

Èkwo
Azáya
Onye Mpfuchiru Chileke

¹ Ọwaa bụ ọphulenyia iphe, e-me l'alì ndu Jiuda yẹe mkpụkpu Jierúsalem. Onye phuru iya nụ bụ Azáya nwa Emọzu. Teke ọ phuru iya bụ teke ndu-a bụ eze ndu Jiuda, bụ iya bụ Uzáya; Jiótamu; Éhazu; yẹe Hezekáya.

Chileke abarụ ndibe iya mba

² Gube igwe; nụmakwa! Gẹ gube alì ngabekwa nchì; kẹle Chipfu pfluakwaru opfu. Ọ sụru-a: “Mu hewaru unwegirima mu; mee phẹ metsee; tẹme ephe gbẹ bya ekwefuru mu ike. ³ Eswi makwaru onye nwe iya nụ. Nkapfụ-igara bya amaru iphe, onye nwe iya nụ eyejeru iya nri; obenu lẹ ndu Ízurẹlu ta adudu ọphu ephe maru; mbụ lẹ ndu ono, bụ ndibe mu ono bẹ iphe edoduru ẹnya.”

⁴ Oowaa! Unubẹ ọha iphe-ẹji-a! Unubẹ ndu ẹjo-iphe jiru ẹhu-a! Eri ndu ẹjo-ememe-a! Unwegirima urwualia! Ndu-a gwobewaru Chipfu. Ephe ta agubeduru Onye nsọ kẹ ndu Ízurẹlu iphe; ephe woru azụ ghaaru iya. ⁵ ?Dẹnu g'o gude e je a-nụ unu aphụ ọzo? ?Bụ gụnu meru g'o gude unu kwẹe ẹka l'ekwefuru Chileke ike? Ishi bụkotawa unu ọnyá ọnyá; tẹme meji nọdu ebuhwaa unu ebuhu. ⁶ E -shikpọo l'ichirupfu-ọkpa unu jasụ l'echi ishi unu ta aduedu ẹka iphe te emedu unu. Iphe, dụkota iya nụ bụ igbiri-echachi; mẹkpoo ọnyá; mẹkpoo ẹka alwa unu mee tọtitori, adudu ọphu a sarụ asasa; ọphu ọ dudu ọphu e kechiru ekechi; ọphu ọ dudu ọphu e meberu ọbvụ.

⁷ Alì unu bụwaa ochobu. Mkpụkpu unu bụru iphe, ọku tsufugbaaru. Opfu, unu kọru bẹ ndu ọhozo nọ l'iphu unu eripya. Ọ dabyiru karaphongu g'ẹka ndu ọhozo lwuru. ⁸ E woru ada Zayonu ono togbọ okorobo gẹ nwa m̀kpù, a tũru dobe l'opfu-vayĩnu; gẹ nwulo-ẹgu, a kpuru l'ẹgu akpuru-eli; gẹ mkpụkpu, ndu ọhogu iya nọ-pheru mgburugburu. ⁹ Ọ -tọ bụ lẹ Chipfu, bụ Okalibe-Kakọta-ike haru haphodoru anyi nwanu ọphu phoduru nu; mẹ anyi aduẹpho gẹ mkpụkpu Sodomu; mbu-a; anyi gege aduẹpho gẹ mkpụkpu Gómóra.

¹⁰ Unu nũmakwa Opfu Chipfu; unubẹ ndu-ishi ndu Sodomu! Unu ngabekwa nchi nũma ekemu, Chileke anyi tũru; unubẹ ndu Gómóra! ¹¹ Ọ sũru-a: “Ọ tọ duedu iphe, mu gũberu ikpoto ngweja, unu anoduje egwe anu mu. Ebili ono, unu akpoje ọku nu mu ono; yee eba-anu unu ndu ọphu kachaa ree; jwakwaru mu ẹpho jigharu mu iya ẹka. Mee eswi; yee ke nwatũru; yee k'eghu te emejeekwa g'iphu tũsahu mu. ¹² G'unu abyajẹ l'iphu mu; ?bu onye asuje unu g'unu bya; mbu g'unu byaru mu azotoshiru oma-unuphu? ¹³ Unu ta abyajehewa mu anu iphe, adudu iphe, ọ bu! Ụnwù-isensu, unu akpoje ọku nu mu tũkoakwaru bũru mu ahũma ahũma. Ọbo Ọnwa-ọphúú; mẹ ọbo eswe-atũta-unme; mękpoo ekukọbe, unu ekukọbeje onwunu g'ọ ha; dukotakwa mu ashị. Ọ buẹpho l'ọ tọ duedu ẹjo ndzukọ unu ọphu aduadaa mu ashị. ¹⁴ Ọbo-ọnwa-ọphúú, unu anoduje abọ; mękpoo ọbo-iphe unu ọzokpo, bũ ndu ọphu geru egeru dukotakwa mu ashị. Ẹphe tũkowaru anyi mu ẹrwa. Mu tanyawaru iya nshi; ike bvũwa mu.

¹⁵ “G'unu achị-lije ẹka epfu anu mu-a bẹ mu ewofu-jekwa ẹnya l'ẹka ono. Unu -pfuru nu mu nta pfua imo; mu ta angadu nchi; kele ọchi nọ unu l'ẹka. ¹⁶ Unu jenu asachaa onwunu; mee onwunu g'unu gbuchafu! Unu

wofunu ẹjo-ememe ono, unu eme ono l'iphu mu! Unu hanaa eme ẹjo-iphe! ¹⁷ Unu nwunaa eme iphe, dū ree! Unu chonaa ikpe, p̄furu nhamunha! Unu ahūa ndu eme ndu ọzọ ewere ahūhū! Unu gbajenuru nwogbee, enwedu nna ọdzori! Unu agbachitajeru nwanyi, ji iya anọedu ndzū!”

¹⁸ Wakwa iphe, Chipfu epfu baa: “Unu byanu g'anyi chija idzū; g'idzū anyi tuko wua nanu! iphe-ẹji unu - dūchakpoonu ẹji eke uswe-uswe bẹ oo-mechaa chaahaa pemu pemu g'aka-mini-sunoo. Teke ọ bụ l'ooke gbog-bogbo g'uswe bẹ oo-mechaa chaahaa phuuphuu g'oghu ọchaa. ¹⁹ Ọ -būru l'oohe unu ihee; tẹme unu nọdu emeje iphe, a sūru g'unu mee bẹ unu e-rikwa iphe, kachaa ree, shi l'alī-a. ²⁰ Obenu teke unu jikaru bya ekwefu ike bukwa ogu-echi bẹ a-sujashi unu. Nokwa iphe, shi Chipfu l'onu bụ ono.”

Jierúsalem ọmu bụ mkpukpu, eme iphe-ẹji

²¹ Lewarọ gẹ mkpukpu ono, e shi gude ọka ono byaru bya aburu ovuoba! Mbụ mkpukpu, dūru teke buepho ikpe, p̄furu ọto bẹ e shi anọduje iya ekpe; mkpukpu, apfubekoto shi buru eburu l'ime. Nta-a bẹ ọ bụwaa ndu egbu nemadzū bu iya. ²² Mkpola-ọchaa, i shi nweru bụwaa nshī-mkpola. Eguru m̄e ngu ono bụwaru iphe, e gude mini gwanyishia. ²³ Ndu-ishi l'ime ngu bukotawa ndu kwefuru Chipfu ike; bya aburu ndu ẹphe lẹ ndu-oshi gba l'ogbo. G'ẹphe ha yeru ẹnya l'eri uphalazu. Tẹme ọ burerupho g'a nū phẹ; l'aduje phẹ ree. Onye enweedu nna bẹ ẹphe ta agbajeduru ọdzori; ọphu ẹphe angajedu nchī l'opfu ẹhu nwanyi, ji iya anọedu.

²⁴ Noo g'o gude Nnajiuphu; mbụ Chipfu, bụ Ọkalibe-Kakota-Ike; mbụ Ọkalibe kẹ Ízurẹlu pfua sū: “Ihee; gẹ mu bya emee ndu mu l'ẹphe dū l'ukukanyi iphe; gude

dúá onwomu obu. Gẹ mu bya egude ndu ọhogu mu gwata ụgwọ iphe l'onwomu. ²⁵ Gẹ mu bya adaa unu ẹka kẹ njo. Gẹ mu bya ahụchafuchaa nshị-mkpọla ono, a gwakọberu unu ono rengurengu; bya atuko ẹrwu, dū unu l'ẹhu rwushia. ²⁶ Mu e-dophuchaa ndu-ikpe unu azu g'ẹphe dū g'ẹphe shi dū teke ndiche. Mu emee ndu akpọ-zijeru unu ụzọ g'ẹphe dū g'ẹphe shi dū lẹ mbu. E-mechaa l'aawata unu eku mkpukpu, pfulerekoto; mkpukpu, e gude ẹka.”

²⁷ Mkpukpu ono, nọ l'eli úbvú Zayonu ono bẹ ee-gude ikpe, pfuluru ọto gbafuta. L'e gude apfulbekoto gbafuta ndu izimanu lwaru azu lẹ mkpukpu ono. ²⁸ Obenu lẹ ndu kwefuru Chipfu ike; mẹ ndu iphe-ẹji bẹ aa-tuko tsupyashia. Teme iphe, bukpo ndu gwọberu Chipfu abukotaru ọla-l'iswi.

²⁹ Achị ono, aasogbaa nsọ ono e-mechaa mee unu iphe-iphere; g'ọ bu iya bẹ unu yeru ẹnya-a; mbu lẹ mgbabu ngweja ono, unu hotaru ono e-mechaa tu unu ẹberebete; ³⁰ kele unu e-mechakwaa dū g'achi, laru ẹkwo; mbu g'opfu, a koru l'eka mini adudu. ³¹ Ndu shihuru ike e-mechaa dū g'ẹphuuruu. Ozi, ẹphe jeru abukotaru ẹkoroku; kele ẹphenebo a-tuko kekota oku; ọphu ọ dudu onye suru agbanyị oku obu.

2

Ẹhu-guu ojejoje

(Mayi 4:1-5)

¹ Owaa bu ọphulenyaa,
Azáya nwa Emọzu phuru l'ẹhu
ndu Jiuda yee ndu Jierusalẹmu.

² Su-a; o -rwua teke ikpazu
bẹ ee-me g'eli úbvú ono,
a kpuru eze-ulo Chipfu
ono nguru anguru;

mee ya g'ò bụru eze l'ẹka
 iphe,
 bụkpoo úbvú ọzo nọgbaa.
 Mbụ l'ee-me iya g'ò kakọta
 úbvú ọzo l'eli.
 Noo teke ọhamoha a-nọdu
 awụ awụ-pfu iya.
³ Ikpoto nemadzụ a-bya bya asụ:
 “Unu bya g'anyi je l'eli úbvú
 kẹ Chipfu!
 Unu g'anyi je l'ụlo Chileke
 kẹ Jiékọpu!
 Ọo ya e-zi anyi ụzo iya;
 k'ọphu anyi a-wata
 etso ụzo, ọ tọru.”
 Noo kẹle ekemu e-shi l'úbvú
 Zayọnu futa;
 mbụ l'opfu Chipfu e-shi lẹ
 mkpụkpu Jierúsalem
 bya.
⁴ Ọo ya e-doshi opfu,
 dughbaaru ọha yẹe ọha
 ibe iya.
 L'ọ bya edoshiaru ikpoto
 nemadzụ opfu,
 duru phẹ nụ.
 Ephe e-woru ogu-echi phẹ
 kpụkwaa l'ọ bụru ọgu;
 woru arwa phẹ kpụa
 l'ọ bụru nwa mma,
 e gude akọcha iphe.
 Ọ tọ duedu ọha,
 a-patakwalu ogu-echi

ejepfu ọhozo ọgu;
 ọphu ẹphe anwụedu alwu
 ọgu ọzobaa.

⁵ Unubẹ ọnu-ulo Jiékọpu;
 unu byanụ g'anyi tsoru
 ìphóró ọphu Chipfu
 nwụberu anyi.

Eswẹ kẹ Chipfu

⁶ Ị jikawaru ndibe ngu ono; mbụ ọnu-ulo Jiékọpu onoya; kẹle ọmamanshi ndu shi ụzo ẹnyanwu-awawa jiru iya ejiji. Teme ẹphe nọdu agba ẹja gẹ ndu Filisi-tayinu. Ẹphe lẹ ndu ọhozo je akua ọkpa. ⁷ Alị phẹ bụ iphe, jiru iya nụ bụ mkpọla-ọchaa mẹ mkpọla-ododo. Ọphu ẹku phẹ abvudu abvubvu. Alị phẹ bụ iphe, jiru iya nụ bụ inya; ọphu ụgbo-inya phẹ abvudu abvubvu. ⁸ Alị phẹ bụ iphe, jiru iya nụ bụ nshi nshi; ọ bụru iphe, ẹphe abarụ ẹja bụ iphe, ẹphe gude ẹka phẹ gẹdegede mee.

⁹ Noo g'o gude e jee ewoze nemadzụ alị. Mbụ l'amadu bẹ ee-me g'o rwua alị. B'a gụkwaru phẹ nvu!

¹⁰ Gbanuru laa l'agbara-mkpuma! Je je edomia onwongu l'ime alị; kẹle ìitsu Chipfu ebvu; teme akpabiri iya nọdu eye ngu ebvu! ¹¹ Onye etu onwiya ẹpha bẹ ee-mechaa mee g'ẹnya lwa. L'e mee gẹ ndu etse etsetse phuru yoo. Ọ bụru Chipfu kpoloko bụ onye ee-kutse m'o -rwua mbọku ono. ¹² O nwekpọerupho ujiku lanụ, Chipfu, bụ Ọkalibe-Kakọta-Ike doberu iphe, bụkpoo ndu eku onwophẹ yẹe ndu akpa nggangga; bya edobekwaru iya phọ ndu ekutse onwophẹ. Ọo mbọku ono bẹ ee-kuze phẹ alị. ¹³ Mbọku ono bẹ e doberu iphe, bụ oshi sida, nọ l'úbvú úbvú Lébanonu, bụ oshi, tsekọtaru agbaragba bya ajaa àjàjà; bya edobekwaru iya phọ iphe, bụkotakpoo achi, nọ l'alị Beshanu; ¹⁴ bya edoberu iya úbvú úbvú,

hagbaa ephekerephe ephekerephe; mē obvu, ha l'eli l'eli.
¹⁵ O doberu iya iphe, bukpoo oje, hagbaa ephekerephe;
 mēkpoo igbulọ, a kpūshiru ike; ¹⁶ mēkpoo ụgbo-mini
 ndu Tashishi g'ọ hakọta; mēkpoo iphemiphe, e meru;
 ọ nọdu ama mma. ¹⁷ Onye etu onwiya ẹpha bẹ ee-
 me g'ẹnya lwa. L'e mee gẹ ndu etse etsetse phuru yoo.
 Ọ buerupho Chipfu kpoloko bẹ ee-kutse mbọku ono.
¹⁸ Nshi ta adụedu adụdu ophu kpọ.

¹⁹ Mbọku ono bẹ nemadzụ a-gbaru laa l'ogba, nọ
 l'agbara-mkpuma; gbaru laa l'enu, a tūru l'alị; kẹle ẹphe
 atsụ Chipfu ebvu; tẹme akpabiri iya nọdu eye phẹ ebvu
 teke ono, ọo-gbalihu gẹ ya nmaghua mgboko l'ophu
 anmaghu ono. ²⁰ Mbọku ono bẹ nemadzụ a-chiru nshi
 ono, ẹphe gude mkpọla-ọchaa mē mkpọla-ododo mee
 dobe agwa agwagwa ono chiru phekaaruru anụ, bu molu
 yẹe ụtsu-nwankuta. ²¹ Ẹphe a-gbaru laa l'ẹka agbara-
 mkpuma gbaru ụwa; mēkpoo l'ime ogba, nọgbaa l'eli
 úbú; kẹle ẹphe atsụ Chipfu ebvu; tẹme akpabiri iya
 nọdu eye phẹ ebvu teke ono, ọo-gbalihu gẹ ya nmaghua
 mgboko l'ophu anmaghu ono.

²² Hanaa akpọru obu yeru nemadzụ; kẹle mkpakọ
 iphe, o nweru bu unme, ọotu l'imi. ?Bu gūnu ọzo bẹ
 oo-mefuba ọnyá?

3

Ikpe, dūru ndu Jierúsalemuru yẹe ndu Jiuda

¹ Sụ-a; lekwa lẹ Nnajiuphu, bu Chipfu; bya aburu
 Okalibe-Kakọta-Ike abyakwa anafu ndu Jierúsalemuru;
 yẹe ndu Jiuda ẹka iphe eshije erwu phẹ ẹka. Ọoby
 phẹ anafu ẹka ẹphe eshije akpata nri; mē ẹka ẹphe
 eshije ekuta mini-angugu; ² nafu phẹ ndu ike du; mē ndu
 ojogu; nafu phẹ ndu-ikpe; mē ndu mpfuchiru Chileke;
 nafu phẹ ndu agba ẹja; mē ndu bu ọgerenya; ³ nafu phẹ

ndu-ishi ndu ojogu; me ndu nweru okwa; nafu phe ndu mgbazi; me ndu maru eme ona; mekpoo iphe, bu ndu agba eja doru enya. ⁴ Mu e-me g'ọ buru unwokorobyia, a-buru ndu-ishi phe; mbu l'oo ndu angukwadu era a-bujeru eze phe. ⁵ Ndiphe a-wata akpa nwibe phe ehu. Onyenonu l'oodaru yee nwibe iya; obutobu yee obutobu iya aduru l'opfu. Unwu-ogbo-lanu etso ndu bu ogerenya opfu. Ndu adudu iphe, ephe bu etsokwapho ndu aakwabẹ ubvu opfu.

⁶ A -nonyaa; nemadzụ azụ nwanna iya gburumu; mbu onye shi l'ibe nna iya; zụ iya gburumu sụ: “Ọo ngu a-buru ishi anyi eshinu i nweru uwe nwilile. Ọ buru ngu maru g'ii-me mekota ọla-l'iswi-a.”

⁷ Noo teke onye ono a-rashi sụ: “Waawakwa-o! Mu ta asukwa iya emekota. Mu te enwekwa nri; ophu mu enwekwa uwe, eeye l'ehu. Unu te emekwa mu onye-ishi ndu ndu-anyi-o!”

⁸ Ọ buru iphe, kparu iya nu bu le ndu Jierusalemu be upfu duru l'okpa. Mbu le ndu Jiuda adawaa iko. Iphemiphe, ephe epfu epfufu; yee iphe, ephe emekota ememe tukoru buru emeswe Chipfu; mbu aturwuepho atatiphu Chipfu ono, egbu nwiiwii ono. ⁹ G'iphu gbaru phe bukpoada iphe, agba phe ekebe. Ephe nodu anoduje asa iphe-eji phe asasa ge ndu Sodomu. Ophu ephe edomidu iya edomi. Nshio phe! Noo kele ephe gudewaa aka phe setaru onwophe eze iphe-ehuka.

¹⁰ Karu onye pfuberekoto l'oo-duru iya le ree; kele ooripuru, eme oma iya mitaru. ¹¹ Nshio ndu ejo-iphe; kele ephe a-lakota l'iswi. Aa-pfu phe ugwo iphe, aka phe metaru.

¹² Ndibe mu bu unwokorobyia akpa phe ehu. Teme o buru unwanyi bu ishi phe.

Su-a; ndu mu! O kwa ndu edu unu ụzo gude unu ephu ụzo. Ephe duru unu haa ụzo shiahaa ophu abudu ụzo.

Ikpe, Chipfu e-kpe ndibe iya

¹³ Chipfu nọakwa l'eka o-o-nodu kpee ikpe l'ulo-ikpe. O gbalihuwaru pfuru ge ya kpee ndiphe ikpe. ¹⁴ Chipfu watawaru ekpe ndu bu ogerenya ikpe; waa ndu-ishi ndibe iya su: "O kwa unu mebyishiru opfu-vayinu mu. Iphe, unu gwetaru l'ibe ndu ukpa kukwaru l'ibe unu. ¹⁵ ? Denu g'o gude unu gwee ndibe mu arakabya; bya egwee iphu ndu ukpa rwukuru rwukuru? Noo iphe, Nnajiuphu epfu; mbu Chipfu, bu Okalibe-Kakota-Ike."

Okwa, aanmaru unwanyi Jierusalemu

¹⁶ Chipfu suru-a: "Unwanyi, bu l'ubvu Zayonu kunukakwaru onwophe. Ephe abujeru; ephe -nodu eje ije ephe eworu olu ngakobe alo enya vaavaava; to nwehu eje degengu degengu degengu; azo iphe, ephe gba l'okpa jogongu jogongu. ¹⁷ Noo g'o gude Nnajiuphu je l'eworu ekpa-ebyi ghaa unwanyi, bu l'ubvu Zayonu l'ishi. Mbu le Chipfu e-me g'ishi chaa phe swarishwari."

¹⁸ Mboku ono be Chipfu a-nashichaa phe iphe, ephe gude ama mma; mbu iphe obu, a zuru phe jogoro-jogoro obu; me ophu ephe gude kechita ishi; me iyagba, ephe tukporu l'olu; ¹⁹ mekpoo iphe-nchi; me iphe-eka; me ophu e gude ekpuchi iphu; ²⁰ iphe, e gude edozi egbushi; me iyagba-ishi-ikpere; me olokpo, eeswe l'upfu; me ekpemu manu, eshi mkpo; me nwanshi phe; ²¹ echi, ephe agba le mkpushi-eka; me ophu ephe eye l'imi; ²² eguru uwe kpowula-kpowula phe; me ukpo phe; me ekwa achichi phe; mekpoo nweda okpoga phe; ²³ me onyo phe; me nweguru uwe ocha ephe eyeje l'ime eh; me ekwa, ephe agbaphuje l'ishi; me ophu ephe ajikobeje l'ukuvu.

²⁴ Noo g'òo-dù; teke ẹphe gege anòdu ete iphe, eshi mkpò; ẹphe eshiaha ishi. Teke ẹphe gege edo onwophẹ ọlokpo l'upfu; ẹphe ekebechia onwophẹ eri. Teke ẹphe gege enweru ẹgbushi, ama ntumatu; ẹphe akpùshia ishi akpùshi. Teke ẹphe gege eye uwe, ama ntumatu; ẹphe eyechia uwe-aphù. Mma ono, ẹphe shi ama ono aghakọbe bụru iphe-iphere.

²⁵ Unwoke unu bụ ogu-echi bẹ ee-gude gbushia phe. L'a tuko ndu ojogu unu gbushia l'ogu. ²⁶ Onu-abata Jierúsalemù echia mkpu ẹkwa gụa aphù anwùhu. Mbù lẹ Jierúsalemù a-dù gẹ nwanyị, gba ẹka nwa; gwòdoshihu l'alì.

4

¹ Ọzo bụ l'o -rwua teke ono bẹ unwanyi ẹsaa a-wụ-pfutajẹ nwoke lanù sù iya: “Jiko nafunu anyi iphere ọwa-a! Hanaa g'ò bụru-a l'anyi a-zarù laaru ẹpha ngu. Anyi a-nòdu-a azù onwanyi lẹ nri; anmarù onwanyi ẹkwa.”

Eedophu Jierúsalemù azù l'ònodu iya

² O -rwua teke ono bẹ onye ono, bụ ẹkali Chipfu a-nòdu ama ntumatu; tẹme l'ò dukwapho akpabiri. Mebyi iphe, amishi l'alì a-bùru iphe, ẹphe e-gude eku onwophẹ; bụru iphe, ẹphe e-gude dù ùbvù l'ẹnya; mbù nwa ndu ọphu phòduru nù l'alì ndu Ízurelu. ³ Nwa ndu ono, phòduru l'ùbvù Zayonu ono; mbù nwa ndu ono, phòduru lẹ Jierúsalemù ono bẹ ee-kuje ndu dù nsọ; mbù ndu e deru ẹpha phe lẹ ndu dzù ndzù lẹ Jierúsalemù. ⁴ Ọ bụru Nnajiuphu a-sachafù inyinyi, dù nwada Zayonu onoya l'ẹhu. Oo-gude unme nkiya sachafù mee, tukuru Jierúsalemù ẹhu; mbù unme ọphu o gude ekpe ikpe bya aburu unme, enwu ọku. ⁵ Ọo ya bụ; Chipfu abya l'ùbvù Zayonu l'ophu; mẹkpoo iphe, bụ ndu ono, edzukọbeje

l'ẹka ono; bya emeta urwukpu, akpụ tụtutuutu doberu phẹ l'eswe; meta ọku, enwu phoophoophoo doberu phẹ l'enyashi; kẹle ẹka ono g'ọ ha bẹ ee-gude ọdu-biribiri Chipfu kpuchia. ⁶ Ọo-buru ikpuka buru ibvù duru phẹ g'okpomọku taa dụ phẹ l'eswe; bya abụkwarupho ẹka ẹphe a-gbabajẹ je anọdu zee ndzụ; yẹ ẹka ẹphe e-domije onwophẹ mẹ igwe -nọdu alwa yẹgeyege mini; yẹ m'ọ -nọdu edze oke mini.

5

Ebvu kẹ opfu-vayinu

¹ Gẹ mu gụa ebvu nụ onye
mu yeru obu.

Mu e-gude opfu-vayinu iya
gụa ya.

Onye mu yeru obu gbaru
opfu-vayinu l'ọsu,
nọ l'ọkpa-úbvú.

² Ọ hazeru iya ahaze bya
atutushichaa ya mkpuma
bya ahọta akpuru vayinu,
kachaa ree kụa ya.

Ọ bya akpụa ụlo-nche
dobe iya;
bya emetakwa iya phọ ẹka
aakụje mẹe.

Ọ nọdu ele iya ẹnya amita
akpuru vayinu, dụ ree.

Obenu l'ọ gbẹ buru ẹjo
akpuru bẹ ọ mītaru.

³ “Ọo ya bụ lẹ-a; unubẹ ndu bu lẹ Jierúsalem; mẹ ndu ọphu bu l'alì ndu Jiuda; unu yeeshikwa ọnu l'ẹhu mu l'opfu-vayinu mu ono. ⁴ Bụ gụnu bẹ mu gege emebaaru

opfu-vayĩnu mu-a, bũ iphe, mu emeadaru; meru g'o gude mu lee ɛnya l'oo-mĩru mu mebyi, dũ ree; ɔ bya amĩ amĩmi bya amĩa ɛjo mebyi.

⁵ “Nta bɛ mu a-karũ unu iphe, mu e-me opfu-vayĩnu mu. Mu a-phokashi iphe, e gude kpɔ-buta iya akpɔ-buta g'iphe mebyishia ya. Mu etsukpɔshia igbulɔ iya haa ya g'a zɔo ya tɔlitoli. ⁶ Mu e-me iya g'ɔ bũru alĩ, a gbadoru agbado. A taa kɔchabaedu iya akɔcha; ɔpɔhu eegbubaɛdu iya ɔgu. ɔo ya bũ g'olekarara; yɛe ɔgara-mbo ezee l'ɛka ono. Mu akaru igwe g'o to dzebaɛkwa mini wũshiru iya.”

⁷ ɔ kwa ɔnu-ulo Ízurɛlu bũ
opfu-vayĩnu ono,

Chipfu,

bũ ɔkalibe-Kakɔta-Ike
gbaru ono.

ɔ bũru ndu Jiuda bũ
iphe ono, ɔ kũru iya ono,
tũbaru iya l'ɛnya ono.

ɔ shi ele ɛnya mgbazi;
ɔ bũchiaru iphe,
ɔ hũmaru
bũ mgbaghashĩ.

ɔ lee ɛnya apfũbekoto;
ɔ bũru iphe-aphũ bɛ
ɔ hũmaru.

Aphũ, Tsɔru ndu Ízurɛlu

⁸ Nshio unubɛ ndu anatajɛ ɔlo yekwa l'ulo unu; nata alĩ onye ɔzo yekwa l'alĩ k'unu; jasũ unu atũko ɛkameka nata buru l'obotɛgu nkĩnyi unu. ⁹ Chipfu, bũ ɔkalibe-Kakɔta-Ike pfuakwaru mu; mu nũma sũ: “Tororo opfu bũ l'ulo, dũ igwerigwe e-mechakwaa dabyiru iphoro. Mbũ l'okoke ɔlo ono, bũgbaa ɛguru ɔlo ono e-mechakwaa

buru ọ́lo, e te budu ebubu. ¹⁰ Ẹ́ka ee-gude eswi iri, a jìgbaberu ẹ́bo ẹ́bo kọ́o ọ́koro ujiku ophu bẹ́ nwa mẹ́e-vayìnu, aa-pyítaje iya e-jijeẹ́pho otumu mẹ́e ẹ́to. Onye kùru mebyi iphe, jiru ogbongu l'ọ́ wọ́ta iya iphe, jiru nkweka kpoloko.”

¹¹ Nshìo ndu etehuje lẹ́ nchi-abọ́hu jeshia achọ́ ẹ́ka ẹ́phe a-ngù mẹ́e; ndu anguje mẹ́e jasù l'echi abalì; mbù jasù ẹ́nya ekee phẹ́ vọ́o l'ẹ́ka ẹ́phe angù iya. ¹² Ẹ́gube ndu ono egudeje une; mẹ́ ogelenda akù l'ẹ́ka ẹ́phe abọ́ iphe. Ẹ́phe egbu opu; aphù ụ́pyi; angùshi mẹ́e. Ọ́le ẹ́phe ta akpadù ishi iphe, Chipfu eme; ọ́phu ẹ́phe akwabẹ́du ozi, o gude ẹ́ka iya jee ùbvù. ¹³ Noo g'o gude e je akpù ndibe mu lẹ́ ndzù; kẹ́le iphe te edojedu phẹ́ ẹ́nya. Ndibe phẹ́, bụ́ ndu nweru ọ́kwa bụ́ ẹ́gu e-mechaa gbua phẹ́. Igwe-ọ́ha phẹ́ a-bùru ẹ́gu-mini a-gù-gbushi phẹ́. ¹⁴ Ọ́o ya bụ́ l'alì-maa bẹ́ ẹ́gu kabawaa agùgu. Ọ́ saẹ́pho ọ́nu kẹ́ gabala ghekahù. Ọ́ bùru l'ime iya bẹ́ ndibe phẹ́, aakwabẹ́ ùbvù a-wùba. Igwe-ọ́ha phẹ́ awùba iya; ndibe phẹ́ ndu aswoje ụ́swo; mẹ́ ndu rigbarigba-mẹ́e a-tùko wùda iya.

¹⁵ Noo teke ee-woze nemadzù alì. Mbù l'amadù ta adùedu iphe, ọ́o-bùkwaduru. Ẹ́nya alwa ndu etse etsetse. ¹⁶ Obenu l'ikpe, pfùru ọ́to ono, Chipfu, bụ́ Ọ́kalibe-Kakọ́ta-Ike kperu ono bẹ́ ee-gude kutsee ya ekutse. Mbù lẹ́ Chileke ono, dù nsọ́ ono e-goshi lẹ́ ya dù nsọ́. Ọ́ bùru apfùbekoto nkiya bẹ́ oo-gude goshi iya. ¹⁷ Noo teke atùru a-ta nri g'ọ́ bụ́ l'ọ́ nọ́ l'ẹ́gu ẹ́ka eecheje iya. Ụ́nwu atùru ataaha nri l'ẹ́ka iphe ndu eze larù l'iswi.

¹⁸ Nshìo ndu egudeje ọ́kpukpu-ẹ́regede akpù ẹ́jo-iphe wuruwuru; tẹ́me ẹ́phe egude ọ́kpukpu-eswi akpù iphe-ẹ́ji. ¹⁹ Nshìo ndu ono, asùje: “Gẹ́ Chileke menaa ẹ́gwegwa mee iphe, ọ́o-dù ike mee g'ẹ́phe hùma! G'o rwukpọ́naa!

G'iphe obu, Onye Nso ke ndu Ízurelu tũberu ememe obu mekpõnaa g'ephe maeduru iphe obu!"

²⁰ Nshio ndu ewojeru ejo-iphe kua iphe, du ree; woru iphe, du ree kua ejo-iphe. Ndu ewojeru ochii dochia enya iphoro; woru iphoro dochia enya ochii. Ndu ewojeru iphe, atso ilu dochia enya iphe, atso utso; woru iphe, atso utso kua iphe, atso ilu.

²¹ Nshio ndu edobesuje l'ephe maru iphe; dobesukwapho l'ephe kwaru enya.

²² Nshio ndu bu iphe, e gude maru phe bu angu mee. Teme o buru phe be angu ngwaragwa mee wukoru; ²³ mbu ndu ewehaje onye-ikpe nmaru opfu l'o nuru phe iphe-uphalazu; bya anafu onye iswi du mma ikpe, pfuru oto, e gege ekpe iya. ²⁴ Oo ya bu le-a; o kwa g'ire-oku erichaje ekperema okponku erichaa; eswa okponku alaa pyete l'oku, enwu phoophoophoo-a; nokwa g'ogbarabvu phe e-repyahu; okoko phe etsua duu g'urwuku; kele ephe jikaru edobe ekemu, o turu; mbu Chipfu, bu Okalibe-Kakota-Ike. O buru opfu Onye Nso ke ndu Ízurelu ono be ephe gburu tũphee. ²⁵ Noo g'o gude ehu nodu eghushi Chipfu egu ike l'iphe, ndibe iya meru iya. O wolia eka chia phe gbaa; chikata phe tua. Eli ubvu nodu anma jiiijiii. Odzu phe dakaa popoo l'oma gbororo. O duchakpoo nno; ehu nodu eghule iya-a egu g'ooghu iya; o pali-ele-a eka g'o paliru iya.

²⁶ O bururo oha, noro uzanya uzanya be o paliru ekwa-ohubama; mbu o bururo ndu no l'eka mgboko jeberu be ookporu okwe. Ephe shi l'eka ono ezi taphutaphu agba abya. ²⁷ Ophu o dudu g'ephe ha g'o ka mma l'oo onye lanu, ike oso bvuru; ophu o dudu onye ophu mgbenya rweru; ophu o dudu onye mgbenya turu; ophu o dudu onye ophu akpo, o keru l'upfu to-woru atwo l'upfu; ophu o dudu onye ophu eri akpokpa iya

gbabuhuru. ²⁸ Apfụ phẹ tųpyichaa zinguzingu. Ụta phẹ g'ẹphe ha g'okobechawaa rengurengu. Nzokpa ịnya phẹ nọdu egbunwutajechaa oku. Okpa ụgbo-inya phẹ nọdu ezichaa phaaphaaphaa g'oke pherephere. ²⁹ Ọrà, ẹphe ara dụ g'ẹka oduma asụ ekiri. Mbụ l'ẹphe agbọ ụja gẹ nwada oduma; ẹphe nọdu asụ kọroro, anyapyashi ndu dụwaa gẹ nri phẹ; apatajẹ phẹ rọ tųgbua; ọ tọ dudu onye agbaru phẹ mkpu.

³⁰ Mbọku onọ bẹ ẹphe a-tụ uzu kpua ya g'ẹka mini agba gborogboro. Onye ọpflu pazetaru ẹnya lee l'alị onọ; ọobuerupho iphe, ọo-huma bụ ọchii yẹ mkpamẹhu; mbụ l'iphóró bẹ urwukpu e-mechaa l'ọ gbahụ ọchii.

6

Ozi Azáya

¹ L'apha eze, bụ Uzáya nwuhuru bẹ mu humakwarupho Nnajiuphu l'ẹka ọ nọ l'aba-eze; ọ nọdu ephekerephe; bya aburu onye e kutseru ekutse. Teme igburonu uwe iya tuko eze-ulo Chileke onọ l'opflu sweta. ² Ndu nọ iya l'eli buru unwu-ojozi-imigwe, bụ serafu; g'ẹphe ha fuchaa nkù ishii ishii. Nkù labọ bẹ ẹphe egudeje kpuchia iphu phẹ; ẹphe egude ẹbo kpuchia okpa phẹ; bya egude ẹbo ephe ephephe. ³ Ẹphe nọdu epfugbaa anụ nwibe phẹ asuje:

“Nsọ! Nsọ! Nsọ! Chipfu,

bụ

Okalibe-kangokotaru-nụ

dụ nsọ!

Mgboko l'opflu bẹ akpabiri

iya jiru!”

⁴ Ẹphe -pfua opfu onọ; itso, gude eze-ulo Chileke l'opflu angakota anganga. Ẹnwuru-oku abya ejiẹpho ẹka onọ kẹ pyimu!

⁵ Tòbodu iya bụ; mu sụ: “Nshio mu! Ephuhu mu. Noo kẹle mu bụ onye ọnu-urwu; tẹme mu buru l'echilabọ ndu ọnu-urwu; tẹme mu bya egude ọnya mu hụma onye eze ono, bụ Chipfu ọphu bụ Ọkalibe-Kakọta-Ike!”

⁶ Tòbodu iya bụ; onye lanụ l'ime serafu ono bya ephepfuta mu. Ọ bụru iphe, o gude l'ẹka bụ icheku-ọku, ọku dū. Ọ bụru ákpà bẹ o gude kpátá ọku ono l'ọrungwẹja Chileke. ⁷ O woru icheku-ọku ono daa mu l'ọnu; bya asụ mu: “Lenụ; a daakwaru ngu ọku l'ọnu. Nta-a bẹ e nwefuakwaru ngu ụta, shi dūru ngu nụ; tẹme a pfulwa ụgwọ iphe-ẹji ngu l'ophu.”

⁸ Noo teke mu nūmaru olu-opfu Nnajiuphu l'ẹka oopfu sụ: “?Bụ onye bẹ mu e-zi ozi? ?Bụ onye e-jeru anyi ozi?”

Mu sụ: “Wakwa mu! Zia mu iya!”

⁹ Ọ sụ: “Ngwa; je akaru ndu-a; sụ phẹ lẹ-a: ‘Unu a-nụma nụma nta nụma imo; ọle ọ tọ dudu iphe, edo unu ọnya. Unu elee ọnya nta lee imo; ọle ọ tọ dudu iphe, unu a-hụma.’ ¹⁰ Mee ndu-a g'ọkpoma nmaa phẹ agbadagba. L'iimee gẹ nchị nyị phẹ ẹrwa. L'iimee g'ọnya nyihu phẹ. Ọdumeka bẹ ẹphe e-gudekwa ọnya phẹ hụma; gude nchị phẹ nụma; gude ọkpoma phẹ nwuta iphe; dakọbe bya l'eemee g'ẹphe wekọrohu.”

¹¹ Mu bya ajịa sụ: “Jiko Chipfu; ?bụ teke ole bẹ ọo-duberu nno?”

Ọ sụ: “Ọo-dū nno jasụ mkpụkpu ono adabyiru bụru ochobu. Ọ tọ dūedu onye e-buru iya nū; jasụ ụlo atụko bụru okorobo ụlo, adūdu onye bu iya nū. Alị emebyishihu bụru mkpọkoro alị. ¹² Sụ-a; ọo-dū nno jasụ teke yẹbe Chipfu e-me g'onjemonye laa ẹka dū ọnya. L'aaparū alị l'ophu tọgbo iphoro. ¹³ Sụ l'a makwarū-a l'oke-lanū-l'uzo-iri a-phodu lẹ ndu alị ono. Ọle ọ kwaphọ e -mechaa; ẹphe aburu mkpurupyata. Ọle ọ bụ; ọo g'eegbutsuje oshi achị; ọzoo oshi akpūrata; upfu

iya akwaa l'alì-a; bụ g'oo-mecha nweru nwa ndu a-phọdu nụ l'ime oshilọkpa Ízurẹlu, bụ ndu a-duru mụbe Chipfu nsọ.”

7

Ozi, Azáya ziru eze, bụ Éhazu

¹ Teke Éhazu bụ eze ndu Jiuda; mbụ Éhazu ono, bụ nwa Jiótamu; Jiótamu bụru nwa Uzáya; ọ bụru teke ono bẹ Rezinu, bụ eze ndu Arámu; yẹle Peka nwa Remalaya, bụ eze ndu Ízurẹlu wụ-lihuru je etsoo ndu Jierúsalemụ ọgu; ọphu ẹphe adụdu ike lwụ-kpee phẹ.

² Tọbudu iya bụ; e pfiaru iya ndu ọnu-ulo Dévidi sụ phẹ: “Ndu Arámu bẹ ẹphe ẹ ndu Ifuremu jeakwaru atugba nanu.” Opfu ono mee; obu teahaa Éhazu yẹle ndibe iya ophe; g'ẹka pherephere enwunga oshi, bvuru l'ẹgbudu.

³ Noo ya; Chipfu bya asụ Azáya: Lụfu g'unu ẹ nwa ngu, bụ Sheya-Jiashubu swịru jepfu Éhazu l'ishi mgba-mini Okpuru-uzo-imeli; mbụ l'uzo ono, eeshije eje l'ẹgu Ọsa-ipe ono. ⁴ Sụ iya: “Tọkwa ẹhu; dobekwa onwongu doo; ọphu i tsukwa ebvu. G'ọ tọ bụkwaru nwa icheku-ọku labọ ono, anyihu anyihu ono l'e-me g'obu phefu ngu; mbụ nwa hanyihanyi, ẹphe aba; mbụ Rezinu; yẹle ndu Arámu; waa kẹ nwatibe Remalaya; ⁵ kẹle ndu Arámu; yẹle ndu Ifuremu; yẹle nwatibe Remalaya chiakwaru ẹjo idzu g'ẹphe e-shi mebyishia ngu. Ẹphe sụru-a: ⁶ ‘G'anyi je alwuta ndu Jiuda l'ọgu. G'anyi je atukaa phẹ nanunanu; woru keeru onwanyi. Anyi eworu nwatibe Tabẹlu dobe g'ọ bụru eze, l'ẹka ono.’

⁷ “O bekwanu ẹ Chipfu, bụ Ọkalibe-Kakọta-Ike sụru l'ọ tọ byadu anwu nno! L'o too medu ememe ophu.

⁸ ?Tọbudu Damasukosu bụ ishi mkpukpu ndu Arámu;

onye bụ ishi ndu Damasukosu bụru Rezinu? A -bya anọo ukporo apha eto l'apha ise be ee-gwe ndu Ifuremu arakabya; k'ophu ephe ta asueduru aburu oha eka phe. ⁹ Su-a; ?to bụdu Samériya bụ ishi mkpukpu ndu Ifuremu; onye bụ ishi ndu Samériya bụru nwatibe Remalaya? I -pfuduru pfushia ike l'iphe, i kweru be ii-mechakwaa; i tii pfuduru apfuru ophu.”

Iphe, abyabya Imanelu egoshi

¹⁰ Chipfu gbeshikwa ozo bya asu Éhazu-a: ¹¹ “Pfuaru Chipfu, bụ Chileke ngu g'o mee iphe-ohubama goshi ngu; m'obeta o -buru l'eka du omilomi g'alī-maa; ozoo l'ephekerephe eka kachaa ephekerephe.”

¹² Éhazu sukwanu: “Mu te epfukwa. Mu te ejekwa ahụ Chipfu ama.”

¹³ Noo ya bụ; Azáya su: “Unu ngabekwa nchi; unube ndu onu-ulo Dévidi! ?Nemadzụ, unu anoduje egburwashị ehu ono teke asuduru unu? ?Unu eme g'unu watafua egburwashị Chileke mu ehu too? ¹⁴ Noo g'o gude Nnajiuphu l'onwiya je l'eme iphe-ohubama nu unu. Le nwamgboko yee nwoke teke akwaswee a-tsuta ime nwua nwa nwoke; teme l'o gua ya 'Imanelu', bụ iya bụ 'Chileke no swiru anyi'. ¹⁵ Iphe, oo-nodu eri bụ manụ, e meru l'era-eswi; yee manụ-enwu; me o -maerupho iphe ree k'ophu oo-jikaje ejo-iphe hata iphe-oma. ¹⁶ Ole o -betashia teke nwata ono a-maru iphe ree k'ophu oo-jikaje ejo-iphe hata iphe-oma; ali ndu eze labo ono, iitsu ebvu ono a-bukotawaru ochobu.

¹⁷ “Chipfu dobeakwaru teke unu eje iphe-ehuka; ndibe unu ejee iphe-ehuka; ndu onu-ulo nna unu phe ejekwapho iphe-ehuka; mbu egube iphe-ehuka, adudu odu-g'oo-ya, dujeru nu; e -shi ge ndu Ifuremu shichaa le

ndu Jiuda bukafu. Ndu oo-gude bya ọgu ono bu eze ndu Asiriya.”

¹⁸ O -rwua teke ono be Chipfu e-ku shishishi phekuta ijiji, shiro l'ohu enyimu Ijiputu bya ephekutakwapho enwu, shi l'ali ndu Asiriya. ¹⁹ Ephe atuko bya akuru le nkwagbo nkwagbo mkpoda-obvu; me le mgbaka mgbaka agbara-mkpuma; tuko egbudu, obvu du sweta; bya atuko ogba, mini aduje kujia.

²⁰ O -rwua mboku ono be Nnajiuphu e-gude akiriko, o nataru l'azu enyimu Yufuretisu; mbu eze ndu Asiriya; gude kpu unu ishi; kpu unu eji okpa; bya akpukwapho unu eji-agba.

²¹ O -rwua mboku ono be onye lanu a-kutaje nweswi yee egbu labo dobe ndzu. ²² O buru era, a-nodu agbo iya jojojo l'e-me g'onye ono nweru manu, du shii, o-nodu eri, bu manu ophu e meru l'era-eswi. Mbu l'iphe, bukpuo nwa g'ephe ha phodu l'ali ono a-noduepho eri manu, e meru l'era-eswi; yee manue-nwu.

²³ O -rwua mboku ono; iphe, bukpuo eka e shi nweru unu vayinu labo le vayinu ukporo iri, e shi eretaje eka-ego ise buwaa iphe, a-du iya nu bu ogara-mbo yee olekarara. ²⁴ Iphe, nemadzu e-gudeje eje iya a-buru uta yee apfu; kele ali ono l'ophu bu iphe, e-ji iya nu bu ogara-mbo yee olekarara. ²⁵ A -bya l'ubvu ubvu ono, bu eka e shi egudeje ọgu akọ akọko; nemadzu ta aduedu ike eye iya ishi; kele ogara-mbo yee olekarara a-tuko iya sweta. L'o buru eka eswi yee aturu a-nodu awu-phe.

8

Ndu Asiriya bu ndu Chipfu gude eje ozi

¹ Noo ya; Chipfu bya asúkwa mu phọ-a: “Wota ẹkwo, eedeje iphe; ẹkwo, dū ọsa dee iphe; gudekwa mkpara-ẹkwo mmanū dee ya. Iphe, ii-de iya bụ ‘Maha-Shalalu-Hashi-Bazu’, bụ iya bụ ‘Eme ẹgwegwa l’okwata; ezi kororo l’iphe onye ọzo.’ ² L’i kua onye uke Chileke, bụ Uráya; yẹle Zekaraya nwa Jieberekaya, bụ phẹ bụ ndu e gude ire phẹ ẹka g’ẹphe bụru ndu ekebe.”

³ Noo ya; mu bya ejepfu nyee mu. Ọ tsuta ime nwua nwa nwoke. Chipfu bya asu mu: “Iphe, ii-gu nwata ono bukwa ‘Maha-Shalalu-Hashi-Bazu.’ ⁴ Kẹle-a; nwata ono -bya amaru eku ‘nnana’ yee ‘nene’ be eze ndu Asiriya byakwaru bya achitakota ẹku ndu Damasukosu yee iphemiphe, ndu Sameriya nweru.”

⁵ Chipfu byakwa bya epfuru yeru mu ọzo su: ⁶ “Eshinu ndu-a jikaru mini ono, aso nwa rima ono; mbu mini Shilowa; bya etechiaru eswa kpua eze Rezinu yee nwatibe Remalaya ⁷ be Chipfu abyakwa agbapyabe phe l’eze utso, e-shi l’enyimu Yufuretisu. Utso ono bu eze ndu Asiriya; yee akpabiri iya l’ophu. Utso ono a-tuko ogba iya l’ophu gbafushihu; bya atuko oma iya sweta; ⁸ soru gborogboro soba l’ali ndu Jiuda; awuchaa ya awuwu; bya awochaaru iya l’ekpiri. Nku iya, o tusaru atusa atuko uswekete ali ngu ono gbarwee; gube Imanelu!”

⁹ Unu chia mkpu ogu; unube ohamoha! G’a chikashikwaa unu achikashi! Unu ngabekwa nchi; unube ndu bu l’eka du enya! Unu dzukobekwa k’ogu; ole aa-chikashikwanu unu achikashi. Su-a; unu dzukobe k’ogu; ole aa-chikashikwanu unu achikashi. ¹⁰ Unu chikpoo idzu g’unu e-me iphe! Ole aa-gbaghashile iya-a. Unu pfua g’unu e-me iya! Ole o todu dudu g’unu pfuru iya. Noo kẹle Chileke no swiru anyi!

Atsu Chileke ebvu

¹¹ Chipfu bya ebyibe mu mkparawa ẹka iya ono bya epfuru yeru mu; lọo mu ẹka ẹ nchị sụ mu gẹ mu te etsokwa ndu-a. Ọ sụ mu-a: ¹² “Iphe, ndu-a sụru l'ọ bụ achị ẹjo idzu; unu b'ekwekwa l'ọ bụ achị ẹjo idzu! Iphe, ẹphe atsụ ebvu; unu ta atsukwa iya ebvu; ọphu unu ejekwaru iya aphuru kparikpari! ¹³ Ọo Chipfu, bụ Ọkalibe-Kakọta-Ike bụ onye unu e-kweje l'ọ dụ nsọ. Ọ bụru iya bụ onye unu a-tsuje ebvu; bụru iya bụ onye unu a-nọduje aphụ kparikpari l'iphu iya. ¹⁴ Teme ọ bụru iya a-buru ẹka e doberu nsọ. Teke a byaru l'ẹka ọnu-ulo Ízurelu ono nọ; ẹphenebo bẹ ọo-buru mkpuma, ee-vukotaje daa iko bya abukwarupho agbara mkpuma, e-meje g'ẹphe daa iko. A -byakwanụ l'ẹhu ke ndu Jierúsalem l'ọ bụru igbudu yee ọnyà, a gbaberu phe. ¹⁵ Ẹphe a-dụ igwerigwe kpọo ya ọkpa. Ẹphe adaa tsukwoshihu; l'a nmakokwaa phe phọ l'ọnyà; kpua phe ẹ ndzụ.”

¹⁶ Iphe-a, mu epfu g'e meje-a bẹ ee-woru kechia ekechi; l'e woru ekemu ono suchia g'ọ kwaru ndu etsoje mu nụ. ¹⁷ Mbẹdua a-nọdu kwabẹru Chipfu; mbụ onye ono, woru iphu iya wohaarụ ọnu-ulo Jiékọpu ono. Ọ bụru iya bẹ mu e-le ẹnya iya.

¹⁸ Wakwa mu baa; mu l'ụnwegirima ono, Chipfu nuru mu ono. Anyi bukwa iphe, egoshi iphe; bya aburu iphe-ọhubama, duru ndu Ízurelu; mbụ iphe, shi l'ẹka Chipfu, bụ Ọkalibe-Kakọta-Ike; bya aburu Chipfu, bu ebubu l'úbvú Zayọnu.

¹⁹ Ndiphe asuje ngu g'i je l'aji l'ibe ndu aphụ ọphulenyà me ndu emeje ọmamanshi; ndu bụ okpurọswa bẹ ẹphe aphuje; teme ẹphe nọdu anọduje epfu l'ime ọnu l'ime ọnu; ?buchia Chileke bẹ e te ejechidaa ajita iphe? ?Denu g'o gude ọ bụru onye nwuhuru anwuhu bẹ ndu dzụ ndzụ ejejechia aji iphe?

²⁰ Tùbe nvọ l'ekemu; yẹle iphe, mu karu g'e meje. Ọ -buru l'ẹphe te epfudu akunyabe opfu ono; Ọo ya bu l'ẹphe taa ahumadu iphoro nchi-abo hu.

²¹ Aphu a-tsuru phe; egu emeshia phe ike; l'eka ẹphe tsoru ali eka ono aghaphe botorii. Teke mbà tueru phe pho; ẹhu agbangahu phe. Ẹphe apalia ẹnya imeli wata ephu onye eze phe iphu; yẹle Chileke phe. ²² Ẹphe abakwa apazeta ẹnya lee le mgboko. Iphe, ẹphe ahuma aburerupho aphu yee ochii, l'a-nodu agba nu yee ragaraga iphe, a-nodu eye phe ebvu. L'e woru phe chie l'eka gbakotaru tsukiribaa.

9

¹ Ọle g'ọ duhabe; e -mechaa be ọ to duedu iphe, adu ragaraga l'ẹnya ndu no l'iphe-ẹhuka. Teke k'ichee be ọ to dudu iphe, a guberu ali ndu Zebulun yee ali ndu Nafutali. Obenu l'o -be l'iphu be aa-kwabẹ ndu bu eze-ẹnyimu ntse ubvu; mbu ndu bu l'azu ẹnyimu Jidanu azu iya ophuu, bu iya bu ali Galili, bu eka ono, ndu ohozo bu ono.

A nwuru anyi nwaswa

² Su-a; ndu no l'ime ochii
humaakwaru iphoro,
paru eka.

Ndu k'ono, bu l'ali ono,
gbakotaru tsukiribaa ono
be iphoro nwuakwaru
ke phorokotokongu.

³ Oha ono be i mewaru;
o ka shii; bya emee;
ehu ka phe atsọ utso.
Ẹphe nodu anoduje l'iphu
ngu ete eswa ge ndu

ete ẹswa ekpu iphe,
 ẹphe metaru l'opfu,
 ẹphe kọru;
 gẹ ndu ete ẹswa l'ẹka
 ẹphe eke iphe,
 ẹphe kwataru l'okwata.

⁴ L'Ọ bu-a g'i meru teke
 i mekperu ndu
 Midiyanu teke ndiche
 phọ bu g'i chikashiru ivu-erwa,
 shi nyipyabe ndibe ngu;
 bya anyakashia mgborigwe,
 e shi swebe phe l'ukuvu;
 yee oshi,
 ndu emekpa phe ehu shi
 gude echi phe echachi.

⁵ Akpokpa ndu ojogu g'ọ ha,
 e gude lwua ọgu;
 mekpoo iphe, bu uwe,
 a rwaphuru le mee be bu
 iphe,
 e doberu k'akpo oku;
 mbu l'oo-du ge nku,
 e gude aphu-nwu oku;
⁶ kele a nwuru anyi nwaswa;
 mbu l'a nuru anyi nwa
 nwoke.

Ọ buru iya bu onye a-buru
 onye-ishi.

Iphe, aa-nodu eku iya bu
 “Onye mkpozi-uzo,
 du biribiri”;
 yee “Chileke,

bụ Ọkalibe-KakỌta-Ike”;
 waa “Nna-ojeje”;
 waa “Onye-ishi,
 eme gẹ nchị dū doo”.

⁷ Abụbu, ọo-buru onye-ishi;
 yẹe nchị-odoo,
 e-shi iya l'ẹka a-nọdu aka
 shii eje ala l'iphu;
 tẹme ọphu ọ byadu
 abvụ abvụbvụ.

Ọo-nọdu l'aba-eze
 ochochoroche iya,
 bụ Dévidi bụru eze.

Oo-gude ekpe ikpe, pfulu ọto;
 waa apfulbekoto mee ya
 g'o keru jingujingu;
 mbụ mee ya g'ọ nguru
 anguru e -shi lẹ teke ono
 jasụ l'ojeje.

Ọ bụru g'ọ phụ-tabẹ Chipfu,
 bụ Ọkalibe-KakỌta-Ike
 l'ẹhu l'e-me g'o mee ya.

Ndu Ízurẹlu akpatsu Chipfu ẹhu-eghu

⁸ Nnajiuphu pfulwaru iphe, ya e-me oshilọkpa Jiékọpu. Iphe ono tukoru ndu Ízurẹlu l'ishi; ⁹ k'ọphu bụ lẹ ndu Ízurẹlu l'ophu a-makọtaru iya; mbụ ndu Ifuremu; mẹkpoo ndu bukọta lẹ mkpukpu Samériya; ndu egudeje eku onwophẹ yẹe etsetse, shi phẹ l'ọkpoma sụ: ¹⁰ “Ụlo ono, e gude ẹja kpua ono bẹ dakposhihuakwaru nụ. Ọle anyi a-pyikwanu mkpuma kpukwaa ya. Oshi sịkamo ono bẹ e gbutsuakwaru. Ọle anyi e-wokwanuru oshi sida je adzakwaa l'ozo iya.”

¹¹ Ọle Chipfu byaru eyeeru ndu ọhogu Rezinu ọkpukpu-ike g'ẹphe je etsoo phẹ ọgu; mbụ ẹ ndu ọhogu phẹ bẹ ọ tųgbawaru nanụ doberu phẹ. ¹² Ndu Arámu shiakwa l'ụzo ẹnyanwu-awawa. Ndu Filisitayinu shi l'ụzo ẹnyanwu-arịba saa ọnu gabala bya eworu ndu Ízurẹlu lwụa. Ọle iphemiphe ono mechaarụ; ẹhu nọdu eghuẹle-a Chileke eghu. Ọ paliẹle-a ẹka g'ọ paliru iya.

¹³ Ọle ndu Ízurẹlu ta adakọbeduru lwapfuta onye ono, chiru phẹ iphe ono; mbụ l'ẹphe ta achọduru Chipfu ono, bụ Ọkalibe-Kakọta-Ike ono. ¹⁴ Ọo ya bụ ẹ Chipfu e-bufu ndu Ízurẹlu ishi bufu phẹ ọdzu; sàshía igu; pheshia ẹswa l'akpuru ẹnyanwu lanụ. ¹⁵ Ọ bụru ndu bụ ọgerenya; yẹe ndu nweru ẹnya bụ phẹ bụ ishi ọbu. Ọ bụru ndu mpfuchiru Chileke, bụ ndu ezi iphe, abụdu ire-lanụ bụ mgbọdzu. ¹⁶ Ndu edu ndu Ízurẹlu eduswekwa phẹ eduswe; tẹme ẹphebedua, eedu ụzo ọbu bụru ndu e duphuru ụzo. ¹⁷ Ọo ya bụ ẹ ndu bụ okorọbya l'alị ono te emedu g'ẹhu tsọo Nnajiuphu ụtsọ. Ndu enwedu nna yẹe ụnwanyi, ji phẹ nwụhuru bẹ ọ tọo phuduru obu-imemini. Noo kẹle onyemonye te emedu ele Chileke; tẹme onyemonye bụwaru onye ẹjo-iphe; bya egudewaa ọnu epfu mkpọkoro opfu. Ọle iphemiphe ono mechaarụ; ẹhu nọdu eghuẹle-a Chileke eghu. Ọ paliẹle-a ẹka g'ọ paliru iya.

¹⁸ Ẹjo-iphe, ẹphe eme enwu phuruphuru g'ọku. Ootsu ọgara-mbo etsu olekarara. Tẹme ọ tųko ẹpfukala, nọ l'ọswa l'ophu eze wọwoowoo; k'ọphu bụ l'ire-ọku iya zelihuru tsoru ẹnwuru-ọku iya ala l'eli l'eli. ¹⁹ Oke ẹhu-eghu Chipfu, bụ Ọkalibe-Kakọta-Ike bẹ a-nma alị ono l'ophu swọkoswoko. Ọ bụru ndu Ízurẹlu a-bụru manụ-ọku, aa-nọdu ekpu l'ọku ono g'o gude bulihu ebulihu. Ọphu ọ dudu onye aphụjeru nwune iya obu-imemini.

²⁰ Ẹphe e-gbu l'ẹkutara ria; ẹgu agule phe-a. Ẹphe eria k'ẹkicha; o too jikwa phe pho. Onyemonye a-taahaa anu onye yee ya bu. ²¹ Mbụ le ndu Manáse a-taahaa anu ndu Ifuremu. Ndu Ifuremu ata ke ndu Manáse. Ẹphe atuko gha iphu tsoahaa ndu Jiuda ogo. O le iphemiphe ono mechaaru; ẹhu nodu eghuẹle-a Chileke eghu. O paliẹle-a ẹka g'o paliru iya.

10

¹ Nshio ndu ono, anoduje atu ekemu, apfuduru-oto; mbụ ndu asuje g'e mee iphe, egbupyata anu; ² k'ophu a taa haduru ndu ukpa enge; yee k'ophu ẹphe a-nafu ndibe Chileke, bu ndu eemekpa ẹhu iphe, rwuberu phe nu. Ndu woru ndu ji phe anodu dobe nri eriri. Teme ẹphe nodu ana ndu enwedu nna nfu. ³ ?Bu gunu be unu e-me mboku Chileke abya unu agbaphe; mbụ mboku, mkpurupyata e-shi ụzenya bya? ?Bu onye be unu agbapfu g'o dzoo unu? ?Bu awe be unu a-ha ẹku unu? ⁴ O to dukwa iphe, aphodu nu; gbahaa g'ẹphe kpua unu le ndzu; loo unu wuruwuru l'alị; ozoo ẹphe egbua unu egbugbu. O le iphemiphe ono mechaaru; ẹhu nodu eghuẹle-a Chileke eghu. O paliẹle-a ẹka g'o paliru iya.

Ikpe, Chileke e-kpe ndu Asiriya

⁵ “Nshio gube Asiriya; mbụ gube oha ono, bu ngu bu oshi-mpaleka, mu egudeje egoshi ẹhu-eghu mu. Teme o buru l'ẹka ngu be mgboro oke ẹhu-eghu mu ono no gededede. ⁶ Mu a-chiru Asiriya yeru oha, amadu mube Chileke. Mbụ le mu e-woru iya nwaru oha, akpatsuje mu ẹhu-eghu; g'ẹphe kwaa ya okwata kee iphe phe l'oha. Ẹphe azoo phe tolitoli g'onye azoka ẹpuchi le gbororo.”

⁷ Obenu l'o to budu iphe ono du yebdua l'obu. O to buduro iphe ono bu iphe, oori. Iphe, bu uche iya bu emebyishi iphe emebyishi; g'o mee g'oha, du igwerigwe

chihu. ⁸ Ọ -nọdu l'ootu onwiya ẹpha sù: “?Ọ kwa ẹ ndu-ishi ojọgu mu bukota eze eze? ⁹ Mkpukpu Kaluno ?tọ bụdu gẹ mkpukpu Kakemishi dū bụ g'ọ dū? Ọ bụru gẹ mu meru mkpukpu Hamatu bụ gẹ mu meru mkpukpu Apadu; bụru gẹ mu meru mkpukpu Samériya bụ gẹ mu meru mkpukpu Damasukosu. ¹⁰ Eshinu ẹka mu dūru ike gudecha aḷi-eze ndu agwọ ọbvu; mbụ aḷi-eze ọphu nshi phẹ ka kẹ Jierúsalemú yẹ Samériya shii; ¹¹ ?būchia Jierúsalemú yẹ nshi nshi, dū iya nū bẹ mu ta anūdu aphū ẹgube ono, mu nūru ndu Samériya yẹ iphe, ẹphe agwa ono?”

¹² Nnajiuphu -meghecha ẹpho iphe, oome l'ẹhu úbvú Zayonu yẹ Jierúsalemú bẹ oo-pfu sù: “Mu a-hù eze ndu Asiriya ahùhù; kẹle o lekeberu ẹnya gude obu iya eku onwiya; bya egude ẹnya etse etsetse.

¹³ “Noo kẹle ọ sùru: ‘Ọo ike ọkpu nkemu bẹ mu gude mee iphe-a, mu meru-a. Ọ bụru mmamiphe mu bẹ mu gude mee ya; opfu l'iphe edoje mu ẹnya. Oke-aḷi unwuliphe bẹ mu meru ọphu oke adūedu l'ẹka o shi dū. Mu kwaa ẹku phẹ l'ọkwata; bya emekpee ndu eze phẹ kẹle mu gbaru mkparawa. ¹⁴ Ọo g'aachitaje ẹpfune ẹnu-a bụ gẹ mu tufuru ẹka chita ẹku ọhamoha. Ọ bụru gẹ nemadzū achikoje ẹkwa-iphe, a gbagharu agbagharu-a bụ gẹ mu chikoberu ndu aḷi, shi ẹkameka l'ọphu. Ọphu ọ dudu g'ọ ka mma l'ọo ndu aḷi ẹka lanū chiru nkù kpa; ọzokwanu jaa ọnu too; ọzoo raa pfurii.’ ”

¹⁵ Obenu ẹ Chipfu sùru-a: “Ogbunkū; ?oo-ku onwiya kughata onye gude iya egbu iphe tọo? Tọo mma, egudeje ekwobu oshi ?ọo-wata ekuru onye gude iya nū onwiya? G'ọ bụ ẹ mgborígwè a-dū ike ngalia onye apaliye iya nū; ọzokwanu g'oshi-mpalẹka wata etu onwiya ẹpha sù ẹ ya ta abụekwa oshi.”

¹⁶ Ọo ya bụ ịe Nnajiuphu; mbụ Chipfu, bụ Ọkalibe-Kakọta-Ike l'a-chiru ẹjo iphe-ememe yeru ndu ojogu iya ono, gbaru mkparawa ono. Ọ bụru l'ime ẹhu phẹ bẹ oo-mecha phụ-nwua o-nwu-phuruphuru ọku.

¹⁷ Ịphóró ndu Ízurelu a-buru ọku; mbụ l'onye nsọ kẹ ndu Ízurelu a-buru ọku, enwu enwunwu. Ọ bụru eswe ujiku lanụ bẹ oo-nwu phoophoophoo kekọta ọgarambo; yẹe ọbyambu, dukota iya nụ. ¹⁸ Ẹguru ono, ọswa iya dū ono; yẹe alị phẹ ono, dū ree ntumatu ono bẹ oo-mecha mebyishichaa l'ọ laa pyetee g'onye iphe eme; ¹⁹ k'ọphu bụ l'oshi, a-phodu l'oke ọswa iya ono a-dū olemole shingushingu kpọ; k'ọphu nwatanshị e-dekọta iya l'ẹkwo.

²⁰ Ọ -rwua teke ono bẹ nwa ndu phoduru nụ l'ime ndu Ízurelu; mbụ nwa ndu ọphu wafuru nụ l'ọnu-ulo Jiékọpu ta akpọedu obu eyeru ndu ono, echije phẹ pyaapya ono. Ọ bụru onye ẹphe a-kpọru obu yeru ọkpobe eyeru a-buru Chipfu; mbụ Onye nsọ kẹ ndu Ízurelu. ²¹ Nwandu ono, phoduru nụ ono e-mechaa lwa; mbụ ịe nwa ndu a-phodu l'ọnu-ulo Jiékọpu e-mechaa lwa lwapfuta Ọkalibe-Kakọta-Ike ono, bụ Chileke. ²² Sụ-a; mbụ l'a makwaru-a l'unubẹ Ízurelu ha g'ẹja, dū l'aguga ẹnyimu. Ọle ọ bụ-a nwuphodu nemadzụ e-mechaa lwa. Ọla-l'iswi phẹ bẹ a tubuwaru l'onoo g'oo-dū. G'oo-me iya ono a-buru l'orwuberu iya. ²³ Ọ bụru Nnajiuphu; mbụ Chipfu, bụ Ọkalibe-Kakọta-Ike l'e-gude ẹka iya mebyishia ọhamoha ọbu l'ophu, bụ iphe, a tubuwaru l'oo-me phẹ.

Aphu, Chipfu a-nụ ndu Asiriya

²⁴ Ọo ya bụ ịe-a; wakwa iphe, Nnajiuphu, bụ Chipfu ọphu bụ Ọkalibe-Kakọta-Ike eepfu baa: “Unubẹ unwu mu, bụ ndu bu l'úbvú Zayonu; unu ta tsukwa ndu Asiriya

ebvu; mbụ ndu ono, anọduje echi unu oshi-mpalẹka ono. Teme ephe nọdu apaliye mgboro echi unu ge ndu Ijiputu shi echije iya unu-a. ²⁵ O tọ dukwa g'oo-nọ-beru; ẹhu eghubuhu mu eghu l'opfu ẹhu unu. Mu eworu oke ẹhu-eghu mu ghaaru ephebedua woru phe mebyishia.” ²⁶ Chipfu, bụ Okalibe-Kakota-Ike l'e-gude echachi chia phe gbaagbaa egube ono, o chiru iya ndu Midiyanu le mkpuma Orebu. Mgboro iya be oo-palikwapho maaru mini egube ono, o meru iya l'alị ndu Ijiputu ono. ²⁷ Le mboku ono be ee-zi unu ivu ẹhu phe g'ọ tọ tukoru unu l'ukuvu. L'a nyafu iya unu g'ọ tọ tukuehe unu l'olu. Iphe ono, e gude kegbabe unu ono agbabuhu kele unu pawaru okporokpo.

Ndu Asiriya abya Ọgu

²⁸ Ndu ohogu ono bahwaru mkpukpu Ayatu shita je aghabua mkpukpu Miguronu. O buru ẹka ephe jeru je akube iphe phe bụ le mkpukpu Mikumashi. ²⁹ Ephe gbaa gorogoro nyighatakota mgbaka mgbaka ubvu epfufe su: “Eka anyi a-kwa bukwa le mkpukpu Geba.” Ndu mkpukpu Rama wata anma pyaapyaapya. Ndu mkpukpu Gibiya, bụ ẹka Sọlu shi buru; ye okpa l'oso gbalala. ³⁰ Unu chia mkpu; unube ndu mkpukpu Galimu! Unu ngabekpodapho nchi; unube ndu mkpukpu Layisha! Unu kaa; unube ndu mkpukpu Anatotu! ³¹ Ndu mkpukpu Madumena be agbawaa oso. Ndu mkpukpu Gebimu nọdu edomishiwaa onwophe. ³² O buru mboku ono be ephe e-jeta je agburu le mkpukpu Nobu. Ephe egbu ẹka swikiswiki l'iphu ubvu Zayonu ono; mbụ l'eli ubvu Jierusalẹmu.

³³ Lewarọ; Nnajiuphu; mbụ Chipfu, bụ Okalibe-Kakota-Ike e-gude okpehu, paru ẹka kwafu ekali-oshi

ono. Ee-gbutsu oshi ono ndu ọ́phu dẹ́je phengara phen-
gara; mbụ mee; ndu ọ́phu dẹ́ ogologo alwazeta ali. ³⁴L'ọ
gude ogbunkụ gbukaa ẹ́pfukala k'eze ọ́swa ono. Ọ́ ya bụ
l'ọ́swa ono, nọ́ l'úbvú úbvú LébanỌ́nu ono l'adaa l'iphu
onye ono, bụ Ọ́kalibe-KakỌ́ta-Ike ono.

11

Ẹ́kali Jiesi

¹ Mkpirikpu upfu-oshi ono,
bụ Jiesi l'e-rwuta irwu.
Ọ́ bụru l'ọ́gbarabvu iya bẹ́
ẹ́kali e-shi nyíkata.

² Unme kẹ́ Chipfu a-nọ́du iya
l'ẹ́hu; mbụ Unme,
emeje g'a maru iphe;
bya abụkwarupho Unme,
emeje g'iphe doo ẹ́nya;

Unme mgbazi;
bya abụkwarupho Unme,
emeje g'ike dẹ́;
Unme, emeje g'a nwụta iphe;
bya abụkwarupho Unme,
emeje g'a tsụ Chipfu ebvu.

³ Ọ́ bụru iphe, a-dẹ́je iya ree
bụ g'a tsụje Chipfu ebvu.

Ọ́ tọ́ bụkwa iphe,
o gude ẹ́nya hụma bẹ́
oo-gudeje ekpe ikpe;
ọ́phu ọ́ bụkwa iphe,
ọ́ nụmaru lẹ́ nchị bẹ́
oo-gudeje kpebua iphe,
dẹ́ k'ekpebu.

⁴ Ọ́ chia iphe, meru nụ bụ

l'oo-kpeje ndu adudu
 g'ò dù phẹ ikpe, pfuru ọto.
 Ọ bụru ikpe,
 pfuru nhamunha bẹ
 oo-gudeje kpebua ikpe
 ndu ukpa l'eliphe-a.
 Eliphe l'opfu bẹ oo-gude
 mgboro,
 dù iya l'ọnu chia gbaagbaa.
 Ọ bụru unme,
 ọ turu atutu bẹ oo-gude
 phua ndu ẹjo-iphe tẹerii.
⁵ Apfubekoto a-buru iphe,
 oo-ke l'upfu.
 Apfushi ike, l'iphe,
 o pfuru aburu iphe,
 ọo-tubutajẹ uwe iya l'upfu.
⁶ Ejo-nkuta-ọswa bẹ oo-me;
 yẹe unwu aturu akpaahaa
 ẹghirigha.
 Agụ yẹe egghu adọaha l'ẹka
 lanu.
 Nweswi; mẹ nwoduma;
 mękpoo anu,
 atsuje onwiya ẹbà a-tuko
 akpa ẹghirigha.
 Ọ bụru nwatanshii bẹ
 a-nọduje eche phẹ nu.
⁷ Ne-eswi; yẹe ẹjo anu-egbudu,
 bu biye a-nodu ata nri
 ẹghirigha.
 Unwu phẹ atuko adọ l'ẹka lanu.
 Teme oduma aburu anu,

a-nɔdu ata ɛswa g'oke-eswi.

⁸ Nwa, angɔ ɛra a-nɔduje
l'ɔnu ɛnu óghù ebvu ebvu.

Nwatanshìi, a mífúwaru ɔnu
l'ɛra ewojeru ɛka ye
l'ɛnu ogiji.

⁹ Iphemiphe ono ta adudu
ɔphu emeka nemadzɔ iphe;
ɔphu ɔ búro k'emegbu l'úbvú,
e doberu mu nsɔ l'ophu;
kɛle ɔo gɛ mini do-jiru
ɔma ɛnyimu-a bú g'eliphe
l'ophu a-madzuru Chipfu.

Alwalwa ndu a kpuru lɛ ndzɔ

¹⁰ O -rwua teke ono bɛ ɔgbarabvu Jiesi ono a-buru
ɛkwa-ɔhubama k'unwu-eliphe. ɔ búru iya bɛ ɔhamoha
a-nɔduje agba agbapfu; ɔkpoku iya a-du akpabiri l'ɛnya.

¹¹ Mbɔ l'o -rwua mbɔku ono bɛ Nnajiuphu a-machi ɛka
iya ɔzo k'ugbo ɛbo nafutafuchaa nwandibe iya ndu ɔphu
a-phɔdu l'alì ndu Asiriya; mɛ l'alì ndu Ijiputu; mɛ l'alì
Paturɔsu; mɛ ndu ɔphu e-shi l'alì ndu Kushi; mɛ ndu
ɔphu e-shi l'alì ndu Elamu; mɛ ndu ɔphu e-shi l'alì
Shina; mɛ ndu ɔphu e-shi lɛ mkpukpu Hamatu; mɛ
ndu ɔphu e-shigba l'ɔha, bukube eze-ɛnyimu. ¹² ɛkwa-
ɔhubama bɛ ɔo-paliru ɔhamoha; bya atuko ndu Ízurelu,
a kpuru lɛ ndzɔ chitachaa; l'o rwukɔbe ndu Jiuda ono,
a tukaru nanunanu ono. ɛka oo-shi rwukɔbe phɛ bú lɛ
nkulahɔ eliphe ɔzo ɛno ono. ¹³ Okophoo ndu Ifuremu
e-phukashihu; l'e mee gɛ ndu ɔhogu ndu Jiuda chihu.
Mbɔ lɛ ndu Ifuremu te ekoɛduru ndu Jiuda okophoo;
ɔphu ndu Jiuda adueduru ndu Ifuremu ɛhuka. ¹⁴ ɛphe
e-zi phaa je ndu Filisitayinu bu l'ɔzo ɛnyanwu-ariba

swọkoswoko. Ẹphe abyakwaphọ erwukọbe onwophe je akwagwoo ndu bu l'ụzo ẹnyanwu-awawa. Ẹphe a-zụ ndu Edọmu yee ndu Mówabu gburumu. Ẹphe emee ndu Amọnu ẹphe anọdu phe l'ẹka. ¹⁵ Chipfu l'e-me g'ọ tahu; mbụ nkulahụ eze-ẹnnyimu Ijiputu. Ọ bụru pherephere, ekpo pharaphara be oo-zi gude phee ẹka l'eli eze nggele Yufurétisu. Oo-me iya l'ọ ta-bushihu atabushihu; tabuha uzi ẹsaa; k'ọphu nemadzụ a-zoje gędengu gędengu gędengu ghata iya. ¹⁶ Nwandibe iya ndu ọphu phọduru nụ, e-shi l'alị ndu Asiriya alwa be aatọgboru oji, a-dabyiru ke phorokotokongu; egube ono, a tọgboru iya ndu Ízurẹlu teke ono, ẹphe shi l'alị ndu Ijiputu alwa ono.

12

Ebvụ ekele

¹ Sụ-a; mbọku ono be
li-sụ:

“Mu e-kele ngu ekele gube
Chipfu; kele mu shi mee;
ẹhu nọdu eghe ngu eghe.

Ọle nta-a be ẹhu-eghe ngu
jizetawaru;
ị bya awata mu adu obu.

² Lenu; ọ kwa Chileke bu
onye ndzọta mu.

Mu a-kpọru obu ye l'ẹka ọ nọ;
ọphu ndzụ agudu mu;
kele Nnajiuphu,
bu Chipfu ono bu ọkpehu
mu bya aburu iya bu
olu ebvu mu.

Teme ọ bya nta-a bya aburu

onye dzọru mu nụ.

³ Ọ kwa ẹhu-ụtso bẹ ii-gude seta
mini lẹ wẹlu ndzọta.”

⁴ Noo mbọku, ịi-wata epfu sụ:

“Unu kele Chipfu ekele;
unu raku ẹpha iya!

Unu mee g'ọhamoha
madzuru iphe-oma,
o meru!

Raa ya arara l'ẹpha iya parụ
ẹka!

⁵ Gụ-ku Chipfu ebvu ekele;
kẹle iphe-oma,
o megbabẹru nyịberu
anyịbe.

Unu mekwaphọ gẹ mgboko
l'ophu madzuru iphe ono,
o megbabẹru ono!

⁶ Unubẹ oha,
bu l'úbvú Zayọnu;
unu tụa ụzu ẹhu-ụtso;
kẹle onye ono,
nọ l'echilabọ unu ono
parụ ẹka;
mbụ Onye Nsọ kẹ
ndu Ízurẹlu.”

13

Epfu opfu ẹhu ndu Bábilọnu

¹ Ọwaa bụ ozi, Chileke ziru zidoru ndu Bábilọnu. Ọ
bụru onye o ziru iya bụ Azáya nwa Emọzu.

² “Palia ẹkwa-ọhubama l'eli úbvú, dabyiru swachamu.
Nọdu l'ẹka ono chiaru phẹ mkpu. Pheeru phẹ ẹka

g'èphe shia ọnu-ọzọ bahu l'èka ndu a maru èpha phè nọ. ³ Mbèdua, bụ Chipfu tųwaru ekemu nų ndibe mu, bụ ndu mu doru nsọ; bya achikobekwapho ndibe mu, bụ ndu ọkpèhu dų g'èphe je egoshi l'èhu eghu mu eghu; mbụ ndu èhu anọduje atsọ lè mu parų èka.”

⁴ Nụmakpodapho ọzọ, aatų l'eli úbvú; g'ikpoto ndu parų èka apaa. Nụmakpodapho wọowoowo, ohamoha atų; g'ọha, eme ndzukọ. Ọ kwa Chipfu, bụ Ọkalibe-Kakọta-Ike achikobe ndu a-lwuru iya ọgu. ⁵ Ndu ono shi èka dų ènya; èphe shi l'èka igwe jeberu. Ọ bụru Chipfu; yèlè ndu bụ ngwọgu, o gude egoshi l'èhu eghu iya eghu bè l'eme g'ọ bya emebyishikota ndu alị-a l'ophu.

⁶ Unu kwaa idemini èkwa; kẹlè eswe Chipfu dųwaa ntse! Mbọku ono a-bụru eswe ala iphe l'iswi. Ọ bụru l'èka onye oo-shi bụ Ọkalibe-kangokọtaru-nų. ⁷ Ọo ya bụ l'èka onyemonye a-tұлwahu. Obu eterwuhu onyemonye. ⁸ Èphe atsұhu ebvu; èhu aphұhu phè ұphu; l'ọoburu iphe-èhuka byaru phè gè nwanyị, ime eme. Onyemonye adų nwibe iya akpabiri. Èphe agbanwube iphu èhuka èhuka. ⁹ Lekwa lè mbọku kẹ Chipfu abyaakwa. Mbọku ono a-bụru eswe omeliwe; bya aburu mbọku oke èhu-eghu. Noo mbọku, ee-me gè mgboko l'ophu bụru ochobu. L'aa-tųko ndu iphe-èji, nọ iya nų mebyishia. ¹⁰ Mbọku ono bè kpokpode, nọ l'igwe g'ọ ha te ekekwa paapaapa. Ènyanwu ekeru l'èka ọowataje wata agba ọchii. Ọphu ọnwa echidu ilile.

¹¹ Chipfu sұru-a: “Mu a-nų eliphe l'ophu aphұ iphe-èji iya. Mu anųa ndu èjo-iphe aphұ èjo-iphe, èphe eme. Mu emee gè ndu anọduje aba abaa te ekuhè onwophè; bya ekuzeta ndu eku onwophè l'ọkponu ọkponu phè. ¹² Mu e-me gè nemadzų dų ọko lè mgboko; mbụ g'ọ ka ọkpobe mkpọla-ododo adų ọko. L'ọ kakwaphọ mkpọla-ododo ọphu shi l'alị Ofi adų ọko. ¹³ Mbụ-a; mu e-me

g'imigwe l'ophu nmahụ jiiijijii. Eliphe anmaa jiiijijii jasụ Ọokporiberu l'ẹka o shi ngụru. Ọ bụru iphe, a-kpa iya nụ bụ oke ẹhu-eghu ono, bụ ọphu a-nọdu eghu mụbe Chipfu, bụ Ọkalibe-Kakọta-Ike l'eswe oke ẹhu-eghu mu ono.

¹⁴ “Ọ bụru gẹ mgbada, aachi ọso agbajẹ-a; ọzoo g'aturu, enwedu onye eche iya nụ agbakashihuje-a bụ g'onjemonye a-nọdu agba agbapfu ndu ẹphe l'ẹphe bụ. Mbụ l'onjemonye a-zẹ l'ọso agba ala ẹka a nwuru iya.

¹⁵ Onjemonye a -hụmakwanuru ahụma; aa-nmafua ya ẹpho. Teke ọ bụ onye e guderu egude; ọola l'ogu-echi.

¹⁶ Ụnwegirima phẹ bẹ aa-nọdu l'iphu phẹ gbubushia mkpirikpu mkpirikpu. L'a kwaa iphe phẹ l'ọkwata; phatoshia ụnwanyi, ẹphe alụ alụ.

¹⁷ “Lekwa; ọ kwa ndu Midiya bẹ mu a-kpatsu g'ẹphe jepfu phẹ ọgu. Ndu adudu iphe, ẹphe guberu mkpọla-ọchaa; ọphu mkpọla-ododo agudu phẹ ẹgu. ¹⁸ Apfu phẹ e-yebushi ụnwokorobyia phẹ eyebushi. Ọphu imemini akpuru-iphe, shi l'ẹpho a-dudu phẹ. Ẹphe -gude ẹnya hụma ụnwegirima nshii; ẹphe ta aphuduru phẹ obu-imemini. ¹⁹ Tẹmanu-a; alị ndu Bábilọnu ono, bụ ẹka e gude akwabẹ alị-eze ọzo ụbvù ono; mbụ ẹguru alị ono, bụ iya meru ndu Bábilọnu; ẹphe nọdu eku onwophẹ ono; alị ono bẹ Chileke e-mechaa mebyia g'e mebyiru Sodomu yẹ Gómóra. ²⁰ Ọ tọ bubaeduru ẹka ee-buru eburu jasụ l'ojeje. Ọphu nemadzu abyadu ebuba l'ime iya; e-shi l'ogbo sweru ogbo. Ọphu ọ dudu ndu Arabu akpọbe iya ụlo-ẹkwa; ọphu ndu eche aturu adọbedu iya aturu phẹ. ²¹ Iphe, a-doru iya nụ a-buru anụ, ebu l'echiẹgu. Ọ bụru nkuta-ọswa bụ iphe, akujeru l'ulo, wushiru iya nụ. Mgbashi-ujiku akukwaru iya phọ. Eghu-ọswa apfuphe karagidingu karagidingu l'ime iya. ²² Achi-anmabu a-nọduje l'ulo phẹ, a kpushiru ike ara ntumatu. Nkuta-

oswa akuru l'ulo phe ndu ophu shi buru eguru ulo. Ozo bu le teke ee-me iya iphe ono duwaa ntse; mbu l'o too noedu odu l'o nwua.”

14

¹ Chipfu a-phuru Jiekopu obu-imemini k'ophu bu l'oo-mechaa hota Izurelu ozo; mee g'ephe buru l'ali phe ozo. Ndu lwaru alwalwa ayikwaru iya pho. Ndu lwaru alwalwa ono ephe l'onu-ulo Jiekopu ebua eghirigha. ² Ohamoha l'e-duta phe dulata l'ali ephebe ndu Izurelu gedegede. Ndu Izurelu ono a-buru ndu e-nweru ohamoha; mee phe; ephe aburu phe ohu: unwoke l'unwanyi l'ali ophu Chipfu nuru phe l'onwiya. Ephe aghaa ophu kpua ndu ono le ndzu; mbu ndu ono, shi kpua ephebedua le ndzu ono; buru ndu a-nodu elekota ndu shi emekpa phe ehu.

Adada eze ndu Babilonu

³ Chipfu e-me g'obu tushihu unube ndu Izurelu l'aphu-a, unu erigbabe-a; me iphe-ehuka-a, unu ejegbabe-a; mekpoo ozi mkponwu-ehu-a, e keru unu-a. ⁴ Noo teke unu a-wata aturu eze ndu Babilonu phukuku su: Onye-a, bu nwa-mmekpa-ehu-a gbẹ meekwadupho bugengu! Ehu gbẹ ghubuhuwa iya nu eghu! ⁵ Chipfu gbajishiwaru mgborigwe, ndu ejo-iphe ono shi swebe phe l'olu; mekpoo oshi, ndu-ishi shi gude echi phe echachi; ⁶ bu ndu shi egudeje ehu-eghu echi ndiphe iphe nchipyabe; mbu l'ephe gude enya, ata phe kapitikpiti lwu-kpee oha, du igwerigwe; ophu o dudu onye egbo phe nu. ⁷ Eliphe l'ophu be atutawa unme nta-a. Teme nchi duwaa phe doo. Olu-ebvu gbufu phe l'onu. ⁸ Mbu l'oshi payinu; mekpoo oshi sida k'ubvu ubvu Lebanonu be ehu tukocharu atsọ l'opfu ehu ngu. Ephe tuko

epfu sù: Nta-a, e wozewaru ngu-a bẹ ndu ekwo oshi ta abyaẹdu anyi ekwotsushi.

⁹ “Alì-maa kwagebewaru akwagebe g'ọ gba ngu ndzuta mẹ ì -lashĩa. O doziwaru ụnwumaa, l'abya ngu ndzuta; mbụ maa iphe, bụkpoo ndu ono, shi bụru ishi l'eliphe-a. Ndu ono bẹ o meru g'ẹphe gbeshichaa agbeshi l'aba-eze phe; mbụ ndu shi bụru eze ọhamoha. ¹⁰ G'ẹphe ha l'e-yeru ngu ọnu sù ngu: ‘?Gụbedua kwaphọ mechaaru bya aduhukwa edzu g'anyibedua; mbụ bya abuhukwaru iphe, anyi bụ? ¹¹ Akpabiri ngu ono g'ọ ha bẹ e nwuwaru ye l'alì-maa; yẹle ọha-gengugengu ogumogu ngu onoya. Ẹkà bụwaa iphe-azẹe, ì zẹ l'eli. Mgbashiride bụwaru ẹkwà, ì phushiru l'iphe-azẹe ngu ọbu.’ ”

¹² Lewarọ g'i shi l'imigwe daa l'alì; gụbe kpokpode nchi-abọhu; mbụ gụbe nwatibe ọnma-ẹwa-utsu! E chitsuwaru ngu chiru ngu ye l'eliphe; mbụ gụbe onye shi byapyabẹ ọhamoha l'ophu! ¹³ I pfuwaru l'ime ọkpoma ngu sù: “Mu e-kuli onwomu kuba l'imigwe. Mu a-pali aba-eze mu g'ọ ha l'eli l'eli; g'ọ kakọta kpokpode kẹ Chileke l'eli. Mu e-je anmakoru l'eli úbvú-ndzukọ ono, nọ l'ụzo isheli ono. ¹⁴ Mu a-tụkoephọ akpaminigwe l'ophu nyighakọta je anọdu; mee onwomu gẹ mu ha gẹ Ọkalibe-kakọta-shii.” ¹⁵ Obenu l'a byazeru ngu byaru ngu ye l'alì-maa; l'ọhulohu nsukutu ono.

¹⁶ Iphe, bụ ndu hụmaru ngu nụ a-gbẹ lerwebaa ngu ẹnya elerwe; ẹphe awata arị ọriri ẹhu ngu sù: “Tọ bụnaa onye-a bụ onye ono, meru mgboko; ọ nmahụ jiiijiii-a; mbụ onye ono, akpabiri iya guderu alì-eze l'ophu? ¹⁷ ? Tọ bụna iya bụ onye ono, meru mgboko l'ophu; ọ dū g'echiẹgu; tsupyashiru mkpukpu, a kpushiru ike, nọ lẹ mgboko; ọphu ọ dudu ndu mgboko, ọ kpuru lẹ ndzụ, duru ọphu o kweru g'ẹphe la ibe phe-a?”

¹⁸ Iphe, bukpoo ndu shi buru ndu-eze, ohamoha l'oplu be e mekotaru ona lia. Onye ophi nonu l'ooze l'ime ilu nkiya. ¹⁹ Obenu le gubedua be a chifuru l'ilu nkengu; tuphaa ngu g'onye gbutaru ekali-oshi tuphaa. A chikoo ndu e gburu egbugbu tupyabe ngu; mbu ndu e gude ogu-echi nmafushia epho; ndu wuru laa le mkpuma ophi no l'ali-maa. Oo g'odzu, a zoru pyakapyaka aduje-a bu gi du. ²⁰ E tee lidu odzu ngu g'e liru ke ndu ophu; kele i mebyishiwari ali ngu; bya egbu ndibe ngu pyaapya. Awa ndu ejo-iphe be a ta abakwa ephotaje ephota ophi ozobaa. ²¹ G'e dozia eka ee-dobe unwu iya gbushia gbudoru iphe-eji, nna phe oche metaru. G'ephe te ejekwa agbalihu ke ge mgboko buru okiphe phe; ephe egude mkpukpu le mkpukpu phe buchishia eliphe l'oplu.

Chileke e-mebyishi Babilonu

²² Le Chipfu, bu Okalibe-Kakota-Ike pfukwaru su: "Ge mu bya agbalihu tsoo Babilonu ogo; mbu le mu e-me g'epha Babilonu chihu; yele ndibe iya, wafuru nu; mekpoo awa iya yele oshilokpa iya. ²³ Mu e-me ali ono l'oplu g'o buru ali ebyi. Mu emee ya l'o buru ali uda. Mu e-gude ala-l'iswi zaa phe l'eza." Noo iphe, Chipfu, bu Okalibe-Kakota-Ike eepfu.

Chileke e-mebyishi Asiriya

²⁴ Chipfu, bu Okalibe-Kakota-Ike ribuwari iya l'angu su-a: "Tororo bu opfu bu l'oo ge mu tuberu g'iphe du bu g'oo-du. O buru iphe, mu pfuru bu iphe, e-me nu. ²⁵ Mu e-gwekwa ndu Asiriya uji; mbu ndu Asiriya ono, no l'ali mu ono. Ndu ophi no l'eli ubvu iya be mu azo tolitoli nwufu phe. Ophi ndibe mu evuedu ivu ehu phe. Ophi mkpa phe aduedu phe l'ukuvu." ²⁶ Nokwa ge mu chiru l'oo-duru unwu-eliphe l'oplu bu ono. Nokwa

ẹka njọ, mu machiru l'ẹhu ohamoha l'ophu. ²⁷ Noo kele ọo Chipfu, bu Okalibe-Kakota-Ike tuburu l'onoo g'oodu. Ophu o dukwa onye suru agbanwe iphe, o pfuru. O machiakwaru ẹka; ophu o dukwa onye suru iya esela ẹka azu.

Chileke e-mebyishia Filisitayinu

²⁸ O kwa l'apha eze ono, bu Ehazi nwuhuru be mu nataru ozi-a. Ozi obu suru-a: ²⁹ “Unu te etekwa eswa; unube ndu Filisitayinu g'unu ha; opfu le mgboro, e chiru unu gbajihuru; kele iphe, e-shi l'agwo ono futa bukwa ogiji. Akpuru, ọo-mita buru okpontonu, apfu saa saa. ³⁰ Noo teke onye kachaa akpa nri l'ime ndu akpa nri ahuma nri riaha. Ndu adudu g'o du phe aze pyakoo; o to dudu iphe, byaru eme phe nu. Obenu l'ogbarabvu nkengu be mu e-gude okpa-nri mebyishia. L'o woru nwa ndibe ngu; nwa ndu ophu phoduru nu phushikota terii.

³¹ “Chia mkpu gube oguzo! Taa uzu-ekwa unube mkpukpu ndu Filisitayinu l'ophu! Unube ndu Filisitayinu g'unu ha; unu toko zashihu azashihu; kele enwuru-oku shikwa l'uzo isheli akpu tututuutu abya. Ophu o dudu onye a-ndu eje nkinyi iya l'ogbo-ogu phe.”

³² ?Bu onu gunu be ee-yeru ndu-ozu, shi l'oha onoya? “Onu, ee-ye bu le Chipfu meakwaru Zayonu; o nguru anguru. O buru l'ime iya be ndibe iya, aakpa ẹhu agbaba je eze ndzu.”

15

Chileke e-mebyishi Mowabu

¹ Owaa bu ozi, Chileke ziru zidoru ndu Mowabu.

Mkpukpu Aru, no l'ali ndu Mowabu buakwaa mkpuryata. O buru enyashi be e gude mebyishia ya.

Mkpukpu Kiru, nɔkwapho l'alì ndu Mówabu búru mkpuryapata. Ọ búru ẹnyasi be e gude mebyishia ya. ² Ndu mkpukpu Dibonu wúru jeshia l'ulo agwa phe; ẹka ẹphe meru; ọ ha l'eli jeshia akwa ẹkwa. Mbú le ndu Mówabu atú ọzu-ẹkwa ndu mkpukpu Nebo; yee ke Medeba. Onyemonye kpúshiru ishi bya akpúshia ẹjí-agba. ³ Ndu eje le gbororo yegbaa uwe-aphu. Ndu nọ l'oma ọlo-eli me ndu kuru l'edupfu tuko atú ọzu-ẹkwa; arwaphu onwophe l'alì akwa ntumatu. ⁴ Ndu mkpukpu Heshibonu me ndu mkpukpu Eleyale tuko echi mkpu k'ophu ndu nọ le mkpukpu Jiahazu anu olu phe. Noo g'o gude ndu ojogu ndu Mówabu chishia mkpu; kele meji tsukahuru phe. ⁵ Ọzu ẹkwa atú mu l'obu l'iswi ẹhu Mówabu; kele unwu iya, eje phururugbada agba ọso agbarwuchaa mkpukpu Zowa; ndu agbarwua mkpukpu Ẹgulatu-Shelishiya. O nwechaaru ndu ophu jerwuchaaru mkpukpu Luhiti. Ẹphe -nodu eje; ẹphe akwa ntumatu. Teke ẹphe tsoru ọzo ala mkpukpu Horonayimu be ẹphe nọ l'uzo raa ẹkwa ọla-l'iswi phe ono. ⁶ Mini, nọ le nggele Nimurimu tashihuru; ẹswa nwulwashihu. Ẹgbudu kposhihu nku; ophu ọ dudu iphe, du oyii, phoduru iya nu. ⁷ Ẹku, ẹphe kparu akpakpa kube; mbu akanya, ẹphe seru dobe be ẹphe e-vuta je adaghata nggele oshi wilo; ⁸ kele ojileka togbo, ẹphe echi agba Mówabu mgburugburu. Ọzu-ẹkwa, ẹphe atú rwuchaaru mkpukpu Ẹgulayimu. Teme erwubvu phe rwuchaa mkpukpu Biye-Elimu. ⁹ Mini mkpukpu Dimonu be mee jiwari ejiji; obenu le mu e-mebakwaaro mkpukpu obu, bu Dibonu iphe, ka njo. Mbú le mu achiru oduma ye g'ọ tagbushia ndu shi iya nu agba ọso ndzu phe; tagbushikwapho nwa ndu ophu phoduru l'alì ono l'ophu.

16

¹ Ndu Mówabu chítaru nwatùru g'ò búru iphe-oku; chíru je anù eze ndu alì-a. Mbù l'e shi lẹ mkpùkpu Sela chíru iya je aghaa echiègu tǔgbua jeshia l'úbvú Zayònu je achije ya ndu bu iya nù. ² Ọ kwa g'unwu-ènu, a chíkaru l'èpfune epheje nanúnanu-a bú g'unwanyi Mówabu agba nanúnanu shia agùga nggele Anònu ibiya ọphu eerwuje iya erwurwu.

³ Èphe nòdu epfu sù: “Unu kpozinaaru anyi ụzo! Unu pfunaaru anyi iphe, l'e-me nù! Unu menaa g'ononyo unu búru anyi ìbvù, l'a-dù kẹ kpuchii g'ènyashi. Unu dominaa anyìbe ndu eje phururugbada; ọphu unu atùkwa anyìbe ndu agba ọso ndzù jala. ⁴ Unu kwenu g'anyìbe ndu ono, a chíru ọso shi l'alì ndu Mówabu lwapfuta unu. Unu kpuchinaa anyi g'onye mmebyi ono te emebyi anyi!

“O -rwua teke ndu mkpamèhu a-chìhuwa; ndu mmebyi abùwaru bugengu; ndu emeje nemadzù ewere bvùebekpo l'alì-a l'ọphu; ⁵ bẹ Chileke e-goshi n-yemobu iya; woru onye apfùshije ike l'iphe, o pfuru, shi l'ònu-ùlo Dévidi mee g'ò búru eze; mbù onye abùjeru; ọ -nòdu ekpe ikpe l'o kpe iya l'ùzo, pfuru ọto. Ọphu ọopadu apfùbekoto ẹka lanù.”

⁶ Anyi nùmawaru gẹ ndu Mówabu ekube onwophẹ; l'èphe anyanùka ndu; tẹme èphe nòdu etse etsetse. L'ekuku ono, èphe eku onwophẹ ono; mẹkpoo sukusuku ono, dù phẹ l'èhu ono bẹ pawaru ẹka. Ọle ẹpha ono, èphe etu onwophẹ ono bükota okorobo iphe.

⁷ Noo g'o gude ndu Mówabu nòdu ara ẹkwa Mówabu ọbu arashì iya ike. Mbù l'èphe tùkoru ara ẹkwa iya. Unu rashìkwa ẹkwa ike; g'o rwukwaa unu l'èhu, bú opfu èhu ọkpa-ùlo, e gude kpùa mkpùkpu Kiru-Harẹsetu. Unu gùa aphù iya; kẹle e tsuwaru iya pyaapya. ⁸ Ègu mkpùkpu Hẹshibonu bẹ iphe, a kọru iya

nwụkotawaru lwa. Vayinu, a kọru ịe mkpụkpu Sibuma nwụkwaapho lwa. Ndu-ishi ọhamoha zọwaru ọkpobe vayinu, ụdị iya nụ pyaapya; mbụ vayinu, shi abaję ụba barwua mkpụkpu Jiaza; mbụ bawarọ ụba tsowaruro ụzo echięgu. Ẹri iya bawarọ ụba ono jerwuchaa eze-ęnyimu. ⁹ Noo ya; mbędua nọdu arakwaphọ ẹkwa ẹgube ono, ndu Jiaza ara ono. Mu arakwaphọ ẹkwa vayinu ndu Sibuma. Unubę ndu Hęshibonu; unubę ndu Eleyale; mu gudeakwa ęnya-mini awu unu ẹhu; kęle okwe, e shi erwujeru ekpu iphe, unu meberu l'alị mę ọ -chashiahaa; yęe okwe, e shi erwuje mę a -kpataahaa ya akpata; bę bụkotawa sụtukumu. ¹⁰ Ẹhu-utso yęe ete ęswa bę a nafuwaru ęgu ono, a kọru oshi-ọmi ono. Ọphu ọ dudedu onye anọdujekwadu l'ęgu-vayinu ono agụ ebvu; ọzokwanu nọdu iya erwu okwe. Ọphu ọ dudedu onye anọdujekwadu l'ęgu ono akụ męe-vayinu. Noo kęle mu buchiwaru akwa ẹvu, e shi anọduje l'ẹka ono akwa. ¹¹ Ọkpoma mu akwa ẹkwa alị ndu Mówabu; mbụ l'ọkpoma azu mu uzu g'onye akpọ ogumogu. Ime obu mu nọdu akwaru ndu Kiru-Haręsetu ẹkwa. ¹² Ndu Mówabu -nọdu eje l'ẹka ẹphe agwaję iphe; buępho ike bę ẹphe eme g'ọ ka phę abvubvu. Mbụ teke ono, ẹphe eje l'agwa phę je iya agwagwa bu iphe, abudu iphe bę ẹphe eme.

¹³ Noo opfu, Chipfu pfuhawaru l'opfu ẹhu ndu Mówabu.

¹⁴ Obenu ịe nta-a bę Chipfu ono suru: “L'ọ kwa apha ẹto bę ọ phoduru; mbụ l'aaguakwaru alị ndu Mówabu apha g'onye-ozu, e ziru ozu, ọo-nọdu eje. Apha ẹto bę ọ phoduru ụbvú ono, alị ndu Mówabu ụdị ono; mękpoo ikpoto igwe ọha ono, bu iya nụ ono abụkotaru ndu a gubeduru iphe. Nwa ndu a-phodu nụ aha nwanshii shii; teme ọphu ike adudu phę.”

17

Chileke a-nụ ndu Arámu; waa ndu Ízurẹlu aphụ

¹ Ọwaa bụ ozi, Chileke ziru lẹ k'ẹhu ndu mkpụkpu Damasụkosu: “Lewarọ; Damasụkosu e-mechakwaa bụ-buhuru mkpụkpu. Iphe, oo-mecha bụru bụ ikpọzu. ² Mkpụkpu lẹ mkpụkpu ono, azagba Arowa e-mechaa bụkotaru ẹka e budu ebubu. Ee-mechaa pakọtaru iya haaru aturu; waa eghu g'ọ bụru ẹka ẹphe a-dọjeru; ọ tọ dudu onye eye phe ebvu. ³ Mkpụkpu lẹ mkpụkpu ono, a kpụshiru ike ono bẹ e-mechaa chihu l'alị ndu Ifuremu. Ọphu ndu Damasụkosu e-nweeduru onye a-buru eze phe. Ọo g'ee-me ndu Ízurẹlu iphe-ipherea a bụkwapho g'ee-me ndu Arámu. Nokwa iphe, yẹbe Chipfu, bụ Ọkalibe-Kakọta-Ike eepfu bụ ono.”

⁴ “O -rwua teke ono bẹ ùbvù, aakwabẹ oshilọkpa Jiékọpu a-ngachafu. Okporokpo ono, ọ dū ono awufu. ⁵ Ízurẹlu a-dū g'onye akpata iphe l'opfu; g'onye egbu ereshi, pfulu apfulu, bụ ẹka bẹ oogudeje ekpokọbe iya. Teme l'ọ dukwapho g'onye akpa ukpa oyoko ereshi lẹ nsuda Refayimu. ⁶ Ọle mkpakwa iya a-phodunu iya-a. Ọo-dukwapho g'ẹka a nmaru oshi-olivu yigayiga; l'ọ phodu nwebo ọzoo ẹto lẹ mkpakpa onu ẹkali-oshi, olivu obu; phodukwapho ẹno ọzoo ise l'eze ẹkali iya, mịshiru ike. Noo iphe, Chipfu, bụ Chileke kẹ ndu Ízurẹlu epfu bụ ono.”

⁷ O -rwua mbọku ono bẹ amadu a-gharu onye meru iya nụ iphu. Mbụ l'anya phe bẹ ẹphe a-tuko ghaa l'ẹka Onye Nso kẹ ndu Ízurẹlu nọ. ⁸ Ẹphe ta aghaeduru ọru-nshi phe iphu; mbụ iphe, ẹphe gude ẹka phe mee. Ọphu ẹphe agubeedu itso Ashera iphe; yee onu ẹka ẹphe akpoje ọku l'iphe, eshi kwẹekweekwee, bụ iphe, ẹphe gude ẹka phe mee.

⁹ O -rwua mbòku ono bẹ mkpukpu phẹ, a kpùshiru ike a-dù g'ẹka a gbadoru agbado l'ime ọswa; ọzoo l'eli úbvú; ọ bụru ndu meru iphe, a gbadoru iya bụ ndu Ízurẹlu. Ẹkameka atụko bụru okorobo ẹgu.

¹⁰ Kẹle-a; unu zọhawaru Chileke, bụ iya dzọtaru unu ono. Unu ta anyataduru onye ono, bụ agbara-mkpuma; bya aburu onye meru unu; unu gbashia ike ono. Ọ bụru iphe ono meru g'o gude; o -betakponu unu kua akpuru oshi, kakotakpoo ree; ọzoo l'unu koru vayinu, unu dzetaru l'ohozo; ¹¹ mbu-a; o -betakpo unu mee g'ọ wata aba uba mboku ono, unu kuru iya ono; o be l'utsu iya; ọ wata atụ ige; unu ta awotakwa iya mebyi; kẹle ọ buẹpho nrimaphu yẹe iphe-ẹhuka bẹ mboku ono a-buru.

Alwu-kpe ndu ohozo

¹² Oowaa! Ọ kwa ọha, dù igwerigwe aba hanyihanyi. Hanyihanyi, ẹphe aba dù g'ẹka Eze Ẹnyimu aphu gbudugbudu. Oowaa! Gẹ ndiphe swokoberu. Ẹphe aphu gbudugbudu g'ẹka oke-mini asọ gborogboro! ¹³ O -betakponu ohamoha phuchaa gbudugbudu gẹ mini, a kuru ikpete; ọ bu-a mba bẹ ọo-baru phẹ; ẹphe agbamihu okpobe agbamihu. L'a chiru phẹ ye lẹ pherephere g'ẹswa ereshi, a nọ l'eli úbvú aphushi; yẹe gẹ berebere iphe, pherephere apaphe l'ẹka oke pherephere ezi. ¹⁴ O -be l'uzenyashi; iphe, eye ebvu atụko kuru. Nchi -bya abohu; ẹphe abvuwaa. Noo onodu ndu ono, egwe ivu anyi ono; mbu okiphe ndu ono, akwa iphe anyi l'okwata ono.

¹ Nshio gube ali ono, aanu ephe nkù iphe, ephegbaa l'aguga enyimu ndu Kushi; ² mbu unube ndu ezije ndu-ozì unu; ephe etsoru mini. Mbu ephe egude ugbo-èjì daghaa mini. Su-a; unube ndu-ozì okpa-egwa; unu lapfunu ndu ono, ha l'eli bya akwo akpo-ehu bururu ono! Unu lapfunu ndu ono, aatsu ebvu l'eka du ntse me l'eka du enya; mbu oha, ike du l'ogu; abyaje alwua lwuta; oha, nggele nggele so-bushiru aso-bushi!

³ Unube unwu-eliphe l'ophu; mbu unube ndu bu le mgboko-a; unu lenu! E -woliepho iphe-ohubama imeli imeli l'eli ubvu be unu a-huma iya-a. Teke e gbuerupho opu ono be unu a-numa iya-a. ⁴ Waa iphe, Chipfu pfuru nu mu baa: “Mu a-noduepho nggujungguji gbè l'eka mu bu tufu enya ele; g'anwu echi phuuphuu teke okpomoku du; ozoo g'urwukpu, akwa iji l'onanwu. ⁵ Kele-a; a -bya erwu teke emetaje iphe, e meberu l'ali; mbu teke iphe e meberu l'ali agbawashikwadu ige; iphe ono, shi buru okoko ono abuwaru mebyi iphe, chawaru k'awota; noo teke oo-bya bya egude mma beshichaa ekali iya ono chita. ⁶ Noo teke aa-tuko g'ephe ha haaru udele, bu l'oma ubvu; paru phe haaru unwu anu, bu l'egbudu. Unwu enu egude phe kpaa nri jasu onanwu alaa. Unwu ejo-anu, bu l'egbudu egude phe kpaa nri jasu udzumini abvu.”

⁷ Noo teke aa-wata ewota iphe-oma gude bya anu Chipfu, bu Okalibe-Kakota-Ike. O buru ndu a-nodu ewotaru iya iphe obu bu ndu ono, ha l'eli bya akwo akpo-ehu bururu ono; mbu ndu ono, aatsu ebvu l'eka du ntse me l'eka du enya ono; ndu bu oha, ike du l'ogu bya alwuje lwuta; oha, nggele nggele so-bushiru aso-bushi. Iphe-oma obu be ee-gudeje bya l'ubvu Zayonu, bu iya bu eka aanoduje araku Chipfu, bu Okalibe-Kakota-Ike.

19

Aphụ, Chileke a-nụ ndu Ijiputu

¹ Ọwaa bụ ozi, Chileke ezi lẹ k'ẹhu ndu Ijiputu.

Unu lenu! Chipfu nọkwa l'urwukpu ezi phaaphaaphaa agba abya Ijiputu. Agwa ndu Ijiputu nọdu anma pyaapyaapya l'iphu iya. Meji rwushihu ndu Ijiputu.

² “Mu a-kpali ndu Ijiputu g'ẹphe tsoje ndu Ijiputu ibe phẹ opfu; k'ọphu unwune a-nọdu etso unwune phẹ ọgu. Obutobu etso obutobu iya opfu. Mkpukpu etso mkpukpu ibe iya ọgu. Alị-eze etso alị-eze ibe iya opfu. ³ Meji a-tọfu ndu Ijiputu. Ẹphe -chịchaa idzu iphe, ẹphe e-me; mu emee ya; ọ tọo dudu g'ẹphe chiru iya. Ẹphe ejee l'ẹja l'iphu nshi; jee l'ajị g'ẹphe kpata maa ishi. Ẹphe ejee l'ajị l'ẹka ndu ajị maa; mẹ l'ẹka ndu agba ẹja. ⁴ Mu e-woru ndu Ijiputu ye l'ẹka ndu a-nọdu eme phẹ omeliwe. Ọ bụru onye a-buru ishi phẹ bụ eze, eme ẹngiringa.” Noo iphe, o pfuru; mbụ Nnajiuphu, bụ Chipfu; bya aburu Okalibe-Kakọta-Ike.

⁵ Mini, dụ l'enyimu Nayilu a-tashihu. Ogbu ogbu nggele akpọshihu nkụ dụ kpọkoro-kpọkoro-kpọkoro.

⁶ Mini, awụ l'ósé a-nọdu eshi ishi. Nggele nggele, nọgbaa l'alị ndu Ijiputu awata alwa alị alị eje jasụ l'ọotahu ree. Okpete okpete; yẹe eji eji atuko nwushihukota;

⁷ mękwapho iphe, a kuru l'aguga ẹnyimu Nayilu, nọ l'ọnu-ẹnyimu ono. Opfu, a kọru akọko l'ogbu ogbu ẹnyimu Nayilu l'a-dụkota kpọkoro kpọkoro kpọkoro. Pherephere atuko iya pata; a taa hụmaedu iya. ⁸ Ndu egbuje ẹma a-tsụ ude kwashia ẹnya-mini. Mbụ iphe, bụkpoo ndu eseje ikokoro l'enyimu Nayilu; ndu anọduje ese ụgbu-egege lẹ mini a-tuko nwụpyashihu. ⁹ Ndu egudeje oghu ọchaa, ama mma gude akpa iphe a-chihu. Ndu ekwe ọkpobe ẹkwa ọchaa a-buru ndu iphere e-gude.

¹⁰ Ndu bu phe gude ali ndu Ijiputu aburu ndu e gweru arakabya. Iphe, bukpuo ndu eri ugwo aburu ndu aphu tsoru.

¹¹ Ndu-ishi le mkpukpu Zowanu bukota ndu eswe. Ndu maru iphe, bu ndu anoduje akpo-ziru Fero uzo ndu akpo-zi mkpo-zi onye-eswe. ?Denu g'unu e-shi su Fero: "Mbèdua yikwa le ndibe ngu ndu ophu maru iphe. Mu buru nwa onye eze, shi l'ichee." ¹² Su-a; ? bu awe be ndibe unu ndu maru iphe no nta? G'ephe goshinu unu g'iphe du; ephe emee g'unu maru iphe, Chipfu, bu Okalibe-Kakota-Ike doberu k'eme ndu Ijiputu. ¹³ Ndu-ishi le Zowanu bukotawa ndu eswe. Ndu-ishi le mkpukpu Memufisu be e mewaru mkpurukpuru-nya. Ndu ono, bu mkpuma, gude ulo l'okpa-ipfu phe ono be duswewaru ndu Ijiputu uzo. ¹⁴ Chipfu chiwaru unme, achije enyaji chiru ye phe l'ehu. Ephe mee; ndu Ijiputu ndu akpo galagala l'iphemiphe, ephe eme egube ono, onye nguru mee anoduje akpo galagala l'eli egbo, o gboru ono; ¹⁵ k'ophu bu l'o to duedu iphe, ishi ozoo ozdzu emeru ndu Ijiputu; ophu o duedu iphe, ekwo-igu ozdoo okpete emekwaduru phe.

Ndu Ijiputu a-baru Chipfu eja

¹⁶ Teke ono be ndu Ijiputu a-du g'unwanyi. Ephe erwuhu le ndzu-agugu; o buru eka o paliru eka abya phe echichi; mbu Chipfu, bu Okalibe-Kakota-Ike. ¹⁷ Ali ndu Jiuda aburu iphe, ee-gudeje eye ndu Ijiputu ebvu. Onye -numaru eka e kuru epha ndu Jiuda; ndzu erwuta iya. O buru iphe, a-kpa iya nu bu iphe, Chipfu, bu Okalibe-Kakota-Ike e-mechaa mee phe.

¹⁸ Teke ono be mkpukpu ise l'ali ndu Ijiputu a-wata epfu opfu-ali ndu Kènanu. Ephe eria nte l'ephe a-ndu l'eka Chipfu, bu Okalibe-Kakota-Ike. Mkpukpu ono be nanu a-ndu aza "Mkpukpu Ola-l'iswi."

¹⁹ Lẹ mbọku ono bẹ ee-dobe ẹka aa-gwajẹ Chipfu l'echilabọ alì ndu Ijiputu. L'a kpọa iphe, e gude anyata Chipfu akpọkpu dobe l'oke alì iya. ²⁰ Ọoburu iphe-ọhubama mẹ iphe, agba ekebe lẹ Chipfu, bụ Ọkalibe-Kakọta-Ike nwụ ẹnya l'alì ndu Ijiputu. A -nọdu eme phẹ mkpawere; ẹphe raku Chipfu; l'o zia onye a-dzọta phẹ nụ. Onye ono abya anafuta phẹ. ²¹ Ọo ya bụ lẹ Chipfu e-me gẹ ndu Ijiputu maru iya. Ọ bụru mbọku ono bẹ ẹphe a-marweta Chipfu amarweta. Ẹphe e-gude anụ yẹ nri gude bya agwaa Chipfu. Ẹphe -rifu nte l'owa-a iphe, ẹphe e-meru Chipfu baa; ẹphe emeeru iya ya. ²² Chipfu a-tụ ndu Ijiputu ẹhu. Ọ -tuchakwaa phẹ ẹhu ono mee ẹphe ewekọrohu. Ẹphe alwapfuta Chipfu; l'ọ ngabẹ nchị l'arwọrwo, ẹphe arwọ iya; mee; ẹphe ewekọrohu.

²³ Teke ono bẹ oji a-dabyiru swanmangu shi l'alì ndu Ijiputu je adajaa alì ndu Asiriya. Ndu Asiriya ejeahaa Ijiputu. Ndu Ijiputu ejeahaa Asiriya. Ndu Ijiputu ẹphe lẹ ndu Asiriya atuko abarụ Chipfu ẹja ẹghirigha. ²⁴ Lẹ mbọku ono bẹ ndu Ízurẹlu a-bụru ndu k'ẹto mẹ a -gụa Ijiputu yẹ Asiriya, bụ ndu a-bụru iphe-ọma, dūru eliphe l'ophu. ²⁵ Chipfu, bụ Ọkalibe-Kakọta-Ike a-gọru ọnu-ọma nụ phẹ sụ: “G'ọnu-ọma bụru kẹ Ijiputu, bụ ndibe mu; yẹ Asiriya, bụ ndu mu gude ẹka mu mee; yẹ ndu Ízurẹlu, bụ ndu bụ okiphe mu.”

20

Iphe, oozì; mbụ onye mpfuchiru, gba ẹhu ọto

¹ L'apha, Tatanụ byaru mkpọkpu Ashidodu; mbụ teke Sagonu, bụ eze ndu Asiriya ziru iya; ọ bya etsoo ndu Ashidodu ọgu; naa mkpọkpu phẹ; ² bẹ Chipfu gude Azáya nwa Emọzu pfua opfu. Iphe, o pfuru bụ: “Yefu uweaphu ono, i yeru l'ẹhu ono; yẹ akpọkpa ono, i yeru

l'òkpa ono!” O yefu iya gbaru ehu oto wata aghaphe; gbakwarupho òkpa oto tsoru ejephe. ³ Tòbudu iya bu; Chipfu pfua su: “Òo egube ono, onye-ozu mu, bu Azáya gba ehu oto gbaru òkpa oto ghaphewaa apha eto ono; ò buru iphe-òhubama; yee iphe, du biribiri, e meru ndu Ijiputu yee ndu Kushi ono; ⁴ noo g'eze ndu Asiriya a-kpu ndu Ijiputu yee ndu Kushi le ndzu; yeshia phe uwe; gbabe phe òkpa oto kpuru phe lashia; me unwokorobya phe; me ndu bu ogerenya phe; ebohu egheeru phe onu g'ò buchaaru iphe, ee-gude mee ndu Ijiputu iphe-iphere. ⁵ Ndu kpuru obu yeru ndu Kushi; bya egude ndu Ijiputu eku onwophe be ndzu e-rwuta; teme iphere emekwa phe pho. ⁶ Noo mboku iphe, bu ndu bukube eze-enyimu-a e-pfu su: ‘Unu humawaro iphe, meru ndu ono, anyi kpuru obu yeru ono; mbu ndu ono, anyi gbaru oso gbapfu g'ephe yeru anyi eka nafuta anyi l'eka eze ndu Asiriya! ? Denukpoo g'anyi e-me nahu?’ ”

21

Alwu-kpe ndu Babilonu

¹ Owa-a bu ozi, Chileke ezi ndu bu l'echiegu ono, no l'aguga eze enyimu ono:

Oo g'oke-pherephere eshije l'echiegu ndohali ezi abya ono; bu g'oo-shi l'echiegu ono bya. Mbu l'oo-shi l'alì, eye ebvu bya. ² Ejo ophulanya be e goshiru mu; eka nwoderu-oye deru ndu alì iya ye; nwokwata ndu akwa okwata.

Unube ndu Elamu; unu gbalihu lwuwa ugu! Unube ndu Midiya; unu no-pee ndu ohogu unu mgburugburu! L'ude ono, ephe meru; ndiphe tsua ono g'ò ha be Chileke buchiakwaru. ³ Noo g'o gude ogwehu mu l'ophu ndu emekota mu ehuka; ehu ndu aphukota mu uphu. Mu dupho ge nwanyi, ime eme. Anuma, mu numaru iya

mee mu; mu kpọhu kulakula. Ahụma, mu hụmaru iya nmakọta mu ẹhu jiiijiii. ⁴ Meji nọdu akụ mu pheripheri; ndzụ-agụgu mee mu; ẹhu nọdu anma mu anmanma. Nchi-ejihi, shi aduje mu ree shi byawaru bya aburu iphe, anyi mu ishi ẹdzu.

⁵ Ẹphe gweshia nri; bya atogbochaa utute-ukpo; bya awata eri nri; angụ iphe, aangụ angungu. A nọnyaephe; ọ bụru: “Unu zelihu unubẹ ndu-ishi ojogu! Unu tua manụ lẹ ngwogu unu!”

⁶ Waa iphe, Nnajiuphu pfuru mu baa. “Je je edobe onye-nche, a-nọdu elefu ẹnya! G'onye ono pfujekwa iphe, ọ hụmaru! ⁷ Ọ -huma ugbo-inya; mẹ ikpoto ndu agba l'inya; mẹ ndu agba nkapfu-igara; ọzoo ndu agba inya-kamelu; g'ọ rụkota onwiya; mbụ rụkota onwiya ọkpobe arụkota.”

⁸ Noo ya; onye-nche ono chia mkpu sụ: Onye nwe mu nụ; mbọku-mbọku bẹ mu a-nọduje l'onyi-eli-a eche nche. Mbụ l'enyashi mbọku-mbọku bẹ mu anọduje nche l'eka a sụru gẹ mu nọdu. ⁹ Lekpọdapho; o nweru onye nọ l'ugbo-inya; mẹ ikpoto ndu agba l'inya etso iya. Ọ nọdu epfu sụ: “Ọ daakwaru! Mkpukpu Babilonu daakwaru! Ọzo bụ l'iphe, bụ agwa mkpukpu ono l'ophu, bụ iphe, bụ agwa nkephẹ bẹ e chikotawaru pyaapya; o rwukota ali.”

¹⁰ Sụ-a; unubẹ ndibe mu; unubẹ ndu e gweru uji l'oma ẹka eechichajẹ bali; iphe, mu epfuru unu bukwa iphe, mu nūmaru l'onu Chipfu, bụ Ọkalibe-Kakota-Ike; l'onu Chileke kẹ ndu Ịzurẹlu.

Ozi, Chileke ziru l'ẹhu ndu Edomu

¹¹ Wakwa ozi, Chileke ziru lẹ k'ẹhu Duma.

O nwekwaru onye gbẹ l'alị Siye eku mu oku sụ: “Onye-nche; ?abalị jeberu ijebe-agma? Onye-nche; ?enyashi jeberu ijebe-agma?”

¹² Onye-nche yee ọnu sụ: “Nchi abọhuakwa; bya ejihuẹkwapho. Ọ -buru l'unu akpata ishi; unu kpata ishi. Unu lwadupho azu ọzobaa.”

Ozi, Chileke ziru l'ẹhu ndu Arabu

¹³ Waa ozi, Chileke ziru lẹ k'ẹhu ndu Arabu.

Su-a; unubẹ ndu ije, shi l'alị ndu Dedanu; unu je je adọru l'oswa ndu Arabu. ¹⁴ Unu kutakwa mini, unu anu ndu mini agụ; unubẹ ndu ọphu bu l'alị Tema! Unu wotakwa nri bya anu ndu agha phurii! ¹⁵ Ndu ono bẹ bu ndu gbalaru ogu-echi; mbu ndu a miliru mma; ephe nahu gbalaa. Ndu e setaru apfu ke kikiki g'a gbaa. Ephe shi l'eka ọgu ekpo ọku ono nahu gbalaa.

¹⁶ Wakwa iphe, Nnajiuphu pfuru mu baa: “Aagwakwaru ndu Keda apha ọgu g'onye e butaru ozi, ọo-nodu eje. Ọ kwa apha lanu bẹ ọ phoduru; iphe, bukpo ubvu, aakwabẹje ndu Keda a-bvukota. ¹⁷ Nwa ndu a-phodu nu l'ime ndu agbajẹ apfu; mbu ndu ike du l'unwu Keda ta abaedu ishi; kele ọ kwa Chipfu pfuru iya; mbu Chileke ke ndu Izurelu.”

22

Ozi, Chileke ezi l'ẹhu ndu Jierusalẹmu

¹ Ọwaa bu ozi, Chileke ezi ndu bu lẹ Nsuda Ọphulenyano.

Su-a; ?bu gunu eme ngu nta-a, meru g'o gude; ndibe ngu tuko wufu wuba l'oma mkpotsu ulo; ² mbu gube mkpukpu ono, bu iphe, jiru iya nu bu etsu utsu. Gube mkpukpu, agba gharagharaghara bya eme rigbarigba.

Ndibe ngu, e gburu egbugbu ta abukwa ogu-echi bẹ e gude gbua phe. Ọphu ọ bukwa l'egu ọgu bẹ ephe

nọ nwụhu. ³ Ndu-ishi ngu g'ẹphe ha tükowaru ye ọkpa l'ọso gbalaa. A kpuru phẹ ndzụ; ọphu e gudedu apfu. Iphe, bụkpoo unubẹ ndu e guderu bẹ a tükotaru mkporo tųgbabe atųgbabe; l'unubẹ ndu gbalaru teke ndu ọhogu unu nọkwaduro ẹnya. ⁴ Noo g'o gude mu su: Unu wofu mu rọ ẹnya. Mbụ-a; unu haa mu gẹ mu kwaa ẹkwa kwaghee ya akwaghe. G'e b'ejekwa mu egbogbo l'ẹka ọ bụ ndibe mu bẹ eeme omeliwe ono. ⁵ Kẹle Nnajiuphu, bụ Chipfu; mbụ Ọkalibe-Kakọta-Ike bẹ meakwaru eswe mbọku ono; ọ bụru mbọku, ụtsú daru; a zọo iphe pyaapya. Ndzụ rwuta onyemonye lẹ Nsụda Ọphulenyia ono. Eswe mbọku ono bẹ eewukpọshi igbulọ; l'a nọdu araku eze úbvú g'ọ gbaa mkpu.

⁶ Ndu Elamu byakwa bya achita ẹkpa apfu phẹ jeshia ọgu; bya achita ndu gude ụgbo-inya alwuru phẹ ọgu; mẹ ndu gude inya eje ọgu gude jeshia. Ndu Kiru bya ekpuhaa iphe-mgbobuta phẹ woru ghebe ọnu. ⁷ Nsụda unu ọphu kachaa ree bụ iphe, jiru iya nụ bụ ụgbo-inya. E woru ndu gude inya eje ọgu yechaa g'ẹphe che ọnu-abata mkpukpu nche. ⁸ Ọo ya bụ l'iphe, gbobutaru alị Jiuda bẹ a nashichawaru iya.

O be mbọku ono; unu leaha ẹnya ngwọgu ono, kuru l'ibe eze, e meru l'oshi sida, shi l'ọswa, dụ l'úbvú úbvú Lébanonu. ⁹ Unu humawaru lẹ mkpukpu Dévidi gbaru ọru l'ẹka dụ igwerigwe. Unu kukọo mini, dụ l'okpuru mkpozeta sụkaa ya. ¹⁰ Unu bya agụa ụlo, dųgbaa lẹ Jierúsalemụ ọgu; bya aharu phẹ tsukpọshia gude mekwaa agbarike igbulọ Jierúsalemụ. ¹¹ Unu bya atụa okpuru lẹ mgbaka igbulọ labọ ono gẹ mini shi l'akahụ okpuru ono wubata iya dọru. Ọphu unu agbapfuduru onye bụ iya tųru okpuru ono atųtu; mbụ ọphu unu akpakpọdarunu onye ono ishi; mbụ onye ono, bụ iya

chiru idzu l'owa-a g'oo-du teke dūhakpowaro ɛnya ɛnya kpɔ.

¹² Tɔbodu iya bu; o be mboku ono; Nnajiuphu; mbu Chipfu, bu Okalibe-Kakota-Ike bya ekua unu su g'unu bya araa ekwa gua aphu; g'unu kpushia ishi; chita uwe-aphu yee. ¹³ Ole o bu; leanarɔ ɛnya! Ehu atsɔle-a unu! Unu nodu emele-a emereme; egbushi eswi; egbushi aturu; atashi anu; angushi me! Unu -gbeshi unu asu: “Unu g'anyi rikwaa nri ngu me! ?O kwaro: o -be echele; anyi anwuhu-a?”

¹⁴ Ole Chipfu, bu Okalibe-Kakota-Ike mekpooru owa-a; mu maru; mu gude nchi mu numa iya; mbu l'o suru-a: “iphe-ɛji-a, unu eme-a be a ta abyakwa asachafu asachafu jasu g'unu a-no-beru. Noo iphe, oopfu; mbu Nnajiuphu ono, bu Chipfu; bya aburu Okalibe-Kakota-Ike.”

Aalo Shebuna aka le nchi

¹⁵ Waa iphe, Nnajiuphu epfu; mbu Chipfu ono, bu Okalibe-Kakota-Ike. O suru-a: “Tugbua je asu onye-ozino, mbu Shebuna, bu iya be unuphu ibe eze du l'eka; je asu iya: ¹⁶ ?Bu gunu be iime l'eka-a? Tememe ?bu onye haru ngu g'i bya anodu tua ilu, ee-li ngu? I bya anodu atu ilu ngu l'ephekerephe; egbubashi aka ii-noduje tata unme l'ime agbara mkpuma. ¹⁷ Lenu! Chipfu abyaakwa ngu azu gburumu pfuuri; tuphakpopho etupha; mbu gube onye ono, bu oke-du-ike ono. ¹⁸ Oo-wee ngu kperekpere ge bolu je eworu ngu chie l'oha, kwata ha okpobe osa. O buru l'eka ono be ii-nodu nwuhu. Tememe o buru l'eka ono be eguru ugbo-inya ngu ono a-kwash; mbu gube onye ono, bu iphe, e gude achu ulo nnaji ngu ochi ono! ¹⁹ Chipfu a-nashi ngu okwa ngu; chifu ngu l'eka i no eje ozi.

²⁰ “O -be mbọku ono bẹ mu e-ku onye ejeru mu ozi, bu Ẹliyakimu nwa Hilikaya. ²¹ Mu achịta uwe kpowula-kpowula ngu woru yee ya; chịta akpọ, iikebutajẹ uwe woru mee ya mgburugburu; woru ike, shi dū ngu nū nū iya. Ọ bụru iya a-bụru nna ndu bu lẹ Jierúsalem; mẹ ndu ọnu-ulo Jiuda. ²² Ọ bụru iya bẹ mu e-ye igodo ọnu-ulo Dévidi l'ẹka; ọ -gūhaa ụzo ghebe ọnu; ọ tọ dudu onye byaru agụ-chi iya nū. Teke ọ gụ-chikwanuru ụzo; ọ tọ dudu onye byaru agūha iya nū. ²³ Mu e-me iya g'ọ nguru anguru gẹ nggu, a kpọberu kpọ-mia akpọ-mi. Eegude iswi ẹhu iya kwabẹ ndibe nna iya ụbvù.

²⁴ “Iphemiphe, bụkpoo iphe, e gude akwabẹ ndibe nna iya ụbvù bẹ aa-tụko nyabẹkota iya l'olu; mbụ ndu ẹphe l'iya bụ abụbu; mẹ unwu, ẹphe nwutaru anwuta; ngwa ulo l'ophu, bụ ndu ọphu ẹnya lwaru l'ibe phe; e -shikpọo l'ochi jasụ l'ipoti.” ²⁵ Chipfu, bụ Ọkalibe-Kakọta-Ike sụru-a: “Lẹ mbọku ono bẹ nggu ono, e shi kpọbe kpọ-mia akpọ-mi ono a-kpọfu daa. Ngwa-ulo ono, e shi kobegbaa ya ono aburu gwoo l'alị. Nokwa olu Chipfu.”

23

Ozi, Chileke ezi ndu mkpụkpu Taya

¹ Waa ozi, Chileke ziru lẹ k'ẹhu mkpụkpu Taya.

Unu kwashia ẹnya-mini; unubẹ ụgbo-mini kẹ mkpụkpu Tashishi; kẹle mkpụkpu Taya bẹ e mebyishiwaru. Nta-a ta aduedu ulo, dū iya nū. Ọphu ọ duedu ọdu ụgbo-mini, dū iya nū. Ọ bụru ẹka e shi ọ bya emee g'ẹphe maru bụ l'alị Sayipurosu. ² Unu dakwaa gbẹẹ unubẹ ndu bukube eze-ẹnyimu; mẹkpoo unubẹ ndu agba ngho, bụ ndu shi lẹ mkpụkpu Sayidonu. Ndu unu ziru ozi daakwaru eze-ẹnyimu jeshia ẹka unu ziru phe. ³ Ẹphe dawaru ẹnyimu olemole. Iphe unu shi

egudeje akpa okpoga bụ witi, a kọru l'agụga ẹnyimu Shihọ; mbụ witi ọpụ a kpatarụ l'agụga ẹnyimu Nayịlu. Mkpụkpu unu shi ẹgube ono bụru ẹka ọhamoha azụkota aswa.

⁴ G'iphere bụru kẹ gube mkpụkpu Sayịdonu; mbụ gụbedua, bụ onye ike dụ, bu l'eze-ẹnyimu; kẹle eze-ẹnyimu yewaru ọnu sụ l'ime teke emeswekwaa ya; ọpụ ya nwụjekwaru nwa. Ọpụ ya ehejekwaru nwa nwoke; ọpụ ya emetsejekwaru nwa nwanyị.

⁵ Ndu Ijiputu -nụmaepho iphe, meru lẹ Taya bẹ oo-gburwashị phẹ ẹhu shii.

⁶ Unubẹ ndu bukube eze-ẹnyimu; unu daghakwaa eze-ẹnyimu la l'azụ iya kẹ Tashishi! Unu rakwaa ẹkwa rashia ya ike! ⁷ ?Bụ mkpụkpu-a bẹ unu shi anọduje eme ẹmereme-a? Mbụ akahụ mkpụkpu ndiche ono; onye ọkpa iya ẹphenebo dutaru je ẹka dụ ẹnya; o je eburu bụru onye byaru abyabya. ⁸ ?Bụ onye kabẹ chọaru Taya ẹjo idzu ọwa? Mbụ mkpụkpu ono, ekpubeje ndu ọzo okpu-eze ono; mkpụkpu, ndu agba oke-nghọ l'ime iya bụkota ndu-ishi ndu-ishi; ndu bụepho l'ẹphe agba nghọ bụru ndu mgboko l'ọpụ akwabẹ ùbvù. ⁹ Ọ kwa onye chọru iya dobe g'ọ dụ nno bụ Chipfu, bụ Ọkalibe-Kakọta-Ike; g'o gude mee g'eku-onwonye k'iphe, bụkpoo ndu nweru akpabiri kpua ẹpho l'alị; l'ookuzetakwaphọ iphe, bụkpoo ndu aakwabẹ ùbvù lẹ mgboko l'ọpụ.

¹⁰ Unu gbawarọ alị unu ophorokpo g'ẹka ẹnyimu Nayịlu byaru utso; unubẹ ndu Tashishi! Ọ tọ duedu onye nọ-chikwaduru unu ụzo. ¹¹ Chipfu machiwaru ẹka maberu eze-ẹnyimu; bya emee g'alị-eze ndu mgboko nmakọta jiiijijii. Ọ tųwaru ekemu sụ l'ọwa-a iphe, ee-me ndu Kėnanu; g'a tųko iphe, bụkpoo ẹka e meru; ọ nguru anguru, dụ iya nụ mebyishikọta. ¹² Ọ pfuru sụ: “Unu tee meekewa ẹmereme; unubẹ ndu Sayịdonu, bụ unubẹ ndu

Ọphu e gweru uji nta! Unu gbalihunu daghata azu iya ọphuu jeshia ali Sayipuroso. Unu -jerwukpọnu ẹka ono be unu ta abyakpọkwanu atuta unme ọbu.”

¹³ Unu lekpodapho ẹnya l'ali ndu Babilonu; mbu ndu ono, adudu iphe, a guberu phe nta-a ono! Ndu Asiriya mewaru iya; ọ buru ẹka unwu anu, shi l'echiegu abyajẹ adoru. Epehe tsoru iya ọgu; bya eworu ulo, a kpushiru ike, du iya nu g'ọ ha tsukpọshia; mee ya; ọ buru ochobu.

¹⁴ Unu raa ẹkwa rashia ya ike; unube ugbo-mini ke mkpukpu Tashishi; kele mkpukpu, unu shi dakobe be e mebyishiwaru!

¹⁵ O -rwua teke ono be aa-zoha mkpukpu Taya no ukporo apha eto l'apha iri, bu iya bu iphe, eze anoje l'okwa eze iya. Ukporo apha eto l'apha iri ono -bvuepho l'ọ nwuaru ndu Taya g'ebvu ono, ndu agba ukpara aguje ono, suru:

¹⁶ “Wota ogumogu tsoru oma
mkpukpu ghaphechaa;
gube nwanyi-ukpara,
a zoharu azoha!

Kpo ogumogu obu
rengurengu;
gua ikpoto ebvu guru
ye iya;
k'ophu aa-nyata ngu
ozobakwa.”

¹⁷ Le-a; ukporo apha eto l'apha iri ono -bvuepho be Chipfu a-bya emee ndu Taya enweru iphe ozo. Epehe alaphu azu l'iphe ono, shi kwowaru phe ehuru ono, bu iya bu agba ukpara. O buru ndu epehe l'iya a-nodu eme iya bu ali-eze ndiphe l'ophu. ¹⁸ O le urwu, oo-rita; me ugwo, aa-pfu iya a-bukotaru iphe, ee-doberu Chipfu. O too dobedu iya l'oba; ophu o dudu ẹka ọochikobe iya. Urwu, o ritaru aburu ndu aa-nuje iya bu ndu no ndzu

nɔ-doru Chipfu; gɛ ndu ono nweru nri nweru ɔkpobe uwe; nweru iya k'etsutsu iya.

24

Aphu, Chipfu a-nu ndiphe l'ophu

¹ Lekwa! Chipfu abyakwa eme g'eliphe l'ophu dabyiru iphoro. Mbū mee ya g'ɔ būru ochobu. Oo-mebyishi iphu iya chikashia ndu bu iya nu. ² ɔ būru g'e meru onye bū g'ee-me onye! G'e meru ndu-uke bū g'ee-me nemadzū mmanū. G'e meru nnajī bū g'ee-me ohu. G'e meru ne nwe ɔlo bū g'ee-me nwamgbɔko, ejeru iya ozi. G'e meru onye ere erere bū g'ee-me onye azū azūzu. G'e meru onye jeru ejita ɔgwo bū g'ee-me onye jieru ɔgwo. G'e meru onye jeru ejita ɔgwo oke ntukwase bū g'ee-me onye ejie oke ntukwase. ³ Eliphe l'ophu bɛ ee-me g'ɔ dabyikɔtakporu iphoro; mbū mebyishikɔtakpoo ya g'ɔ ha. ɔ kwa Chipfu pfuru opfu-a l'onwiya.

⁴ Eliphe l'ophu agbanwūshihu agbanwūshihu anwū lwaalwaa anwūlwashihu. Mgboko l'ophu nɔdu atahū atahū anwūkwapho lwaa. Iphe, bū ndu eekutse l'eliphe nɔdu atahūkotakwapho atahū. ⁵ ɔ kwa ndu nɔ lɛ mgboko pharwūru mgboko; kɛle ɛphe jikaru eme iphe, ekemu pfuru; bya agbanwee iphe, a sūru g'e meje; bya emebyia ɔgbandzu ojejeje onoya. ⁶ Noo g'o gude ɔnu, Chileke tūru nɔdu ere phuruphuru lɛ mgboko. ɔ būru ndu bu iya nu e-vuta ɔnwu iya. ɔo ya bū lɛ ndu bu lɛ mgboko bɛ e kepyashikotawaru. ɔphu nwa ndu ɔphu phɔduru nu abaɛdu ishi. ⁷ Mɛɛ ɔphūú tashihuru. Vayinu ata mɛɛ nwukota lwaa. Iphe, bū ndu eme rigbarigba tsuaha pfupfufu.

⁸ ɛguru ɔda nkwa ono, ɛphe akū ono būru bugemu. Wɔwoowoo, ndu angū-sweshi onwophɛ iphu atū būru sūtukumu. Ogumogu ono, shi atso ikpoki ono daa

nyonyoronyo. ⁹ Ophu ephe abujeeduru; ephe -nodu angu mee; ephe agu ebvu-mee eye iya. Mee, atsu atsutsu nodu atsowa ndu angu iya nu ilu. ¹⁰ Mkpukpu ola-l'iswi ono dabyiwaru ophorokpo. Ulo onyemonye be a gu-chishichaaru agu-chishi g'o to du onye a-bahu iya nu. ¹¹ Ephe wushiru le gbororo ara g'a nu phe mee g'ephe ngu. Ehu-utso l'ophu toko gbahukota ochii. Ophu ete eswa aduedu l'eliphe mgburugburu. ¹² A haa mkpukpu ono; o buru ikpuzu. E woru oguzo, e shi yee ya gbua pyaapya. ¹³ Noo g'oo-du l'eliphe l'ophu bu ono. Nokwapho g'oo-duru ohamoha. Oo-du g'eka a nmaru oshi olivu yigayiga; ozoo ge nwantukantuka akpuru vayinu, phoduru l'eka a woru vayinu.

¹⁴ Ephe e-mechaa wolia olu tua uzu; mbu tua uzu ehutu. Ephe eshiro l'uzo enyanwu-adada tuta onu ge Chipfu paberu eka. ¹⁵ Oo ya bu ge ndu no l'uzo enyanwu-awawa jaa Chipfu ajaja. Ge ndu bukube eze-enyimu tukwaapho Chipfu ono, bu Chileke ke ndu Izurelu epha! ¹⁶ Anyi nodu anuro ebvu, a -gbu l'eka igwe beru ali beru agu, asuje: "G'ajaja buru k'onye ono, pfuberekoto ono!"

Mbedua sukwanu: "Mu wufuakwaru! Mu wufuakwaru! Nshio kwa mu nshio! Ndu oderu-oye edeakwaru amadu eye! Ephe gudeakwa eregede ederu amadu eye!" ¹⁷ Nggiri; yee nsukutu; mekpoo igbudu tukokwaru kwaberu unube unwu-eliphe! ¹⁸ Onye numaru ukporo nggiri -gbalaaha l'o je adalahu le nsukutu. Onye -shikwanu le nsukutu nyifuta; igbudu atupyabe iya. Uzo-mini uzo-mini, nokota l'igwe ghekotawaru onu. Okpa-ulo mgboko l'ophu nodu angakota anganga. ¹⁹ Mgboko l'ophu gbawashihuwaru agbawashihu. Mbu le mgboko gbajahawaru ebo. Mgboko aphuwaa kpakpakpa aphushi iya ike. ²⁰ Mgboko

l'ophu angaakwaa phuphuphu g'onye mee l'atsụ. Ọtu kpekengu kpekengu g'ụlo, bvuru l'ẹka oke pherephere ezi. Mbụ l'ẹjo-iphe, o meshiru bẹ ikpe iya nmarụ iya nmashia ya ike; k'ophu bụ l'ọo-da darwua alị; ọphu ọogbalihubaedu.

²¹ O -rwua mbọku ono bẹ Chipfu a-hụ ndu nọ l'ephekerephe ahụhụ k'iphe-ẹji, ẹphe nọ l'ẹka dụ ephekerephe mee; hụkwapho ndu eze, nọ l'eliphe ahụhụ kwaphọ. ²² Ee-rwukọbe phẹ l'ẹka lanụ g'onye rwukọberu ndu mkpọro l'ọka-mkpọro. L'a tų-chia phẹ l'ọka-mkpọro ọbu parụ haa. A -nọephe ujiku olemole l'e je ahụa phẹ ahụhụ. ²³ Noo teke iphere a-dụ ọnwa; l'e meru ujikputeru nụ ẹnyanwu. Noo kẹle Chipfu, bụ Ọkalibe-Kakọta-Ike a-buru eze l'eli úbvú Zayọnu yẹfua lẹ Jierúsalemụ. O je l'egoshi ndu bụ ọgerenya mkpụkpu ọdu-biribiri iya.

25

Etu Chipfu ẹpha

¹ Gube Chipfu;

ọ bụ ngu bụ Chileke mu.

Mu a-nọdu ekutse ngu;

eku ẹpha ngu gude aja
ngu ajaja.

Noo kẹle i mewaru iphe,

dụ biribiri.

Iipfushije ike l'iphe,

ị chịru idzu iya e -shi
teke ndiche;

² kẹle i mewaru mkpụkpu;

ọ buru ikpọzu;

mbụ mee mkpụkpu,

a kpụ-pheru igbulọ

mgburugburu;
 Ọ bụru ọla-l'iswi.
 Ẹka ndu ọhozo kpuru;
 Ọ nguru anguru bẹ i mewaru;
 Ọ bụru ẹka mkpụkpụ
 adụedu;
 Ọphu a byadu emezibaa
 ya jasụ l'ojeje.

³ Noo g'o gude Ọha ike dụ je
 a-nọdu akwabẹ ngu
 ùbvù.

Ndu mkpụkpụ ono,
 ndu bu iya nụ bụ ndu
 ewebushi akụrepho ono
 a-tụko wata ngu eyeru
 nsọ.

⁴ Ọ kwa ngu shikpọo eshinu
 bụru onye ndu adudu
 g'ọ dụ phẹ anọduje l'ẹka
 ezeru ndzụ.

Mbụ l'ị bụ onye abụjeeru;
 iphe -nọdu atsụ nemadzụ
 l'ẹhu l'ọ gbaba ngu l'ime
 je anọdu zeeru ndzụ.

Ọ bụru ngu bẹ aagbabajẹ
 l'ime je anonyabe mẹ
 oke phẹrephere nọdu ezi;
 mbụ l'ọo ngu bụ ìbvù
 onye okpomọku ekpo;
 kẹle mkpawere ndu
 ewebushi akụrepho
 dụ g'ẹka oke
 phẹrephere eme g'o

nwutsua igbulọ;
⁵ bya adụkwapho
 g'okpomọku, ekpo l'alị,
 mini adụdu.

Ọ bụ ngu emeje gẹ ndu
 ọhozo,
 atụ kwokwokwo dobe
 ọnu doo.

Ọo g'ìbvù, shi l'urwukpu
 atuzetajẹ okpomọku-a
 bụ g'ìbyanyije erwu
 úbvù ndu ewebushi
 akụrepho.

Nri Ọbo-iphe, Chipfu e-shiru ndibe iya

⁶ Ọo l'eli úbvù-a bẹ Chipfu, bụ Ọkalibe-Kakọta-Ike a-nọdu kua ndiphe l'ophu oku iphe-eriri, tsuru ẹba; gaaru phẹ mẹe ndiche; mbụ shiaru phẹ anụ, bụ anụ, ụmi jiru ejiji; yẹe mẹe, doru ẹrwu. ⁷ Ọzo bụ l'ọo l'eli úbvù-a bẹ ọo-nọdu mebyishia phulaphula ẹkwa ono, e gude phukputechaa ọhamoha ono; mbụ ukpo ono, e gude phụ-chia ọha l'ophu onoya. ⁸ L'o mebyia ọnwu lwụa ya ree jasụ l'ojejeje. Mbụ lẹ Nnajiuphu, bụ Chipfu l'e-hushi onyemonye ẹnya-mini l'ẹnya. Iphe-iphere ono, e shi eme ndibe iya ono bẹ oo-me g'ọ bvụkota l'eliphe mgburugburu; kẹle ọo iphe ono bẹ Chipfu pfuru.

⁹ O -rwua mbọku ono bẹ ẹphe a-sụ: “Lenu! Ọ kpọkwaa Chileke anyi baa. Anyi kpọru obu yeru iya; ọ dzọo anyi. Onye-a bụ Chipfu; anyi kpọru obu yeru iya. G'ẹhu tsọo anyi! G'anyi teje ẹswa l'ọ dzọru anyi!”

Aphụ, Chipfu a-nụ ndu Mówabu

¹⁰ Kẹle ẹka Chipfu a-dụkwa l'eli úbvù-a. Mbụ lẹ ndu Mówabu bẹ aa-zọ tọlitoli l'ibe phẹ ẹgube ono,

aazọje ẹswa ekperema pyakapyaka l'ikpọzu ono. ¹¹ Ẹphe a-chịru ẹka labọ tũkaa g'onye ebvu mini, tũkaru ẹka l'eli mini ebvu mini onoya. Tẹme l'ọ bya emee g'eku onwophẹ ono lwa phẹ alị; g'ẹphe amahabe ẹrengete iya. ¹² Ọo-byazeta phengarangu igbulọ ono, unu kpuru; ọ nguru anguru ono. Oo-me iya l'ọdukpoo mkpulalị ọkpobe adudu; mbu l'oo-wozetakpọ ya alị ọkpobe ewozeta; mbu worwua ya alị gẹdegede kpọ.

26

Ebvu Ajaja

- ¹ O -rwua mbọku ono; waa ebvu,
aa-gu l'alị ndu Jiuda baa:
“Anyi nweru mkpukpu,
shihuru ike.
Ọ buru ndzọta bẹ Chileke
gude kpụ-pee ya
mgburugburu g'igbulọ.”
- ² Unu guhaa ọzo mkpukpu
ono ghebe ọnu;
k'ọphu ọha ono,
pfunberekoto ono,
bu ndu apfunshije ike l'iphe,
ẹphe pfuru ono abahu.
- ³ Ii-kebe iya l'oma; mbu onye ono,
uche iya du l'eka i no;
opfu l'ọ kpọru obu yeru
ngu ono.
- ⁴ Unu kpọru obu yeru Chipfu
jasu le tuutuutuu le mimiimii;
kele Nnajjoha,
bu Chipfu bu oke agbara
mkpuma ojejeje.

⁵ Ndu woliru onwophẹ eli
 bẹ o kuzetaru;
 bya emee gẹ mkpụkpu, a kpuru;
 ọ ha ephekerephe
 ephekerephe lwazetakpọ
 mkpulali;
 mbụ l'o gwerụ iya
 pyakapyaka jasụ o rwua ali;
 o woru iya gwọo
 l'urwuku.

⁶ E gude ọkpa azọ iya tọlitoli;
 mbụ ọkpa ndu e shi
 emekpa ẹhu;
 mbụ ntụ-ọkpa ndu adudu
 g'ọ dụ phẹ.

⁷ Ụzo, ndu pfụberekoto
 eshi pfuru nhamụnha.

Sụ-a; gube onye obu guru
 ìphóró;
 ọo ngu meru ụzo ndu
 pfụberekoto;
 ọ nọdu akwọ tẹretere.

⁸ Gube Chipfu;
 anyi nọkpoephe eme iphe,
 ekemu ngu pfuru;
 gude nno daa gbẹe
 ngabẹru ngu.

Ẹpha ngu;
 yẹ ẹngiringa ngu bụ iphe,
 aduje anyi ree l'obu.

⁹ Oghoroko ngu aduje mu
 l'ẹnyashi.

O -be l'ụtsu l'ọ dukwa mu phọ

g'asụ ịe mu hụmaru
ngu.

Teke i kpeerupho
ụnwu-eliphe ikpe;
ndu bu iya nụ amaru iphe,
bụ apfubekoto.

¹⁰ Ndu ejo-iphe abujeru;
e -mechakporu phe
eze-iphe-oma;
ephe ta anwutadu iphe,
bụ apfubekoto.

Ephe -nouchakponu l'ali
ndu obu phe guru iphoro;
ephe emele-a iphe,
bụ iphe, apfuduru-oto.

Ephe ta akpadu ishi kele
Chipfu paru eka.

¹¹ Gube Chipfu;
ị paliwaru eka ephekerephe;
obenu l'ephe ta ahumaduru
iya.

G'ephe humanu g'opfu-ehu
ndibe ngu aphu-beru
ngu l'ehu;
g'iphere adu phe!

G'oku, duru ndu ohogu ngu
tsupyashikwaa phe!

¹² Gube Chipfu;
o bu ngu e-me ge nchi
du anyi doo.

Iphe, bukpo iphemiphe,
anyi meru bukota ngu
be meru iya nụ anyi.

13 Gụbe Chipfu, bụ Chileke anyi;
 ndu bụ nnajịuphu ọzo,
 abụdu gụbedua shiakwa
 bụru nnajịuphu anyi.

Obenu l'ọo gụbedua kpoloko
 bẹ anyi akwabẹ ùbvù.

14 Ndu k'ono nwụhuakwaru;
 ẹphe ta anọekwa ndzụ.

Ndu maa, lashịwaru nụ;
 ta alwajeekwa azụ.

I hùru phẹ ahùhù; mee phẹ;
 ẹphe bụru ọla-l'iswi;
 bya emee phẹ g'a ta
 nyatajẹhe phẹ anyata ophu.

15 I mewaru ndu ndu-anyi;
 ẹphe ka igwerigwe;
 gụbe Chipfu.

I mewaru ndu ndu-anyi;
 ẹphe ka igwerigwe.

I shi ẹgube ono mee
 onwongu;
 a kwabẹahaa ngu ùbvù;
 gụbe onye kpọribecharu
 oke alị ono l'ophu.

16 Mbụ-a Chipfu;
 ọ kwa ngu bẹ ẹphe
 gbapfutaru teke iphe atsụ
 phẹ l'ẹhu.

Teke ìhù phẹ ahùhù bẹ ẹphe
 tųkoru wata ngu araku.

17 Ọo gẹ nwanyị, dụ ime;
 ime nọdu emewaa iya;
 anọduje aswịkposhi onwiya;

echi mkpu l'oome iya ẹhuka-a;
 noo g'anyi shi dụ nọdu
 ngu l'iphu; gụbe Chipfu.

¹⁸ Anyi shi dụ ime;
 anyi nọdu aswịkposhi
 onwanyi l'ẹka oome
 anyi ẹhuka.

E mechaa; ọ dụ g'anyi nwuru
 pherephere;
 mbụ l'anyi ta adudu ike
 dzota unwu-eliphe;
 ọphu ndu buchiru mgboko
 adaduru.

¹⁹ Sụ-a; ndibe ngu,
 nwuhuru anwuhu
 e-mechakwaa nọdu
 ndzụ ọzo.

Ogwẹhu phẹ e-teta gbalihu.
 Unubẹ ndu bu l'ime urwuku;
 unu gbalihu rwua okwe
 ẹhu-utso.

Iji, akwaru unu dukwa g'iji,
 akwa lẹ nchi-abọhu.

Mgboko e-mechakwaa
 chifutagbua ndu shi
 nwuhuhawa nụ,
 dụ iya l'ime.

Adzọ ndu Ízureẹlu ndzụ

²⁰ Ndu mu; unu tųgbua bahụ l'ụlo unu je agụ-chia
 onwunu ụzo! Unu domia onwunu nwanshii; jasụ oke
 ẹhu-eghu iya adazeta; ²¹ kele-a; unu lenu! Chipfu shiakwa
 ẹka o bu eje afuta; g'ọ bya ahụa ndiphe ahụhù k'iphe-ẹji,

ẹphe meru. Mgboko l'ophu e-kpofutakọta ndu e gburu l'ime iya; ọpflu oodomiẹdu ndu a nọ iya l'ime phushia.

27

¹ O -rwua mbọku ono bẹ Chipfu e-gude ogu-echi, aha gengugengu. Ogu-echi, parụ ẹka bya adu ike bẹ oo-gude hua ẹjo-oke-agiyi ono ahùhù; mbụ ọkpụ-wuruwuru ono, bụ agwọ; ẹjo-oke-agiyi ono, bụ iya bụ nwoswi nggẹgeringge agwọ ono; mbụ l'ẹjo anụ, bugbaa lẹ mini bẹ ọo-phushichaa tẹterii.

² O -rwua mbọku ono bẹ Chipfu e-pfu sụ: “Unu gụa ebvu nụ opfu-vayinu ono, eye mebyi ntumatu ono.

³ O kwa mube Chipfu eleta iya ẹnya. Mu agba iya mini mkpụrumkpuru. Mu nọdu eche iya nche eswe l'enyashi; g'ọ tọ dụ onye e-mebyi iya nụ. ⁴ Ehu te eghujekwa mu egbu. O -bukwanuru l'e woru obvu obvu yee mkpọ mkpọ tọ-chishia mu ụzo; mu azọo ya ọkpa ghata mē a -nọdu l'iphu ọgu; chiru phẹ ye l'ọku g'ọku kee. ⁵ Odumeka; g'ẹphe gbapfutaēle mu-a bya anọdu mu l'ẹka zee ndzụ. G'ẹphe byalẹ-a gẹ mu l'ẹphe doshia; g'opfu ta aduheru mu l'ẹphe.”

⁶ E-mechaa l'uzo iphu; bẹ oshilọkpa Jiéọpu e-mechaa gbaa ọgbarabvu. Mbụ lẹ ndu Ízurelu e-mechaa tụa ige; phọo ishi; mịa amimi gude mebyi mị-jia mgboko l'ophu.

⁷ Mbụ-a; iphe, Chipfu chiru iya; ?ọ hakpọwanu g'ọpflu o chiru ndu chiru iya iphe? ?E gbubekpọwaru iya nụ g'e gburu ndu gburu iya nụ? ⁸ Iphe, o gude baarụ iya mba bụ l'ọ harụ; e tsoo ya ọgu kpua ya lẹ ndzụ; mbụ ọ buru ẹjo pherephere, shi l'uzo ẹnyanwu-awawa bẹ o gude bya agụ-lia ya. ⁹ Wakwa g'ee-gude byachia ikpe, nmarụ oshilọkpa Jiéọpu baa; tẹme ọ bukwaru iya phọ a-buru mebyi, ọ mịru, bụ iya bụ l'ee-huchafu iphe-ẹji iya: Teke oo-gwe mkpuma ẹnya agwa iya rwukuru-rwukuru

g'onye egwe ndzú. Itso Ashera taa duedu; ophu enya eka aakpoje unwù-isensu oku aduedu ophu apfukwaduru nu.

¹⁰ Noo kele mkpukpu, a kpushiru ike dabyiwaru iphoro. O buru ochobu egu mbukobe; buru eka a gbadoru g'echiegu, adudu onye bu iya nu. O buru eka ono be aanoduje eche eswi; bya aburu eka aadobeje iya; o nodu ata ekali-oshi, du iya nu l'oburu echachi.

¹¹ Teke ekali iya ono kpohuru nku l'eegbushia ya. Unwanyi abya evuta iya jeye l'oku; kele ndu-a bu ndu enwedu egomunggo. O buru iphe ono meru g'o gude ophu imemini phe adudu onye meru phe nu; mbu ophu o dudu iphe-oma, oo-meru phe me ililekpo.

¹² O -rwua mboku ono be Chipfu e-shiepho l'onu enyimu Yufuretisu tutukoo ndibe iya g'onye atutushi eswa l'ereshi; gbiriri jasu le nggele Ijiputu. Mbu l'unube ndu Izurelu be aa-nodu atutukobe nanunanu. ¹³ Mboku ono be ee-gbu eze opu. Ndu ono, no l'ali ndu Asiriya ala l'iswi ono; me ndu ophu a kpuru le ndzu laa ali ndu Ijiputu; a-tuko lwakobe bya abaaharu Chipfu eja l'ubvu, du nsu ono, no le Jierusalemu onoya.

28

Aphu atsoru ndu Ifuremu

¹ Nshio mkpukpu Sameriya, bu okpu-eze ono, ndu Ifuremu gude eku onwophe ono; gude iya angughajeru me eka ono! Nshio eguru okoko ono, anwawa anwanwa ono; mbu okoko, bu iya bu eguru iya; bya aburu ogbunwiiinwii ya ono, a tu-koberu l'ishi nsuda, emehuje iphe ono! Nshio mkpukpu ono, ephe egudeje eku onwophe; mbu ndu me kwatsuru ono! ² Lenu; Nnajiuphu nwekwaru onye okpehu du shii; teme o shihu ike. Oo-gbalikpo ya pho byia l'ali ke gbaa; g'eka a turu

akamini; g'ẹka oke phẹrephere mebyishiru iphe; g'ẹka igwe ezi phẹrephere; edze oke mini, asọ gborogboro. ³ Okpu-eze ono, ndu Ifuremu gude eku onwophẹ ono; gude iya angughajeru mẹe ẹka ono bẹ ee-gude Okpa tee pyakapyaka. ⁴ Okoko ono, anwawa anwanwa ono; mbụ okoko, bụ iya bụ ẹguru iya bya aburu ogbunwịnwii ya ono, a tų-koberu l'ishi nsuda, emehuje iphe ono; l'a-dų g'akpuru oshi figu, chakeru achake. Ahuma, nemadzu ahuma iya; bya awotawa iya paru l'ẹka; bụwaa g'ọ wata iya eriri.

⁵ O -rwua mbọku ono bẹ Chipfu, bụ Okalibe-kakọta-ike a-buru okpu-eze, egbu nwịnwii; bya aburu okpu, l'eme phẹ g'ẹphe dų ùbvù l'ẹnya; mbụ nwa ndibe iya ọphu a kpų-phoduru lẹ ndzụ. ⁶ Sų-a; ọ Chileke l'a-buru onye a-nọdu eyeru onye-ikpe ẹka g'o kpee ikpe, pfuru ọto; l'ọ bụru iya a-buru onye angẹje ndu alwụ ọgu ike g'ẹphe nwufu ndu ọhogu phẹ ọnu-ọguzo mkpụkpụ.

Ndu uke yẹle ndu mpfuchiru Chileke, ngunukaru mẹe

⁷ Ndu ọwa akpọkwapho kulakula mẹe; tẹme ẹphe gudewaa angų mẹe, shihuru ike dakashihu. Sų-a; ndu-uke Chileke ẹphe lẹ ndu mpfuchiru Chileke ngwakwaru mẹe, shihuru ike; akpọ kulakula. Mẹe riakwaru phẹ ishi. Ẹphe nguru mẹe, shihuru ike akpọ kulakula. Ẹphe nọdu anọduje akpọ garigari m'ẹphe nọdu aphụ ọphulenyà. Ẹphe -nọdu epfu iphe, ee-me; ẹphe epfusweshi iya epfusweshi. ⁸ Iphe, bukpo teburu g'ọ ha bẹ ẹphe gbokotaru ẹgbo kpua; k'ọphu bụ l'ọ tọ dudu ẹka akpọduru iya idzu.

⁹ “?Bụ onye bẹ oome g'o zia iphe? ?Bụ onye bẹ oome g'iphe, oozii doo ẹnya? ?Bụ unwegirima nshị, aamifu ọnu l'era tọ; mbụ ndu bụ-wokwadu-a bẹ a nafuru phẹ era. ¹⁰ Kẹle ọ kwa ekemu bẹ e woru tų-kobe l'ekemu;

mbụ l'ekemu tų-koru l'eli ekemu. A bya akaa iphe l'eli iphe, a karų iphe; kaa iphe l'eli iphe, a karų iphe. E metọta l'ẹka-a; metọta l'ẹka phọ."

¹¹ Ọ kwa onye epfu l'ọnu-ọku yee onye epfu opfu-alị ndu ọzo be Chileke e-gude pfuru opfu nų ndu-a; ¹² mbụ ndu ono, ọ sųru: "Eka-a bų ọkpoku atųta unme; ge ndu ike bvuru nọdukwa iya tųta unme. Teme eka-a bųru eka atųta unme." Ọphu ephe angadųruro nchị. ¹³ Ọo ya bų l'opfu, Chipfu epfu eyeru phe a-bųru ekemu be e woru tų-kobe l'ekemu; mbụ l'ekemu tų-koru l'eli ekemu. A bya akaa iphe l'eli iphe, a karų iphe; kaa iphe l'eli iphe, a karų iphe. E metọta l'ẹka-a; metọta l'ẹka phọ; k'ọphu ephe e-jekwanų adaa idaphu-azų; meka iphe; dalahų l'ọnyà; l'aanmata phe.

Mkpuma, gude ọlo, a tọgboru l'úbvú Zayọnu

¹⁴ Ọo ya bų; unu nųmakwa opfu, Chipfu epfu anų unube ndu mgbonu! Mbụ unube ndu ono, bų ndu-ishi le Jierúsalemu ono! ¹⁵ Unu anọduje epfu ọkpu-ọnu ọkpu-ọnu sų: "Anyi l'anwųhu gbaakwaru ndzų; mbụ l'anyi l'alị-maa yeakwaru eka l'ekwo. Teke Ochi-gbaagbaa ono, e-dzuru ekameka ono rwuru be ọ tọ dųkwa iphe, oo-me anyi; kele ọo adzų ọka be anyi meru; ọ bųru iphe, anyi egudeje ezeru ndzų; ųghoshi l'onwiya bųru eka anyi ejeje je edomia onwanyi." ¹⁶ Wakwanų iphe, Nnajiųphu, bų Chipfu pfuru baa: "Lekwa; mu tọgboakwaru mkpuma l'úbvú Zayọnu; mkpuma, a hųwaru ama; bya abųru mkpuma, vu oke aswa; mkpuma, e doberu l'ishi eka o gude ọkpa-ọlo gudeshia ya ike; k'ọphu bų l'onye dakoberu iya nų ta abyadų anga anganga. ¹⁷ Ọo ikpe, pfuru ọto be ya e-me oshi ọnyeka. Ọ bųru apfųbekoto a-bųru iphe, e gude eme g'ọ pfuru nhamųnha."

Ọ bụru akamini e-kpota iphe ọbu, unu gude ezeru ndzụ ọbu; mbụ adzụ ụka. Mini abya asọpyabe ẹka ono, unu ejeje je edomia onwunu ono. ¹⁸ Ọgbandzu unu l'anwuhu bẹ tee vuẹduru ire. Ọphu ẹká, unu l'alĩ-maa yeru l'ẹkwo apfueduru. Teke o-chi-gbaagbaa ono, e-dzuru ẹkameka ono rwuru; l'oochita unu tọgbo. ¹⁹ Ọ tọ dukpodaa teke ọ bya; ọphu o zikọta unu. Ụtsu g'utsu; eswe l'enyashi bẹ ọo-byajẹ bya ezia zighata. Mbụ l'onye-ozia doru ẹnya bukwa ndzụ e-rwuta iya. ²⁰ Kẹle iphe-azẹe taa sụedu nemadzụ azẹe lọchia onwiya alọchi. Ukpo apaa gbẹrere k'ọphu ọ tọ sụedu nemadzụ aphụ onwiya. ²¹ Noo kẹle Chipfu a-gbalihu g'ọ gbalihuru l'eli úbvú Perazimu. Ẹhu eghuahaa ya egbu g'o ghuru iya lẹ nsụda Gibiyonu. Noo teke oo-je ozi iya; jee ya g'o to jejehaadaru iya; mbụ mee ụngara nkiya g'o to mejehaadaru iya.

²² Nta-a bụ lẹ-a; unu hakwa agba mgbonu; ọdumeka bẹ ee-mekwa g'ẹgbirigba unu kabaa unu anyị ẹrwa. Ọ kwa Nnajiuphu; mbụ Chipfu, bụ Ọkalibe-Kakọta-Ike bẹ pfuru mu sụ mu l'a tų-buwaru l'ee-mebyishi alĩ-a l'ophu.

Mmamiphe Chileke

²³ Unu ngabẹ nchị nụma olu mu! Unu gebekpọdapho nụma iphe, mu epfu! ²⁴ Teke onye akọje opfu akọshi ẹka ọo-nma iphe; ?Ọonoduje akọpho Ọkoro nno eje tọo? ?Bụ iphe, Ọonodujeepho eme bụ egbukpọshi bẹ Ọonodujeepho egbukọshi alĩ akpa iya ẹja eje tọo? ²⁵ Ọ -kọchaa ya kpasaa ya; ọ dų ree; ?tọo ghajẹdu iya akpuru dilu; ghaa akpuru kọminu; kua ya witi l'ẹka rwuberu iya nų; ghaa balị l'ibiya ọphu a karu iphe; bya aghaa ereshi-supelutu l'okoke alĩ iya ọbu? ²⁶ Ọ bụru Chileke iya anọduje egoshi iya iphe, oo-me; bya abukwaru iya phọ anọduje ezi iya iphe, bụ: o -mee ya; l'ọ bụru

Ọkpobe iya. ²⁷ E tee gudejekwa mgborígwè, eegudeje echi ereshi echishi akpuru dilu. Ọphu eegudejedu ọgba-kperekpere-nzoshi-iphè ewephe l'eli kọminu. Akpuru dilu bu oshi be eegudeje echishi iya. Ọ buru mgboro be eegudeje echishi kọminu. ²⁸ ?Eegwepyashije witi egwepyashi tọo? Waawakwa. E te egwejedu iya ngwe lanu. Ọobujeru; e -wechaa ya ọgba-kperekpere-nzoshi-iphè; l'ọ phushia ya eswa; ọle o too gwepyakwanu iya egwepya. ²⁹ Iphemiphe ono bukotaru onye o shi l'eka bu Chipfu, bu Ọkalibe-Kakota-Ike. Iphe, ọotu-beje k'ememe du biribiri; mmamiphe iya be pakwaru eka.

29

Nshio mkpukpu Jierusalẹmu

¹ Nshio Ariyẹlu; gube Ariyẹlu; mbu mkpukpu ono, Dévidi shi buru ono! Unu guru apha ye l'apha. Unu boo ọbo-iphè bogbabe mgburugburu. ² Obenu le Ariyẹlu be mu e-me g'o jee iphe-ehuka. Ọo-gu aphu kwashia enyaminini. Ọo-due mu pho g'eka aakpoje ngweja oku l'oru-ngweja. ³ Mu e-keru ngu ọgu kephee ngu mgburugburu; woru ose-ọgu buphee ngu mgburugburu. ⁴ Ee-wozekpo ngu ali k'ọphu ii-nodu l'ali aka gberegbere. Olu ngu eshi l'ali adafuta nwiphiphe. Mbu l'ii-nodu l'ali epfu nwa hohoho ge nwamaa. Ọ buru l'ali be ii-ze; olu ngu obu ada nwa rwirwirwii.

⁵ Ndu ohogu ngu, dukpoo igwerigwe be ee-gwe uji g'urwuku, du nukuru nukuru. L'e mee igwerigwe ndibe ngu, ewebushi akurepho; ephe etsu dududu g'eswa ereshi. Teke ono teke ono; mbu a -bya amaru; ⁶ be Chipfu, bu Ọkalibe-Kakota-Ike e-me phereketeke. Ọ -nodu abya l'ọ tu egbigwe; ali anma jiiijiii; ekameka aphu tititi; oke pherephere ezi; oke mini edze; oku, anodu enwu phoophoo; ekepyashi iphemiphe. ⁷ Noo teke ikpoto

Ọha, a-nọdu etso Ariyẹlu ọgu a-wufuta; ẹphe etsoo ya ọgu; mẹkpoo ọlo, a kpụshiru ike, dụ iya nụ; nọ-pee ya mgburugburu. Ọ -nọdu eme l'ọ dụ iya gẹ nrwọ; g'ọ bu ọphulenyanya bẹ ọophu l'enyashi. ⁸ Ọo-dụ g'ẹka onye ẹgu agụ rwọru nrwọ gẹ ya eri nri; o tehushia; ẹgu nọdu agụ iya rọ l'ẹka ọogu iya; g'ẹka onye ẹgu-mini agụ rwọru nrwọ ẹka ya angụ mini; o tehushia; ẹkpiri kpọhukwa iya phọ nkụ g'ọ kpọhuru iya; kẹle mini ọbu agụle iya phọ g'ọogu iya. Noo g'ọo-dụ ikpoto ọha l'ophu, etso úbvú Zayọnu ọgu bụ ono.

Iphe, e-me ndu ta angaduru Chileke nchị

⁹ G'ọ tufukwaa unu ẹhu! G'ọ dukwa unu biribiri! Unu watakwa atsụ ishi! Unu ba aphụhekwa ụzo! Gẹ mẹe, unu anguduru watakwa unu atsutsu! Unu awata akpọ garigari l'ẹbe unu angụ mẹe, shihuru ike! ¹⁰ Chipfu meakwaru g'oke mgbenya tū unu. O kechiakwaru unu ẹnya; unubẹ ndu mpfuchiru Chileke; o kpuchiwaa unu ishi; unubẹ ndu aphụ ọphulenyanya. ¹¹ Ọphulenyanya-a l'ophu ta adukwa iphe, ọ bụ unu. Ọ dụ-a unu g'opfu, e pfuru dee ya l'ekwo woru nyachia. Teke i wokwanụru ẹkwo ọbu nụ onye maru agụ ẹkwo bya asụ iya g'ọ nggẹ gụa jiko; iphe, oo-pfu bụ lẹ ya taa dukwa ike agụ iya. L'a nyachikwaru iya anyachi. ¹² Ọzoo l'i woru ẹkwo ọbu nụ onye amadụ agụgu bya asụ iya: “Nggenu gụa jiko.” Iphe, oo-pfuru ngu bụ: “Mu ta amakwa g'aagụje ẹkwo.”

¹³ Sụ-a; wakwa iphe, Nnajiuphu epfu baa: “Ndu-a buepho epfufu bẹ ẹphe epfujeru mu l'ẹphe nọ mu ntse. Ọ bụru eli ọnu bẹ ẹphe gude akwabẹ mu úbvú. Obenu l'obu phẹ nọgbaa mu ụzenya. Ebvụ, ẹphe atsụ mu bụ iphe, ẹphe gude eme iya bụ ekemu, nemadzụ tūru. ¹⁴ Ọo ya bụ lẹ-a; mgbo lanufua bẹ mu e-mefu-a ndu-a iphe, a-dụ phẹ ebvụ l'ẹnya. Mu e-me iphe, dụ biribiri tū-kobe

l'iphe, dū biribiri. Mmamiphe ndu maru iphe bẹ a-la l'iswi. Nkwamẹnya ndu iphe edoje ẹnya edomia onwiya edomi.”

Ele ẹnya l'iphu a-ka ree

¹⁵ Nshio unubẹ ndu ono, ejeje l'ẹka dū omilomi je edomia iphe, ẹphe chiru idzu ememe; domia ya gẹ Chipfu ta ahuma iya; ndu anọduje l'ochii eme iphe, ẹphe eme ariro su: “?Buro onye humaru anyi? ?Buro onye amaru iphe anyi eme?” ¹⁶ Unu ewojeru iphe gha igharaphu g'onye ari l'ọ-kpu-ite a-du g'urwa, o gude akpu ite. ?O duru teke iphe, e gude ẹka mee a-su onye meru iya nu: “?O to bukwa ngu meru mu?” ?O duru teke ite a-su ọ-kpu-ite: “?O to dukwa iphe, i maru g'eeme?”

¹⁷ ?O to dukwa g'ọo-nọ-beru l'e woru úbvú úbvú Lébanonu mee g'ọ buru ali, iphe emehuje; ali, iphe emehuje abya ezee dū g'oswa.

¹⁸ O -be mboku ono bẹ ndu ada nkuchi a-numachaa opfu, e deru l'ekwo ono. Ndu atsu ishi ahumachaa iphe l'ime ochii, gbaru tsukiribaa. ¹⁹ Ndu wozeru onwophe ali bẹ a-nodu l'ẹka Chipfu ẹhu atso phe utso. Mbule ndu adudu g'ọ dū phe a-nodu l'ime Onye Nso ke ndu Izurelu ete ẹswa. ²⁰ Ndu ewebushi akurepho a-chihu; ndu mgbonu taa duedu; ndu nweru ẹnya eme ẹjo-iphe l'eenwutsushikota phe g'ẹphe ha; ²¹ mbu ndu egudeje onu mee g'ikpe nmaa nemadzū l'iphe, iswi dū iya mma; woru ọnya gbaaru onye agbaru nemadzū ọdzori l'ulo-ikpe; gbaa ekebe ugho jasū l'e woru ikpe nma onye iswi dū mma.

²² Ọo ya bu le-a; wakwa iphe, oopfu anu onu-ulo Jiékọpu; mbu Chipfu ono, bu iya gbafutaru Ẹbirihamu ono. ?O suru-a: “Iphere taa aduekwa oshilokpa Jiékọpu ọzo; ọphu iphu agbachihuedu phe agbachihu

ozo. ²³ Teke ephe a-huma unwegirima, mu a-nu phe be ephe e-dobe-a ephe mu nsọ. Ephe ekwetakwapho l'onye nsọ k'oshilokpa Jiékpọ be du nsọ eviya. Ephe anmahu pyaapyaapya l'iphu Chileke ke ndu ízurelu. ²⁴ Ndu te ebvuduru ebvuru l'iphe ke Chileke aburu ndu iphe edoje enya. Ndu agu-phe aphu ekwe mee iphe, a suru g'ephe mee.”

30

Ogbandzu, enwedu ishi

¹ Wakwa iphe, Chipfu epfu baa: “Nshio unube unwu ono, bu ndu ejo-okpoma; mbu ndu anoduje eme iphe, abudu idzu mu; ndu ephe l'ibe phe achije idzu atugba buru nanu; ole ephe te egudekwanu Unme nkemu eme iya; ndu eme iphe-aji akube l'eli iphe-aji; ² ndu wufuru lashia ali ndu Ijiputu l'ebe epfuru mu iya; ndu bu. Fero be ephe ele enya l'eka g'o yeru phe eka gbobuta phe g'o to du iphe, e-me phe nu; ndu gbapfuru ndu Ijiputu je anodu phe l'eka ezeru ndzu. ³ Ole egbobuta, Fero anodu egbobuta unu be iphere iya e-mechaa du unu; mbu l'eka ndu Ijiputu, unu gbabar; e-mechakwana tee unu ntu l'iphu. ⁴ A makwaru-a le ndu-a be ndu-ishi phe nowa le mkpukpu Zowanu; mbu le ndu ephe ziru ozi byarwutawaru mkpukpu Hanesu. ⁵ Ole onyemonye be ee-mekota g'ephe buru ndu iphere du. O buru iphe, akpa iya nu bu ndu ono, adudu iphe, ephe gude phe eme ono; ndu te eyeduru phe eka; ophu ephe abaduru phe urwu. O buerupho iphe-iphere yee iphe ata uta be ephe a-buru phe.”

⁶ Owaa bu ozi, Chileke ezi le k'ehu unwu anu, no l'echiegu ndohali: “Ndu ono, e ziru ozi ono wuru je aghaa ali iphe-ehuka yee mkpawere; ali, oke oduma; yee ne oduma bugbaa; eka okpontu; yee ejo agwo ozo bugbaa;

mbụ l'ephe vu ẹku phẹ l'okpurukpu nkapfu-igara; bya evuru iphe, vu oke-aswa phẹ l'okpurukpu inya-kamelu; evujeru oha, ta abaduru phẹ urwu; ⁷ mbụ evujeru ndu Ijiputu l'ebe abụ lẹ n-yemeka phẹ duru urwu, oobaru phẹ. Noo g'o gude ya kua ndu Ijiputu 'Eze-oke-agiyi O-nọ-ke-mmanu'."

Ndu kwefuru ike

⁸ "Jekwa ebyiaru phẹ iphe-a, mube Chipfu epfu-a l'okwekpu; mbụ dekwaa ya edede l'ekwo-aphupu; k'ophu abukwanuru; o-rwua l'iphu; l'o buru iphe-ekebe, a-nọ jasụ l'ojejoje. ⁹ Lẹ ndu-a bukwa ndu kwefuru ike; bya aburu unwu ẹregede; mbụ unwegirima, o too hedu ihee angabe nchi l'okwa, Chipfu anmaru phẹ. ¹⁰ Ephe nodu asuje ndu ophulanya: 'Unu ta aphuhekwa ophulanya ozobaa!' Bya asu ndu mpfuchiru Chileke: 'Unu te ekpuhajekwaru anyi iphe, gbaru anyi l'ememe! Unu pfujeru anyi iphe, atsọ utso anuma! Unu gbebejeru anyi mpfuchiru egbebe! ¹¹ Unu haaru anyi uto! Unu gbeshiru anyi l'uto! Unu ba byahẹ anyi l'iphu! Unu te epfuhuru anyi ke Onye Nso ke ndu Izurulu!' "

¹² Oo ya bu lẹ-a; wakwanu iphe, oopfu; mbụ Onye Nso ke ndu Izurulu: "Eshinu unu jikaru anuma ozi, mu ziru unu; bya asu l'oo mkpawere be unu a-chiru upfu kwee; bya akporu obu ye l'eregede; ¹³ be iphe-aji ono a-buru unu igbulọ, ha ephekerephe, gbaru oru; teme o nodu ada adada; g'ejia epfua; o dawanu teke ono teke ono. ¹⁴ Oo-kukposhihu g'onye kukposhiru ite-urwa; tukaa ya nanunanu ehuka ehuka; k'ophu bu l'ibiribe iya be a taa humadu g'o ka mma l'oo mkpebahụ iya g'e gude guta oku l'ovokoku; ozokwanu g'e gude kwota mini l'obvumini."

¹⁵ Wakwa iphe, oopfu baa; mbụ Nnajiuphu, bụ Chipfu, bya abụru Onye Nso kẹ ndu Ízurẹlu: “Ízimanụ -lwa unu azụ; unu daa ngabẹru mu; l'a dzọta unu. Unu -dakpọepho gbẹdemu bya adakobe mu; ike adu unu. Obenu l'ọ tọ dudu iphe ono, duru ọpụ unu meru. ¹⁶ Ọ bụchia iphe, unu pfuru bụ waawaa; l'unu e-nyikotachia inya gude gbala. Ọ bụru iphe ono meru g'o gude unu je l'agbala. Teme unu sukwapo l'unu a-nọdu l'inya ọkpa-egwa gude agbala. Ọo ya bụ lẹ ndu a-nọdu achi unu ọso ọbu a-bukwarupho ndu ọkpa-egwa. ¹⁷ Ụnu ụmadzu labo l'ukporo ụmadzu iri etsukahụje gbala mẹ onye lanu yee unu ebvu. Teke a du ise yee unu ebvu; unu atuko g'unu ha zeliu gbalaa jasụ nwa ndu a-phodu l'echilabo unu aduwa gẹ nwa itso, bvuru lẹ mkpakponu eze ubvu; mbụ gẹ nwa ekwa, akụ pẹpẹe l'eli ubvu.” ¹⁸ Ọle ọo-nodulekwa-a agụ Chipfu g'o meeru unu eze-iphe-oma. Ọo-gbalihule-a phuaru unu obu-imemini; kele Chipfu bụ Chileke, ekpeje ikpe, pfuru nhamunha. Ehu-utso be a goru nu iphe, bukpo ndu pfuru echeru iya nu.

Iphe-oma, Chileke e-meru ndibe iya

¹⁹ Su-a; unube ndu Zayonu; mbụ unube ndu bu lẹ Jierúsalem; unu a-kwata ekwa gberuma. Oo-mekwaru unu eze-iphe-oma; mẹ unu raa ekwa raku iya! Ọo ẹpho anuma, ọonuma iya; l'ọ za unu ẹnu. ²⁰ Nnajiuphu -nukponu unu nri mkponwu-ẹhu; bya echebe unu mini eje iphe-ẹhuka; e tee domieduru unu ndu ezi unu iphe; unu egude ẹnya unu gededede hụma pẹ. ²¹ ? Unu shiru ẹkutara-o; unu shiru ẹkicha-o; iphe, nchi unu a-noduepho anu l'azu unu a-buru: “Wakwa ụzo baal! Unu tsokwaru iya!” ²² Noo teke unu a-turwu nshi unu ono, a wuru mkpola-ochaa ono. Unu aturwukwapo ntekpe unu ono, e gude mkpola-ododo wua ono. Unu eworu

phẹ tuphashia g'onye etupha nkịrika-ekwa bya asụ phẹ: “Unu gbarụ ẹka laa!” ²³ Noo teke Chileke a-wata edzeru unu mini; edze iya ekpu l'iphe, unu meberu l'alị. Nri, aakọta l'alị emehuaha emehu; bya adụkwapho shii. Noo teke iphe-edobe unu a-wata akpa ntụsaru-ẹhu. ²⁴ Eswi unu; mękpoo nkapfụ-igara unu, bụ ọphu ejeru unu ozi ẹgu l'a-nọdu ata nri, a gwọ-phuberu agwọ-phube; pyashichaa ya únú; ọ bụru agọ-ézé yẹe shọvelu bẹ e gude gwọ-phube iya. ²⁵ Teke o rwuru mbọku ono, ee-gbu nemadzụ pyaapya ono; mbụ teke ono, ọje-ephekerephe e-zeshihụkota ono; bẹ mini a-wata asọ gborogboro gẹ nggele; shigbaa l'úbvú, ha l'eli asọshihu; shikwaphọ lẹ mkpogiji ọphu habe nwahabe asọshihukwapho. ²⁶ Ọnwa a-wata egbu nwịnwii g'ẹnyanwu; anwụ akabaa echishi ike eme lẹ g'oochi nta-a ugbo ẹsaa; mbụ l'ọo-nọdu echibe g'anwụ chiru ujiku ẹsaa l'ophu l'ophu; teke Chipfu e-pfubechaa iphe l'ẹka o mekarụ ndibe iya iphe; bya emee g'ónyá, o yeru phẹ kpọhukota.

Aphụ, Chileke a-nụ ndu Asiriya

²⁷ Unu lenu; Chipfu shi l'ẹka dụ ẹnya abya. Ẹhu-eghu iya nọdu enwu phuruphuru g'ọku; tẹme ọ nọdu akpụ tụtutuutu g'ẹnwuru-ọku. Ogbogboromonu iya bụ iphe, jiru iya nụ bụ oke-ẹhu-eghu. Tẹme ire iya bụru ọku, enwu phoophoophoo. ²⁸ Unme, ọotu atutu dụ gẹ mini, asọ gborogboro, byaru kụlakula bya awọru nemadzụ l'olu. Ọhamoha bẹ ọonmaje yigayiga; mbụ chiru phẹ ye lẹ n-yọ ọla-l'iswi. Ọ bya eworu iyagba-inya woru ye ndiphe l'asha g'o dughua phẹ. ²⁹ Noo teke unu awata agụ ebvu g'aagụje l'enyashi mbọku, unu abọ ọbo-iphe, dụ nsọ. Ẹhu atsọshikpoo unu ụtso ike gẹ ndu egbu opu eje l'úbvú kẹ Chipfu; mbụ agbara-mkpuma kẹ ndu Ízurẹlu.

³⁰ Chipfu emekwa gẹ nemadzụ nụma g'olu iya dụ-be akpabiri; mekwaphọ g'ẹphe hụma ọkpehu iya l'ẹka ooje alwa l'alị l'ẹka ẹhu-eghu iya enwu phuruphuru; tẹme o gude ọku, enwu phoophoophoo; bya edzekwaphọ oke mini, atụ aka-mini. ³¹ Olu Chipfu l'a-chikashi ndu Asiriya nanụnanu. Oo-gude mgboro-eze iya chitachaa phẹ tọgbo. ³² Teke Chipfu gude oshi-mpaleka iya ono, o gude anụ phẹ aphụ ono chia phẹ gbaa; ebvu aswoshihu; mbụ ebvu, aakụ nkwa eye; bya akpọ ogumogu eye iya; teke ono, ọo-nọdu etso phẹ ọgu echi phẹ ẹka gbaagbaa ono. ³³ Noo kẹle Tofetu shihawaa lẹ ndiche dụ. E doziwaru iya kwabẹru eze. Nsukutu ọku, dụ iya nụ bẹ e mewaru; ọ dụ omilomi bya adụ ọsa. Ọku yẹle nkụ kwatakporu paa ya ẹka. Unme, Chipfu turu ọru gborogboro g'ọku nshị-egbe sobata iya bya emee ya; ọ gbanwuhu ọku nwuahaa phoophoophoo.

31

Oshi, ayọru ndu kpọru obu yeru ndu Ijiputu

¹ Nshio unubẹ ndu ono, agba ala alị ndu Ijiputu eje achọ n-yemeka; ndu daphuberu inya; bya akpọru obu yeru ikpoto ugbo-inya, ẹphe nweru; yẹe oke ọkpehu dụ ndu ojogu phẹ, bụ ndu egudeje inya eje ọgu; ọphu ẹphe adabeduru ẹnya l'ẹka Onye nsọ kẹ ndu Izurẹlu nọ; mbụ ọphu ẹphe agbapfuduru Chipfu g'o yeru phẹ ẹka. ² Ọle ọ bụ; yẹbedua l'onwiya bukwa a onye maru iphe. Ọ nọdu ewotajeru nemadzụ ọla-l'iswi; ọphu oopfujedu opfu laa azụ azụ. Ọo-gbalihu tsoo ibe ndu ẹjo-iphe ọgu; mekpoo ndu anọduje eyeru ndu eme ẹjo-ememe ẹka. ³ Obenu lẹ ndu Ijiputu bụ nemadzụ; ẹphe ta abudu Chileke. Inya phẹ bẹ bụ anụ-ẹhu; ọ tọ bụdu maa. Chipfu -machiwaa ẹka bẹ upfu a-dụ-a onye eye ẹka. Onye eeyeru ẹka adaa gwoo. Ẹphenebo atuko laa l'ite lanụ.

⁴ Wakwa iphe, Chipfu pfuru nū mu baa: “Ọo g'oduma asuje ekiri; mbū g'oke-oduma asuje ekiri mē o -gbua iphe, oo-ri; m'obetakpoo e kua ikpoto ndu eche aturu; ephe tuko dzukoo g'ephe tsoo ya ọgu; mkpu, ephe tuko echi te emekpodanu ge ndzu gua ya; ophu uzu, ephe atū akposhidu iya iphe, oome-a. Noo ge Chipfu, bu Okalibe-Kakota-Ike e-nyizeta bya alwua ọgu l'eli ubvu Zayonu; mekpoo le mkpakponu ubvu ono. ⁵ Chipfu, bu Okalibe-Kakota-Ike e-kpuchita Jierusalemu g'enu, ephe l'eli. Oo-kpuchi iya; teme l'o nafutakwa iya pho; agbaru iya odzori, agbaru iya mkpu; g'o to du iphe, e-me iya nu.”

⁶ “Su-a; unube ndu Izurelu; unu lwaphutanu azu lwapfuta onye ono, unu kwefuru ike ono; ⁷ kele o -rwua mboku ono be onyemonye le g'unu ha e-mechakwaa jika nshi mkpola-ochaa ono; yee ke mkpola-ododo ono, unu gude eka iphe-eji unu mee ono. ⁸ Ndu Asiriya be ee-gude ogu-echi, abudu k'amadu gude gbushia; mbu o buru ogu-echi, abudu ke nemadzu mmanu be ee-gude gbufu phe. Ephe a-gba oso gbalaaru ogu-echi ono; l'a chiru unwokorobya phe ye l'ozi mkponwu-ehu. ⁹ Agbarike phe a-dakota; eka eeye phe ebvu. Ndu-ishi ndu ojogu phe -humaepho g'ogu obu eje ala; ephe agbado ekwa-ohubama phe phota oso gbalachaa.” Noo iphe, Chipfu pfuru bu onoya; mbu onye ono, kpoberu oku l'ubvu Zayonu; bya azube ota pfupfupfu oku le Jierusalemu ono.

32

Onye eze, pfuberekoto

¹ Unu lenu; o nweru eze, abyanu a-buru eze, pfuberekoto. Ndu-ishi iya aburu ndu ekpe ikpe, pfuru nhamunha. ² Onyemonye a-du g'eka edomi onwonye,

a nọ agbalaru pherephere; dukwapho g'eka anoduje ezeru ndzu l'eka oke-mini edze; dukwapho ge nggele, aso l'ali, mini adudu; dukwapho g'ononyo oke agbara mkpuma, nọ l'ali, adudu iphe, du iya nu. ³ Noo teke e tee meedu ge ndu aphu uzo phu-buhu uzo. Teme ndu anu iphe le nchi awata anga nchi. ⁴ Ndu iphe aduje egwegwa e nweru egomunggo. Ndu epfu l'onu-oku epfuaaha opfu gbururu; pfuaaha iphe, doru enya. ⁵ E tee kuhedu onyeswe onye a maru epha iya. Ophu akwabedu ejo nemadzu oke ubvu; ⁶ kele onyeswe epfuje mkpokoropfu. Egomunggo iya buepho ejo-iphe be onoduje ari. Iphe, onoduje eme ememe buru umere onye agubeduru Chileke iphe. Teme o nodu anoduje ezi ejo-nzi l'opfu ehu Chipfu. Ndu egu agu be oohaje; epe adabyiru iphoru. O to kejedu ndu egu-mini agu mini. ⁷ Umere k'onye ejo nemadzu bukwaru ejo-iphe. Iphe, ochije idzu ememe bukota ejo-ememe; g'o gude ntuphu-ire mebyishia ndu akpa nri; mbukpoo m'obetaru ndu ono, adudu g'o du phe ono nodu eyekpo onu, pfuru oto. ⁸ Obenu l'onye a maru epha iya achije idzu, a maru epha iya. O buru iphe, a maru epha iya, oomeje be oogudeje pfuru pfushia ike.

Unwada Jierusalemu

⁹ Unube unwanyi ono, nọ tusaru ehu; unu gbalihu ngaberu mu nchi! Unube unwada ono, ari l'o to dudu iphe, abya unu ememe ono; unu numakpodapho iphe, mu abya epfufu! ¹⁰ A -nopho apha ophu; tu-kobe iya iphe, ha nwanshi be unube ndu ono, ari l'o to dudu iphe, abya unu ememe ono a-wata anma jijijiii. Vayinu ta adudu mebyi, oo-mita. O to dudu iphe, aawota l'oshi-omi ililekpo. ¹¹ G'ehu nmakwaa unu anmanma; unube unwanyi, nọ tusaru ehu! G'ehu tekwaa unu

kparìkpari; unubẹ ụnwada ono, arị l'ọ tọ dudu iphe, abya unu ememe ono! Unu tọfukwa ẹkwa unu; chịta uwe-aphụ gbaphua onwunu l'upfu! ¹² Unu phukwaru yoo l'opfu ẹhu ẹgu ono, dū ùbvù l'ẹnya ono; mẹ kẹ vayinu ono, amije shii ono; ¹³ mẹ k'alì ndibe mu l'ophu; mbụ alì, bụ iphe, rwuchiru iya nū bụ obvu yẹe ẹwu-óbvú. Ee-o! Unu watakwa agụ aphụ l'opfu ẹhu iphe, bụkpoo ụlo, aanọduje abọ iphe; mẹ k'ẹhu mkpụkpu-a, aanọduje eme ẹmereme-a! ¹⁴ Noo kẹle unuphu ibe eze ono bẹ ee-mechaa gbado. Mkpụkpu ono, aatụ wọwoowoo ono adabyiru iphoro. Úbvú Ofẹlu; yẹe ụlo, a kpushiru ike, dū iya nū a-bụru ochobu jasuru; bụru ẹka dū nkafụ-ìgara-ọswa ree; yẹe ẹka eeche egu mẹ aturu; ¹⁵ gbiriri jasụ teke ee-shi l'eli wụa anyi unme Chileke l'ẹhu. Noo teke ee-woru echiẹgu mee alì, iphe a-nọdu emehuje; alì ẹka iphe emehuje abya ezee dū g'ọswa. ¹⁶ Ee-kpeahaa ikpe, pfuluru nhamunha l'echiẹgu; haahaa enge, pfuluru ọto l'alì, emehuje iphe, a kọru iya. ¹⁷ Mebyi, apfubekoto a-mì bụ lẹ nchì a-dū doo. Iphe, e-goshi l'a pfuluberekoto aburu l'ẹkameka a-da nyonyoronyo; meji anmapfuru onyemonye jasụ l'ojejoje. ¹⁸ Tẹme ndibe mu eburu l'unuphu ẹka nchì a-dū phẹ doo; l'unuphu, adudu iphe, byaru eme phẹ nū; l'ẹka ẹphe a-nọdu atuta unme; ọ tọ dudu iphe, akpọ-byi phẹ iya nū. ¹⁹ Mbụ l'igwe a-tu akamini gude tųpyashia oke ọswa; tųpyashia mkpụkpu ono l'ophu l'ophu. ²⁰ Ẹhu-utso bẹ a gọru nū unubẹ ndu ono, akụ iphe, unu akụ akụku l'ẹka mini dū; mbụ unubẹ ndu harụ eswi unu; yẹe nkafụ-ìgara unu; ẹphe nọdu akpa ntusaru-ẹhu.

33

¹ Nshio gube nwa mmebyi; l'ẹbe abụ l'o nweru onye mebyiru gubedua! Nshio gube nwoderu-oye; l'ẹbe abụ

l'ò dùru onye deru ngu ye! Ọ kwa: ì -haẹpho emebyishi; l'e mebyia gùbedua. Teke ì haẹrupho ederu nemadzù ye; l'e deru gùbedua ye.

² Gùbe Chipfu; menaarù anyi eze-iphe-oma! Anyi p̄fukwaru echeru ngu. Bùjenuru ike anyi l'ùtsu mbòku-mbòku. L'ì b̄uru onye ndzòta anyi; m̄e anyi n̄odu l'iphe-ẹhuka. ³ Ọobujeru; olu ngu -daẹpho g'egbigwe; ndiphe agbalacha. Teke i kwolihuru ekwolihu; ọhamoha agbakashìhu. ⁴ A kwaa ph̄e ọkwata rwukọo ph̄e g'ẹka ìnyarinya erwu ẹkwo; mbù gbaa ph̄e gorogoro g'ẹka igube wùbaru.

⁵ Chipfu b̄e goshiru l'ò parù ẹka; noo k̄ele o bu l'ephekerephe. Úb̄vù Zayọnu b̄e oo-me g'ò b̄uru iphe, e-ji iya n̄ù b̄ù ikpe, p̄furu nhamunha; ȳe ap̄fubekoto. ⁶ Ọo ya a-b̄uru onye e-me g'unu nguru anguru l'ogbo k'unu. L'ò dzòta unu ọkpobe adzòta; mee g'unu maru iphe; kwaa ẹnya. Ọ b̄uru atsù Chipfu ebvu a-b̄uru ẹku k'unu.

⁷ Lewarọ; ndibe ph̄e, b̄ù ndu ọkp̄ehu d̄ù l'echikwa mkpu l'oma gbororo. Ndu ẹphe ziru ozi, b̄ù ndu byaru g'e doshia op̄fu n̄odu akwa ntumatu. ⁸ Eze gbororo b̄e a gbadoakwaru; ọphu ọ d̄uedu ndu ije, eshijekwadù iya n̄ù. Ẹphe mebyiwarù ọgbandzu, ẹphe gbaru; ọphu ọ d̄uedu iphe, a gùberu ndu ekebe. Ọphu ọ d̄uedu onye aakwab̄ejekwadù ùb̄vù. ⁹ Alì-a n̄odu agù aphù edideshihu edideshihu. Iphere d̄ù ọswa, n̄ò l'ùb̄vù ùb̄vù Lébanọnu; ọ n̄odu anw̄ulwashihu anw̄ulwashihu. Ns̄uda Sharọnu d̄uepho g'echiẹgu ẹka mini ad̄udu. T̄eme oshi, n̄ogbaa l'alì Beshanu; ȳele ùb̄vù Kam̄elu n̄odu alaẹpho ẹkwo kparakpara.

Ọkwa, Chipfu anmarù ndu ọhogu iya

¹⁰ Chipfu bya eyee ọnu sụ: “Ọo nta-a bẹ mu a-gbalihu agbalihu! Ọo nta-a bẹ mu e-goshi lẹ mu parụ ẹka! ¹¹ Unu dū ime ẹswa ọkponku; ọ bụru oshi ereshi bẹ unu a-nwụ. Unme, unu atụ bụru iya bụ ọku, e-ke unu. ¹² Ọzo bụ lẹ ndu ono bẹ a-dụepho gẹ mkpuma layimu, a kpọru ọku; mbụ l'ọo g'e gbushije irwu obvu kùbe tsee ya ọku-a bụ g'ẹphe e-tsu gburugburu tsufu. ¹³ Unubẹ ndu bu ụzenya; unu nụmakwa iphe, mu meru! Unubẹ ndu ọphu bu ntse; g'o donaa unu ẹnya l'ọkpehu dū mu!”

¹⁴ Ndu iphe-ẹji, bu l'eli úbvú Zayọnu bẹ ndzụ-agugu rwutaakwaru. Ndu ta adudu iphe, ẹphe guberu Chileke nọdu aphuwaa kpaakpaakpaa epfu sụ: “?Bụ onye ole lẹ g'anyi ha bẹ yẹe ọku, enwu enwunwu e-buru? ?Bụ onye ole lẹ g'anyi ha bẹ yẹe oku, etsu ojejeje e-buru?” ¹⁵ Ọ kwa onye bụ onye emeje iphe, pfulu ọto; tẹme ọ nọdu epfuje iphe, pfulu nhamunha; onye ajikaje anata urwu, shi l'iphe, a nataru l'ike; tẹme ọ nọdu eselaje ẹka azu l'anata uphalazu; onye ta angabẹjedu nchi mẹ a - nọdu achi idzu g'ee-shi gburu ọchi; tẹme ọphu ọsajedu ẹnya hụma iphe, bụ ẹjo-iphe. ¹⁶ Noo ẹgube onye a-nọdu l'ephekerephe. Ọ bụru ẹka oo-buru zee ndzụ bụ l'ulo, a kpushiru ike l'eli úbvú. Ẹka ono bẹ aa-nọdu anụ iya nri. Ọphu ọ dudu teke ọ byaru achọ mini achọcho.

G'iphe a-dụ-be ree l'iphu

¹⁷ Gụbedua e-gude ẹnya ngu hụma onye eze ono g'ọ dū-be úbvú l'ẹnya; bya amaa ẹnya l'alị ono, nọru ogologo ono. ¹⁸ L'ị bya egude ọriri ngu bya alaphu azu l'akahu nggiri ono. Mbụ l'ị rịa sụ: “?Bụnaa awe bẹ onye ono, shi edeje okpoga-akiriko ono nọhunu? ?Bụhunu awe bẹ onye ọphu e shi apfujeru ego ọbu nụ nọ? Mbụ ? bụnaa awe bẹ onye ọphu shi agụ ulo-mgbobuta anyi ọgu nọnaa?” ¹⁹ Ị tịi hụmabaedu ndu ono, shi eku

onwophe ono ɛnya ahuma ophu; mbu ndu ono, opfu phe egbejeru egberu ono. Ndu atsu ntsu; ophu iphe, ephe epfu edojedu ɛnya. ²⁰ Lenaa ɛnya le Zayonu; mbu mkpukpu ono, anyi anoduje abo obo-iphe anyi ono! Iigudewarɔ ɛnya ngu huma Jierusalemu; mbu mkpukpu ono, bu: i -buru iya; nchi adu ngu doo ono; bya adu g'ulo, e meru l'ekwa, adudu onye byaru aphoriberu iya aphoriberu; ophu o dudu onye adu ike apho-lita itso iya apho-lita. Ophu o dukwapho eri iya ophu byaru agbabuhu agbabuhu. ²¹ L'eka ono be Chipfu a-buru Onyibe k'anyi. Eka ono a-du g'eka nggele du oša; ɛnyimu du iya oša. Ophu o dudu unwu ugbo-mini, nweru akwo-ugbo, byaru eshi iya nu. Ophu o dukwapho oke ugbo-mini, a byaru anga l'eli iya. ²² Noo kele oo Chipfu bu onye-ikpe k'anyi. Mbu l'oo Chipfu l'aturu anyi iphe, anyi a-nodu eme. Teme o buru Chipfu bu onye eze k'anyi. Oo ya bu onye a-dzota anyi. ²³ Eri, e shi kee gube ugbo toshihuakwaru. Oshi, gube ugbo gude nguru anguru duchaakwa wogowogo. Ophu ekwa-ugbo ngu adabyiekwaru potoo. Oo ya bu l'aa-kwa okwata, paru eka kee; mbu le ndu eniyeni a-kwachaa okwata. ²⁴ Ophu o duedu onye bu le Zayonu a-su: "Iphe emekwa mu." Teme iphe-eji ndu bu l'eka ono meru be aa-gukotaru phe nvu.

34

Aphu, Chileke a-nu ndu ohogu iya

¹ Unu kpitaru ntse; unube ohamoha; unu bya anumakpodapho! Unu ngabekpodapho nchi; unube ndiphe! G'eliphe l'ophu numakwa; iphemiphe, no iya nu anuma! Ge mgboko numa; iphemiphe, shi iya nu anuma! ² Chipfu be avukwaru ohamoha ovuma. Oke ehu-eghu iya be o tu-koshiakwaru ndu ojogu phe

l'ophu. Oo-mebyishikọtakwa phẹ g'ẹphe hakọtakpoo rengurengu. Oo-woru phẹ haa g'e gbushia. ³ Ndu nkephẹ, e gburu egbugbu bẹ aa-pajẹru tuphaa etupha. Odzu phẹ awata eshi ishi; mee phẹ atuko úbvú úbvú swongaa. ⁴ L'aphu akpaminigwe g'onye phuru utute. Kpokpode atuko adashihu l'alị g'ẹka ẹkwo vayinu, nwuru lwaa erishihu l'eri iya; mbu g'akpuru oshi figu, nọ l'oshi figu gbanwushihuru agbanwushihu dashihu.

⁵ Ogu-echi mu bẹ a nọkwa l'imigwe baa bata nkọ. Lekwa; a paakwaa ya apazeta gude abya anu ndu Edomu aphu; mbu ndu ono, bu ndu mu dochawaru edocha k'emebyishikọta rengurengu ono. ⁶ Ogu-echi Chipfu bẹ mee a-ngugukwa angugu. Iphe, e-ji iya nu bukwa ẹba-iphẹ. Mee unwu-aturu; yẹe mee eghe; waa ẹba-iphẹ, shi l'akpuru ebili aduchaa ya. Noo kẹle Chipfu abya egwe ngweja lẹ mkpukpu Bọzura; iphe, ee-gbu egbugbu paa ẹka l'alị ndu Edomu. ⁷ Atsu bẹ aa-tuko ẹphe l'ẹphe gbushikọta; mẹkpoo oke-eswi ndu ophu ha nwanshii; mẹ ndu ophu paru ẹka. Alị phẹ bẹ mee a-nọdu aso gborogboro; l'eegude ẹba-iphẹ gwọo urwuku l'ọoburu ẹpuchi. ⁸ Noo kẹle Chipfu nweru eswe agwata ugwo iphe; bya enweru apha, ẹjo-iphẹ onye meru a-vọ iya l'ẹhu; g'ooshi nno gbaaru ndu bu lẹ Zayonu ọdzori.

⁹ Nggele nggele, nọkota l'alị ndu Edomu a-wokota korota. Eja, du l'alị ono awokota oku-nshị-egbe. Alị ẹka ono l'ophu abukotaru korota, oku enwu taphutaphu. ¹⁰ O to byadu anyihu anyihu eswe l'enyashi; enwuru iya akpu tuntuutuu jasụ l'ojejeje. L'ọ buru ochobu dabyiru nno shi l'ogbo sweru ogbo. O to dudu onye byaru eshibaa ya ghatakponu aghata ọzobaa. ¹¹ Okpo-ngwere yẹe ebyi esweta iya l'ọ buru iphe phẹ; mbu lẹ mgbashị-ujiku yẹe okpoko-óhà akpashị ẹpfune l'ẹka ono. Chileke e-me alị ndu Edomu g'ọ du g'o shi du teke o meru eliphe

k'òphúú lẹ mbùlembu. ¹² Ndu oke amadu phẹ ta adùedu ẹka ẹphe enwekwaduru, bu ẹka eekuje ali-eze. Ndu-ishi iya g'ẹphe ha a-chihukota. ¹³ Ewu-óbvú erwuchia l'ulo-eli, du iya nu. Ole-karara yee egbara atuko ulo iya, a kpushiru ike zechia. Iphe, a-nodu akpa iya uri aburu nkuta-oswa. Mgbashi-ujiku eworu iya mee ibe phẹ. ¹⁴ Unwu anu, bu l'echiegu ẹphe l'achi-anmabu atuko edzudagbaa l'eka ono. Eghu-oswa araku ibe iya l'ora. O buru l'eka ono be mgbashi-ujiku anodukwapho atuta unme. O buru l'eka ono be ẹphe achotaru onwophe ẹka ẹphe a-nodu atuta unme. ¹⁵ Mgbashi-ujiku a-kpa ẹpfune l'eka ono nodu tushia ekwa. L'o kpua ya; vu a nodu l'eka ono kpupyabe phẹ lẹ nkù iya hee hetseshia. O bukwarupho ẹka ono be égbé e-dzukwapho okee lẹ nyee.

¹⁶ Unu jenu elee enya l'ekwo Opfu Chipfu; unu agua ya agugu. Unwu iphe ono ta adukwa me nanu aduphodo l'eka ono. Ophu o dukwa ophu byaru asu lẹ ya ta ahumaduru okee ozoo nyee ya; kele o kwa mbedua turu ekemu su l'onoo g'oo-du bu ono. Temе o buru Unme mu a-nodu erwukobe phẹ l'eka lanu. ¹⁷ Oo ya atuje g'oo-duru phẹ. O nodu egudeje ẹka iya tua ya atutu kee. O je aburu nkephẹ jasu l'ojejoje. Mbu ẹphe ebuwaruro l'eka ono gbẹ l'ogbo sweru ogbo.

35

Ehu-utso ndu a dzotaru

¹ Echiegu yee ali, adudu

mini,

du iya nu be ehu a-tso.

Mgbegu ali-evevee be a-wata

ete eswa mehuaha iphe,

e meberu iya g'eka

okoko jashiru.

² Mbụ l'ọo-jashikpoo
igwerigwe.

Ehu atsọo ya tsoshikpoo
ya ike;

l'o rwua okwe kpua ya.

L'e mee ya g'ọ dụ biribiri
g'úbvú úbvú Lébanonu;

dụ akpabiri g'úbvú

Kamelu;

yẹe nsuda Sharonu.

Ephe egude ẹnya phẹ

huma

ọdu-biribiri kẹ Chipfu;

mbụ akpabiri kẹ Chileke

anyi.

³ Unu menaa g'ẹka unu,
tsuru mее shihu ike.

Unu emee g'ikpere unu,
aphu kwẹekweekwee
nguru anguru.

⁴ Unu pfiaru ndu nweru obu
ndzu-agugu sụ phẹ-a:

“Unu shihu obu ike;
gẹ ndzu ba agushi unu.

Lẹ Chileke unu a-bya;

bya emelata nemadzụ iphe,
o meru onye ọzo.

Ọo-bya; bya adzọo unubẹdua
ndzu.”

⁵ Noo teke ẹnya a-sahụ ndu
atsụ ishi.

Nchị ndu ada nkuchi emee
phosangu.

⁶ Noo teke ndu ẹniyeni a-wata
azỌ garamu garamu
g'ele.

Ire agbụtosihhu ndu te
epfudu opfu;
ẹphe awata erwu okwe
ẹhu-ụtso.

Mini e-shi l'echiẹgu gbafuhu
sọaha kẹ gborogboro.

Tẹme nggele eshi l'ali,
mini te eshidu dụ gbafuhu
sọaha gborogboro.

⁷ Eja evevee,
l'ekpo phuruphuru
l'a-buru okpuru.

Ali, mini tahuru agbafushihu
ọgba buru nggele.

Ọ buru ẹka ono,
bụ nkuta-ọswa shi buru
iya ono
bẹ ẹswa e-fushi;
eji efushia ya;
ẹchara amishia ya.

⁸ L'a bya atọgbo iya eze
gbororo; l'e kua ya ụzo,
dụ nsọ.

Ndu aasọ nsọ te eshidu iya.

Ndu a-nọdu eshi iya nụ
kpoloko abụerupho
ndu ọ duru;
ọphu ndu eme eswe
aghaphedu l'ime iya.

⁹ Oduma taa nọdu iya.

Ọphu ọ dudu anụ ọzo,
 eri anụ,
 byaru eshitakpọo ya
 eshita ophu.
 A taa hụmakpoda phẹ nụ
 ahụma ophu l'ẹka ono.
 Ọ bụepho ndu a gbafutaru bụ
 ndu a-nọdu eshi iya nụ.
¹⁰ Mbụ lẹ ndu ono,
 Chipfu pfuluru aswa phẹ
 ono a-lwa.
 Ẹphe aguru ebvu lwatashia
 Zayonu.
 Ẹphe ekpuru ẹhu-utso ojeje
 g'onye kpu okpu eze.
 Ete ẹswa yẹe ẹhu-utso
 atuko phẹ ẹhu sweta.
 Aphụ yẹe atsụ ude agbaa
 ọso gbalaa.

36

Senakeribu eye ndu Jierúsalem ebvu
(2Ndu 18:13-37; 2Iphe 32:1-19)

¹ Tọbudu iya bụ; o rwua l'apha, kwe eze, bụ Hezekáya
 apha iri l'eno, ọ wataru aburu eze; Senakeribu, bụ eze
 ndu Asiriya bya ọgu l'alị ndu Jiuda; bya atuko mkpukpu
 phẹ g'ọ ha, bụ mkpukpu, a kpushiru ike lwa lwa.
² No iya; eze ndu Asiriya ono bya agbẹ lẹ mkpukpu
 Lakishi zia onye-ishi ndu ojogu iya; yeru iya ndu ojogu,
 dū igwerigwe; bya asu iya g'ephe jepfu eze, bụ Hezekáya
 lẹ Jierúsalem. Onye-ishi ndu ojogu ono jerwua bya eje
 apfuru l'ishi mgbá-mini okpuru ụzo eli, dū l'uzo ono,
 eeshije eje ẹka asajẹ uwe ono. ³ Ọ nọdu l'ẹka ono; ephe

byapfuta iya; mbụ Ëliyakimu nwa Hilikaya, bụ onye-ishi l'ibe eze; waa Shebuna, bụ onye edeje ẹkwo; waa Jiowa nwa Asafu; yẹbedua bụ onye nkwakọbe.

⁴ Onye-ishi ndu ojogu ono bya asụ phẹ: “Unu je akaru Hezekáya ẹ-a: Wakwa iphe, o pfuru; mbụ Okalibe eze, bụ eze ndu Asiriya. O sụru-a: ?Bụ ẹ gunu bẹ ị chiru nwupfu ophu i nweru kwẹe? ⁵ Ị sụru l'ị machawaru ẹregede ogu bya enweru ike, e gude alwụ ogu. Obenu l'opfu ngu bụ okorobo opfu. ?Bụ onye bẹ ị dakoberu ekwefuru yẹbe eze ndu Asiriya ike? ⁶ Lenu; o kwa ndu Ijiputu bẹ ị dakoberu; mbụ Ijiputu ono, bụ mgbawa-ẹchara, abụjeru: onye dakoberu iya nụ l'o yejashia ya ẹka meka iya iphe onoya. O kwa ẹgube ono bẹ Fero dụ; mbụ eze ndu Ijiputu. O kwa nno bụ g'ọ duru iphe, bụkpoo ndu dakoberu iya nụ. ⁷ Teke ị sụkwanuru mu l'ọo Chipfu, bụ Chileke unu bẹ unu dakoberu; ?tọ bụdu Chipfu obu bụ ophu Hezekáya lwuru ẹka aagwajẹ iya; bya emebyishia ọru-ngwẹja iya; bya asụ ndu Jiuda ẹphe ẹ ndu Jierúsalemụ g'ẹphe byajẹ abaa ẹja l'atatiphu ọru-ngwẹja-a?

⁸ “Byalẹkwa-a g'unu ẹ nnajiuphu mu, bụ eze ndu Asiriya tuko chia idzù. I -kweta bẹ mu a-kpuru unu inya ise kpẹe ngu; mẹ o -buru l'ị-du ike yechaa ya ndu a-nodu agba iya nụ. ⁹ Odumeka; ?denu g'ị riru l'ị-du ike kpafu l'iphu onye-ishi ndu ojogu nnajiuphu mu; m'obeta o buru onye ẹnya kachaa alwalwa ẹ ndu-ishi ndu ojogu iya; l'ẹka o bụ ndu Ijiputu bẹ ị dakoberu g'ẹphe chie ngu ugbo-inya; chie ngu ndu agba l'inya-ogu? ¹⁰ Ozo bụ ẹ-a; ?i dobesu l'ọ tọ bụdu Chipfu bẹ mu nọ l'ẹka bya ogu l'alị-a gẹ mu mebyishia ya? O kwa Chipfu l'onwiya ziru mu gẹ mu bya ogu l'alị-a mebyishia ya.”

¹¹ Tọbudu iya bụ; Ëliyakimu; yẹ Shebuna; waa Jiowa bya asụ onye-ishi ndu ojogu ono-a: “Jiko gude opfu ndu

Arámu pfuru yeru anyibe ndu-ozu ngu; eshinu anyi anu iya ree. Te egudeshi opfu ndu Jiuda pfuru yeru anyi; kele ndu no l'eli igbulu anukwa iya.”

¹² Onye-ishi ndu ojogu ono su phe: “?Bu unu le nnajuphu unu kpoloko be o du unu ge nnajuphu mu ziru mu ge mu bya ezia ozi-a? Waawakwa. O kwa unu le ndu ono, no l'eli igbulu ono; mbu ndu ono, unu l'ephe e-mechaa ria nshi unu l'onu; ngu mamini, unu gboru ono be mu epfu iya.”

¹³ Onye-ishi ndu ojogu ono bya apfu bya egude opfu ndu Jiuda bya arashia ya ike su: “Unu numakwa iphe, o pfuru; mbu Okalibe eze ono, bu eze ndu Asiriya!

¹⁴ Wakwa iphe, eze ndu Asiriya pfuru: Unu te ekwekwa ge Hezekaya dephua unu. O too dukwa ike adzo unu!

¹⁵ Ophu unu ekwekwa ge Hezekaya deta unu g'unu dakobe Chipfu; l'eka oopfu unu asuje le Chipfu ta adukwa iphe, e-me g'o to dzota unu. Le mkpukpu-a taa lakwa l'eka eze ndu Asiriya. ¹⁶ Unu ta angakwaru Hezekaya nchi; kele eze ndu Asiriya sukwaru-a g'unu wufuta wu-pfuta iya ge yele unu doshia. Oo ya bu g'onnyemonye le g'unu ha eria iphe, shi le vayinu iya; ria akpuru, shi l'oshi figu iya; bya angwa mini, du le welu iya; ¹⁷ jasu teke ya a-bya eduta unu; lashia l'ali, du ge k'unu; mbu ali, ereshi du; mee ophuu du iya; ali, nri du; teme opfu-vayinu du iya.

¹⁸ “Unu te ekwekwa ge Hezekaya dephua unu; kele osu unu le Chipfu l'a-dzotakwa unu. ?O dukporu oha ophu agwa ali phe nafutajewaru l'eka eze ndu Asiriya?

¹⁹ ?Bu awe be agwa ndu Hamatu yee ke ndu Apadu no? Agwa ndu Sefavayimu; ?ephe no l'awe? ?Epe duru-a ike dzota ndu Sameriya l'eka yee eze ndu Asiriya too?

²⁰ ?Bu agwa ole l'ime agwa ndu ali ono be duru ike nafuta

ndu alì iya l'ẹka iya? ?Denu gẹ Chipfu e-shi dọ ike nafuta ndu Jierúsalemu l'ẹka iya?"

²¹ Ndu Jiuda ono, oopfu eyeru ono nọduepho nggujing-guji; ọphu ọ dudu onye ọphu pfuru opfu yeru iya; kẹle eze, bụ Hezekáya turu ekemu sụ g'ọ to dukwa onye eyeru iya Ọnu.

²² Tọbudu iya bụ; Ẹliyakimu nwa Hilikaya, bụ onye-ishi l'ibe eze; yẹ Shebuna, bụ onye edejeru eze ẹkwo; waa Jiowa nwa Asafu, bụ onye nkwakọbe tųgbua; o buru phẹ ejepfu Hezekáya. Ẹphe gbajachaa uwe phẹ agbaja. Ẹphe jerwua bya eje akọru iya iphe, onye-ishi ndu ojọgu ono pfuru.

37

Hezekáya epfu anụ Chileke (2Ndu 19:1-13)

¹ Tọbudu iya bụ; Hezekáya nọmaepho iphe ono ọ gbajashia uwe iya; bya achita uwe-aphu yee; ọ buru iya eje l'eze-ulo Chipfu. ² Ọ bya ezia Ẹliyakimu, bụ onye-ishi l'ibe eze; yẹ Shebuna, bụ onye edejeru eze ẹkwo; waa ndu-ishi lẹ ndu-uke Chileke; g'ẹphe jepfu onye mpfuchiru Chileke ono, bụ Azáya nwa Emọzu. Ẹphe tuko yee uwe-aphu jeshia. ³ Ẹphe je je asu iya: "Hezekáya sọru-a: 'Ntanu-a bukwa mbọku, oke iphe-ẹhuka dapfutaru anyi; bya aburu mbọku, aahụ anyi ahùhù; bya aburu mbọku, iphe-iphere jiru anyi iphu. Ọ dukwa g'ẹgube ime anọduje eme nwanyi; ọ tọ dudu ike nyia ọnyi nwua nwata ọbu-a ⁴ Ọ nweru g'ọo-du; Chipfu, bụ Chileke ngu anuma iphe ono, onye-ishi ndu ojọgu ono epfu ono; mbu onye ono, nnajuphu iya, bụ eze ndu Asiriya yeru g'ọ bya epfutoshia Chileke ono, dzu ndzu ono; k'ọphu bụ lẹ Chipfu a-baru iya mba l'opfu ono, yẹbe

Chipfu, bụ Chileke ngu nūmaru ono. Ọo ya bụ; pfuru nū Chileke l'opfu ẹhu ndu ọphu phọduru nū.' ”

⁵ Ọo ya bụ; ndu ono, eze, bụ Hezekáya ziru ono bya abyapfuta Azáya; ⁶ Azáya sụ phẹ: “Unu je asụ nnajjuphu unu lẹ Chipfu sūru-a: ‘Ba atsukwa ebvu lẹ k'iphe ono, ị nūmaru ono; mbụ opfu ono, ndu-ozu eze ndu Asiriya gude bya epfutoshia mu ono. ⁷ Huma lẹ mu e-woru unme lanu ye iya l'ẹhu; k'ọphu bụ l'ọo-nūma asulasu; lashia alị phẹ; mu emee g'e gude ogu-echi gbua ya l'alị phẹ gẹdegede.’ ”

⁸ Onye-ishi ndu ojogu ndu Asiriya bya anuma l'eze ndu Asiriya lufuwaru lẹ mkpukpu Lakishi; ọ laphu azu je ahuma onye eze ono l'eka ootso ndu Libuna ogu.

⁹ Noo ya; a bya ezia Senakeribu lẹ Tirihaka, bụ eze ndu Kushi bẹ abyapfutawa iya ogu; o zia ndu-ozu g'ephe je ezia Hezekáya sụ: ¹⁰ “Waa iphe, unu e-pfuru Hezekáya baa; mbụ eze ndu Jiuda: ‘B'ekwekwa gẹ Chileke ngu, bụ onye ono, i dakoberu ono duphua ngu; l'eka oopfu lẹ Jierúsalemu ta alwadu l'eka mube eze ndu Asiriya. ¹¹ Ọphu doru ẹnya bụ l'ị nūmahawaru iphe, ndu eze ndu Asiriya meru ndu alị ọzo; mbụ l'o mebyishikotaru phẹ. ?Aa-nafuta-chia gubedua to? ¹² Mbụ-a; ndu ọhamoha ono, nna mu oche phẹ mebyishiru ono; ?agwa phẹ dzotaru phẹ-a to? Mbụ agwa ndu Gozanu; yẹ ke ndu Haranu; waa ke ndu Rezufu; mẹ ke ndu Edenu, bụ ndu shi nodu lẹ Telasa. ¹³ ?Bụ awe bẹ eze ndu Hamatu no nta-a; mẹ eze ndu Apadu; mẹ eze ndu mkpukpu Sefavayimu; ọzoo ke ndu Hena; ọzoo ke ndu Iva?’ ”

¹⁴ Tọbodu iya bụ; Hezekáya bya anata ekwo-ozu ono l'eka ndu e ziru iya; bya eworu iya gụa. Ọ bya abahu l'eze-ulo Chipfu bya eje eworu iya tosa l'iphu Chipfu. ¹⁵ Hezekáya bya epfuru nū Chipfu sụ: ¹⁶ “Gube Chipfu, bụ Ọkalibe-Kakota-Ike; gube Chileke ke ndu Izurelu;

onye sùgaru l'aba-eze iya l'echilabọ chierobu. Ọo ngu kpoloko bụ Chileke, nwekọta alì-eze, dụ lẹ mgboko mgburugburu. Ọo ngu meru igwe bya emee eliphe. ¹⁷ Ngabẹnu nchì gùbe Chipfu; nùma iphe, mu epfu. Sanaa ẹnya hụmadupho. Ngabẹkpodapho nchì; nùma opfu ono, Senakeribu ziru g'e gude bya epfutọshia gùbe Chileke, nọ ndzụ ono.

¹⁸ “Gùbe Chipfu; ọ bụkwa eviya lẹ ndu eze ndu Asiriya mebyishiwaru ọhamoha; waa alì phẹ. ¹⁹ Ẹphe chìwaru agwa ndu ono ye l'ọku; o kepyashia; kẹle agwa phẹ ọbu ta adụdu iphe ọzo, ọ bụ; gbahaa nkụ; yẹe mkpuma, bụ iphe, nemadzụ gude ẹka mee. ²⁰ Ọo ya bụ lẹ-a; gùbe Chipfu, bụ Chileke anyi; dzọnaa anyi l'ẹka eze ndu Asiriya ono; k'ọphu alì-eze, dükota lẹ mgboko l'ophu a-maru l'ọo gùbedua kpoloko; mbụ gùbe Chipfu bẹ bụ Chileke.”

Adada Senakeribu

²¹ Tọbudu iya bụ; Azáya nwa Emọzu bya ezia Hezekáya ozi sù: Chipfu, bụ Chileke kẹ ndu Ízurẹlu sùru l'iphe ono, i pfuru nù iya l'opfu ẹhu Senakeribu, bụ eze ndu Asiriya ono bẹ ya nùmawaru. ²² Waa iphe, Chipfu pfuru l'opfu ẹhu Senakeribu baa:

Nwada Zayọnu ta adụekwa
iphe, ọ gùberu ngu;
tẹme ọ nọdu aja ngu
ewenu.

Nwada Jierúsalemụ ekwe
l'ishi l'ẹka ñigba ọso lẹ
ndaba agbala.

²³ ?Bụ onye bụ onye ono,
i shi ephu iphu;
bya epfutọshi iya ono?
?Bụ onye bẹ i shi atụ ụzu
ekpu-a;

mbụ onye ono,
i gude eku-onwonye
vỌoru ẹnya ono?

Ọ kwa Onye dụ Nsọ
kẹ Ízurelu!

²⁴ I ziru ndu-ozí ngu;
ẹphe bya eburu iphu nyabẹ
Nnajiuphu.

Ị sụru l'i gudewaa ikpoto
ụgbo-inya-ọgu ngu
nyirwuchaa mkpakpọnu
úbvú úbvú;

Mbụ l'i nyirwuwaru
mkpakpọnu,
ẹka úbvú úbvú
Lébanọnu jeberu;
bya egbutsushiwa oshi sida,
dụ iya nụ, bụ ndu ọphu
kachaa etse ogologo;
mẹ oshi payịnu iya
ọphu kachaa adụ ùbvù
l'ẹnya;
bya ejerwuwaa ẹka ọ
kachaa aburu ẹpfukala;
mẹ ẹka ọ kachaa aburu ọswa,
dụ ree.

²⁵ Mbụ l'ị tųwaru wẹlu l'alị ndu
ọhozo; bya angụa ya mini;
bya egudewaa
ọbochi-ọkpa ngu zọo iphe,
bụ nggele,
dụkota l'alị Ijiputu tọlitoli;
jasụ ọ tashihukota.

²⁶ Sụ-a; ?ọ dụ g'ì tị nụmajeduru
iya?

Ọo mu tubuhawaru g'ọ dụ
nno teke dūhawaa ẹnya.

Mbụ l'ọ bụro teke ndiche
bẹ mu chihawaru iya
rọo dobe.

Ọ bụru nta-a bẹ mu
meru iya g'ọ vụa;
mbụ mee;
i woru mkpụkpu,
a kpụgbaaru o shihu
ike mebyishia;
ọ bụru ikpo mkpuma.

²⁷ Ọ bụru iya bụ;
ike bvụ ndu bu iya nụ.

Ẹphe bụru ndu a turu
ẹberebete;
e meru iphe-iphere
kpua phe.

Ẹphe bya adụ g'iphe,
a kuru l'opfu; g'iphe,
rwuru irwu k'òphúú;
mbụ dụ g'ẹswa,
furu ẹ mkpotsu ụlo,
anwụ chigbushiru
l'ẹbe adụ g'o vutaberu l'eli.

²⁸ “Obenu ẹ gụbedua bẹ mụbe
Chileke maru ẹka ị nọ.

Mu maru teke ịibata abata;
maru teke ịitugbu
atugbu.

Mu maru g'ịibataberu

hanyìhanyi ekpu mu.

²⁹ Eshi ọ́phu ọ́ bụ́ mụ́be Chileke
 bẹ́ ì́baru hanyìhanyi;
 tẹ́me bẹ́beebée,
 iipfuru mu rwuwa mu
 nchì;
 bẹ́ mu e-woru ì́kokoro
 dzụ́be ngu l'imi;
 woru mkpụ́rukpu-ígwè
 ye ngu l'ọ́nu g'ìnya.

Mu emee ngu g'i shia ọ́phu
 i shi laphu azụ́ l'ẹ́ka
 i shi.

³⁰ “A -bya lẹ́ gụ́bedua, bụ́ Hezekáya; waa iphe, a-buru
 ngu iphe-ọ́hubama baa: Apha-a bẹ́ ii-ri iphe, daru ẹ́da. O
 -be apha ọ́zo l'i ria ọ́phu shi l'ono futa. O -rwua l'apha
 k'ẹ́to iya; kọ́o opfu kpata iphe, ì́ kọ́ru iya. Gbaa opfu-
 vayìnu; ria akpụ́ru, e-shi iya nụ́. ³¹ Sụ́-a; nwa ndu ono,
 a-phọ́du nụ́ l'ọ́nu-ụ́lo Jiuda bẹ́ a-gba ọ́gbarabvu l'ime
 alì; mị́a mebyi l'eli mgboko; ³² noo kẹ́le o nweru nwa ndu
 phọ́duru nụ́ lẹ́ Jierúsalemu. Ikpoto ndu wafuru nụ́ e-shi
 l'úbvú Zayọ́nu. Ọ́ bụ́ru Chipfu, bụ́ Ọ́kalibe-Kakọ́ta-ike
 e-gude g'ọ́ phụ́-be iya l'ẹ́hu mee ya.

³³ “Ọ́o ya bụ́; waa iphe, Chipfu pfuru l'ẹ́hu eze ndu
 Asiriya baa: Ọ́ tọ́ byadu a-bata lẹ́ mkpụ́kpu-a; ọ́phu
 ọ́ byadu agba g'ọ́ ka mma l'ọ́o apfụ́ l'ẹ́ka-a. O too
 gudekpọ́danu iphe, eegbobutajẹ́ onwonye abyakube iya
 ntse; ọ́phu ọ́ byadu ebvuphe iya ose-ọ́gu. ³⁴ Ọ́o ụ́zo, o
 shi bya bẹ́ oo-shi laa. Ọ́ tọ́ byadu abata lẹ́ mkpụ́kpu ọ́wa
 abata ophu.” Nokwa iphe, Chipfu eepfu. ³⁵ “Sụ́-a; mu e-
 gude k'ẹ́pha mu; mẹ́ opfu ẹ́hu Dévidi, bụ́ onye-ozì mu
 gbobuta mkpụ́kpu-a; dzọ́o ya.”

³⁶ Tòbudu iya bụ; ojozi Chipfu tųgbuepho bya eje l'ẹka ndu ojọgu Asiriya dọru; bya eje egbua ụkporo ụnu ụmadzu ugbo ụkporo l'ẹto l'ụnu ụmadzu labọ l'ụkporo ụmadzu iri* l'ime ndu ojọgu ono. E tehushia l'utsu; odzu zẹshiwaa kẹ bẹe. ³⁷ Noo ya; Senakeribu, bụ eze ndu Asiriya tųgbua; ọ bụru iya alaphu azụ. Ọ laphushia azụ lẹ Ninive je anọdu. ³⁸ O be ujiku lanụ; ọ nọdu agwa agwa iya, bụ Nịsuroku; ụnwu iya, bụ Adurameleku; mẹ Shareza je egude ogu-echi gbugbua ya; gbaru lashia alị Araratu. Ọo ya bụ; Esahadonu, bụ nwa iya bụru eze nọchia ẹnya iya.

38

Iphe-ememe guderu Hezekáya (2Ndu 20:1-11)

¹ Ọ bụru teke ono bẹ iphe-ememe guderu Hezekáya; k'ọphu bụ l'ọ nọwaa l'ọnu ọnwu. Onye mpfuchiru Chileke, bụ Azáya; nwa Emọzu bya ejepfu iya je asụ iya: Chipfu sụru-a: “Dozia ibe ngu ree; kẹle ịbyawa anwuhu; ị tị kadu mma.”

² Noo ya; Hezekáya bya aghaa iphu l'uzo igbulọ pfuru nụ Chipfu sụ: ³ Gụbe Chipfu; nyatanu gẹ mu bụ-be onye gude ire-lanụ; mẹ obu mu g'ọ ha tsoo ụzo nkengu; mẹ gẹ mu gude meberu iphe, dụ ree l'ẹnnya ngu. Hezekáya raa ẹkwa kpọo pfula pfula.

⁴ Tòbudu iya bụ; Opfu Chipfu bya atuba Azáya lẹ nchị sụ iya: ⁵ “Je akaru Hezekáya lẹ-a: Waa iphe, o pfuru; mbụ Chipfu, mbụ Chileke kẹ nna ngu, bụ Dévidi: Mu nụmawaru epfupfu, i pfuru nụ mu; bya ahụmawaa ẹnnya-mini, shi ngu l'ẹnnya. Mu e-yekwafua apha iri l'ise lẹ ndzu

* 37:36 37:36 BỤ iya bụ 185,000 lẹ mbekee.

ngu. ⁶ Ọzo bụ ịe mu a-nafuta ngu; nafuta mkpukpu-a l'eka eze ndu Asiriya. Mu a-gbaru mkpukpu-a ọdzeni.

⁷ “Waa iphe-ọhubama, Chipfu e-goshi ngu baa; g'i gude maru ịe Chipfu e-me-a iphe ono, o pfuru ono. ⁸ Nwonyonyo iphe ono, a kpushiru, ee gudeje enyi ụlo-eli Éhazu ono; be mu e-me g'o gude ntụ-ọkpa iri tsụ-phu azụ.” No iya; onyonyo ono tsụa rịbo; gude ntụ-ọkpa iri tsụ-phu azụ eme ịe g'o shi habe ogologo.

⁹ Ọwa-a bụ iphe, Hezekáya deru; mbụ eze ndu Jiuda g'iphe-ememe ono mechaarụ iya; ọ kachaa mma.

¹⁰ Mu sụkwaru: ?Bụ ịe
mkpakponu ndzụ mu-a
be mu jeru je eshisweta
onu ọguzo alị-maa?

A naa mu nfu nafu mu nwa
apha ndzụ mu ọphu
phoduru nụ?

¹¹ Mu sụkwaru ịe mu taa
humabaedu Chipfu
l'alị ndu dzụ ndzụ.

Ọphu mu egudebaedu
enya ahuma nemadzu,
dzụ ndzụ;
ozoo ke g'anyi ịe ndu
nọkwadu l'eliphe-a
bubaaru.

¹² A lashiru ndzụ mu g'onye lashiru
eswa l'ulo unwu-eswi;
mbụ l'ọo g'onye akpa iphe
akpakpa aphukobeje iphe,
ọ kpagheru akpaghe-a
bụ ge mu
phukobewaru ndzụ mu.

Ọ bya atuwaa mu eri
gbupya l'iphe, aakpaje iphe;
bya egbubufu iya.

Ọ buri-a shi l'eswe ge nchi
jihu be i mebufuwaru
nu ke ndzu mu.

¹³ Mu ndu atajekpoepho
nshi jasu nchi aboju.

Obenu l'o gweru mu
okpu arakabya g'eka
oduma ata anu.

Ọ buri-a shi l'eswe ge nchi
jihu be i mebufuwaru
nu ke ndzu mu.

¹⁴ Mu gbaha chachacha
g'apya ozoo g'asha.

Mu deahaa kukuku
g'ede-kuukuu.

Mu lenyaa enya l'eligwe;
enya meahaa mu ehuka.

Mu su: Jiko Nnajiuphu;
mu eje iphe-ehuka;
byanu agbaaru mu
mkpu!

¹⁵ Ole o bu; ?mu a-sukwanu
agha?

O pfuakwaru opfu nu mu;
mbu o buri yebedua
l'onwiya meru iphe ono.

Mu a-ndukpoepho eje
nwa gelee jasu ge mu
a-no-beru;
kele obu atawa mu

nyikinyiki.

¹⁶ “Gùbe Nnajiuphu;
 Ọ kwa ọdu iphe,
 dughaa egube-a bẹ
 nemadzụ gude buru.

Ọ bụkwaru iya phọ bẹ unme,
 nọ mu l'ẹhu byaru bya
 egudewaa nọdu ndzụ nta-a.

Jiko menaa gẹ mu wekọrohu;
 menaa gẹ mu nọdu ndzụ!

¹⁷ Okpobe opfu;
 Ọ kwa g'ọo-duru mu lẹ ree
 bẹ mu gude jee iphe-ẹhuka,
 dụ nno.

Ọ bụru l'ọo l'i yeru mu obu
 bẹ i ti kwedu gẹ mu
 bahụ lẹ nsukutu ọla-l'iswi.

Ị bya atụko iphe-ẹji mu l'ophu
 chịru ye onwongu l'azụ;
¹⁸ kele ndu nọwaa l'ali-maa te
 etukwa ngu ẹpha.

Ọphu ndu nwụhuwaru anwụhu
 agụkwa ebvu egude etu
 ngu ẹpha.

Ọphu ndu e kpochiru l'ilu
 eleekwa ẹnya ire-lanụ
 nkengu.

¹⁹ Ọ kwa ndu nọ ndzụ;
 mbụ l'ọo ndu nọ ndzụ bụ ndu
 anọduje etu ngu ẹpha gẹ
 mu etu ngu iya ntanụ-a.

Ọ bụru ndu bụ nna anọduje
 akọru ụnwu phẹ g'ị bụ-be

onye ire-lanụ.

²⁰ Chipfu a-bya adzọo mu ndzụ.

Ọo ya bụ l'anyi a-nọdu agụ
ebvu akpọ iya l'une
jasụ g'anyi a-nọ-beru ndzụ.

Ọ bụru l'eze-ulo Chipfu bẹ
anyi a-nọdu gụa ya.”

²¹ Azáya pfuwaru sụ g'e meta iphe oshi figu tsua et-sutsu debechaa Hezekáya l'ẹjo-onwo ono, phọkashiru iya l'ẹhu ono; l'o -mewaa ya nno; l'o wekọrohu. ²² Hezekáya bya ajía sụ: “?Bụ gụnu bụ iphe-ọhubama, e-goshi lẹ mu e-mechaa bahụbaa l'eze-ulo Chipfu ọzo?”

39

Ndu nnoch-ẹnya, shi Bábilọnu

¹ Ọ bụru teke ono bẹ Merodaku-Baladanu; mbụ nwa Baladanu, bụ eze ndu Bábilọnu deshiru ẹkwo-ozí nù g'e je anụ Hezekáya; bya eyekwaru iya ya phọ iphe-oma g'e gude bya iya ajiji; kẹle ọ nụmaru l'iphe shi eme iya; ọ kawaa mma. ² Hezekáya nabata ndu ono, e ziru ozí ono; bya egoshi phẹ iphe, nọkota l'ulo-ẹku iya; mbụ goshi phẹ mkpọla-ochaa; yẹe mkpọla-ododo; mẹ manụ, eshi mkpọ; mẹ ngwọgu iya l'ophu; mẹ iphe, bụkota ẹku iya. Ọ tọ dudu iphe, dụ l'ibe iya; ọzoo iphe, dụ l'alí-eze iya l'ophu, o to goshiduru ndu ono; mbụ Hezekáya.

³ Tọbudu iya bụ; Azáya, onye mpfuchiru Chileke bya ejepfu eze, bụ Hezekáya je ajía ya sụ: “?Bụ awe bẹ ndu ono shi bya? ?Bụ gụnu bẹ ẹphe pfuru?”

Hezekáya sụ iya: “Ephem shikwa ẹka dụ ẹnya bya. Ephem shi Bábilọnu.”

⁴ Azáya bya ajía ya sụ: “?Bụ gụnu bẹ ẹphe hụmaru l'ibe ngu?”

Hezekáya sù iya: “Ephe tükokwaru iphemiphe, dù l'ibe mu hùma-gbua. Ọ tọ dukwa iphe, dù g'ẹku, mu nweru enweru, mu te egoshiduru phẹ.”

⁵ Noo ya; Azáya bya asù Hezekáya: “Nùma opfu, shi Chipfu l'ònu; mbù Ọkalibe-Kakọta-Ike ono. ⁶ Ọ sùru-a: Lẹ mbọku abyawaa teke iphemiphe, dù l'ùlo eze ngu; mẹ iphe ono, nna ngu phẹ setarù dobe; ọ nọ byasù nta-a a-bùru iphe, ee-vuta lashia Bábilọnu. Ọ tọ dùdu m'ọphu ee-wophodo. Noo iphe, Chipfu epfu. ⁷ Tẹme unwu ngu unwoke, bù ndu a nwùtaru ngu bẹ aa-harù kpùkaa; ẹphe eje abùru ndu anọduje eleta ibe eze ndu Bábilọnu ẹnya.”

⁸ Hezekáya sù iya: “Opfu Chipfu ono, i pfuru ono dukwa ree.” Iphe, o gude pfua nno bù l'ọ rìru sù lẹ nchì a-dù-a doo; ọphu ọ dùdu iphe, bya l'eme teke ya nọkwadu ndzù.

40

Adù ndu kẹ Chileke obu

¹ Unu dùnaa ndibe mu
obu! Unu dùnaa phẹ obu!

Nokwa iphe, Chileke unu
pfuru bù onoya.

² Unu pfunaa opfu bẹlebele
yeru Jierúsalemù.

Unu ranaa ya arara g'ọ maru
l'ozì-ike ono,
ooje ono bẹ bvùwaru nù.

L'a pfùwaru ugwo ẹjo-iphe,
o meshiru.

L'ewere, Chipfu meru iya
hawaa g'iphe-ẹji, o meru;
mbù l'ọ hawaa g'ọo ya
ugbo labọ.

³ Ọ dọru onye ara iya arara sụ:
 “Unu meziaru Chipfu ụzo
 l'echiẹgu.

Unu mee eze gbororo iya g'ọ
 dụgbaa nhamunha ị
 mgbẹgu alị-evevee.

⁴ Ẹka dụ nsụda bẹ ee-nwuchi
 enwuchi.

Iphe, bụ úbvú úbvú bẹ
 ee-gbuzekọta egbuze.

Ẹka dụ nkwegbo-nkwagbo bẹ
 ee-mezi emezi.

Ẹka dụ
 kpọkoro-kpọkoro-kpọkoro
 l'a rwazee ya arwaze g'ọ
 kwọo akwọkwo;

⁵ k'ọphu ee-kpuha ọdu-biribiri
 kẹ Chipfu g'a hụma.

Iphe, bụkota nemadzụ l'ọphu
 ahụmakota iya;
 kẹle Chipfu gudewaa ọnu
 pfua ya.”

⁶ Ọ dọru olu-opfu, epfu sụ:
 “Chia mkpu!”

Mu sụ: “?Bụ gụnu bẹ mu
 e-chi ị mkpu?”

Ọ sụ: “Chia mkpu sụ ị
 nemadzụ l'ọphu
 dụkota g'ẹswa.

Tẹme mma, ẹphe ama
 dụkwapho g'okoko ẹswa,
 dụ l'ẹgu.

⁷ Ọobujeru;

ẹswa -kpọhuwaa nkụ;
 okoko iya erishihu dashihu;
 kẹle udzu-ọnu Chipfu
 phụshiru phẹ.

Hoo haa; nemadzụ bụkwa
 ẹswa.

⁸ Mbụ l'ọobujeru;
 ẹswa -kpọhuwaa nkụ;
 okoko iya erishihu dashihu;
 obenu l'ọpfu, Chileke anyi
 pfuru;
 a-pfuru pfushia ike jasụ
 l'ojeje.”

⁹ Je apfuru l'eli úbvú, ha shii;
 gụbe Zayọnu;
 onye byaru ezi ozi-ọma.

Gụbe Jierúsalemụ,
 byaru ezi ozi-ọma;
 wolinaa olu chia mkpu!

Wolia olu; gẹ ndzụ ba agushi
 ngu!

Sụ mkpukpu,
 dụgbaa l'alị ndu Jiuda-a:
 “Wakwa Chileke unu baa!”

¹⁰ Lekwa! Nnajiuphu,
 bụ Chipfu gudekwa
 ike-ọkpu abya.

Ọ bụru ọkpehu iya bẹ
 oo-gude bụru eze.

Lekwa! O gudekwa obunggo
 eje abya;
 bya egudekwaphọ ụgwo
 ọo-pfụ.

- 11 Ndu ẹphe l'iya swi bẹ
 ọonoduje eche g'onye
 eche aturu.
- Ọ nọdu achikobeje unwu
 aturu ono heru l'ẹka;
 mbu heru phe dobe onwiya
 ntse k'ophu ẹphe a-nọduje
 iya l'obu.
- Teme ọ nọdu atọje nwẹhu
 erwu ndu ophu he nwa.
- 12 ?Bu onye dụjewaru ike
 gbaa ẹka okorokoro
 gude tụa mini,
 nọ ẹ mgboko l'ophu atùtù;
 ọzoo gude nkwo-ẹka
 tụa akpaminigwe
 l'ophu?
- ?Bu onye dụjewaru ike
 kpokọo urwuku,
 dụ l'eliphe l'ophu kporu
 ye ẹ nkata;
 ọzoo wota iphe-atùtù
 gude tụa ẹrwa úbvú,
 nọkota nù?
- 13 ?Bu onye maru uche Chipfu?
 tọo ?bu onye a-sụ ẹ ya
 zijeru iya iphe;
 ẹ ya bu onye akpọ-zijeru
 Chileke ụzo?
- 14 ?Bu onye bẹ Chipfu jeru
 akpata ishi?
 tọo ?bu onye ziru iya
 ụzo ophu bu ọkpobe

ụzo?

?Bụ onye bẹ ọ bụ;
mbụ onye ziru iya iphe,
Ọ maru;
Ọzoo onye goshiru iya ụzo,
oo-shi mee g'iphe doo
ya ẹnya?

¹⁵ Tororo opfu bụ l'ọhamoha
dụkwa gẹ mini,
daru kpọngu l'ime
bọketi.

Iphe, a gụberu phẹ bụ-a
nwurwuku, dụ l'iphe,
egudeje tụa ẹrwa iphe.

Mbụ l'ọotùje ndu bukube
eze-ẹnyimu g'onye
kpokọberu urwuku,
dụ rwukuru rwukuru
atù l'iphe.

¹⁶ Mbụ l'ọswa, dụ l'úbvú úbvú
Lébanọnu ta asụkwa abụru
nkụ eye l'ọku.

Ọphu anụ, nọkota iya nụ
asụkwapho
g'eegbushi iya gude
gweeru Chipfu
ngweja-akpọ-ọku.

¹⁷ L'iphu iya bẹ ọhamoha l'ophu
ta adụkwa iphe, o bụ.

Ọ gụberu phẹ iphe,
adụdu iphe, ọ bụ;
mbụ l'iphe-iphoro ka
phẹ shii.

- 18 ?Bụ onye bẹ unu a-turu
Chileke yeru?
?Bụ ntẹkpe gụnu bẹ unu a-sụ
lẹ yẹe ya bụ iphe lanụ?
- 19 L'a -bya l'iphe,
a kpuru akpukpu;
ono bụ onye eme ọna
kpuru iya.
Ọ bụru onye-úzá
mkpọla-ododo wuru
iya mkpọla-ododo;
bya emetaru iya
ẹgbirigba mkpọla-ọchaa.
- 20 Ọbujeru onye daru ukpa
k'ophu ọ tọo dudu ike
anụ Chileke ẹgube
iphe ono;
l'ooje ahọta oshi,
kpọru akpaa;
bya eje achọo onye eme
ọna emegharu iya
ẹka kua
l'ọ bya apyiá ntẹkpe
doberu iya; mbụ ntẹkpe,
ta abyadụ aharībejeru
ọkpa aharīberu.
- 21 ?Unu ta amahaada? Tọo
?unu teke anụma-swee?
?Te epfuduru iya unu e
-shikpọo lẹ mbụ?
?Toko dodu unu ẹnya g'e
gude tọo ọkpa
mgboko l'ophu?

- 22 L'Ọ nỌ l'aba-eze iya
 l'ephekerephe;
 nỌghata eliphe,
 gbaru mgburugburu.
 Ndu nỌ l'eliphe dughae ya
 phỌ ribariba g'ụnwu ogu.
 Eligwe l'ophu bẹ ọ phụshiru
 tọgbo g'onye phụshiru
 ukpo;
 bya eworu iya tọgbo
 jakpata g'ulo-ekwa,
 aabya eburu eburu.
- 23 Ndu-ishi bẹ oomeje;
 ọ tọ dudu iphe,
 ephe abụ.
 L'ọ bya emee ndu-ishi
 lẹ mgboko-a;
 ephe aburu iphe-mmanụ.
- 24 Sụ-a; ọobujeru akuku,
 aaku phẹ l'alị;
 adzadza, aadza phẹ;
 ephe -jekwadu-a agbabe
 ọgbarabvu l'alị;
 l'ọophuwa phẹ ọnu;
 ephe anwulwashihu.
 Oke pherephere abya
 ezikọta phẹ g'ẹswa ereshi.
- 25 Onye nsọ ono jiru sụ-a:
 “?Bụ onye bẹ unu a-turu
 mu yeru?
 Mbụ-a; ?bụ onye bẹ unu epfu
 lẹ mu l'iya ha ẹnya
 nhamụnha?”

26 Palinaa ɛnya lee

l'akpaminigwe.

?Bụ onye meru iphemiphe
ono dobe?

Mbụ onye ono,

emeje kpokpode,

dụ igwerigwe l'ọofushi

nanụnanu;

tẹme ọ nọdu ekuje

phẹ ẹpha l'ẹhu l'ẹhu.

Ọ bụru l'ike parụ onye

ono ẹka;

tẹme ọkpẹhu dụ iya

meru g'o gude ọphu ọ

dụdu kpokpode ono

mẹ nanụ etuphahụje nụ.

27 Unubẹ ndibe Jíékọpu;

?denu g'o gude unu

pfua ẹgube ọpfu-a?

Mbụ-a; unubẹ ndibe Ízurẹlu;

?denu g'o gude unu

nọdu agụ aphụ?

Kẹle unu sụru lẹ Chipfu ta

amadụ iphe-ẹhuka,

unu eje;

mbụ lẹ Chileke unu ta

adụdu iphe,

ọ guberu iphe,

rwuberu unu?

28 ?Unu ta mahaada?

Tọo ?unu teke anụma-swee

lẹ Chipfu bụ Chileke,

l'a-nọ jasụ lẹ tuutuutuu

lẹ mịmimii?

Ọ bụru iya meru eliphe
l'ophu jasụ l'ẹka o
jeberu.

Ike ta abvụdu iya;
ophu nkwo atsụdu
iya mẹe;
ophu ọ dudu onye
amakọtaru nkwa męnya
nkiya.

²⁹ Ọo ya emeje g'ike dū
onye ike bvuru.

Teme ọ nọdu emeje g'onye
dū nmęlenmele rọkota
ike.

³⁰ Mbụ lẹ-a; unwu ọgbo
lanụ emenyakwaa iphe;
ike abvụ phẹ;
ẹphe emehu nmęlenmele.

Mbụ lẹ ndu bukwa du
okoro bya abụjeru a -nọnya;
ẹphe evukota iphe daa iko.

³¹ Obenu lẹ ndu daru ngabẹru
Chipfu bẹ ike a-nọdu
aka adudu.

Ẹphe e-gude ñkù ephe
l'eli l'eli g'ugo.

Ẹphe agbaa ọso;
ike ta abvụdu phẹ.

Ẹphe ejee ije; nkwo ta atsụdu
phẹ mẹe.

¹ Unubẹ ndu bukube
 eze-ẹnyimu;
 unu nọdukwa nggujungguji
 l'iphu mu!

G'ike kabakwaa adu
 ohamoha!

G'ẹphe kpịritakwaru
 bya eyee onu!

G'anyi je edzuda l'ulo-ikpe!

² “Su-a; ?bu onye jeru
 je akpalia onye
 pfuberekoto l'uzo
 ẹnyanwu-awawa;
 mbu onye abujeru;
 o -halia okpa l'o lwua lwuta.

Mbu le Chipfu ewojeru
 ohamoha ye iya l'eka;
 bya akwatsushiaru
 iya ndu eze.

O nodu egudeje ogu-echi
 gwee phe arakabya;
 gbaa phe apfu jasụ ẹphe
 phekishihu g'ẹswa ereshi.

³ Oochije phe oso;
 ejerọ l'iphu l'iphu.

O to dudu iphe, eme iya nu.

Mbu eshichaa uzo,
 okpa iya teke eshiswee
 le mbu.

⁴ ?Bu onye meru iphemiphe
 ono; mee ya meghaa;
 mbu shiepho le mbu ebu
 ogbo l'onwiya?

Ọ kwa mbẹdua, bụ Chipfu;
 onye nọ swiru ndu kẹ mbụ;
 tẹme mu jekwa anọdu
 swiru ndu k'ikpazụ;
 ọo mu bụ onye ọbu!”

⁵ Ndu bukube eze-ẹnyimu
 hụma iya; ndzụ gụhu phẹ.
 Ndu bu l'ẹka eliphe jeberu
 nọdu anma
 pyaapyaapya eje
 akpịritaru.

⁶ Onyenọnu nọdu eyeru nwibe
 iya ẹka.

Ẹphe nọdu asụje nwibe phẹ-a:
 “Shihukpọekwapho ike!”

⁷ Ndu maru eme ọna nọdu
 adụkpọepfo ndu ụzu
 mkpọla-ododo obu.

Onye ọphu egudeje ọngu
 akwọ iphe tẹretere
 nọdu agba onye ọphu
 edzefufe iya edzefufe
 unme.

Ọ -nọdu l'ọ sụ onye ọphu
 agbajẹ iya ọku gude
 dzepfua ya: “Ọ dükwaa ree!”

L'ọ bya akua ntẹkpe ono
 ngga g'o to rikashihu.

⁸ A -byakwanụ lẹ gube Ízurẹlu,
 bụ onye-ozu mu;
 mbụ gube Jíékọpu;
 onye mu gude ẹka mu
 họtá;

mbụ gụbe oshilọkpa
 Ébirihamu, bụ onye mu l'iya
 eshi ònyà;
⁹ mu jekpọeruro l'ẹka
 igwe beru alị beru je
 eduta ngu.

Mbụ l'ọo ẹka ọ kachaa
 omilomi bẹ mu jeru je
 ekua ngu.

Mu sụ ngu: Ị bụakwaa
 onye-ozì mu.

Mu họtakwaru ngu;
 ọphu mu ajịkaekwa ngu.

¹⁰ Ọo ya bụ; ba atsụkwa ebvu;
 kẹle mu nọkwa swiru
 ngu.

Gẹ meji ba tọfukwa ngu;
 kẹle ọ kwa mu bụ
 Chileke ngu.

Mu e-me g'ike dụ ngu;
 mu e-yeru ngu ẹka.

Mu e-gude ẹkutara mu ono,
 bụ ẹka mu egudeje
 mee iphe, pfulu ọto
 ono gudeshia ngu.

¹¹ Iphe, bụkpoo ndu aba
 hanyịhanyi ekpu ngu
 bẹ ọ tọ dudu iphe,
 e-me g'e te meru
 iphe-iphere kpua phẹ.

Ndu etso ngu opfu bẹ ee-me;
 ẹphe alaa l'iyi bụru
 mkpurupyata.

12 Mbụ l'ii-chịka ẹnya ndu
 ọhogu ngu;
 ị tị hụmadu phẹ.

Ndu etso ngu ọgu a-dụepho
 g'iphe-iphoro.

13 Noo kẹle ọo mbẹdua
 bụ Chipfu;
 bya abụru Chileke ngu;
 onye sekpu ngu
 l'ẹkutara ngu;
 bya asụ ngu g'ị ba
 tsushi ebvu;
 lẹ mu e-yeru
 ngu-a ẹka.

14 “Ba atụkwa ebvu;
 gube nworishi ono,
 bụ Jiékọpu;
 mbụ gube nwata-une,
 bụ Ízurelu;
 kẹle ọo mbẹdua
 l'onwomu e-yeru
 ngu ẹka.”

Noo iphe, Chipfu epfu;
 mbụ onye ono,
 gbafutaru ngu nụ ono;
 bya abụru Onye nsọ
 kẹ ndu Ízurelu.

15 Lenu; mu e-mekwa ngu
 g'ị bụru iphe,
 e gude echi ereshi;
 mbụ iphe, bụ k'òphúú;
 bya atụ nkọ;
 bya enweru ézé.

li-chi úbvú úbvú
 gbiigbii tsutṵo ya
 etsutṵ;
 mbṵ mee ya l'ṵ dṵ
 swakiri-swakiri
 g'ṵswa ereshi.

¹⁶ L'ṵ phṵshia phṵ;
 phṵrephere apakaa ya.

Mbṵ oke-phṵrephere
 atṵkaa ya nanṵnanu.

Obenu lṵ gṵbedua
 e-gude Chipfu ete ṵswa.

Mbṵ l'ṵ Onye nsṵ kṵ ndu
 Ízurṵlu ono bṵ ii-gude
 eku onwongu.

¹⁷ “Ndu ṵkpa mṵ ndu adṵdu
 g'ṵ dṵ phṵ achṵ mini
 angṵngu.

Ṷphu ṵ dṵdu ṵphu ṵphe
 hṵmaru.

Ire nṵdu atṵ phṵ hṵehee
 l'ṵka mini agṵ phṵ.

Ṷle ṵ bṵ-a mbṵdua,
 bṵ Chipfu a-za phṵ ṵnu.

Mbṵ lṵ mbṵdua, bṵ Chileke
 ndu Ízurṵlu taa
 hadṵ phṵ.

¹⁸ Mu e-me gṵ mini wata
 asṵshi gṵ nggele
 l'ephekerephe ṵka
 dṵ jakṵṵro jakṵṵro
 jakṵṵro.

Ṷgba eshi lṵ nsṵda nsṵda

gbafushihu.

Mu emee g'echiẹgu bụru
okpuru okpuru.

Alì, dū jakpọro-jakpọro
aburu ẹka mini e-shi
asọshihu.

¹⁹ Iphe, mu e-ye l'echiẹgu bụ
oshi sida;
yẹe oshi akesha;
mẹkpoo oshi mịturu;
yẹe oshi olivu.

Mbụ l'oshi payinu;
yẹe oshi firi;
yẹe oshi sipuresu bẹ
mu a-tụko dzakọta
lẹ chakiri chakiri
chakiri alì;
²⁰ k'ọphu ndu nemadzụ
a-huma; tẹme ẹphe
amakwarupho.

Ẹphe e-gbukwaa ya phọ igo;
l'oodoo phẹ ẹnya l'ọo
Chipfu gude ẹka iya
mee iphe ono;
l'ọo Onye nsọ kẹ ndu
Ízurẹlu bẹ meru
iphemiphe ono dobe.”

²¹ Chipfu sụkwaru-a: “Unu
byanụ edoo edo k'unu.”

Mbụ l'eze ndibe Jiékọpu
ono sụru-a: Unu byanụ
epfua g'ọonwuru unu.

²² Unu jenụ eduta agwa unu g'ọ

bya epfuaru anyi iphe,
e-me nṽ.

Ẹp̄he epfukwarṽpho anyi
ṽphu mehawaru nṽ;
k'ṽphu anyi e-gbu
iya igo maru iphe,
o mechaarṽ nwṽfuta.

Ọdumeka; unu pfunaaru
anyi iphe,
e-mechaa mee nṽ.

²³ Unu pfuaru anyi iphe,
e-me l'ip̄hu k'ṽphu
anyi a-maru l'unu bṽ
agwa, ere ire.

Unu menaa Ọhumalenya.
Unu menaa iphe,
dṽ ree; ọzo ṽphu dṽ ẹji;
k'ṽphu anyi a-nmahṽkwanu
pyaapyaapya;
ndzṽ agṽaha anyi.

²⁴ Obenu l'ip̄he-iphoro ka
unu mma.

T̄eme ṽphu iphe,
unu eme adṽkpoda iphe,
ṽ bṽkpoo ililekp̄o.

Onye h̄otar̄u unu bṽkwa ẹbyi
b̄e o meru.

²⁵ “Mu jeakwaru akpalia onye
shi l'ṽzo isheli;
ṽ n̄du abyawaa.

Ọo-n̄du l'ṽzo
ẹnyanwu-awawa bya
akp̄o-kua ẹpha mu.

Onye ono a-zṽ ndu-ishi

pyakapyaka g'onye
 atsu nri l'ikwe;
 mbụ g'ẹka onye akpu
 ite atsu urwa,
 o gude akpu iphe.

26 ?Bunaa onye pfuru iphe-a
 eshikpo le mbụ;
 k'ophu anyi a-maru iya?
 ?Bu onye nmahawaru iya
 g'okwa k'ophu anyi a-sụ:
 'O pfukwaru ire-lanụ?'

O to dudu onye pfujeru
 iya nu.
 Ophu o dudu onye nmajeru
 iya l'okwa.
 Ophu o dudu onye numajeru
 olu unu.

27 O buru mbedua vuru uto
 pfuaru Zayonu su iya:
 'Lenu; wakwa phe baal!'

Mbu; o buru mu yeru onye
 jeru ezia Jierusalemu
 ozi-oma ono.

28 Mu leri enya;
 ophu o dudu g'o ka mma
 l'oo onye lanu;
 mbu g'o ka mma l'oo
 onye lanu,
 mu humaru l'echilabo phe,
 adu ike akpo-ziru mu uto.

Ophu o dukwapho onye
 azaje enu me mu ja
 ya aji.

29 Lewarọ; ephe tukoru

bụkotaru
 iphe-mmanụ!
 Iphe, ephe eme bụkwarupho
 iphe-mmanụ.
 Mbụ l'agwa phẹ ono bụkota
 pherephere yee
 iphe-iphoro.”

42

Onye-ozì kẹ Chipfu

¹ Chipfu sụru-a:

“Wakwa onye-ozì mu,
 bụ onye mu gudesì;
 mbụ onye mu họtaru;
 bya abụru onye emeje
 g'obu jidata mu.

Mu yeakwaru iya Unme mu
 l'ẹhu.

Oo-goshi ọhamoha iphe,
 bụ ikpe, pfulu ọto.

² O too jekwa ara ọrà;
 ọphu ojekwa echi mkpu.

Ọphu ọ dukwa onye bya
 anuma olu iya l'etsuzọ.

³ Mbụ l'ekperema,
 jihuru ejihu bẹ ọ tọ
 gbajikpọkwanu;
 ọphu ọophunyikwa orọku,
 enwu reswereswe.

Oo-gude ire-lanụ goshi iphe,
 bụ ikpe, pfulu ọto.

⁴ Ọphu ọdadu adada;
 ọphu ọ dudu iphe,

a-kpọshi iya iphe,
oome jasụ teke ikpe,
pfuru ọto e-keru l'eliphe.

Ọ bụru ekemu iya bẹ ọha,
bukube eze-ẹnyimu
a-nọdu ele ẹnya iya.”

⁵ Sụ-a; wakwa iphe, Chileke,
bụ Chipfu epfu baa;
mbụ onye ono,
bụ iya meru eligwe
l'ophu bya eworu iya tọsa;
onye bụ iya tọsaru eliphe
l'ophu mẹkpoo
iphemiphe, shi iya nụ;
bya anụ ndu bu iya nụ
unme, ẹphe atụ;
bya eworu ndzụ nụ ndu eje
ije l'eli iya.

⁶ Ọ kwa mụbe Chipfu gude
apfubekoto nkemu
kua ngu.

Mu je l'e-seta ngu l'ẹka
gudeshia.

Mu e-dobe ngu;
mee ngu g'ị bụru iphe,
mu ẹ ndiphe e-gude
gbaa ndzụ.

Tẹme l'ị bụru ìphóró,
duru ọhamoha.

⁷ L'i mee g'ẹnya sahụ ndu atụ
ishi;
mee gẹ ndu a kpuru ẹ
ndzụ nweru onwophẹ;

mekwapho g'a haa
 ndu no le mkporo
 l'eka gbahuru tsukiribaa.

⁸ “Su-a; o kwa mbèdua bu
 Chipfu.

O buru epha mu bu ono
 gèdegede!

Ophu mu e-wokwaru úbvú,
 rwuberu mu nu anu
 onye ozo.

Ophu mu ewokwaru
 etu epha,
 eetuje mu woru haaru
 agwa.

⁹ Lewarò; akahu iphe,
 a sùru l'oo-me meakwaru.
 Mu nodu epfuwa k'òphúú.
 Mbù le mu epfujeeḱwaru
 iya pho unu tème
 l'owata ememe.”

Ebvù, e gude aja Chipfu

¹⁰ Unu gùa ebvu òphúú
 nu Chipfu!

Unu shikpòepho l'eka igwe
 beru ali beru tuta iya
 epha;
 unubè ndu eje l'oma-mini;
 mē iphe, bu iphe,
 bu le mini!

Iphe, bu ali,
 no-kube eze-enyimu;
 mē iphe, bu ndu bu iya nu;
 unu tua ya epha!

- 11 G'echiegu mę ọha,
 bu iya nụ wata erwu
 okwe!
 Gę ndu bugbaa lę mkpụkpu
 Keda tejekwa ęswa!
 Gę ndu Sela gụa ebvu ẹhu-utso!
 G'ẹphe nọdu lę mkpakpọnu
 úbvú rwua okwe!
- 12 G'ẹphe kwabẹkwa Chipfu
 úbvù!
 Ẹphe anọdu l'ali,
 nọ-kube eze-ẹnyimu
 tua ya ẹpha!
- 13 Chipfu a-zọ garamu garamu
 lufuta gę nwoke,
 dụ ike.
 L'ọ bya akpalia obu iya
 g'ojọgu, ike dụ;
 l'ọ phụahaa ya l'ẹhu.
 L'ọ bya araa ọrà gude chia
 mkpu ọgu;
 lwụa ọgu lwụ-kpee
 ndu ọhogu iya.
- 14 Chileke sụru-a:
 “Mu shihaakwa ụzenya
 nọduta doo.
 Mu nọkpoepo nwapyakọo
 esedekpọepo
 onwomu.
 Obenu lę nta-a bę mu a-wata
 echi mkpu; atsụ ude;
 atụ hẹehee;
 gę nwanyị, ime eme.
- 15 Mu e-me g'iphe, bụ úbvú,

nòkòtá nù dabyikòtaru
iphòrò.

Mu abya emee g'èswa,
rwuru iya nù kpòshihu
nkù.

Mu emee nggele nggele
g'ò ghòshia alì òkponku.

Mu abya emee g'òkpuru
òkpuru tashìhu.

¹⁶ Mu e-duru ndu atsù ishi
shia ùzo,
èphe amahaada.

Gbororo, èphe te eshijehaada
bè mu a-kpò-ziru phè
ùzo iya.

Mu e-me g'òchii bùru ìphóró
l'iphu phè;
bya emee g'ùzo,
dù kpòkoro kpòkoro
kpòkoro kwòru
phè akwòkwo.

Iphemiphe ono bùkòtá iphe,
mu e-me;
òphu mu abyadù
aha phè.

¹⁷ Obenu lè ndu kpòru obu
yeru agwa;
mbù ndu bù iphe,
a kpùru akpùkpu bè
èphe sùru l'ò gude
ndzù phè;
ndu ono bè ee-me
iphe-iphèrè chìfu phè.”

Ndu Ízur ̣elu aṭṣu ishi ada nḳuchi

18 “Unuḅe ndu nḳuchi;
 unu ṇumadupho iphe
 ḷe ncḥi!

Unuḅe ndu aṭṣu ishi;
 unu palidapḥo ̣enya
 ḥumakpodapho!

19 ?Ḅukwanu onye aṭṣu ishi ̣obu,
 aḅudu onye-oẓi mu?

Ṭoo ?ḅu onye adabe nḳuchi
 g'onye ono,
 mu ẓiru oẓi ono?

?Ḅu onye aṭṣu-be ishi
 g'onye ṇo mu l'̣eka?

Mḅu ?ḅu onye aṭṣu-be ishi
 g'onye-oẓi ḳe Chipfu?

20 Ị ḥumawaru iphe,
 ḍu igwerigwe;
 ̣ophu ṇ̃ingadu ncḥi.

Ncḥi gheru ngu ̣onu;
 ̣ophu ̣o ḍudu iphe,
 ṇ̃inumaje.”

21 Chipfu ḅe ḅu onye
 pf̣uberekoto.

Noo iphe, meru g'o gude ̣o ṇu
 pḥe ekemu,
 ereshi ire ike bya
 aḍukwapho biribiri.

22 Obenu l'̣ephe byaru
 bya aḅuru ndu a
 lẉutaru iphe pḥe l'̣ogu;
 bya aḅuru ndu a kwaṛu
 l'̣okwata.

Mbụ ịe g'ẹphe ha be
 nwulahụkotaru
 kwaa l'ime nsụkutu;
 me ndu ọpụ a
 turu mkpọro woru
 domia edomi.
 Ẹphebēdua l'onwophē bụwaa
 ndu a lwutaru l'ọgu.
 Ọpụ ọ dudu onye gbaru
 phē mkpu.
 Ẹphe bụwaa ndu a kwaru
 l'ọkwata.
 Ọpụ ọ dudu onye pfuru
 sụ: “Unu chiphu phē nū
 azu-o!”

²³ ?Bụ onye ole ịe g'unu
 ha a-ngabē nchị l'opfu-a;
 ọzokwanu nọdukpoepfo
 nwadoo nūma iphe,
 e-mechaa mee nū?

²⁴ ?Bụ onye woru ndibe Jiékọpu
 haa g'ẹphe bụru iphe,
 a kwaru l'ọkwata;
 mbụ haa ndu Ízurẹlu
 g'ẹphe bụru ndu a
 lwutaru l'ọgu?

?Tọbudu Chipfu l'onwiya
 meru iya;
 mbụ onye ono,
 bụ iya be anyi meshiru
 iphe-ẹji ono?

Kẹle ẹphe te ekwedu etso
 ụzo iya.

Ọpụ ẹphe ekwedu eme

ekemu iya.

- ²⁵ Ọ bụru iphe ono meru g'o
 gude ọ wụa phẹ oke
 ẹhu-eghu iya;
 mee g'ẹjo ọgu dapfuta phẹ.
 Ọgu ono gude ọku woru phẹ
 kee mbvu;
 ọphu iphe edoduru
 phẹ ẹnya.
 O kee phẹ phuruphuru g'ọku;
 ọphu o rwuduru phẹ
 l'ọkpoma.

43

- Onye* bụ iya kpoloko
 a-dzọ ndu Ízurẹlu
¹ O be lẹ nta; wakwa iphe,
 Chipfu epfu;
 mbụ onye ono,
 bụ iya meru gụbe Jiékọpu;
 onye bụ iya kpuru
 gụbe Ízurẹlu pfube.
 Ọ sụru-a:
 B'atsushi ebvu;
 kele mu gbafutawaru ngu.
 Mu kuru ngu oku;
 kukpọo ngu ẹpha ngu;
 mbụ l'ị bụ nkemu.
² Teke ọ bụ mini bẹ iirwughata
 bẹ mu nọepfo swiru
 ngu eswiru.
 Teke ọ bụ nggele bẹ iime
 g'ị ghata;

o too ridu ngu.
 Teke i jeru ije je aghabua Ọku;
 ọ tọo hụdu ngu;
 ọphu ire ọku iya te
 ekepyashịdu ngu.

³ Noo kẹle ọo mbẹdua bụ
 Chipfu;
 bya abụru Chileke ngu;
 bya abụru Onye nsọ
 kẹ ndu Ízurẹlu;
 bụru onye ndzọta ngu.

Ọo ndu Ijiputu bẹ mu
 nụru gude gbata ngu.

Mu woru ndu Kushi;
 yẹle ndu Seba nụ
 l'Ọzori ngu.

⁴ Eshinu ị dū mu mkpa;
 tẹme ị bụru onye
 aakwabẹ ùbvù l'ẹnya mu;
 tẹme eshinu mu yeru
 ngu obu;
 bẹ mu e-woru ndu
 nemadzụ nụ gude
 gbanweta ngu;
 nụkwapho ndiphe gude
 gbanweta ndzụ ngu.

⁵ Gẹ ndzụ ba agụkwa ngu;
 kẹle mu nọkwa swiru
 ngu eswiru.

Mu e-shi l'ụzo
 ẹnyanwu-awawa
 chịlataru ngu ụnwu ngu;
 bya ejekwaphọ l'ụzo

ẹnyanwu-arịba je
achịlatachaa ndibe ngu.

⁶ Mu abya asụ isheli:
“Pakwarụ phẹ haa!”

Bya asụ ndọhali:
“Be sedeekwa phẹ!”

Sụ phẹ: Unu shikwa l'ẹka
dụ ẹnya chịtaru mu
ụnwu mu kẹ nwoke!

Unu eshi l'ẹka igwe
beru alị beru chịlataru
mu ụnwada mu!

⁷ Mbụ iphe, bukpo
onyemonye zarụ ẹpha
laaru mu.

Ndu mu meru g'e gude tua
mu ẹpha.

Ndu mu gude ẹka mu kpua;
gude ẹka mu mee g'ọo-dụ.

⁸ Dufutanu ndu ono,
nweru ẹnya;
obenu l'ẹphe atsụ ishi onoya;
mẹ ndu ọphu nweru nchị;
ẹphe nọdu ada nkuchi.

⁹ Ohamoha l'ọphu dzukọru
l'ẹka lanụ.

Teme ndu nemadzụ
dzukokwaapho.

Ọle ?bụ onye ole lẹ g'ẹphe ha
pfuru iphe ono,
eme nụ onoya;
bya epfukwapho ọphu
mehawaru nụ?

G'ẹphe jenụ ekua ndu ekebe

phẹ g'ẹphe bya egoshi
 ẹ nkephẹ bụ ire-lanụ;
 k'ọphu ndu ọzo a-nụma
 iya sụ: Ọ kwa eviya.

¹⁰ Wakwa iphe, Chipfu epfu baa:

“Ọ kwa unu bụ ndu ekebe mu;
 unu bụkwarupho
 onye-ozu mu,
 mu họtaru l'onwomu;
 k'ọphu unu a-maru mu;
 bya ekwetakwaphọ nkemu.
 L'ọ dokwaphọ unu ẹnya
 l'ọo mu bụ onye ọbu.

Ọ tọ duedu Chileke ọzo,
 e meru dobe,
 abụdu mbẹdua;
 ọphu ọ dudu ọzo,
 a-dubaa nụ gbahaa mbẹdua.

¹¹ Mbẹdua; mbụ mbẹdua
 gẹdegedede;
 ọo mu bụ Chipfu;
 ọphu ọ duedu onye
 ndzọta ọzo,
 dū nū gbahaa mbẹdua.

¹² Mu goshiwaru iya egoshi;
 bya adzọta iya dobe;
 bya echia ya ẹ
 mkpu l'ọo mbẹdua bụ
 Chileke;
 l'ọ tọ bụdu agwa ndu
 ọhozo ono,
 unu dobegbaaru ono.

Mbụ ọ bụru unu bụ ndu
 ekebe mu.”

Nokwa iphe, Chipfu eepfu.

¹³ “E -shikp̄oo l'ichee
 b̄e ọ̄ b̄u mu ph̄o b̄e
 b̄u iya n̄u;
 ọ̄phu ọ̄ d̄u du onye ad̄u
 ike anaf̄u mu onye n̄o
 mu l'ẹka.

Mu -mewaa iphe g'ọ̄ d̄u mu;
 ?b̄u onye s̄uru g'Ọ̄o-bya
 emee ya imephu?”

Chileke l'e-me ḡe ndibe iya
 laphu az̄u l'Ọ̄nodu ph̄e

¹⁴ Wakwa iphe, Chipfu epfu
 baa; mb̄u onye ono,
 gbaf̄utaru unu ono;
 bya ab̄uru Onye Ns̄o
 k̄e Ízur̄elu.

Ọ̄ s̄uru-a: “Ọ̄o l'iswi ẹhu
 unu b̄e mu e-gude
 zia g'e je Bábil̄onu;
 je anyakash̄a
 ọ̄guzo-igwe g'ọ̄ ha.

Noo teke okoo,
 ndu Bábil̄onu at̄u
 a-gh̄o erwubvu.

¹⁵ Ọ̄ kwa mb̄e dua b̄u Chipfu
 ono;
 mb̄u Onye Ns̄o k'unu ono.

Mb̄u onye ono,
 b̄u iya meru unub̄e
 ndu Ízur̄elu dobe;
 bya ab̄uru iya b̄u eze unu.”

¹⁶ S̄u-a; wakwa, iphe,

Chipfu epfu;
 mbụ onye ono, tọru ụzo,
 o shijaa eze-onyimu;
 mbụ tọgbo gbororo;
 ọ ghajaa eze mini;
¹⁷ mbụ onye ono,
 chifutaru ụgbo-inya-ọgu;
 mẹ inya;
 mẹ ndu ojogu;
 mękpoo ndu gbaru
 mkparawa;
 chikobe phe dobe.

Ephe zeshia l'eka ephe ta
 abyadu agbalihubaa ozo.

Mbụ ọ gbanyia phe;
 mbụ phunya phe
 g'onye aphunyi oku
 oroku.

¹⁸ “Unu zohaa akahu iphe!
 G'ọ tọ bushi l'iphe, mehawaru
 nu be obu unu a-du!

¹⁹ ?Unu te eledu le mu watawaru
 eme iphe ophuu!

Mbụ l'obyawaa efuta.
 ?Unu ta ahumaduru iya?

Mu eyeakwa ụzo l'echiegu.

Teme mu ndu emewaa
 nggele l'ali,
 dabyiru mgbegere.

²⁰ Anụ-egbudu akwabẹ mu ùbvù;
 mękpoo nkuta-ọswa yẹ
 mgbashị-ujiku;
 kele mu meru gẹ mini du

l'echieḡu;
 bya emee gḡ mini sḡo
 gborogboro l'alì,
 dabyiru mgbegere;
 k'ḡphu ndibe mu a-ngu
 mini; mbḡ ndu ono,
 mu gude ḡka mu hḡta
 ono;
²¹ ndu mu gude ḡka mu mee
 doberu onwomu
 g'ḡphe raa ya arara sḡ g'e
 tuje mu ḡpha.”

- Iphe-ḡji* ndu Ízureḡlu
²² Obenu ḡ ḡbe Jiéḡḡpu
 te ekwedḡ raku mu.
 Mbḡ-a; ḡbe Ízureḡlu sḡ l'ike
 mu bvḡwaru ngu.
- ²³ ḡphu ì kpḡtaduru atḡru
 gude gweeru mu
 ngweja-akḡ-ḡku.
 ḡphu ì gweduru mu ngweja
 mmanḡ gude kwabḡ
 mu ùbvù.
- ḡ tḡ bḡdu ḡ mu bojeru ngu
 ivu-ḡrwa sḡ g'i gweeru
 mu ngweja-nri.
- ḡzokwanu ḡ mu mejeru
 g'ike bvḡ ngu ḡ mu
 adaru ngu ngweja
 ùnwù-isḡnsu.
- ²⁴ I ti gudedu okpoga je azḡta
 oshi ḡmanko,
 eshi mkḡḡ gude bya
 anḡ mu.

Ọphu i gweduru mu ngwẹja
 ẹba-anụ gude mee g'ẹpho
 ji mu.

Ọ bụchia iphe, i meru bụ l'i
 mewaru mu iphe-ẹji jasụ
 ọ nọdu anyịwa mu ẹrwa.

Mbụ l'i meswewaru mu jasụ
 ike ngu bvụwa mu.

²⁵ Ọ bụru mbẹdua;
 mbụ l'ọo mu bụ onye
 e-hufu emeswe,
 i mesweru mu;
 g'ẹpha mu apfuru.

Ọphu mu anyatabaẹdu iphe-ẹji,
 i meshiru ọzobaa.

²⁶ Sụ-a; nyatanuru mu iphe,
 mehawaru nụ.

G'anyi tụkonu yee ọnu l'opfu
 ọbu.

Donaa g'ọ nwuru g'a maru
 ?ọ kalẹru ngu?

²⁷ Nna ngu kẹ mbụ meru iphe-ẹji.

Ndu-ishi ngu meswee mu.

²⁸ Noo g'o gude mu woru
 ndu-ishi ụlo-dụ-nsọ
 merwushia;
 bya ahaa g'e woru Jíékọpu
 mebyishikọta l'ophu;
 l'e gude ndu Ízurẹlu
 ephu l'iphu.

¹ “Obenu lẹ-a; ngabẹ nchị
nta-a; gụbe Jiékọpu,
bụ onye-ozí mu;
mbụ gụbe Ízurẹlu ono,
mu gude ẹka mu họtá ono.”

² Wakwa iphe, Chipfu epfu
baa; mbụ onye ono,
meru ngu nụ ono;
onye bụ iya doziru
ngu teke ị nọ l'ẹpho.

Tẹme ọ bụru iya bụ
onye e-yeru ngu ẹka:

Ta atsụkwa ebvu;
gụbe Jiékọpu,
bụ onye-ozí mu;
mbụ gụbe Jieshurunu,
bụ onye mu gude ẹka
mu họtá.

³ Mu a-gba mini l'alị,
ẹgu mini agụ.

Mbụ lẹ mu e-woru
ọ-sọ-gborogboro
mini wụa l'alị,
kpọhuru jegiri-jegiri.

Awa ngu bẹ mu a-wụ
Unme nkemu.

Mu abya awụa iphe-ọma,
shí mu l'ẹka l'ẹhu ndu
bụ oshilọkpa ngu.

⁴ Ẹphe awata amishi g'ẹswa,
amishi l'ẹka mini
aduje shii;
mbụ g'oshi wilo,

zeru l'aguga nggele,
asO asOso.

⁵ O nweru onye asu:

Mu bukwa ke Chipfu.

Onye ozo ekua onwiya
epha laaru Jiekopu.

Onye ozo edee l'eka iya su:

Mu bukwa ke Chipfu!

Epha mu bukwa Izurelu!

⁶ Wakwa iphe,

Chipfu epfu baa;

mbu onye ono,

bu eze ndu Izurelu

bya aburu onye

gbafutaru phe nu;

mbu Chipfu,

bu Okalibe-Kakota-Ike:

O kwa mbedua bu onye ivuzo;

bya aburu onye ikpazu.

O to dukwa Chileke ozo,

du nu; gbahaa mbedua.

⁷ Oo ya bu le-a;

?bu onye be unu

a-nodu atu eyeru mu?

G'onye ono pfunaa ya!

G'onye ono menaa

ya ge mu maru;

g'o doo ya ishi rii

l'iphu mu!

Mbu iphe, mekotakporu nu;

eshinu mu meru ndibe

mu, shi l'ichee.

G'onye ono pfukwapho iphe,

e-mechaa mee nu;

mbụ-a; g'ọ k'Ọnaa iphe,
abya ememe.

⁸ G'ẹhu ba nmakwa unu
anmanma;
mbụ gẹ ndzụ ba agụkwa
unu!

?Mu te epfuhaadaru iya
unu eshi lẹ mbụ;
mbụ pfua ya raa ya
arara?

Mbụ-a; ọ kwa unu bụ ndu
ekebe mu.

?Ọ duru Chileke ọzo, dụ nụ,
abụdu mbẹdua?

Waawakwa! Agbara mkpuma
ọzo ta aduhakwa.

Ọ tọ dụekwa onye ọzo,
mu maru.

Ndu eme kẹ ntẹkpe

⁹ Iphe, bụkpoo ndu eme kẹ ntẹkpe g'ẹphe ha ta
adukwa iphe, ẹphe bụ. Teme iphe ono, ẹphe sụru l'ọ
bụ phẹ ọkpobe iphe ono bụru iphe, adudu iphe, ọ bụ.
Ndu agbaru phẹ ọdzori bụkwa ìshì bẹ ẹphe atsu. Ọphu
ẹphe amadu iphe; k'ọphu iphere a-du phẹ. ¹⁰ ?Bụ onye
jejeru je emeta agwa; mbụ kpua ntẹkpe, adudu iphe, ọo-
baru iya? ¹¹ Lekwa; iphe, bụkpoo ndu ẹphe l'iya swi bẹ
e-mechakwaa bụru ndu iphere e-me. Ndu ono, akpuje iya
nụ ono bünü nemadzu mmanu bẹ ẹphe bụ. G'ẹphe
dzukobenu bya apfuru hụma l'ee-ye phẹ oke ebvu meru
iphere kpua phẹ g'ẹphe ha.

¹² Ọo onye-úzu ewotaje anma hube l'ọku icheku. L'ọ
bya egude ọngu tsua ya gude meta ntẹkpe. Ọ bụru ike-
okpu iya bẹ oogudeje mee ya. O -menyaa ya; ẹgu gụahaa

ya; ike abvu iya. Teke o nguduru mini; a -nonyaa; egu mini atsua ya nkwo mee.

¹³ Onye ekwo oshi bu eri be oogudeje atu nkiya. L'o bya egude iphe, aakaje iphe kaa ge ya e-me iya. L'o bya egude ayo bya ebebashia ya. Gude komupasuu mee ya l'o du ge nwoke; mbu dukpoo akpabiri ge nwoke aduje; woru iya je ebvube l'ulo-nshi. ¹⁴ Mbu le-a; o gbutsuru oshi sida; ozoo oshi sipuresu; ozokwanu achi, o haru; yele oshi ozo, du l'oswa tuko vua. Ozoo l'o woru oshi payinu dzaa; igwe dzee mini mee ya; o vuta. ¹⁵ L'o buwaruro nemadzu iphe, oo-gude eshi ite. L'o haru hata iya gude nyaa oku. L'o gude iya phunwua oku ghee buredi. Temanu l'o gbutakwa iya pho gude pyita agwa wata abaru aja. Mbu pyia ntakpe phozeaharu iya. ¹⁶ L'o bya ekee nku obu ebo chita ye l'oku; shia ya ite. L'o hua ya anu taa; epho eji iya. L'o gudekwa iya pho nyaa oku; l'o su: "Hm! Nta-a be ehu evuwa mu oku. Mu humawaru oku nyaru." ¹⁷ L'o bya achita ophu phoduru nu gude mee agwa; mbu mee ya ntakpe; phozeru iya wata iya abaru aja. L'o bya epfuahaa nuahaa ya su iya: "Dzotanuu mu; o kwa ngu bu Chileke nkemu."

¹⁸ Su-a; ephe ta amakwa iphe; ophu o dudu iphe, edoje phe enya; kele a phuchiru phe iphe l'enya; k'ophu ephe ta aphudu uzo. Teme e mechia phe egomunggo; g'o to du iphe, e-dojee phe enya. ¹⁹ Ophu o dudu onye ophu asuje ge ya ria oriri. Mbu ophu o dudu onye ophu iphe edoje enya ke g'o su: "Nta bu iphe-a, mu hataru ye l'oku-a; bya egude icheku iya ghee buredi-a; bya egude iya hua anu taa-a; bu ophu phoduru nu be mu e-gude mee ebyi? Bu kpukurukpu be mu a-wata ephozeru?"

²⁰ O kwa ntuu be oorije. O buru obu iya, e dephuru edephu dephuru yebedua. O to budu l'oo-du ike

adzọ onwiya. Ọphu ọosudu: “?Ọ kwa l'iphe-a, ya gude l'ẹkutara-a bụ iphe, abụdu ọkpobe iphe?”

Chipfu, bụ onye ndzọta

kẹ ndu Ízurẹlu

²¹ “Nyatakwa iphe-a;

gụbe Jiékọpu;

mbụ gụbe Ízurẹlu;

kẹle ọ kwa ngu bụ

onye-ozu mu.

Ọ kwa mu meru ngu dobe;

ị bụru onye-ozu mu.

Gụbe Ízurẹlu; mu ta abyakwa

azọha ngu azọha!

²² Mu rwufuwaru emeswe,

i mesweru mu.

Ọ gbakahụwa g'ẹka igwe

rwuchaaru erwurwu;

gbakaa ya.

Mu bya agbaka iphe-ẹji,

i meru mu; ọ tahụ g'iji,

kwarụ l'ụtsu atahụje-a.

Lwapfutanụ mu;

kẹle mu gbafutawaru ngu.”

²³ Gụbe imigwe;

gụnaa ebvu ẹhu-utso;

kẹle o kwa Chipfu mewaru

iphe-a!

Chia mkpu g'a nụma gụbe

eliphe, nọ igwe lẹ mkpula!

Unu watanụ agụ ebvu;

unubẹ úbvú úbvú;

mẹkpoo unubẹ

ọswa ọswa; yẹle iphe,

bụkpoo oshi,
nọ iya nụ!

Noo kẹle Chipfu gbafutawaru
Jiékpọpu!

O gudewaa Ízurẹlu goshi
ọdu-biribiri iya.

²⁴ Wakwa iphe, Chipfu epfu baa;
mbụ onye ono,
gbafutaru ngu nụ ono,
bụkwa iya phọ bụ onye
kpuru ngu teke ị
nọkwadu l'ẹpho ono.

Ọ sụru-a: “Ọ kwa mu bụ
Chipfu;
onye bụ iya meru
iphemiphe dobe.

Ọ bụru mu tọsaru eligwe
nwẹka mu;
ọ dabyiru swoo;
bya abụkwaru mu phọ
tọsaru eliphe l'onwomu.

²⁵ Ọ kwa mu l'emebyije
iphe-ọhumalenya, ẹphe eme;
mbụ ndu ono, epfu iphe,
mu epfuduru ono.

Mu nọdu emejekwaphọ
ndu aphụ ọphulenyà;
ẹphe aburu ndu
eme eswe.

Ọ bụ mu alọ-phuje ndu
maru iphe azụ
mee mmamiphe phẹ
l'ọoburu iphe,

adudu iphe, o bu.

²⁶ Opfu, onye ejeru mu
 ozi pfuru be mu emeje
 g'o du g'o pfuru iya.
 Teme teke ndu epfuchiru mu
 nu pfukwarupho iphe;
 mu emee ya g'ephe
 pfuru iya;
 mbu ndu pfuru opfu
 ehu Jierusalemu
 su l'ee-mechakwaa buru
 iya eburu ozo;
 bya epfukwapho opfu
 ehu mkpukpu le mkpukpu,
 nogbaa l'ali ndu Jiuda
 su l'ee-mechakwaa
 kpukwachaa ya;
 mbu l'emebyishi ono,
 e mebyishiru iya ono
 be ya e-mechakwaa
 mekwata g'o du g'o shi du.

²⁷ Oo mu suru ogbu-mini:
 'Ngwa; tahu!
 Mu e-mekwa ge mini,
 nogbaa
 le nggele ngu tashihu.'

²⁸ Oo mu pfuru opfu ehu
 Sayirosu su l'o bu onye
 echeru mu aturu mu.
 L'oo-mekota iphe,
 du mu l'obu g'o mee.
 L'oo-su g'a kpu-phu
 Jierusalemu azu.

L'ò byakwapho asù g'a tùa
 òkpa-ùlo
 eze-ùlo Chileke.”

45

- ¹ Wakwa iphe, Chipfu
 epfu anù onye ono,
 ò họtaru g'ò bụru eze;
 mbù Sayịrosu,
 onye ò lọtaru l'ẹkutara
 gude kwatsushia òha,
 dù ichiche, byaru iya
 l'iphu; gude nashia
 ndu eze ngwọgu phẹ
 gbabẹ phẹ ẹka ọto;
 gụhashia ụzo gheberu
 iya ọnu;
 k'ọphu a taa gụ-chihedu
 iya agụ-chi.
- ² Ọ sùru-a: Mu e-vuru ngu ụzo
 je egbuzeru ngu úbvú
 úbvú egbuze;
 je agbakwoshia ọguzo,
 e meru l'onirubvu;
 bya egbukashia mgbọ́rígwè,
 e gude tị-chia ụzo.
- ³ Mu a-nù ngu ẹku,
 e doberu l'ọchii;
 mbù iphe-enweru,
 e doberu l'ẹka e domiru
 edomi.
- Ono e-me g'ị maru lẹ mu
 bụ Chipfu bya aburu

Chileke ndu Ízurẹlu;
 onye ekuje ngu ẹpha
 ngu gẹdegede.

⁴ Ọ kwa onye mu eme ele bụ
 Jiékọpu ono,
 bụ onye-ozu mu ono;
 mbụ Ízurẹlu ono,
 bụ onye mu họtaru
 l'onwomu ono.

Ọ bụru iya meru g'o gude mu
 kua ngu l'ẹpha;
 bya eworu ọkwa,
 aakwabẹ ùbvù woru nù
 ngu l'ẹbe abụ l'ị maru
 onye mu bụ.

⁵ Ọ kwa mbẹdua bụ Chipfu;
 ọphu ọ dụekwa onye ọzo,
 dụ nù.

Mbụ l'a -gufu mbẹdua ta
 adụekwa Chileke ọzo,
 dụ nù.

Ọo mbẹdua e-me g'ike dụ
 ngu l'ẹbe abụ l'ị maru
 onye mu bụ.

⁶ Ọ bụru mu -mee ya nno;
 ndu nemadzụ eshita l'ẹka
 ẹnyanwu awatajẹ jasụ
 l'ẹka ọodaje
 maru l'ọ tọ duedu onye ọzo,
 dụ nù, abudu mbẹdua.

Ọ kwa mbẹdua bụ Chipfu;
 ọphu ọ dụekwa onye ọzo,
 dụ nù.

⁷ Ọ kwa mbẹdua emeje
 g'ìphóró dụ; bya emee;
 ọchii adụ.
 Ọ kwa mbẹdua emeje g'e
 nweru ẹku;
 mu nọdu emejkwaphọ
 g'ọla-l'iswi bya.
 Ọ kwa mbẹdua, bụ Chipfu
 tọkoru iphemiphe ono
 eme.
⁸ Gụbe imigwe,
 nọgbaa l'ephekerephe;
 dzenaa apfubekoto
 gẹ mini!
 G'urwukpu dzenaa ya
 yọyoyo!
 G'eliphe l'ophu saa ọnu
 gabala!
 K'ophu ndzọta a-tụko
 ẹkameka sweta;
 apfubekoto atụko ẹkameka
 dzuru.
 Ọ kwa mbẹdua, bụ Chipfu
 meru iya dobe.
⁹ Nshio onye etso onye meru
 iya nū ụswo.
 Mbụ onye adụdu iphe ọzo,
 ọ bụ gbahaa ite,
 a kpuru l'urwa.
 Urwa; ?ọojije onye akpu ite
 sụ iya: “?Bụ gunu bẹ
 iikpu?”
 Iphe, i gude ẹka ngu mee;
 ?!’Ọo-nọnya sụ ngu

l'i mekwaru iya;
 ọphu ya enwedu ẹka?

¹⁰ Aphu tsoru onye asu nna iya:
 “?Bu gunu be o gude i nwua
 mu egube-a?”

Ọzoo onye asu ne iya:
 “?Bu gunu be i nwuru mu
 egube ọwa-a?”

¹¹ Wakwa iphe, Chipfu epfu
 baa;
 mbu Onye Nso ke
 ndu Ízurelu;
 teme o buru iya bu onye
 meru Ízurelu obu
 dobe.

Ọ suru-a: “?Unu a-wata
 mu aji njikpa-Ọnu le
 k'unwegirima mu?”

Tọo ?unu a-nodu aturu mu
 ekemu ge mu e-me iphe,
 mu gude ẹka mu mee?

¹² Ọ kwa mbẹdua meru eliphe
 dobe.

Mu byakwapho bya emee
 nemadzụ dobe iya.

Ọ kwa ẹka mu be mu gude
 tọsaa imigwe;
 bya edokaa ya kpokpode
 kpokpode l'ophu.

¹³ Ọ kwa mbẹdua meru ge
 Sayirosu futa
 gude goshi le mu bu onye
 pfuberekoto.

Ọ bụru mbẹdua e-me g'ụzo,
ooshi pfụkotaru
nhamụnha.

Ọo ya a-kpụkwa mkpụkpu
mu ono mee gẹ ndibe mu,
a kpuru lẹ ndzu
nweru onwophẹ.

Ọphu oomekwa iya g'apfua ya
ụgwo;
Ọzoo g'e bua ya nggo.”

Nokwa iphe, oopfụ;
mbụ Chipfu,
bụ Ọkalibe-Kakota-Ike.

¹⁴ Wakwa iphe, Chipfu epfu:
“Iphe, e metaru l'alị Ijiputu;
mẹkpoo ngwaswa,
shi l'alị Kushi;
mẹkpoo gwagoro-gwagoro
ndu ono,
shigba alị Seba ono;
g'Ọ ha a-lwakotaru ngu;
tụkoru bụkotaru nkengu.

Ẹphe a-tụko etso ngu;
awụ l'odze awụ-pfuta ngu.

Ẹphe abya ephozeta l'iphu
ngu rwọahaa ngu
arwọrwo epfu sụ:

‘Tororo opfu bụ lẹ Chileke
nọkwa swiru ngu
eswiru.

Ọ tọ dụekwa onye ọzo,
dụ nụ;
mbụ l'ọ tọ dụekwa onye ọzo,
dụ nụ gbahaa yẹbedua.’

15 Tororo! I bukwa Chileke,
 anɔduje edomi onwiya
 edomi; gube Chileke,
 bu onye dzotaruru ndu Ízurɛlu.

16 Iphe, bu ndu agwo obvu
 be ee-me iphe-iphere
 meru botorii nu phe.
 Mbụ l'ephe a-tuko mehu
 botorii g'ephe ha
 tughua.

17 Obenu le ndu Ízurɛlu bu
 Chipfu a-dzota phe.
 Mbụ l'adzodzo, ɔo-dzo phe
 a-buru ojeje.

Ophe a byadu eme unu
 iphe-iphere;
 ophe unu abyadu
 emephe botorii gburu
 jeye le gbururu.”

18 Kele-a; wakwa iphe,
 Chipfu epfu; mbụ onye ono,
 bu iya meru imigwe dobe.

O kwa iya bu Chileke;
 onye bu iya kpuru
 mgboko;
 bya aburu iya meru iya.

Oo ya toru okpa iya;
 ophe o meduru iya g'ɔ
 nodu iphoru.

O meru iya dobe g'e buru
 iya eburu.

O buru iya epfu su: “O kwa
 mbedua bu Chipfu;

Ọphu ọ ọ̀dekwa onye ọ̀zo,
dụ nụ.

¹⁹ Iphe, mu pfuru bẹ mu
te epfukwaru lẹ mpya.

Mu te ejekwaru anọdu l'ẹka
lanụ l'ali,
Ọchii agba pfua ya.

Ọphu mu asụkwaru oshilọkpa
Jiékoṣu phẹ g'ẹphe chọo
mu kẹ mmanụ.

Mụbe Chipfu epfuje ọkpobe
opfu; mu epfuje iphe,
dụ k'epfupfu.”

²⁰ Unu dzukọbenu onwunu
byakpọdapho!
Unu nọkobe l'ẹka lanụ;
unubẹ ndu ono,
shi ọhamoha tsoru agha
phurii ono!

Ndu amadụ iphe bẹ ẹphe bụ;
mbụ ndu gwọru nshi,
a pyiru l'oshi parụ aghaphe;
ndu epfuje anụ iphe,
ta adzọjedu nemadzụ.

²¹ Unu pfunaa iphe g'ọ ọ̀;
unu byanụ edoo g'ọonwuru
unu.

G'ẹphe nọkobe chiaru iya idzu.

?Bụ onye bụ onye pfuhawaru
iphe-a teke ọ̀nya?

?Bụ onye meru g'a maru
iya teke ọ̀hawaa
ụzenya-ụzenya?

?Tòbudu mbèdua, bụ Chipfu?
 Ọzo bụ l'ọ tọ duedu Chileke
 ọzo, dụ nụ,
 abụdu mbèdua.

Ọo mbèdua bụ Chileke,
 pfuberekoto;
 bya aburu onye ndzọta.

Ọ tọ duedu onye ọzo,
 dụ nụ abụdu mbèdua.

²² Unu ghanaaru mu iphu;
 huma l'aa-dzọta unu;
 unubẹ ndu mgboko l'ophu;
 kẹle ọo mbèdua bụ Chileke;
 ophu ọ dükwa onye ọzo.

²³ Mu gudewaa onwomu ria angụ.
 Mu gudewaa ọnu mu pfua
 opfu onye pfuberekoto.

Ọphu mu abyadụ asụ g'ọ
 laa azụ.

Mu pfuru sụ l'iphe,
 bụ ikpere ndiphe l'ophu
 e-mechaa rwuchaaru
 mu alị.

Ọ bụru mbèdua bẹ ndiphe
 l'ophu e-mechaa gude
 eriye angụ.

²⁴ “Ephẹ e-pfu opfu ehu mu sụ:
 ‘Ọo Chipfu nwẹka iya
 pfuberekoto;
 bya aburu
 iya bẹ ike dụ kpẹekpu.’

Ndu ono g'ephẹ ha, shi
 abarụ mu hanyịhanyi
 ono l'a-byapfuta mu

gude iphere bya.
²⁵ Obenu lẹ-a; iphe,
 bukpo oshilokpa Ízurẹlu
 l'a-nọdu l'ẹka Chipfu
 buru ndu pfulberekoto;
 bya egude Chipfu
 eku onwophẹ.”

46

Agwa ndu Babilonu

- ¹ Balu phozeakwaru;
 Nebo nọdu ekpuwa
 ekpukpu.
 Mbụ lẹ ntẹkpe phẹ ono
 buwaa onye vu iya nu
 bu anu, evuje iphe.
 Mbụ l'iphe, o vu anyi iya
 ntumatu.
 Teme o buru ivu l'ẹhu nwanu,
 ike bvuru.
- ² Agwa obu g'ẹphe ha tukoru
 ekpu ekpukpu bya
 atuko phozeta.
 Ophu ẹphe adudu ike
 dzota onwophẹ.
 Ochia l'ẹphebedua l'onwophẹ
 be a kpuru lẹ ndu.
- ³ Unu ngabenuru mu nchi;
 unube onu-ulo Jiekpu;
 mbu g'unu ha buru ndu
 phoduru nu l'onu-ulo
 Izurẹlu;
 mbu unube ndu ono,

mu gudeshi eshinu a tsuru
ime unu ono;
mu nɔdu ehe unu eshinu a
nwuru unu.

⁴ Mbukpoo jasụ unu kahụ;
ewó tuko unu ishi sweta;
bẹ mu bukwapho onye
mu bu;
mu bukwapho onye
gude ndzụ unu.

Ọo mu meru unu;
ọ buru mu a-nɔdu apa
unu gelegelee.

Ọo mu a-nɔdu edobe unu
ndzụ;
teme ọ buru mu a-nɔdu
agbafutaje unu.

⁵ ?Bu onye bẹ unu a-turu
mu yeru?

?Bu onye bẹ unu a-sụ lẹ mu
l'iya ha?

?Bu onye bẹ unu a-sụ l'ọ kwa
onye dụ egube-a bẹ ọ
dụ g'a turu yeru mu?

⁶ O nweru ndu evushije
mkpọla-ododo l'ekpa phẹ.
Ephẹ achikoo mkpọla-ochaa
tù àtùtù l'iphe,
aatùje iphe.

Ephẹ eje ebuta onye-úú
mkpọla-ododo g'ọ bya
egude iya kpataru phẹ
ntekpe.

A -kpuchaa ya;

ẹphe awata iya abarụ ẹja.

⁷ Ẹphe apata iya t̄a l'ukuvu
p̄hẹ parụ iya t̄ugbua.

Ẹphe eje eworu iya kp̄obe
l'ẹka ọo-n̄odu.

Ọ b̄uru ẹka ono, a kp̄oberu
iya ono b̄e oo-kp̄oru.

Ọ t̄o byadu eshi l'ẹka ono,
a kp̄oberu iya ono
kp̄iriberu.

Teke nemadz̄u byaru bya
echiku iya l̄e mkpu;
ọ t̄o zad̄u iya ẹnu.

Ọphu ọ d̄udu ike adz̄ota iya
l'iphe-ẹhuka, byaru iya n̄u.

⁸ S̄u-a; unub̄e ndu ono,
emeje iphe,
Chileke s̄uru g'e be meshi
ono;
unu nyatakwa iphe-a!
Unu mekwaa ya g'ọ kwaa
unu l'egomunggo!

Unu yekwa iya eyeye l'ọkpoma!

⁹ Mb̄u-a; unu nyatakwa
akah̄u iphe; mb̄u iphe,
shihawaa ụzenya.

Ọ kwa mu b̄u Chileke.
Ọ t̄o d̄uekwa onye ọzo.

Ọ kwa mu b̄u Chileke;
ọ t̄o d̄uekwa onye ọzo,
d̄u ḡe mu d̄u.

¹⁰ Mu eshijeẹpho l̄e mb̄u mee
g'a maru iphe,

a-bùru ikpazù iphe.
 Mbù lẹ̀ mu anọ̀dujero teke
 ndiche mee g'a maru iphe,
 eteke medu nù.

Mu sùru-a: Iphe,
 mu tùberu k'ememe bẹ̀
 mu mefùtajekwa.

Tẹ̀me ọ̀ bùru iphe,
 dù mu ree bẹ̀ mu e-me.

¹¹ Mu jekpọ̀ruro l'ùzo
 ẹ̀nyanwu-awawa je ekua
 ẹ̀nu, erije odzu;
 bya ejemihu l'alì ẹ̀ka dù
 ẹ̀nya je ekua onye e-me iphe,
 mu tùberu.

Iphe, mu pfuru bẹ̀ mu e-me!
 Iphe, mu chìru idzu iya bẹ̀
 mu e-mekwaphọ̀.

¹² “Unu ngabẹ̀ru mu nchì;
 unubẹ̀ ndu ono,
 ọ̀kpoma kpọ̀ru gbengu ono!

Mbù unubẹ̀ ndu ono,
 apfùbekoto kwata dù
 ẹ̀nya ono.

¹³ Apfùbekoto nkemu bẹ̀ mu
 gudeakwa akpìritaru ntse.

Ọ̀ tọ̀ dùhekwa ẹ̀nya.
 Ọ̀phu ọ̀ dùekwa g'ọ̀o-nọ̀-beru;
 ndzọ̀ta mu erwua.

Mbù lẹ̀ mu a-dzọ̀ta ndu bu
 l'eli úbvú Zayọ̀nu.

Mu eworu akpabiri mu nù
 ndu Ízurẹ̀lu.”

47

Adada Bábilonu

¹ “Gụbe nwada Bábilonu;
 lwakwa alì alì;
 gwọdoshihukwa l'urwuku!

Hakwaa anọdu l'aba-eze
 je anọdu l'ali;
 gụbe
 nwada ndu Bábilonu!

Kẹle e tee kuẹdu ngu nwanyị,
 dụ bẹlebele bya adụ
 nyẹgenyeye.

² Pata mkpuma, eegweje
 iphe wata egwe nri!

Phụfunu ẹkwa,
 ì phụ-chiru iphu!

Phụ-linaa uwe ngu aphụ-li;
 l'ì gbaru ọkpa ọto je
 erwughashia nggele!

³ L'aa-gbabekwa ngu ọto;
 mee g'a hụma iphe-iphere
 ngu.

Mu e-melatakwa; ọphu ọ
 dukwa onye mu a-ha.”

⁴ Mbụ l'onye agbafutaje anyi
 ono
 bẹ ẹpha iya bụ Chipfu.

Ọ bụ Ọkalibe-Kakota-Ike;
 bya aburu Onye nsọ ke
 ndu Ízurẹlu.

⁵ Nọdukpoepfo nwa
 nggujunggui!
 Je anọdukpoepfo l'ẹka

gbakọtaru ọchii;
 gụbe
 nwada ndu Bábilọnu.
 Kẹle nta-a bẹ e tee kubaẹdu
 ngu eze nwanyị,
 nwe alị-eze, iche iche.

⁶ Ndibe mu meru;
 ẹhu ghuahaa mu eghu.

Mu tūr wua ndu ono,
 bụ okiphe mu onoya.

Mu woru phẹ ye ngu l'ẹka;
 ọphu ị phuduru phẹ
 obu-imemini.

I bochaa phẹ ivu-erwa
 bochaa mẹ ndibe phẹ,
 kahuru akahu.

⁷ I pfuru sụ l'ịi-bụwaruro
 eze-nwanyị jasụ l'ojejeje.

Ọphu ị rị-vukpọdaru
 iphemiphe-a;
 ọzokwanu chia idzù iphe,
 e-mechaa mee l'ikpazụ
 iya.

⁸ Ọo ya bụ ẹ-a;
 ngabẹkpodapho nchị;
 gụbe nwọphu kpọru obu
 ye l'akpa ntusaru-ẹhu;
 mbụ gube nwọphu arije
 l'ọ tọ dudu iphe,
 byaru eme ngu nụ;
 tẹme ị nọdu asụje onwongu
 l'owa-a ngu kpoloko dụ;
 l'ọ tọ duedu onye ọzo
 gbahaa ngu;

l'ì tì byadu abụ nwanyi,
 ji iya nwụhuru;
 ọphu ume nwa abyadu
 eme ngu.

⁹ Iphe labọ-a a-nwụkwaru
 ngu lẹ ntabu ẹnya lanụ.

L'ujiku lanụ bẹ ụnwu
 ngu a-nwụshihu;
 ji ngu anwụhu.

Iphe labọ ono a-zụe ngu phọ
 gburumu pfulurii.

I tii metadu iya l'agwugwo;
 ọphu iigwetadu iya
 l'ikpoto ngweja.

¹⁰ Kẹle ì kpọru obu ye l'ẹjo-iphe,
 ịinoduje eme.

I pfua sụ l'ọ tọ dudu onye
 hụmaru ngu nụ.

Ọ bụru mmamiphe ngu;
 yẹle iphe,
 ì nwụtaru bẹ dephuru ngu nụ;
 mee ngu;
 ì sụ onwongu l'ọwa-a ngu
 kpoloko dụ;
 l'ọ tọ duedu onye ọzo
 gbahaa ngu.

¹¹ Obenu l'ẹjo-iphe a-nwuru
 ngu;

ọphu ịmadu ẹka o shi.

Eze iphe-ẹhuka a-dapfuta ngu;
 ì tị dudu ike egbobuta
 iya.

Ọla-l'iswi a-tụ ngu l'ụpfu;

Ọphu ịmadu l'onoo
g'ọo-dụ.

¹² Sụ-a; mekpọekwapho
ọmamanshi ngu g'iime
iya!

Gwekpọekwapho ikpoto
ngweja, iigwe; bụ iphe,
i shi teke ị bụ nwata
gweta.

?A maru bụ; i -menyaa ya
l'ọgbohuru ngu?

Tọo ?bụ: i -menyaa ya
l'ịkpatsu ndzụ-agụgu?

¹³ Iphe, bụkpoo idzu,
a chị-koshiru ngu bụ iphe,
o meru
bụ l'ọ tukururu mee;
ike kabaa ngu abvubvu.

Ngwanụ gẹ ndu aphụjeru
ngu ọphulenyaa
kpịritanuru!

Mbụ ndu ono, anọduje ele
enya l'enyanwu yele
kpokpode
gude akọru ngu g'ọo-dụru
ngu l'ọnwa l'ọnwa ono.

G'ephe dzọnaa ngu l'iphe-a,
abyaru ngu anwuru-a!

¹⁴ “Ephe dū g'ẹswa akpe,
kpọhuru nkụ.

Ọ bụru ọku e-mechaa kee
phẹ kefu.

Ọphu ọ bụdu l'ephe adụkponu

ike adzọ onwophe;
g'ọku ono te nwu
phuruphuru kefu phe.

L'ẹka-a bẹ icheku
ọku k'anyaru ta adụkwa;
ọphu ọ dụkwa ọku,
a-dụ iya nụ k'anọdu ẹ
mgboru iya.

¹⁵ Nokwa mkpakọ iphe,
ẹphe e-meru ngu bụ ono;
mbụ ndu-a,
unu l'ẹphe shi teke ị bụ
nwata seta akanya-a;
zụta aswa-a.

G'ẹphe ha l'ẹhu l'ẹhu
e-shiswekọtaephe ụzo;
ọphu ọ dudu g'ọ ka mma
l'ọo onye lanụ,
byaru adụ ike dzọo
ngu nụ.”

48

Ízurẹlu ada ike

¹ Unu ngabẹ nchị l'opfu-a;
unubẹ ọnu-ulo Jiékọpu;
mbụ unubẹ ndu ono,
eekujeru laaru Ízurẹlu ono;
mbụ unubẹ eri Jiuda;
mbụ unubẹ ndu egudeje
ẹpha Chipfu eri nte;
tẹme unu nọdu akpọ-kuje
Chileke kẹ ndu Ízurẹlu;
ọphu ọ dudu ọphu unu

eme ire-lanụ;
 ọ́phu ọ́ dudu ọ́phu unu
 p̄f̄uberekoto eme;
² mbụ unubẹ ndu ono,
 kuru onwunu ndu shi lẹ
 mkpukpu, dū nsọ ono;
 tẹme ọ́ bụru Chileke kẹ
 ndu Ízurelu bẹ unu kpọru
 obu yeru;

Chipfu, bụ Ọkalibe-Kakọta-Ike;
 nokwa ẹpha iya bụ ono.

³ Ọ bụro teke dū ẹnya
 ẹnya bẹ mu pfuru iphe,
 mewaru nụ.

Mu gudekpọo ọnu mu pfua
 ya; raa ya arara;
 tẹme mu mekwaphọ g'a
 madzuru iya.

A bya l'amarụ; mu mee ya;
 ọ́ nwụa gẹ mu pfuru iya.

⁴ Kẹle mu mahawarụ g'ìidabe
 ike;
 mbụ l'akwara olu ngu bụ
 mgbọ́rígwè;
 tẹme atatiphu ngu bụru
 onyirubvu.

⁵ Ọ bụru iphe ono meru g'o gude
 mu pfuhawaru ngu
 iphe-a teke dū ẹnya;
 mbụ tẹme ọ́ nwụaha bẹ
 mu vuru ụzo raarụ ngu
 iya arara;
 k'ọ́phu ì tịi sudu l'ọ́o nshi
 ngu meru iphemiphe

ono; l'ṓo ntẹkpe ono,
 ị pyiru apyipyi ono;
 ọzoo ọphu ị kpuru
 l'onvirubvu ono bẹ o shi
 l'ẹka mee.

⁶ Ị nūmawaru iphemiphe-a.

Lewa iya rọ ẹnya! ?Tii
 kwetadu iya?

Nta-a bẹ mu byaru awata
 ngu egoshi iphe ọphúú,
 bụ iphe, e domiru edomi,
 bụ iphe, ịimadu.

⁷ Iphe ono bụa nta-a bẹ e meru
 iya;
 e te mehaadaru
 iya ụzenya.

Mbụ l'i tiki nūmaswee ya
 abụdu ntanụ-a;
 k'ọphu bụ l'i tịi sụdu l'i
 machahawaru iya.

⁸ Sụ-a; i tiki nūmaswekwaa ya;
 ọphu ị mahaakwaa ya;
 eshinu i shi teke ndiche
 data nkuchi.

Kẹle mu maru l'i bụ
 mebyikpọo onye
 ẹregede; tẹme iphe,
 i shikpọo l'ẹpho ne
 ngu zata bụru Okwerike.

⁹ “Ọ kwa g'ee-shi g'ẹpha
 mu apfuru meru g'o
 gude mu sedekwadụ
 ẹhu-eghu mu.

Ọ bụru g'ee-shi g'a jajẹ mu

ajaja meru g'o gude
 Ọphu mu teke
 atụ-koshidu ngu iya;
 k'Ọphu mu te emedu
 ngu g'ị chihu.

¹⁰ Tii ledu; mu hụchaakwaru
 ngu ahụcha;
 l'ẹbe abụ l'ị bụ
 mkpọla-ọchaa.

Mu byakwapho ahụa ngu
 l'ọku-ụzu,
 bụ iya bụ iphe-ẹhuka.

¹¹ Ọ kwa onwomu bẹ mu emeru
 iya.

Mbụ ẹ mu eme iya emeduru
 iya onwomu.

Kẹle-a; ?denu ẹ mu e-shi
 haa g'e woru ẹpha mu
 tūrwwa?

Mu te ewokwaru ùbvù,
 gbaru mu nụ aharu onye
 ọzo.”

Enweru onwonye ndu Ízurẹlu

¹² Ngabẹkpodarụ mu phọ nchị
 gụbe Jiékọpu;
 mbụ gụbe Ízurẹlu,
 mu kuru l'onwomu.

Ọ kwa mbẹdua bẹ ọ bụ.

Ọ kwa mu bụ onye mbụ bya
 abụru onye ikpazụ.

¹³ Ọ kwa mbẹdua gude ẹka mu
 tụa ọkpa mgboko-a
 l'ophu.

Ọ bụru mbẹdua gude ẹkutara
mu tọsaa imigwe
imigwe l'ophu.

Mu -kua phẹ oku;
ẹphe atụkoepho zelihi
pfuru apfuru.

¹⁴ Unu tuko g'unu ha byakọta
bya angabẹ nchị.

Denu nshi ọphu duru ike
pfuaru unu iphe-a;
mbụ l'onye ono,
mụbe Chipfu họtaru ono
l'e-me iphe,
mu tüberu l'ẹhu ndu Bábilọnu;
mbụ l'oshi ẹka iya bẹ ọ
dabẹwaru l'ẹhu ndu Bábilọnu.

¹⁵ Ọ kwa mu; mbụ l'ọ kwa
mu pfuru opfu-a.

Ee! Ọ kwa mu kuru iya oku.

Ọ bụru mu e-duru iya bya;
l'o mee iphe,
ọ byaru ememe meghaa.

¹⁶ “Unu kpịritaru mu ntse
bya angabẹ nchị l'iphe-a.

E -shikpọ lẹ mbụlembu,
mu shi pfuta opfu bẹ
mu teke epfuswee opfu
lẹ mpya.

Teke o mekpọoru lẹ mbụ
bẹ mu nọepho l'ẹka
ono.”

Nta-a bẹ Nnajiuphu, bụ Chipfu;
yẹle Unme nkiya;

yewaru mu gẹ mu bya.

¹⁷ Wakwa iphe,
 Chipfu epfu baa;
 mbụ onye agbafutaje ngu
 nụ ono, bụ Onye Nso
 kẹ ndu Ízurẹlu.

Ọ sụru: Ọ kwa mu bụ Chipfu,
 bụ Chileke ngu;
 onye bụ iya ezije ngu iphe,
 a-karụ ngu lẹ ree;
 bya aburu onye anọduje
 aturu ngu ẹka l'ụzo,
 ị-nọdu eshi.

¹⁸ “Ọme ị ngaberu nchi mee
 iphe, mu sụru g'e mee;
 ẹhu-guu gege anọduepho
 asọru ngu gborogboro
 gẹ mini asọ asoso.

Apfubekoto ngu atụ kpereree
 g'akpara-mini, atụ
 l'eze-enyimu.

¹⁹ Oshilokpa ngu gege adu
 igwerigwe g'ẹja,
 nọ l'alị.

Ụnwegirima ngu aburu aguta
 aguta g'unwu akpuru
 ereshi.

Ẹpha phẹ ta abyadu achihu
 achihu;
 ọphu a byadu emebyishi
 phẹ emebyishi
 l'iphu mu.”

²⁰ Unu shikwa lẹ Babilonu

kwafu!

Unu gbakwaa Ọso gbalaaru
ndu Bábilonu!

Unu t̄ya okoo gude pfua
ya g'a n̄uma-dzuru!

Unu zia nzi g'o rwua ẹka
igwe beru al̄i beru!

Iphe, unu e-pfu b̄u l̄e Chipfu
gbatawaru ndu-oz̄i iya
ono,
b̄u ndu Jiékọpu.

²¹ Ẹgu-mini ta aḡukwaru ph̄e
teke o duru ph̄e ghaa echiẹgu;
mb̄u l'o meru;
mini shi l'agbara-mkpuma
as̄shiru ph̄e.

Ọ gbajaru agbara-mkpuma;
mini wata as̄shi.

²² “Ndu ẹjo-iphe b̄e ẹhu ta
ad̄ujekwa guu.”

Nokwa iphe, Chipfu eepfu
b̄u ono.

49

Onye-oz̄i k̄e Chipfu

¹ Unu ngab̄eru mu nch̄i
unub̄e ndu bukube
eze-ẹnyimu!

Unu n̄umakpodapho iphe-a
unub̄e ọha, bu l'ẹka d̄u
ẹnya!

Chipfu vukwaru ụzo kua
mu t̄eme a nw̄ua mu.

Ọ b̄uro teke mu n̄okwadu

l'ẹpho ne mu bẹ
o kuru mu ẹpha.

² O meru ọnu mu;
ọ nọdu atsu nkọ g'ogu-echi,
a baru ababa;
bya eworu mu domia l'ime
ọbochi-ẹka iya.

O meru mu; mu dụ g'apfu,
a rwacharu arwacha;
bya eworu mu su-chia l'iphe,
ooyeje apfu iya.

³ O su mu: “I bukwa onye-ozu
mu gube Ízurẹlu.

Onye bu ngu bẹ mu e-gude
goshi gẹ mu dụ-be
biribiri.”

⁴ Mbẹdua sukwanu:
“Mu seakwaru akanya
ọla-l'iswi.

Mu swishierupho ike mu
k'iphoro l'iphe,
bu iphe-mmanu.

Ọle ọ bu; iphe, rwuberu mu
nu bu l'ẹka Chipfu
bẹ ọ dụ.

Tẹme obunggo mu buru
Chileke mu gude iya.”

⁵ O be nta-a Chipfu,
bu onye ono,
meru mu rọ teke mu
nọ l'ẹpho;
gẹ mu buru onye-ozu iya;
su:

“Duphutaru mu unwu Jiékọpu

azụ.

Chìkobe ụnwu Ízurẹlu
chítaru mu.”

Kẹle mu bụ onye aakwabe
ùbvù l'ẹnya kẹ Chipfu;
tẹme ọ bụru Chileke
mu bụ ike nkemu.

⁶ Ọo ya bụ; ọ sụ:

“Ọ tọ bụlekwa g'ị bụru
onye ejeru mu ozi
duphutaru mu ipfu ipfu
ụnwu Jíékọpu azụ;
wafụa g'i dulatakwaru
mu phọ ndu kẹ Ízurẹlu,
bụ nwa ndu ọphu mu
doberu bẹ ị nọ-doru.

Mu e-mekwa ngu phọ
g'ị bụru ìphóró,
duru ndu
abudu ndu Jiuda;
k'ọphu ii-me gẹ ndzọta mu
rwua ẹka igwe beru
alì beru.”

⁷ Wakwaphọ iphe, Chipfu epfu;
mbụ onye ono,
bụ onye agbafutaje anyi;
bya aburu Onye Nsọ
kẹ ndu Ízurẹlu.

Oopfu iya anụ onye ono,
ọhamoha jikaru ajika;
akpọ-yiru iya ukuvu ono;
mbụ onye ono,
bụ onye-ozì kẹ ndu-ishi.

Waa iphe oopfu baa:
 “Ndu eze e-mechakwaa
 hūma ngu wu-lihu.
 Ndu-ishi a-hūma ngu
 phozeru ngu.”

Q b̄uru onye e-me iya n̄u
 b̄u Chipfu; onye ono,
 apfushije ike l'iphe,
 o pfuru;
 mb̄u Onye ns̄o k̄e ndu
 Ízur̄e lu,
 b̄u onye h̄otar̄u ngu n̄u.

Edophu Ízur̄e lu az̄u l'̄onodu iya

⁸ Wakwa iphe, Chipfu epfu:

Qo teke mu a-wata eme
 eze-iphe-̄oma b̄e mu a-za
 ngu ̄enu.

Q b̄uru mb̄oku,
 mu a-wata adz̄ota
 nemadz̄u b̄e mu e-yeru
 ngu ̄eka.

Mu a-kwak̄obe ngu mee ngu
 g'i b̄uru iphe,
 mu l̄e ndiphe e-gude gbaa
 ndz̄u;
 g'i dophu al̄i ono az̄u
 l'̄onodu iya;
 mee g'̄ephe keta okiphe ono,
 shi dabyiru iphoro
 onoya.

⁹ Mb̄u-a; g'i s̄u ndu ono,
 a kp̄uru l̄e ndz̄u ono
 g'̄ephe f̄uta;

l'ì sùkwapho ndu nọ
 l'ọchii g'ẹphe nweru
 onwophẹ.

Ẹphe adụ g'ụnwu-aturu,
 dọru ata nri l'agụga gbororo;
 hụmachaa nri l'úbvú úbvú,
 dụgbaa kpọkoro
 kpọkoro kpọkoro.

¹⁰ Ẹgu nri ta abyadụ agụ phẹ;
 ọphu ẹgu mini agụdu
 phẹ; ọphu okpomọku,
 shi l'echiẹgu;
 ọzoo ọphu shi
 l'ẹnyanwu ekpoedu
 phẹ.

Ọ bụru onye aphuru phẹ
 obu-imemini a-nọdu
 edu phẹ duru phẹ
 shita agụga mini,
 asọ asọso.

¹¹ “Mu e-me g'úbvú úbvú,
 mu nweru bụchaaru
 gbororo.

L'aabya atụa iphe,
 bụ oji mu mkpoli l'ọoha
 l'eli l'eli.

¹² Lekwa; ẹphe e-shigbakwa
 ẹka dụ ẹnya.

Ọ duru ndu ọphu e-shi
 l'isheli;
 ndu eshi l'ụzo ẹnyanwu-adada;
 duru ndu ọphu e-shichaa
 ụzo alị Asụwanu.”

¹³ Unubẹ imigwe l'ophu;

unu rwua okwe!
 Gube eliphe; tenaa ẹswa!
 Unube ńbvú ńbvú;
 unu watanu agu ebvu!
 Noo kele Chipfu watawaru
 adu ndibe iya obu.
 Teme o buru ndibe iya ono,
 shi eje iphe-ẹhuka ono
 be ọo-phuru obu-imemini.

14 Obenu le Zayonu suru:

“Chipfu gbadoakwaru
 mu.

Nnajuphu mu zohaakwaru
 mu.”

15 Ne; ʔozohaje nwa, angu iya
 era l'obu;
 mbu ke g'o to phuru nwa,
 bu iya nwuru iya
 obu-imemini?

O -jekponu azoha be
 ọo-zohakwaa;
 obenu le mbedua ta
 azohadu ngu!

16 Tii ledu; mu deakwaru epha
 ngu g'uri l'obochi-eka
 mu;
 ophu mu azohajedu igbulu
 ngu ono azoha.

17 “Unwu ngu alwaakwa
 ẹgwegwa.

Ndu ono, shi mee ngu;
 i buru ochobu ono ndu
 alufuwaa.

18 Palinaa enya ngu imeli

lephee mgburugburu!
 Ụnwu ngu g'ẹphe ha
 anọkoakwa alwapfuta
 ngu.

Wakwa iphe, mụbe Chipfu
 epfu baa:

Eshinu mu nọ ndzụ gẹ mu nọ
 iya-a bẹ ii-mechaa yee
 phẹ g'ẹphe hakọta g'onye
 yeru uwe.

Mbụ l'ii-gude phẹ kwaa
 ngwa gẹ ngwa nwanyị,
 aabya alụ k'òphúú.

¹⁹ A makwarụ-a l'e shi
 mebyishia ngu tọgbo
 ngu ị buru ochobu;
 alị ngu dabyiru iphoro.

Nta-a bẹ ị tị sụkpoedunu
 ndibe ngu ebubu.

Tẹme ndu ono,
 shi mebyishia ngu nụ
 ono nọdu ngu
 ụzenya.

²⁰ Ụnwegirima, a nwuru teke
 ono,
 iije iphe-ẹhuka ono
 e-mechakwaphọ pfua
 l'ị numa ẹ nchị ngu sụ:

Ẹka-a paakwaru anyi
 nwanshị ebubu;
 chọbanaaru anyi alị
 ẹka anyi e-buru!

²¹ Noo teke ii-pfu l'ọkpoma
 ngu sụ:

‘?Bụ onye nwụshiru mu ikpoto
 ụnwegirima ọwa-a?
 Mu shi eje iphe-ẹhuka;
 tẹme ọphu mu atsudu ime.
 Mbụ ẹ mu shi bụru onye
 a jịkaru ajịka;
 a bya akpụa mu ẹ ndzụ
 laa alị ndu ọhozo.
 ?Bụkwanu onye
 hefutaru mu ụnwegirima
 ọwa-a?
 Ẹ mụbe onye e shi haa;
 mu nọdu nkinyi mu.
 ?Igwerigwe ndu ọwa-a
 shihunu awe? ”
²² Wakwa, iphe Nnajiuphu,
 bụ Chipfu epfu baa:
 “Lenu; mu e-pheru
 ọhamoha ẹka.
 Mu e-woru ẹkwa-ọhubama
 mu paliaru ọhamoha.
 Ẹphe egude ẹka phe
 kulataru ngu ụnwu ngu
 unwoke;
 kwọru ụnwada ngu
 l'ukuvu kwọlataru ngu.
²³ Ndu eze a-bụru nna,
 ehe ngu nụ.
 Ndu eze-nwanyị abụru ne,
 ehe ngu nụ.
 Ẹphe a-nọdu ephozeru ngu;
 bubechaa iphu l'alị.
 Ẹphe erichachaa urwuku,

dụ ngu l'òkpa.
 Noo teke ìi-maru l'òo mu
 bụ Chipfu;
 lẹ ndu ẹnya dụ l'ẹka mu
 nọ bẹ iphere te emedu.”

²⁴ ?Aa-nata ndu dụ ike
 l'ògu iphe, ẹphe kwarụ
 l'òkwata tọo?

Tọo ?aanafụ ndu iwashị ndu
 ẹphe kpuru lẹ ndzụ?

²⁵ Obenu lẹ-a; wakwa iphe,
 Chipfu epfu baa:

“Ee! Ndu a kpuru lẹ ndzụ bẹ
 aa-nafụ l'ẹka ndu ike
 dụ l'ògu!

Tẹme l'a nata ndu iwashị iphe,
 ẹphe kwarụ l'òkwata.

Ọle ndu etso ngu ọgu bẹ
 mu e-tso ọgu.

Mu adzọo ụnwu ngu ndzụ.

²⁶ Ndu emekpa ngu ẹhu bẹ mu
 e-me g'ẹphe taa anụ
 onwophẹ.

Ẹphe angua mee onwophẹ jasụ
 l'òotsuahaa phẹ gẹ mẹe.

Noo teke nemadzụ l'ophu
 a-maru lẹ mbẹdua,
 bụ Chipfu bụ onye adzọje
 ngu nụ;
 bya aburu onye agbataje
 ngu nụ;
 bya aburu Ọkalibe
 kẹ Jiékọpu.”

50

¹ Wakwa iphe, Chipfu
epfu:

?Denu ẹkwo, mu deru nū ne
unu gude chifu iya-a?

Tọo ?bū ndu mu ji ụgwo onye
ole bẹ mu woru unu
ree?

Ọ kwa iphe-ẹji unu kpatarū
iphe,
mu gude woru unu ree.

Ọ bụru ẹjo-ememe,
unu eme meru g'o gude
a chifu ne unu.

² Teke mu byaru; ?bū gūnu
meru g'o gude ọphu ọ
dudu onye nọ l'ẹka
ono?

Teke mu shi eku oku;
?bū gūnu meru g'o gude
ọphu ọ dudu onye zarū
enu?

?Bū ẹka parū mu mkpūrukpu
kẹ gẹ mu ta agbata
unu tọo?

?Bū ike anafuta unu ta adudu
mu tọo?

Ọ kwa mba mmanū bẹ mu
abajẹ;
mini atahū l'eze-ẹnyimu.

Mu eworu ọma nggele mee;
l'ọ bụru echiẹgu.

Ẹma, shi dū iya nū ereshihu
kẹle mini ta adūedu

iya.

Ègu mini eworu phẹ
gụ-gbushia.

³ Akpaminigwe bẹ mu eyeje
uwe, bụ iya bụ ọchii.

Mu nọdu achiẹje iya
uwe-aphụ g'o kpuchije
onwiya.

⁴ Nnajiuphu, bụ Chipfu
nụwaru mu ire ndu nwuru
ẹkwo gẹ mu maru opfu,
mu e-pfufe g'ike dụ ndu
ike bvuru.

Ookuteje mu l'utsu g'utsu;
l'ọ bya emee mu echilibe
nchị ngabẹ g'onye eezi
iphe.

⁵ Nnajiuphu, bụ Chipfu
ghebechaẹkwarupho
nchị mu ọnu;
ọphu mu ekwefujeduru iya ike;
ọphu mu aladụ
azụ azụ.

⁶ Mu woru okpurukpu mu
doberu ndu echi mu
iphe;
bya eworu agba mu doberu
ndu pheshiru mu
éjị-agba.

Ọphu mu ewohaduru iphu
mu g'a ta chị mu
ọchi ọphu a gbụ mu
iya ọnu-mini.

⁷ Eshinu Nnajiuphu, bụ Chipfu

eyejeru mu ẹka
 bẹ ọ tọ dudu iphere,
 byaru eme mu nũ.

Ọ bũru iphe ono meru g'o
 gude mu woru iphu
 mu kpọo gbengu gẹ
 mkpuma;
 tẹme o doo mu ẹnya
 l'iphere tee medu mu.

⁸ Onye aharu mu enge
 nọ mu ntse.

?Bũ onye sũru g'ọobyà
 agũaharu mu iphe,
 mu meru?

G'anyi pfunuru dogba iya!

?Bũ onye bũ onye ọbu,
 epfu iphe,
 ọ sũru lẹ mu meru ọbu?

G'onye ọbu byanu apfuru
 mu l'iphu pfua ya!

⁹ Ọ kwa Nnajiuphu,
 bũ Chipfu bũ onye eyejeru
 mu ẹka.

?Bũ onye bũ onye ọbu,
 l'a-bya mu anma
 ikpe-ọnwu?

Ndu ọbu a-tũko kahũ g'uwe;
 ọ bũru mkpu a-takashĩ phẹ.

¹⁰ ?Bũ onye l'echilabọ unu
 atsũ Chipfu ebvu;
 tẹme ọ nọdu emeje iphe,
 onye-ozì Chipfu sũru
 g'e meje?

Mbụ-a; g'onye eje ije l'ọchii;
 mbụ onye enwedu ìphóró,
 e gude aphụ ụzo;
 g'onye ono kpọru obu
 ye l'ẹpha Chipfu!

G'onye ono chiru ụpfu kwẹe
 lẹ Chileke iya!

¹¹ Obenu nta-a; iphe,
 bụ g'unu ha bụru ndu
 aphụ-nwu ọku;
 mbụ unubẹ ndu nwuru
 ọku yegbaa l'orọku parụ;
 unu jenụ;
 unu gude ìphóró ọku unu
 je ije!

Unu gude orọku,
 unu nwuru ọku ye;
 ọ nọdu enwu;
 je ije!

Iphe, unu a-nata l'ẹka
 mu bụkwa l'ọo l'eje
 iphe-ẹhuka
 bẹ unu a-nọduepho!

51

Aa-dzọta Zayọnu ojejoje

¹ “Unu ngabẹru mu nchi;
 unubẹ ndu eme g'unu
 bụru ndu pfuberekoto;
 mbụ unubẹ ndu achọ
 Chipfu.

G'ẹnya unu dukwa
 l'agbara-mkpuma ono,

bù ẹka a kùkpofutaru
 unu ono;
 mbù lẹ wukirima ẹka ono,
 e bvutaru unu ono!

² Mbù-a; g'ẹnya unu dùkwa
 lẹ Ébirihamu, bù nna unu!
 Wafùá lẹ Sera; onye bù iya
 tsùru ime unu!

Teke mu kuru iya bùkwa
 onye lanù bẹ o shi bùru.

Mu bya ekebe iya l'oma
 bya emee ya;
 ọ dọ igwerigwe.

³ Chipfu te nwedu iphe,
 e-me g'ọ tọ dọ Zayonu obu;
 bya egude obu-imemini
 lee ẹnya l'iswi,
 yiru iya nù.

Alì iya ono, shi bùwaru
 echiẹgu ono bẹ oo-me
 g'ọ dọ gẹ Édenu.

Alì iya ono, dabyiru iphoro
 ono adọ gẹ mgbabu
 Chipfu onoya.

Noo teke ẹhu a-wata iya
 atsotso;
 l'owata ete ẹswa;
 l'o keleahaa ekele;
 gùahaa ebvu.

⁴ Unu ngabẹkpodaaru mu phọ
 nchì; ndibe mu!
 Unu nùmakpodapho iphe,
 mu epfu;
 unubẹ ọha mu!

Mu a-tụkwaru unu ekemu;
 mbụ l'ikpe, p̄furu ọto ono,
 mu ekpeje ono
 a-bụkwaru ìphóró,
 d̄uru ọhamoha.

⁵ Mu a-nafuta unu ẹgwegwa.
 Mbụ ẹ mu abyaakwa unu
 adzota.

Ọ b̄uru ẹka mu b̄e mu
 e-gude kpee ọhamoha
 ikpe.

Ndu bukube eze-ẹnyimu
 b̄u mu b̄e ẹphe a-n̄odu
 ele ẹnya l'ẹka.

Teme ẹphe an̄odu kwab̄e;
 ele ẹnya g'ẹphe maru iphe,
 mu e-me l'ẹka.

⁶ Unu palinaa ẹnya unu
 lee l'imeli!
 Unu lenaa ẹnya l'eliphe-a!
 Igwe e-mechakwa ch̄ihu
 g'ẹnwuru-oku.

Eliphe-a l'ophu anwachaa
 anwacha g'uwe.

Ndu bu iya n̄u anw̄ushihu
 g'ijiji.

Obenu ẹ ndzota nkemu
 a-d̄u ojejeje.

Ap̄f̄ubekoto nkemu taa dad̄u
 adada.

⁷ Unu n̄umakpodapho iphe,
 mu ep̄fu;
 unub̄e ndu maru iphe,

pfuru nhamunha;
mbu unube ndu ekemu
mu du l'okpoma!

Unu ba atsujekwa ebvu
l'okonu, nemadzū akọ unu;
ophu iphu, oophu unu
eyejekwa unu ebvu;
⁸ kele nsu e-mecha sukashia
phe g'uwe.

Eka-ali atakashia phe g'ukpo.
Obenu l'apfubekoto nkemu
a-nọ jasū l'ojejeje.

Ndzota nkemu a-nọo shi
l'ogbo sweru ogbo.”

⁹ Tehunu etehu! Tehu etehu
yena onwongu
okpehu g'uwe;
gube oshi-eka ke Chipfu!

Tehunu etehu du g'i shi
adujehewaa teke k'azu;
mbu l'ogbo teke ndiche.

?Tọ bunaa ngu-a bu onye
gbubushiru Réhabu
mkpirikpu mkpirikpu;
mbu gube onye mekaru ejo
nwanu-egbudu ono
iphe?

¹⁰ ?Tọ bunaa ngu-a bu onye ono,
meru eze-enyimu;
ọ tahu;
mbu mee; mini,
nọ l'ogbu-enyimu tahu;
i woru gbororo togbo l'oma

ọhulohu ẹnyimu
 k'ọphu ndu ono,
 a gbafutaru ono wughataru?

11 Ọo ya bụ gẹ ndu ono,
 a gbataru ono alwa.
 Ẹphe aguru ebvu bahụ lẹ
 Zayonu.

Ẹhu-utso ojejeje aburu
 okpulishi,
 ẹphe e-kpuru.

Ete ẹswa; yẹle ẹhu-utso
 asopyabe phe
 asopyabe.

Agụ aphụ; yẹle atsu ude
 e-gude ọso ghata.

12 “Ọ kwa mbẹdua;
 mbụ mbẹdua gẹdegede
 bụ onye eyeru unu
 ọkpukpu-ike.

?Bụ ole bẹ bụ kẹ g'unu nọdu
 atsu nemadzụ mmanụ
 ebvu;
 mbụ nwa ndiphe,
 bụ iphe yẹe ya gba nanụ
 bụ ẹswa;

13 kẹ g'unu zọhaa Chipfu,
 bụ onye meru unu;
 bya aburu iya bụ onye
 tọsaru eligwe;
 ọ dabyiru;
 bya aburu iya turu
 ọkpa mgboko l'ọphu;
 kẹ gẹ ndzụ rwutajẹ

unu tekenteke ẹgube ono;
 opfu l'onye eme unu
 ewere bẹ ẹhu eghu
 oke eghu;
 mbụ onye bụ iphe,
 o shiberu ite iya bụ g'o
 mebyia unu?

Kẹle-a; ?denu oke ẹhu-eghu
 onye ọbu,
 eme unu ewere ọbu?

¹⁴ Ndu ono, a turu mkpọro
 ono l'e-me ẹgwewa
 k'ọphu ee-me g'ẹphe
 nweru onwophẹ;
 g'ẹphe ta nwụhu l'ọka;
 ọphu ẹgu nri eme phẹ.

¹⁵ Kẹle ọ kwa mbẹdua bụ
 Chipfu;
 bya aburu Chileke unu;
 mube onye abujeru:
 mu -kpakọbe mini
 l'eze-ẹnyimu;
 akpara-mini iya asụa ekiri.

Chipfu,
 bụ Ọkalibe-Kakọta-Ike
 bụ ẹpha mu.

¹⁶ Mu woakwaru opfu
 mu ye unu l'ọnu;
 bya egude ọbochi-ẹka mu
 kpuchia unu.

Mbụ mube onye ono,
 bụ mu dobegbaaru igwe
 l'ọru iya;

bya aburu mu turu ọkpa
 mgboko l'ophu;
 tẹme ọ buru mu suru ndu
 Zayonu-a: 'Unu buakwaa
 ndibe mu.' ”

Okoro k'oke ẹhu-eghu Chipfu

- ¹⁷ Tehu etehu! Tehu etehu!
 Gbalihu agbalihu gube
 Jierusalemu;
 mbu gube onye ono,
 shiwaa l'eka Chipfu
 nata okoro k'oke
 ẹhu-eghu iya ngua;
 mbu gube onye pataru
 ipoti mee,
 emeje ge nemadzu kpoo
 galagala ngua;
 ngua urwuku urwuku iya.

- ¹⁸ L'ime ikpoto unwu ono,
 ọ nwushiru ono ta
 adudu g'ọ ka mma
 l'ọo onye lanu
 letaru iya enya.

L'ikpoto unwu ono,
 o metaru ono be ọ to
 dudu me nanu setaru
 iya l'eka.

- ¹⁹ Mkpamehu-a uzi labo-a
 dapfutawaru ngu;
 le babu l'ọ duru onye
 dua ngu obu.

Ọla-l'iswi yele mgbu-onwu;
 ọkpa-nri yele ogu-echi;

mbụ-a;
 ?bụ onye a-sụje ngu
 gberuma?

²⁰ Ụnwu ngu kurwuwaru ẹnya.

Ẹphe dabyigbaaru l'ishi
 gbororo gẹ mgbada,
 kolahuru l'ụgbu.

Iphe, zuru phe gburumu
 pfuurii bụ oke
 ẹhu-eghu kẹ Chipfu;
 yele aba mba kẹ
 Chileke ngu.

²¹ Ọo ya bụ ị-a;
 nụmakpodapho iphe-a;
 gube onye ono,
 eemekpa ẹhu;
 mbụ onye e meru;
 ọ nọdu akpọ garigari
 l'ẹbe ọ ngu mẹ;

²² Wakwa iphe, Nnajiuphu,
 bụ Chipfu epfu baa;
 mbụ Chileke ngu;
 onye ono,
 agbajeru ndibe iya ọdzori
 ono.

Ọ sụru: “Tii ledu;
 mu nafuakwaru ngu
 okoro ono l'ẹka bụ
 ọphu meru;
 ị nọdu akpọ garigari.

Oke ẹhu-eghu mu ono,
 du l'ipoti ono bẹ ị tii
 ngu edu.

²³ Mu e-woru iya p̄e ndu ono,
 an̄u ngu aph̄u ono,
 b̄u ndu ono, s̄uru ngu-a:
 ‘Dabyiru kpube iphu l’al̄i;
 g’anyi bya eswee ngu
 godogodogodo!’
 I woru okpurukpu ngu
 mee al̄i; mb̄u mee ya;
 ɔ̄ d̄u ḡe gbororo,
 nemadz̄u eshi.”

52

¹ Tehu etehu! Tehu etehu;
 ḡube Zaȳonu!
 Yena onwongu ɔ̄kpehu
 g’uwe!
 Yena uwe ngu ono,
 emeje ngu g’ī d̄u biribiri
 l’ɛnya onoya;
 ḡube Jierúsalem̄u,
 b̄u mkp̄ukpu ono,
 d̄u ns̄o ono.
 Ndu ebuduru úbv̄u;
 ɛ̄phe l̄e ndu ono,
 aas̄o ns̄o ono taa
 bah̄ubaekwa l’ime ngu
 ɔ̄zo baa.
² Gbalihu agbalihu!
 J̄ishia urwuku, d̄u ngu l’ɛhu!
 N̄odu an̄o; ḡube Jierúsalem̄u!
 T̄ukufu onwongu ɛ̄gbirigba,
 a t̄uru ngu l’olu;
 ḡube ada Zaȳonu ono,
 a kp̄uru l̄e ndz̄u ono!

³ Wakwa iphe, Chipfu epfu baa: “E shi ree unu erere; Ọp̄hu a nataduru aswa unu. Nta-a bẹ e tee gudekwanu okpoga agbata unu.” ⁴ Kẹle-a; wakwa iphe, Nnajiuphu, bu Chipfu epfu: “Lẹ mbu bẹ ndibe mu shi laa ali Ijiputu je eburu. Teme ndu Asiriya bu-wokwadu a bẹ ephe shi emekpa phe ehu.” ⁵ Wakwa iphe, Chipfu aji baa: “A -bya le ke nta-a; Ọwa-a buhunu ole? Kẹle ndibe mu bẹ a kputaru ke mmanu. Teme ndu-ishi phe gude phe eme iphe-ochi.” Nokwa olu Chipfu. “Teme mkpuru mkpuru bẹ eepfubyishi ephe ẹpha mu shi l’utsu jasụ nchi ejihu. ⁶ Ọo ya bu le ndibe mu a-maru ephe mu. Mbu l’o -be mboku ono bẹ ephe a-maru l’o mbedua pfuhawaru iya teme o nwuje. Ee! Ọo mbedua!”

⁷ Lenu g’oma l’eli ubvu ono;
 mbu okpa ndu eje abya ezi
 ozi-oma;
 ndu ezi ozi nchi-adu-doo;
 ndu nzi, ephe gude abya du ree;
 ndu byaru ezi ozi ke ndzota;
 ndu asuje Zayonu-a:
 “O kwa Chileke ngu bu eze!”

⁸ Ngabekpodapho nchi!
 Ndu nche ngu wolikwaru
 olu phe ewoli.
 Ephe tukoru erwu okwe;
 kele ephe e-gude enya
 huma Chipfu teke o-nodu
 alwa Zayonu.

⁹ Unu tuko wata ebvu ehu-utso
 mgbo lanu;
 unube mkpokpo iphe,
 tukoru le Jierusalemu;
 kele Chipfu duwaru

ndibe iya obu.

Ọ gbatawaru Jierúsalem.

¹⁰ Chipfu a-gbabẹ onwiya ẹka
 ọto l'iphu ọhamoha l'ophu;
 mbụ ẹka iya ono, dū nsọ ono;
 k'ophu aa-humachaa gẹ
 Chileke anyi e-gude dzọta
 ndibe iya jasụ l'ẹka igwe
 beru alị beru.

¹¹ Unu tųgbua! Unu tųgbua!
 Unu lųfu l'ẹka ono!
 Unu te edenyikwa ẹka l'iphe,
 aasọ nsọ!
 Unu shikwa l'ẹka ẹphe
 nọ futa!
 Unu bųkwaru ndu dųebe ree;
 unubẹ ndu ono,
 apajẹru iphe kẹ Chipfu,
 bųgbaa iphe, dųgbaa iche
 iche!

¹² Ọle unu ta alakwa
 gburugburu;
 ọphu unu agbakwa
 phuphuphu ala;
 kẹle Chipfu e-vuru unu
 ụzo eje.

Mbụ l'ọo Chileke kẹ ndu
 Ízurẹlu l'a-bųru onye
 e-kperu unu azụ.

Eje iphe-ẹhuka yẹle ọdu-biribiri
 k'onye-ozì Chipfu ono

¹³ “Lekwa; onye-ozì mu
 e-mekwa umere onye

maru iphe.

Aa-pali iya eli;

wolia ya ephekerephe;

shi nno kutsee ya.

¹⁴ G'o gude gbaa ụgbugba meru;
 ẹkpa-oyi nwụa ndu dụ
 igwerigwe l'ẹhu g'ẹphe
 hụmaru iya.

Ọ gbachihucharu nchi
 ẹgube adụdu onye
 gbachihujewaru iya nụ;
 ọphu ọ dukpodaa gẹ nemadzụ
 ililekpọo.

¹⁵ Nokwaphọ g'ọo-dụ-dzuru ọha,
 dụ igwerigwe biribiri.
 Mbụ ẹ ndu eze bẹ ọo-kpọ
 ọnu opfu;
 kẹle ẹphe a-hụma iphe,
 e pfuduru phe; tẹme iphe,
 ẹphe anụmajeduru edoo
 phe ẹnya.”

53

¹ ?Bụ onye kwetarụ ozi,
 anyi ziru?

Tọo ?bụ onye bẹ e meru g'ọ
 maru g'ike Chipfu
 habe shii?

² Kẹle ọ nọ iya l'iphu vua
 g'oshi, rwuru irwu ọphúú;
 mbụ g'ogbarabvu-oshi,
 gbafutaru iphe l'alị
 ọkponku.

Ọ tọ madu mma;
 ọphu ọ dudu ùbvù
 l'ẹnya kẹ g'ọ
 gu anyi ẹgu anọ-kube.

Mbụ l'ọ tọ dudu ugbugba,
 du iya l'ẹhu, bu iphe,
 aasụ l'ọo ya meru;
 ọ nọdu agụ ẹgu.

³ Ndiphe nmaru iya phulaphula
 bya ajika iya.

Ọ bu nwoke, aphụ tsọru;
 bya aburu onye eje
 iphe-ẹhuka kwọwaru ẹhu;
 onye ndiphe abụjeru:
 ẹphe -huma iya;
 ẹphe aghaa iphu l'ibiya
 ọzo.

Mbụ l'a nmaru iya phulaphula;
 ọphu ọ dudu iphe,
 anyi guberu iya.

⁴ Tororo opfu bu l'o jeru
 iphe-ẹhuka, anyi gege
 eje;
 bya evuta aphụ gege
 atsọru anyi.

Anyi gbẹ dobesu l'ọo Chileke
 echi iya iphe;
 l'ọo ya chitsuru iya;
 anu iya aphụ.

⁵ Obenu l'e mekaru iya iphe;
 kele anyi mesweru.

Mbụ l'e tsuru iya pyaapya;
 kele anyi meru ẹjo-iphe.

Aphụ, a nụru iya mecharu
 mee;
 ẹhu bya adụ anyi guu.

Teme ọ bụru ọnyá,
 e chibashiru iya bẹ e
 gude eme g'ẹhu dụ
 anyi ike.

⁶ G'anyi hakọta
 kpaphuhuakwaru
 akpaphuhu g'atụru.

G'anyi ha l'onye l'onye
 ghawarụ iphu eshi ụzo
 ọphu dụ iya ree.

Ọle Chipfu woru ẹjo-iphe
 anyi l'ophu woru
 tụ-kobe iya l'ishi.

⁷ “A kpapyarụ iya ishi bya
 emekpa ya ẹhu;
 ọphu ọ saduru ọnu pfua
 opfu.

A kpụtaru iya g'onye kpụ
 nwatụru eje aphụphụ.

Ọ nọduepho nggujungguji
 g'atụru,
 nọ l'iphu ndu ebushi iya
 ẹji.

⁸ E meru iya mkpawere;
 bya ekpee ya mpfụ-gbu;
 kpụru iya je emegbua.

A -bya l'ogbo kẹ teke nkiya;
 ?bụkwanu onye
 kpakwanuru ishi?

Kẹle e meru iya;

Ọ chíhu l'alì ndu dzụ
ndzụ.

Ọ bụru emeswe,
ndibe mu mesweru bẹ e
gude chia ya iphe.

⁹ E doberu iya ilu l'ẹka eelije
ndu ẹjo-iphe.

Ọ nwùhu; e lia ya l'ilu
oke amadu;
ọle o to wejeduru iwashi;
ọphu ntuphu-ire adujeduru
iya l'ọnu.”

¹⁰ “Obenu l'ọo Chipfu bẹ ọ bụ
uche iya g'o gwee ya
arakabya ono;
mee ya g'o jee iphe-ẹhuka
ono.

Teme Chipfu bya eworu
ndzụ iya mee iphe
ngweja-apfu-ugwo.

Ọo-mecha hụma ụnwu
nwanwa iya;
bya anọdu ndzụ ogologo.

L'ọ bụru l'ẹka iya bẹ aa-gbẹ
eme uche Chipfu
emeshi iya ike.

¹¹ O -jehaa iphe-ẹhuka ono;
l'ọ bya ahụma ìphóró
kẹ ndzụ;
ono abya eji iya ẹpho.

Ọ bụru amaru ono,
onye ono, pfulberekoto,
ejeru mu ozi a-maru
iya ono l'e-me gẹ ndu

dū igwerigwe buru
 ndu aa-gū lẹ ndu
 p̄f̄uberekoto
 Yẹbedua evutakwanū
 ẹjo-ememe, ẹphe meru.
¹² Ọo ya b̄ lẹ mu a-hẹ iya oke,
 a h̄eru ndu oke amadū.
 Ọ buru ẹphe lẹ ndu dū ike
 l'ọgu l'e-ke iphe,
 a kwatarū l'ọkwata;
 noo kẹle ọ m̄iru ẹnya
 lẹ ndzū iya nwūhu;
 tẹme a gūru iya yeru
 ndu ẹjo-iphe;
 kẹle o vutaru iphe-ẹji
 ndu dū igwerigwe;
 tẹme ọ rwọchiru ndu
 ẹjo-ememe arwọrwo.”

54

Obu, Chipfu yeru Jierúsalem
¹ “Gua ebvu; gūbe nwanyị,
 ta atsudu ime!
 Mbū gūbe onye teke
 ezedaswee nwa.
 Chikpota ebvu!
 Rwua gerwugerwu;
 mbū gūbe onye ono,
 ime teke emeswee ono;
 kẹle ụnwu gūbe nwanyị,
 dabyiru mgbegere
 a-kakwa shii eme
 l'ụnwu nwanyị alū ji.”
 Nokwa iphe, Chipfu eepfu.

² Ph^oribekwaru ụlo-ẹkwa,
i bu ebubu g'ọ ka ọsa!

Mee g'ẹkwa, e gude mee
ụlo ngu ọbu ha
phalaphala;
ba l^o-phukwa iya azụ!

Mekwaa g'eri iya kabaa
ogologo!

Mekwaa g'abara iya kabaa
anguru anguru!

³ Noo kẹle ii-mechaa jaa àjàjà
buru laa l'ẹkutara
buru laa l'ẹkicha.

Awa ngu phẹ l'a-naphuchaa
ọhamoha ono azụ;
je ebuchishichaa mkpụkpu
phẹ ono,
bụgbaa ochobu ono.

⁴ Gẹ ndzụ ba agụkwa ngu!
E tee mekwa ngu
iphe-iphere.

Gẹ ndzụ ba agụkwa ngu
k'a nọnyaa e kpua
ngu iphu lẹ ntụ!

Kẹle a ta abyadụ eme
ngu iphe-iphere.

Ii-mecha zọhachaa iphere
ono,
meru ngu teke ị bụ
ọgbolanu ono;
ọphu ị byadu anyatabaa
mkpatsu aphụ,
dụ l'abụ onye ji iya

nwùhuru;

⁵ kẹle ọo onye ono meru ngu

nụ ono bụ ji, alụ ngu nụ.

Chipfu,

bụ Ọkalibe-Kakọta-Ike

bụ ẹpha iya.

Ọ kwa Onye nsọ kẹ ndu

Ízurẹlu ono bụ onye

gbataru ngu nụ.

Iphe, eekuje iya bụ Chileke

kẹ mgboko l'ophu.

⁶ “Kẹle Chipfu ono e-kuphu

ngu azu;

g'ị bụ nwanyi, aalu alulu,

a togboru mgbegere;

ophu obu adudu iya ree;

mbu nwanyi,

a luru teke ọ bụ nwata;

ji iya paru iya haa.”

Nokwa iphe, Chileke ngu epfu.

⁷ “Mu haru ngu kpoo nwupfu

nwanshi;

ọle mu a-phukwanuru ngu

eze obu-imemini gude

duphuta ngu azu.

⁸ Ehu ghuru mu eghu nwanshi.

Mu woru iphu mu

domiaru ngu kpoo

nwupfu nwanshi.

Obenu le mu e-ye ngu obu

ojejoje gude phuaru

ngu obu-imemini.”

Nokwa iphe, oopfu;

mbụ Chipfu,
 bụkwapho onye agbafutaje
 ngu.

⁹ “L'ẹhu nkemu bẹ ọwa-a
 dukwaa gẹ teke kẹ
 Nuwa,
 bụ teke mu riru nte sụ l'utso,
 dū teke ono taa dūbaedu
 lẹ mgboko ọzobaa.

Nta-a bẹ mu riwaru nte sụ
 l'ẹhu tee ghubaedu mu
 egbu l'opfu ẹhu ngu;
 ọphu mu ababaeduru
 ngu mba ọzo.

¹⁰ O -betakpọ úbvú l'opfu
 nmakỌta jijijijii;
 a pashia obvu obvu,
 l'ẹka ẹphe nọgbaa;
 bẹ n-yemobu ojejoje ono,
 mu yeru ngu ono ta
 aphỌngakwa aphỌnga;
 ọphu ọgbandzu
 ẹhu-guu nkemu ono
 egbukahụkwa egbukahụ.”

Nokwa iphe, oopfu;
 mbụ Chipfu ono,
 aphuru ngu obu-imemini
 ono.

¹¹ Gube mkpukpu ono,
 eje iphe-ẹhuka ono,
 oke pherephere enwunga;
 ọphu ọ dudu onye
 agbaru ngu mkpu;
 mu e-gude mkpuma,

amashì mma ike
kpụ-phu ngu azụ.

Mu egude mkpuma sáfàyà
tụ-phu ọkpa-ulo
igbulọ ngu azụ.

¹² Mu e-me g'eli igbulọ
ngu ono g'ọ ha
bụkotaru
mkpuma rubi.

Mu egude mkpuma,
aphụ ngerengere,
gude kpụa ọnu-abata
ngu;
gude mkpuma,
vu oke aswa kpụkota
igbulọ ngu l'ophu.

¹³ Ụnwegirima ngu g'ẹphe ha
bụ mụbe Chipfu e-zi
phẹ iphe l'onwomu.

Tẹme ụnwu ngu bẹ ẹhu
a-dụkpoo guu mebyi
adụdu.

¹⁴ Ee-me g'ị ngụru angụru l'ụzo,
pfuru ọto.

Ọ tọ dudu onye byaru eme
ngu mmegbu;
ọphu ọ dudu iphe,
byaru eme ngu g'ị
tsua ebvu.

Ndzu-agugu bẹ ee-wofu
l'eka ị nọ je edobe ụzenya;
ọphu ọobyadu ngu
ntse ililekpoo.

15 O -nweru onye tsoru ngu
 opfu;
 ọ tọ bụduru mu bẹ o
 shi l'ẹka.

Onye etso ngu opfu bụ:
 o -mechaa l'o yeru
 ngu ẹka l'alị.

16 “Tii ledu; ọ kwa mbẹdua
 meru onye-úzá ono,
 anmajẹ eko l'icheku
 jasụ l'o nwuhu ọku ono;
 gude iya kpụa ngwa
 ọgu l'ọ dụ k'egude
 alwụ ọgu.

Tẹme ọ bụkwarupho mbẹdua
 meru onye mmebyi g'o
 mebyishia iphe.

17 Ọ tọ dụkwa iphe,
 a kpụru g'e
 gude meka ngu iphe,
 byaru evujeru ire.

Tẹme iphe, bụkpoo onye ebo
 ngu ibo bẹ ire
 a-gwọje ẹji.

Nokwa iphe, ndu-ozị kẹ
 mụbe Chipfu eketa
 l'ẹka mu.

Tẹme ọ bụkwarupho ono
 bụ ọdzori;
 mu nọdu agbaru phẹ iya.”

Nokwa iphe, Chipfu eepfu.

55

Oku, eeku ndu mini agụ

¹ Unu gebekwa-o! G'iphe,
bụkpoo onye mini agụ
byakwa anguta mini!

G'onye enwedu okpoga
byakwa azụa nri ria!

G'ọ byakwa agata mee;
zuta ọra-eswi,
e gudedu okpoga azụ;
ọphu ọ dudu aswa.

² ?Denu g'ọ gude unu ọdu
emebyishi okpoga l'iphe,
abudu nri;
teme unu ọdu ese akanya
l'iphe, tee jidu ọpho?

Unu ngabekwa;
unu ngabekpodaru mu
pho nchi; g'unu eria iphe,
du ree; mbu g'unu eria nri,
kachaa aburu okpobe nri.

³ “Unu ngabẹ nchi! Unu
kpiritaru mu nu ntse!

Unu numakpodapho
iphe, mu epfu;
k'ophu unu a-ọdu ndzu.

Mu l'unu a-gbakwa ndzu
ojejeje.

Ono buru iphe-oma, mu kweru
Dévidi ukwe le mu
e-meru iya;
teme mu buru onye
apfushije ike l'iphe,

mu kweru ukwe iya.

⁴ Lewarọ; mu meakwaru iya
g'ọ bụru onye a-nọdu agba
ndiphe ekebe;
g'ọ bụru iya a-bụru ishi;
mẹ onye a-nọduje
atụru ndiphe iphe,
ẹphe e-me.

⁵ Lewarọ; ọha, ị madu ndu
ẹphe bụ bẹ ii-kukwa oku;
ẹphe egude ọso byapfuta
ngu;
l'ọ bụkwaru ọha,
amadụ ndu unu bụ.

Ọ bụru onye a-kpa iya
nụ bụ Chipfu,
bụ Chileke ngu;
mbụ Onye Nsọ kẹ Ízurẹlu;
kẹle o doziwaru ngu;
ị dụ akpabiri.”

⁶ Chọnaa Chipfu teke ịi-hụma
iya!

Rakua ya teke ọ nọkwadu
ntse!

⁷ G'onye ẹjo-iphe haa ụzo ono,
ootso ono;
onye ọkpoma mgbashi
ahaa ẹjo ọriri iya.

G'onye ono lwapfuta Chipfu
hụma l'ọo-phuru iya
obu-imemini.

Mbụ-a; g'onye ọbu lwapfuta
Chileke anyi;
kẹle ọo-guru iya nvụ

kẹ mmanụ.

⁸ “Ọriri mu ta abụkwa ọriri
ngu;
ọphu ọ bụdu g'iimeje bụ
gẹ mu emeje.”

Nokwa iphe, Chipfu eepfu.

⁹ Ọ kwa g'igwe dụ-be alị
ẹnya-a; bụ g'iphe,
mu emeje dụ-be ẹnya
l'iphe, iimeje.

Ọ bụru g'ọriri mu dụ-be
ọriri ngu ẹnya.

¹⁰ Ọ kwa gẹ mini;
yẹle aka-mini-sunoo eshije
l'igwe dzee;
ọ tọo laphuhẹedu iya azụ;
abụdu l'ọ gbaru mini
l'eliphe-a;
mee ya l'o gua egugu
fushiaha iphe l'alị;
k'ọphu ọo-mitaru ndu
akọ iphe akpuru-iphe;
tẹme ndu eri eriri enweru
iphe, ẹphe e-ri;
¹¹ nokwa g'opfu,
shi mu l'ọnu dụ bụ onoya.

Ọ tọo gbakwarụ ẹka
alwaphutaru mu azụ.

Ọ chĩa iphe, oo-me bụ iphe,
bụ obu mu; mbụ mee iphe,
mu ziru iya g'o je emee.

¹² “Unu e-gude ẹhu-utso lufu;
l'eeduta unu dufu

l'ẹhu-guu.
 Iphe, bụ úbvú úbvú
 aswọkobe wata agụ
 ebvu l'iphu unu.
 Nokwaphọ g'iphe,
 bụkpoo oshi,
 nọkota l'ẹgu a-nọdu
 akụkota ẹka.
¹³ O -beta g'ọgarambo fushia;
 oshi payinu efushichia.
 Ọo lashiya ọphu ọbyambvu
 e-fushi;
 oshi mịturu efushichia.
 Ono a-buru iphe,
 Chipfu e-gude zaa ẹpha;
 kẹle ọo-buru iphe-ọhubama,
 a-dụ ojejoje;
 ọphu a byadu emebyi
 iya emebyi.”

56

*Aa-dz*otakwapho ndu ọhozo

¹ Wakwa iphe, Chipfu epfu: “Unu kpeje ikpe, pfuru nhamunha; unu emeje iphe, pfuru ọto; kẹle teke mu a-dzọ nemadzụ dukwaa ntse; tẹme apfubekoto nkemu ta adukwa g'ọo-nọ-beru l'e kpuhaa ya goshi. ² Onye a gọru ọnu-ọma nụ bẹ bụ onye eme iphe-a; mbụ onye gudeshiru iya ike; onye doberu eswe-atuta-unme nsọ; ọphu ọoturwujedu iya; bya eselajẹ ẹka iya g'ọ tọ dụ ẹjo-
 iphe, oo-meta.”

³ G'ọ tọ dukwa onye shi eshishi bya atugbabe onwiya l'ẹhu Chipfu, a-sụ lẹ Chipfu a-gufu iya lẹ ndibe iya.

Ọphu ọ dukwa onye te eyedu ime a-sụ ịe ya bụ oshi, kpọhuru nkụ nọdu; ⁴ kẹle-a; wakwa iphe, Chipfu epfu baa l'ẹhu onye te eyedu ime, bụ onye ọphu edobeje eswe-atụta-unme iya nsọ; mbụ onye ọphu ahatajẹ eme iphe, dū Chipfu ree; tẹme ọ nọdu egudeshije ọgbandzu iya ẹka: ⁵ “Ọ kwa phẹ bẹ mu a-nụ iphe nkọmepha l'ime eze-ulo mu. Mu agụkwaa phẹ phọ ẹpha, l'a-ka l'a nwutaru unwegirima. Mu a-gụ phẹ ẹpha, a-nọ jasụ l'ojeje; ọphu oochihudu echihu.”

⁶ Tẹme ndu ono, shi eshishi ono, bụ ndu woru on-wophẹ tųgbabe l'ẹhu Chipfu g'ẹphe jeeru iya ozi ono; g'ẹphe yee ẹpha Chipfu obu; tẹme ẹphe abakwaru iya phọ ẹja ono; iphe, bụ ndu ono, doberu eswe-atụta-unme nsọ; ọphu ẹphe aturwuduru iya ono; ndu ono, nọshiru ike l'ọgbandzu yele ẹphe ono bẹ Chipfu epfu sụ: ⁷ “Ọo ndu ono bẹ mu e-gude je l'eli úbvú mu ono, dū nsọ ono. Mu emee g'ẹhu tsọo phẹ uto l'ulo, eepfufe anụ mu. Ngweja-akpọ-ọku phẹ; yele ngweja ọzo, ẹphe gude abyapfuta mu bẹ aa-natachaa l'ọru-ngweja mu. Noo kẹle iphe, ee-ku ulo mu bụ ulo, ọhamoha a-nọduje epfu anụ mu.”

⁸ Nnajiuphu, bụ Chipfu epfukwa sụ-a; mbụ onye ono, aachilata ndu Ízurelu ono, a kpuru ịe ndzụ ono: “Mu achilatabakwa ndu ọzo bya eyeru phẹ; a -gụfukwaro ndu ọphu mu chilatawaru.”

Iphe, Chileke epfu ịe ndu ẹjo-iphe meru

⁹ Unu byakwa; iphe, bukpo anụ, bu l'ẹgbudu l'ophu! Unu bya atapyashia iphe; unubẹ anụ, bu l'oswa l'ophu!
¹⁰ Ndu nche ndu Ízurelu atsukwa ishi. Ẹphe ta adudu iphe, ẹphe nwutaru. Ẹphe bukota nkuta, nọ nggu-jingguji. Ẹphe ta agbodu ire. Ọ buerupho nrwọ bẹ ẹphe azeshije arwọ. Mbụ l'iphe, aduje phẹ ree buerupho

mgbènya. ¹¹ Èphe bù nkùta ùghoro; ndu èpho te ejijedu ejiji. Èphe bù ndu eche atùru; bùru ndu iphe te edojedu ènya. G'èphe ha atùkoje gha iphu l'ùzo k'èka phè. G'èphe ha achò iphe, èphe e-rita l'urwu. ¹² Èphe nòdu atùkoje sù: “Unu bya g'anyi je agata mée! G'anyi ngua mée, atsù atsùtsu g'o ji anyi! Echele a-dùlekwa gè ntanù. Mbù l'òo-gbènu ka ree òkpobe akaka.”

57

¹ Onye pfulberekoto abùjeru; ò -nwùhu; ò tò dùdu onye oorwu l'èhu. Teke a kpùtaru onye obu-imemini je egbua; ò tò dùdu onye oodo ènya. Iphe, te edojedu ènya bùru l'edufu ono, e dufuru onye pfulberekoto ono bù g'èjo-ememe te erwu iya èka. ² Iphe, bukpo onye eme iphe, pfuluru òto l'abùjeru; ò -nwùhu; l'ò zèe guu wata atùta unme.

³ Obe l'unubèdua; unu byakpòdapho l'èka-a; unubè ùnwu ndu agba èja! Unubè eri ndu eri ogori yèle ndu agba ùkpara ono! ⁴ ?Bù onye bè unu gude eme iphe òchi? ?Bù onye bè unu aphùshiru ùgbonu ahashìru ire? Unu bùkwa ùnwu, ndu ono, l'ada ike nwùshiru ono; mbù awa ndu adzùje ùka! ⁵ Unubè ndu òonoduje anma èhu anmanma agwa iphe l'upfu achì; mèkpoo l'upfu iphe, bù oshi, jaru àjàjà! Unubè ndu ejeje lè nsùda nsùda je anòdu egbushi ùnwu unu gude agwa iphe lè mgbaka ògba agbara-mkpuma! ⁶ Ò bùru nshi ono, nò l'echilabò mkpuma, akwò tètètere, nò lè nsùda bù okiphe unu. Òo ya bè ò bù. Mbù l'òo ya bù iphe, unu ketarù. Ee! G'ò bù iya bè unu agbaru mée gude agwa; bya egude iphe, unu metaru l'ègu unu gude agwa iya. ?Bù unu -nòdu eme iphemiphe ono; unu asù gè mu palia pazeta tò? ⁷ Unu jeru je eworu iphe-azèe unu gbaa l'eli eli úbvú, ha l'eli. Ò bùru èka ono bè unu nyihuru je anòdu agwa iphe unu.

⁸ L'abata-aghachi ụlo mę l'azu-mgbo ụlo unu bę unu dobechaaru ọbvụ unu. Unu jịka mu bya eworu iphe-azęę unu ghebe ọnu; mbụ nyihu iya ghebe iya karaphongu. Unu lę ndu ono, unu yeru iphe-azęę phę obu ono gbaa ndzụ. Unu je anọdu ele iya ęnya l'ęka ọ gba ọto. ⁹ G'unu jiru manụ, eshi kwęekweekwee bya egude manụ olivu jee l'agwa, bụ Moleku; bya ezia ndu nọ-chiru unu; ęphe jee l'ọbvụ l'ęka dụ ęnya ęnya; mbụ jerwuchaa alị-maa l'onwiya. ¹⁰ Unu mee iphe ono, unu eme ono jasụ ike bvụ unu. Ọphu unu adụkwapho ike sụ l'iphe-a ta adụkwa iphe, ọ bụ. Ọ gbę anọduje adụ unu obu; ọphu ike iya abvụjedu unu abvụbvụ.

¹¹ “?Bụ onye bę ndzụ iya shi agụ unu; mbụ onye unu tsuru ebvụ k'ọphu unu watarụ adzuru mbędua ụka? Ọphu unu anyataduru mu anyata ophu; ọphu ọ bụro kę g'unu jekpọo ya ariri l'obu unu? ?Tọbudu l'ọle mu shi teke-a gbata nkuchi meru g'o gude ọphu unu atsudu mu ebvụ? ¹² Mu e-me g'a maru g'unu bụ-be ndu pfuberekoto; yele iphe, unu emegbabe; ọphu ęphe abyakwa abarụ unu urwu. ¹³ Gę ribaribariba ọbvụ ono, unu gwọshiru dobe ono dzọwaro unu! Ọo phęrephere a-tuko g'ęphe ha pata pafụ; mę unu -wata o-ji-l'ęka-togbo. G'ọ bụ phęrephere a-tuko iya pata paphua; mbụ l'ọo unme, a turu atutu a-patakota iya paphua apaphu. Obenu l'onye gbabarụ l'ime mu je anọdu ezeru ndzụ bụ alị-a l'a-buru okiphe iya; tęme l'ọ bụru iya e-nweru úbvú, dụ nsọ mu onoya.”

Aadụ ndu izimanụ lwarụ azụ obu

¹⁴ Ee-mecha sụ: “Unu kpunaa ya; unu kpunaa ya; unu dozinnaa ụzo! Unu wofuchaa iphe, a-nọ-chi ndibe mu ụzo.” ¹⁵ Kęle-a; wakwa iphe, onye ono epfu; mbụ onye ono, ha shii; tęme e kutsee ya ephekerephe; mbụ onye ono, nọ ndzụ ojejeje; onye ępha iya dụ nsọ: “Ęka mu

bu bukwa ẹka dụ l'eli bya aburu ẹka dụ nsọ. Teme mu bukwarupho l'ẹka o bu; mbu onye izimanu iphe-ẹji iya lwaru azu; bya ewoze onwiya ali; ge mu mee g'obu gu-zeta onye wozeru onwiya ali; mu emekwapho g'obu gu-zeta onye izimanu iphe-ẹji iya lwaru azu. ¹⁶ Mu taa nduadaro l'epfu iphe, e meru mu jaswaruro ya; ophu ehu a-nduadaro eghu mu eghu; odumeka be ndzu nemadzu a-duka nyegenyeghe l'iphu mu; mbu unme nemadzu, bu mu gude ẹka mu mee ya dobe. ¹⁷ Iphe, shi ghua mu eghu bu ughoro ono, shi paa ẹka l'ehu iya ono. Mu hua ya ahuhu; woru iphu wohaarua iya l'ẹka ehu eghu mu eghu. O ndu emekwapho iphe, o lekeberu enya eme.

¹⁸ “Mu humakwaru iphe, ephe emeje. Ole mu e-me g'ephe wekorohu. Mu e-du phe l'onwomu mee g'obu nmapfuru phe. ¹⁹ Mu e-me g'ajaja du l'ogbogboromu ndu ono, agu aphu le izurelu ono. Ehu-guu dukwaru ndu no enya me ndu no ntse; ozo bu le mu e-me g'ephe wekorohu.” Nokwa iphe, Chipfu eepfu. ²⁰ “Obenu le ndu ejo-iphe dua g'oke-enyimu, atu akpara, ata atutajedu unme atuta, bu ophu akpara-mini iya anoduje atsushi urwukutu yele epuchi. ²¹ Ndu ejo-iphe be ehu ta adujekwa guu.” Nokwa iphe, Chileke mu epfu.

58

Okpobe aswiru Chileke egu

¹ “Chia ya le mkpu g'a numa! B'eselakwa olu azu! Wolia olu chia mkpu, a-da g'eka eegbu opu! Karu ndibe mu l'ephe kwefuru mu ike; li karu onu-ulo Jiekopu iphe-ẹji phe. ² Ole ephe anoduje achọ mu mboku-mboku. Ephe -ndu ephe eme g'ogu phe egu amaru uzo mu. Ephe eme g'ephe bu oha, anoduje eme iphe, du nhamuha; g'ephe taa jikadu eme iphe, Chileke phe

suru g'ẹphe meje. Ẹphe nọdu asụje gẹ mu pfua iphe, pfuru nhamunha mu e-meru phẹ. Ọ nọdu agụ phẹ ẹgu gẹ mụbe Chileke kpịritaru phẹ ntse.”

³ “Ẹphe -nọdu ẹphe asụ: ‘?Bunaa gụnu meru g'o gude anyi nọdu aswị ẹgu epfu anụ Chileke; ọpflu Chileke ahụmaduru iphe anyi eme? ?Bunaa gụnu meru g'o gude anyi wozehaa onwanyi alị ọpflu o rwuduru Chileke l'ẹhu?’

“Ọle mbọku ono, unu aswị ẹgu epfu anụ mu ono bẹ bukwa iphe, dụ unu ree bẹ unu anọduje eme; mbụ erichaa mẹ ndu ejeru unu ozi urwu. ⁴ Aswị ẹgu unu bukwa iphe, unu egudeje kpochia ya ishi bụ aba mba yẹle ese opfu; yẹle egude iwashị echi nwibe unu gbaagbaa. Ụdu aswị ẹgu ono, unu anọduje aswị ono tee mekwa gẹ mu nọdu l'imigwe nụma olu unu. ⁵ ?Bụ ẹgube aswị ẹgu ono bẹ mu hatarụ tọo; mbụ g'ọ bụerupho lẹ nemadzụ wotaru ujiku lanụ woze onwiya alị? ?Bụ iphe, ọ bụ bụ ephuru yoo g'ẹswa ekperema; yẹle azẹ l'uwe-aphụ; yẹle azẹ lẹ ntụ? ?Bụ iphe ono bẹ iiku aswịru Chileke ẹgu; l'eswe, dụ Chipfu ree?

⁶ “Wakwa ụdu aswị ẹgu, dụ mu ree baa: Unu gbütoshia ẹgbirigba, unu tūru ndu eme omeliwe! Unu abya atọshikwapho eri odogoro, unu yeru ndu unu akpa ẹhu; haa phẹ g'ẹphe nweru onwophẹ! Unu atụko odogoro ono nyakwoshia anyakwoshi! ⁷ Iphe ọzo, ọ bụfua bụ g'unu l'onye ẹgu agụ gbarụ mgba lẹ nri ngu! Unu abya achọoru ndu akpa nri, enwedu ụlo ẹka ẹphe e-buru. Unu -hụma onye gba ọto; unu anmabe iya iphe! Ọpflu unu ewofukwa iphu l'ẹhu onye unu l'iya bụ mee lanụ!

⁸ “Noo teke ìphóró unu e-nwu phoo g'ìphóró nchi-abọhu; ewekọrohu unu emee phuruphuru. Noo teke apfubekoto unu e-vuru unu ụzo; unu etso iya etsotso. Ọdu-biribiri kẹ Chipfu aburu iphe, a-nọdu etso unu

l'azụ. ⁹ Noo teke unu e-ku oku; Chipfu aza unu ẹnu. Unu echia o-ji-l'ẹka-tọgbo; l'ọ sụ unu lẹ ya nọ-a.

“Ọ -bụru l'unu a-tọshi eri odogoro ono, unu yeru ndu unu akpa ẹhu ono; bya ahaa amaru nemadzụ ẹjo ẹka ono; hakwaphọ epfu ẹjo-opfu; ¹⁰ ọ -bụru l'unu a-wata anụ ndu ẹgu agụ nri; wata emeru ndu eeme ewere mkpa phẹ; bẹ ìphóró e-nwuru unu phoo l'ẹka ọchii agba; ẹnyashi adụ unu g'echi eswe. ¹¹ Ọo-bụru Chipfu a-nọdu edu unu mkpụrumkpuru. L'o meeru unu iphe, bụ mkpa unu l'ẹka kpọru gbengu; mekwaphọ g'ọkpu shihu unu ike l'ẹhu. Unu abya adụ gẹ mgbabu, a gbaru mini ree; g'ọgba, ta anwụ-buhujedu shọkoshoko anwụ-buhu. ¹² Ndibe unu akpụkwaa akahụ ụlo ono, shi dakpọshihuwa nụ ono; bya akpụ-lia akahụ ọkpa-ulo ono, shi lẹ ndiche ono. L'e kuahaa unu: ‘Ọ-kpụkwa-mkpọkpo-igbulọ’; yẹle ‘Ọ-kpụkwa-ulo-l'agụga-oji’.”

Obunggo, ee-bu onye doberu eswe-atụta-unme

¹³ “Unu -chịfukpowaa ọkpa unu l'emebyi eswe-atụta-unme; ọphu unu emejeedu g'ọ dụ unu l'eswe, duru mu nsọ ono; unu -gụbekpowaa eswe-atụta-unme iphe; mbụ-a; unu -kua eswe ono, duru mụbe Chipfu nsọ ono eswe aakwabẹ ùbvù; ọ -bụru l'unu doberu iya iche; ọphu unu ahatajedu ẹnu ẹka unu; ọphu unu emedu g'ọ dụ unu; ọphu unu epfudu okorobo opfu; ¹⁴ noo teke unu a-nọdu Chipfu l'ẹhu wata ete ẹswa. Teme ọ bụru l'ẹka kachaa ephekerephe l'eliphe bẹ mu e-me g'unu ngakojeru tụa okoo. Unu eketa okiphe, shi lẹ nna unu ono, bụ iphe Jiékpọ; ọ bụru iya bẹ mu e-gude azụ unu.” Nokwa ọnu, Chipfu yeru.

59

¹ Tororo opfu bụ l'ẹka Chipfu ta adụkwa tsọkpuru kẹ g'ọ tọ dzọta nemadzụ. Ọphu nchị echihukwaru iya

echihu g'ọ tọ nụma iya iphe. ² Ọ chia ẹjo-ememe unu dokaharu unu ẹ Chileke unu. Ọo iphe-ẹji unu meru; o wofu iphu l'ẹka unu nọ; k'ọphu bụ l'ọ tọ nuedu olu unu; ³ ọkele ẹka unu bẹ mee ọchi tūrwwaru. Mbụ ẹ mkpūshi-ẹka unu rwūkatawaru ẹjo-iphe. Ogbogboromōnu unu dzūwaru ụka; tẹme unu nọdu atụ ẹjo opfu kẹ tootoo.

⁴ Ọ tọ dudu g'unu ha onye ọphu epfu g'e kpeje ikpe, pfuru ọto. Ọphu ọ dudu onye edoje opfu iya ire-lanụ. Ẹphe achijeru ụpfu kwẹe ẹ mkpọkoro opfu, adzūshi ụka. Ẹphe nọdu atsūtaje ime nchọko-opfu nwua ẹjo-iphe. ⁵ Iphe, ẹphe ekpuje ekpukpu kputa iya nwa bụru ẹkwá ogiji. Tẹme òghú, ẹphe agbajẹ bụru oghu udude. Iphe, bụ onye tarụ ẹkwa iphe phẹ nwuhufutaje. Teke ọ dūkwanuru ọphu tūkphuru nụ l'ọ vua nwa ogiji. ⁶ Udude, ẹphe kweru ta adūkwa k'akpa uwe. Ọphu ẹphe egudekọtadu iphe, ẹphe gude ẹka phẹ mee gbobuta onwophẹ. Iphemiphe, ẹphe eme bụkota ẹjo-iphe. Ọ bụerupho iphe ike iphe ike aduje phẹ l'ẹka. ⁷ Ọkpa phẹ ekwoje gburumu bahụ l'eme iphe-ẹji. Ọphu egbu onye adudu iphe, o meeru adudu iphe, ọobujeru phẹ. Ọriri phẹ bụkota ẹjo ọriri. Mkpurupyata yẹe ọla-l'iswi bụru iphe, anọduje egoshi ụzo, ẹphe shiru. ⁸ Ụzo, eeshije; nchị-adu-doo bẹ ẹphe ta amadụ. Ọphu ikpe, pfuru ọto adudu l'ụzo, ẹphe eshi. Ẹphe tūkowaru iya mee; ọ bụkotaru ụzo, dū nggọdого nggọdого. Ọphu ọ dudu onye eshi iya nụ, byaru amaru iphe, bụ nchị-adu-doo.

Ndu Ízur ẹlu epfushi iphe-ẹji, ẹphe meru

⁹ Ọo ya bụ l'ikpe, pfuru ọto nọ anyi ẹnya. Ọphu apfubekoto erwuduru anyi ẹka. Anyi leri ẹnya ìphóró; iphemiphe bụkotaru ọchii. Anyi lee ẹnya g'ìphè gbuchafụ egbuchafụ. Obenu l'ẹka anyi nọ aghaphe bụ

oke ọchii. ¹⁰Ọ bụru gẹ ndu atsu ishi anọduje aduda ẹka-a bu g'anyi aduda ẹka l'igbulọ. Mbụ gude ẹka achọ ụzo anyi gẹ ndu enwedu ẹnya. O -be l'echi eswe; anyi evuko iphe evuko g'ọ bu echi abali. Teke anyi nọ l'echilabọ ndu ike du; anyi aduepho gẹ ndu nwuhuru anwuhu.

¹¹ Anyi atukoje aba hanyihanyi g'oke-ẹjo-nkuta-ọswa; atsuru ntsuru gẹ ndo. Anyi lee ẹnya ikpe, pfulu ọto. Ọphu ọ dudu ọphu rwuru anyi ẹka. Anyi lee ẹnya g'a dzọo anyi. Adzọta duro anyi ụzenya ụzenya.

¹² Ọ bụru iphe, kparu iya nu bu l'iphe-ẹji anyi paru ẹka l'iphu ngu. Ọ bụru iphe-ẹji anyi agba anyi ekebe. Emeswe, anyi mesweru ngu adujeepho anyi l'egomunggo. Teme anyi maru ẹjo-iphe, anyi meru ree.

¹³ Anyi mesweru Chipfu; teme anyi nọdu ejephe iya. Mbụ l'anyi woru azu ghaaru Chileke anyi. Opfu, eshije anyi l'onu afushi buerupho eme ewere; yele agirigo; mekpoo adzu uka, bu ọphu tukoru anyi obu sweta. ¹⁴ Ọo iphe ono meru g'o gude ọphu e kpeedu ikpe, pfulu ọto. Apfubekoto pfuluro ụzenya ụzenya. Ire-lanu dawaa kpoo mkpomishaku l'oma gbororo. Ọphu abu onye ọkpobe opfu adudu ike batakpọnu abata ophu. ¹⁵ Ire-lanu be ta adudu ẹka a humaru iya. Onye jeru g'o zehuru ẹjo-ememe l'a vua ya kpatakpata.

Noo ya bu le Chipfu elee ya ẹnya; ọ du iya ẹji; kele ikpe, pfulu ọto ta aduedu. ¹⁶ Ọ huma l'ọ to dudu onye du nu. Mbụ-a; ọ nyia ya ẹhu kpalaa l'ọ to dudu onye gbaa mkpu, du nu. Ọo ya bu; o gude ẹka iya dzọo ya l'onwiya. Teme ọ bụru apfubekoto nkiya sederu iya. ¹⁷ Ọ bya eworu apfubekoto mee uwe-igwè onye eje ọgu chibe l'okpoma; bya eworu adzọta kpuru l'ishi g'okpu-igwè. Ọ bya eyee agwata ugwo-iphe g'uwe; bya eworu iphe enwu oku l'obu gbaphua onwiya g'onye gbaphuru ẹkwa.

¹⁸ Ọ bụru g'iphe, ẹphe meru gbaru bu g'oo-gude pfula

phẹ ụgwọ. Mbu l'ọo-tụ-koshi ndu ọhogu iya oke ẹhu-eghu iya. L'ọ bya agwata ndu opfu iya ụgwọ iphe, ẹphe meru iya. L'ọ bya apfua ndu bukube eze-ẹnyimu iphe, rwuberu phẹ nụ. ¹⁹ Ọo ya bu gẹ nemadzu atsuhaha ẹpha Chipfu ebvu jasuchaa l'uzo ẹnyanwu-adada. Ẹphe eshikwaphọ l'uzo ẹnyanwu-awawa akwabe ọdu-biribiri iya úbvú; kẹle ọo-tụ kpereree bya g'utso; ọ buru unme kẹ Chipfu a-nọdu adube iya ikike.

²⁰ Onye agbafutaje anyi a-bya úbvú Zayonu; mbu byapfuta oshilokpa Jiékọpu, bu ndu izimanu iphe-ẹji phẹ lwaru azu. Nokwa iphe, Chipfu eepfu. ²¹ Wakwa iphe, Chipfu epfu baa: “A -bya l'ẹhu mube Chipfu; wakwa ọgbandzu mu l'ẹphe baa: Unme mu, bu ọphu nọ ngu l'ẹhu; yele opfu mu, bu ọphu mu yeru ngu l'onu ta abyakwa abvu ngu l'onu; ọphu ọobvudu l'onu unwu ngu; ọphu ọobvudu l'onu oshilokpa phẹ e -shi nta-a jasụ l'ojejeje.” Nokwa iphe, Chipfu eepfu.

60

Zayonu e-mechaa du akpabiri

¹ Gbalihu agbalihu!

Wata egbu nwịinwii;
kẹle ìphóró nkengu byawaru!

Teme Chipfu nọdu egbuwa
nwịinwii l'ẹhu ngu!

² Tii ledu; ọchii tukoakwaru
eliphe l'ọphu gbachia.

Teme oke-ọchii gbapyabe
ndiphe l'ọphu.

Obenu lẹ Chipfu gbalihuru
pfuru pfu-doru ngu.

Teme e je ahuma
o-gbu-nwịinwii ya l'eli

ẹhu ngu.

³ Ndu ọhozo a-bya anọdu

l'ìphóró, duru ngu nụ.

Ndu eze abya anọdukwapfo

l'ìphóró ono, duru ngu nụ ono;

mẹ nchi bọhueru ngu phọ.

⁴ Palinaa ẹnya lephee

mgburugburu hụma gẹ

ndibe ngu dzukọberu

awụ awụpfuta ngu.

Ụnwu ngu kẹ nwoke shi ẹka

dụ ẹnya alwa.

Tẹme ẹphe kwọru

ụnwuada ngu l'ukuvu

akwọlataru ngu.

⁵ Noo teke ii-le iya ẹnya

nwụjaa.

Ọkpoma evuahaa ngu evuvu;

l'ì wata anya ndú.

L'e shi l'oke-ẹnyimu kporu

ẹku kpotaru ngu.

Tẹme l'ọ bụkwaru ngu phọ

bẹ aa-chịtaru ẹku

ọhamoha.

⁶ Ọ-dọru-nyịmunyimu

inya-kamẹlu atụko alị

ngu sweta.

Mbụ ụnwu inya-kamẹlu,

shigba alị ndu

Midiyanu yẹle kẹ

ndu Ifa.

Tẹme iphe, bụ ndu shi alị

Sheba azarụ bya.

Èphe eguderu ngu
 mkpòla-ododo yèle
 ùnwù-isensu.

Tème èphe ara iya arara g'e
 tua Chipfu èpha.

⁷ Eghu mè aturu ndu Keda g'ò
 ha bè aa-tùko chítaru ngu.

Mbụ-a; ebili ndu Nebayotu
 e-mechakwaa jeeru
 ngu ozi.

L'a nata phè gude gweeru mu
 ngwèja l'òru-ngwèja
 mu.

Mu abya eworu èguru
 eze-ùlo mu mee g'ò dù
 ùbvù l'ènya.

⁸ ?Bù ndu ole baa? ?Bù ndu
 ole asò raaraa g'urwukpu,
 asò l'igwe phò;
 mbù ndu ono,
 eze gbiigbiigbi g'èka
 ndo-nwènu
 l'eze gbiigbiigbi ephe
 ala l'èpfune iya
 ono?

⁹ Tororo bù lè ndu bukube
 eze-ènyimu bù mu bè
 èphe achò abya.

Ùgbo, vutagbaaru phè ùzo
 bùru ùgbo-mini ndu
 Tashishi.

Ò bùru ndu èphe achìlata
 bù ùnwu ngu,
 shi èka dù ènya;

yẹle mkpọla-ọchaa mẹ
mkpọla-ododo,
ẹphe vugbaa alwa.

Ono bụru ùbvù,
aakwabẹ Chipfu,
bụ Chileke ngu ono;
mbụ onye ono,
bụ Onye Nsọ kẹ ndu Ízurelu;
kẹle o meru g'ì dụ akpabiri.

¹⁰ Ọo ndu shi eshishi
a-kpụkwa igbulọ ngu
ono.

Ọ bụru ndu eze phẹ a-nọdu
ejeru ngu ozi.

A makwarụ-a lẹ mu gude
ẹhu-eghu chitsua ngu.

Obenu lẹ mu e-mechaa gude
n-yemobu phụaru ngu
obu-imemini.

¹¹ Ọnu-abata gụbe mkpụkpu
ono e-ghejeru Ọnu
mkpụrumkpuru.

A ta abyadụ agụ-chije iya
agụ-chi eswe l'enyashi.

Ọo ya bụ gẹ ndiphe anọdu
achịbataru ngu ẹku
ụnwu-eliphe.

Ọ bụru ndu eze phẹ a-chijeru
phẹ abya;

¹² kẹle iphe, bụ ọha;

ọzoo alị-eze, a-jịka
l'ẹphe te ejeduru
ngu ozi

a-bụru mkpurupyata;

ndu ono bẹ
ee-mebyishikọta l'ophu.

¹³ Iphe, alì úbvú úbvú
Lébanọnu gude dọ
akpabiri a-larọ ngu;
mbụ oshi payinu;
mẹkpoo oshi fịru;
mẹchakpoo oshi
sayipuresu, bukota oshi,
dọ iya nụ.

G'ọ ha bẹ ee-gude mee g'ẹka
duru mu nsọ maa
mma.

Tẹme mu emekwaphọ g'ẹka
mu azoje ọkpa bụru ẹka
dọ akpabiri.

¹⁴ Ụnwu ndu ono, eme ngu
ewere ono e-mechaa
bya l'iphu ngu bya
ephozeru ngu.

Iphe, bukpo ndu ono,
agụbeduru ngu iphe
ono e-mechaa bya
lẹ mgboru ọkpa ngu bya
ephozeru ngu.

Ẹphe e-mechaa tuko kuahaa
ngu Mkpukpu kẹ Chipfu;

Úbvú Zayọnu kẹ Onye Nsọ
kẹ ndu Ízurẹlu.

¹⁵ A makwaru-a l'a jikaru ngu
bya akpo ngu ashị;
ọphu ọ dudu onye
aghajajẹ ngu nụ.

Obenu ẹ mu e-mechaa mee ngu
 mkpukpu, ọgbo l'ogbo
 e-gude eku onwophẹ;
 gude iya ete ẹswa.

Ọ bụru g'ọo-dụwaro bụ ono
 jasụ l'ojejoje.

¹⁶ Ịi-ngu ẹra ọhamoha;
 mbụ l'ọo ẹra ndu eze bẹ
 ee-gude hee ngu.

Noo teke ịi-maru l'ọo
 mbẹdua, bụ Chipfu bẹ
 bụ onye ndzọta ngu;
 bụru onye aagbafuta
 ngu nụ;
 bya aburu Ọkalibe kẹ
 Jiékọpu.

¹⁷ Ọ bụru mkpọla-ododo bẹ
 mu a-nụ ngu l'ọzori
 onyirubvu.

Mu anụ ngu mkpọla-ọchaa
 l'ọzori mgbụguru-ígwè.

Onyirubvu bẹ mu a-nụkwanu
 ngu l'ọzori oshi-nkụ.

Mu anụ ngu
 mkpụrukpu-ígwè
 l'ọzori mkpuma.

Ọ bụru nchị-ọdu-doo bẹ
 l'a-nọdu atùru ngu iphe,
 ịi-nọdu eme.

Apfubekoto aburu iya a-nọdu
 edu ngu.

¹⁸ A ta abyadụ anụmabaa
 l'iphe-kpangangaa

l'eme l'alì ngu
l'ophu.

Ọphu aanụmabaedu
k'Ọla-l'iswi ọzoo
mgbu-ọnwu l'alì ngu
gbaa mgburugburu.

Iphe, ìi-nọdu eku igbulọ ngu
a-bụru: Ndzọta;
l'i kua ọnu-abata mkpụkpu
ngu “Ajaja”.

¹⁹ “Ọ tọ bụeduru ẹnyanwu
bẹ ii-gude aphụ ụzo l'eswe;
ọphu ọnwa echiẹduru ngu
phuuphuu l'ẹnyashi.

Noo kẹle Chipfu a-bụru
ìphóró duru ngu nụ
jasụ l'ojejeje.

Mbụ l'ọo Chileke ngu ono
a-bụru
ọdu-biribiri nkengu.

²⁰ Ẹnyanwu ta arịbaedu arịba;
ọphu ọnwa arịbaedu arịba.

Ọ bụru Chipfu a-bụru ìphóró
ojejeje nkengu.

Ọ tọ duedu mbọku, aphụ
byaru atsọbaaru ngu.

²¹ Noo teke ndibe ngu l'ophu
a-bụkotaru
ndu pfuberekoto.

Ẹphe enweru alì ono jasụ
l'ojejeje.

Mbụ-a; ọ kwa ẹphebedua
bụ irwu oshi ono,

mu dzabèru ono; mbu ozi,
 mu gude ẹka mu jee;
 g'e gude hụma gẹ
 mu dū-be akpabiri.

²² Ndu ọphu kachaa alwa alị lẹ
 g'unu ha a-duje ụnu labọ
 l'ụkporo iri;
 tẹme ndu kachaa nwanshịi
 lẹ g'unu ha aburu
 mkpukpu, ike dū.

Ọ kwa mbèdua bu Chipfu.
 Iphemiphe-a bẹ mu e-mekwa
 ẹgwegwa mẹ o -rwuẹpho
 teke mu e-me iya.”

61

Apha, Chipfu e-me eze-iphe-oma

¹ Unme Nnajiuphu,
 bu Chipfu dū mu l'ẹhu;
 kele ọ họtaru mu gẹ mu
 je ezia ndu wozeru
 onwophẹ alị ozi-oma.

Ndu meji tọfuru bẹ o
 ziru mu gẹ mu je emee
 gẹ meji nmapfuru
 phẹ;
 gẹ mu je ezia ndu a
 kpọtaru lẹ ndzū l'ẹphe
 e-nweru onwophẹ.

Mu epfukwarupho ndu nọ
 l'ọka-mkpọro l'aa-ha
 phẹ.

² Tẹme gẹ mu bya arakaa

l'apha, Chipfu e-meru
 ndu nkiya eze-iphe-oma
 rwuwaru;
 yẹle eswe mboku,
 Chileke anyi a-gbaru
 ndibe iya ọdzori.

Mu adu a ndu agu aphu
 obu g'ẹphe ha.

³ Teme mu eyekwarupho ndu
 Zayonu ẹka;
 mbu ndu ophu aphu
 tsoru.

Mu eworu eguru okpu-eze
 kpube phe l'ishi l'ozori
 ntu,
 ẹphe shi kpube onwophe;
 wua phe manu ẹhu-utso;
 l'ozori agu aphu;
 yee phe uwe,
 bu aja Chileke ajaja;
 l'ozori anodu yokoo.

Iphe, aa-nodu eku phe
 aburu “Achi k'apfubekoto”;

Oshi, Chipfu kuru l'onwiya
 g'e gude huma g'o
 du-be akpabiri.

⁴ Epe a-kpukwa akahu igbulu
 ono,
 dakashihuru e -shi teke
 ndiche ono;
 bya atuko akahu ẹka ono,
 buhawaa ochobu ono
 doziphuchaa azu.

Mkpukpu ono,

dakp̄shihuchaaru
 adakp̄shihu n̄odu nno
 shi l'ogbo sweru ogbo
 ono b̄e ẹp̄he a-t̄uko
 kp̄uzi-k̄otachaa.

⁵ Ọ b̄uru ndu shi eshishi
 a-n̄odu echeru unu eḡhu
 m̄e at̄uru unu.

Ndu ọhozo ab̄uru ndu
 a-n̄odu ejeru unu ozi ẹgu;
 ȳele ozi op̄fu-vaȳinu
 unu.

⁶ Ip̄he, aa-n̄odu eku unu ab̄uru
 “ndu-uke k̄e Chipfu”.

Ip̄he, aa-ḡube unu a-b̄uru
 “ndu ejeru Chileke
 anyi ozi”.

Ọ b̄uru ẹku Ẹnwu-elip̄he b̄e
 unu a-n̄odu eri.

Mb̄u ọ b̄uru ip̄he-enweru ph̄e
 b̄e unu e-gude eku
 onwunu.

⁷ L'ozori ip̄he-ip̄here,
 e gege an̄odu eme ndibe
 mu b̄u-chia ip̄he,
 e-me n̄u b̄u l̄e ndibe mu
 a-nata okip̄he
 nnakwase l'eka ph̄e.

T̄eme l'ozori ekpu ip̄hu l̄e
 nt̄u b̄e ẹp̄he a-n̄odu
 etechia ẹswa l'okip̄he,
 ẹp̄he ketar̄u.

Ẹhu-Ẹtso ojejoje ab̄uru nkep̄he.

⁸ “K̄ele mb̄eɗua, b̄u Chipfu b̄u

iphe,
 aduje mu ree bu ikpe,
 pfuru nhamunha.
 Ophu dukwanu mu ashi buru
 ana nfu yele eme
 ejo-ememe.
 Ozo bu le mu e-me
 ire-lanu bua ndibe
 mu obunggo.
 Teme mu l'ephe agbaa ndzu
 ojejoje.
⁹ Oshilokpa phe aburu
 ndu a maru amaru
 l'ohamoha.
 Nokwapho ge ndiphe a-maru
 awa phe.
 Iphe, bukpo onye humaru
 phe nu a-majeerupho
 l'ephe bu ndu Chipfu
 keberu l'oma."
¹⁰ Mu a-nodu Chipfu l'eka
 tee eswa.
 Mbụ l'obu mu be ehu atsọ
 l'ime Chileke mu;
 kele o yewaru mu ndzota
 g'uwe;
 bya egude apfubekoto
 kwaa mu yegele g'onye
 yeru uwe mkpelanu.
 O meru mu; mu du ge nwoke,
 abya alu nwanyi
 k'ophuu;
 mu kpuchia iphe l'ishi
 g'onye uke Chileke;

mbụ mee mu;
 mu nọdu ama gẹ nwanyi,
 akwakọ ala ji;
 mbụ nwanyi,
 gude iphe-nchi yẹle
 iphe-olu kwaa onwiya
 akwa.

- ¹¹ Kẹle ọo g'alị emeje g'iphe
 fushia-a;
 tẹme mgbabu nọdu emeje
 g'iphe,
 a kuru iya mehu-a;
 nokwaphọ gẹ Nnajiuphu,
 bụ Chipfu e-me
 g'apfubekoto yẹle
 ajaja kpọ-futa l'iphu
 ọhamoha.

62

Ẹpha ọphúú ndu Zayọnu

- ¹ Ọ kwa l'iswi ẹhu Zayọnu
 bẹ mu e-gude;
 mu taa nọdudu doo.
 Mbụ lẹ mu e-gude l'iswi ẹhu
 Jierúsalemú;
 mu tee dobedu ọnu doo;
 gbiriri jasụ teke
 apfubekoto iya achafuta
 g'a hụma iya g'ẹka
 nchi bọhuru;
 ndzọta iya enwua kẹ phoo
 g'orọku, eke jajaja.
² Ọhamoha a-hụma apfubekoto

nkengu.

Ndu eze l'ophu ahuma
ogbu-nwĩnwii nkengu.

L'a gũa ngu epha òphúú,
bũ Chipfu e-gude ọnu iya
gũa ngu iya l'onwiya.

³ Gũbedua a-dũ g'okpu-eze,
dũ ùbvù l'ẹnya,
nọ l'ẹka Chipfu.

Mbũ l'ìi-nọdu l'ẹka Chileke
ngu dũ iya g'okpu-eze,
onye eze kpu l'ishi.

⁴ Ẹphe te ekubaẹdu ngu
“onye a gbagharu agbagharu”.

Ọphu e kuẹdu alì ngu “ochobu”.

Iphe, aa-gũ ngu bũ
“ọtsomahu Chileke”.

L'a gũa alì ngu “nwanyị,
a luru k'òphúú”;
kẹle Chipfu e-gude ngu
ete ẹswa.

Tẹme alì ngu adũ gẹ nwanyị,
a luru k'òphúú.

⁵ Mbũ l'ọo ẹgube ono,
nwokorọbya aluje
nwamgbọko ono
bũ g'ụnwu ngu a-luru gube
Zayọnu.

Ọ bũru g'onye eme ekele nwanyị
egudeje nyee ya ete ẹswa-a;
nokwaphọ gẹ Chileke ngu
e-gude ngu ete ẹswa.

⁶ Mu woakwaru ndu nche

dobechaa l'eli igbulọ,
 a kpụ-pheru gụbe
 Jierúsalemụ.

Ọphu ẹphe abyakwa e-dobe
 ọnu doo eswe l'enyashi.

Mbụ-a; unubẹ ndu eku
 ẹpha Chipfu;
 unu ba tutakwa unme!

⁷ Ọphu unu ahakwa iya g'ọ
 tuta unme jasụ teke
 oo-me Jierúsalemụ g'ọ
 nguru anguru;
 mee ya g'ọ bụru iphe,
 eliphe l'ophu e-gude
 aja Chileke ajaja.

⁸ Chipfu gudeakwa ẹkutara
 iya;
 yẹle ogwe-ẹka iya l'ophu
 ria angụ sụ:

“Ọ tọ dukwa teke mu byaru
 ewobaaru iphe,
 ị kọberu l'alị nụ ndu
 ọhogu ngu g'ọ bụru
 nri phẹ.

Ọphu ndu ọhozo abyadụ
 angubaa mẹe ọphúú ono,
 bụ ngu seru akanya
 iya ono.

⁹ Ọ chia ndu kpatarụ iya nụ e-ri
 iya jaa Chipfu ajaja iya.

Tẹme ndu awọ akpuru
 vayinu angua mẹe ya
 l'oma-unuphu ibe mu ono,
 dū nsọ onoya.”

- ¹⁰ Unu ghajaa ya;
 unu ghajaa Ọnu-abata
 mkpụkpu ono!
 Unu dozia ụzo, ndu ono
 a-nọdu eshi!
 Unu tụa mkpoli;
 unu tụa mkpoli l'eze
 oji ono!
 Unu wofuchaa ya mkpuma
 mkpuma, dụ iya nụ!
 L'e wolia ẹkwa-ọhubama ono
 pfuluberu ọhamoha
 g'ẹphe hụma!
¹¹ Lenu; Chipfu raakwaru iya;
 o jedzuru mgboko jasụ
 l'ẹka igwe beru alị
 beru sụ:
 “Unu sụ ndu Zayọnu g'ẹphe
 hụmakwa l'onye ndzọta
 phẹ abyakwa!
 O gudekwa obunggo iya;
 bya egude iphe,
 oo-gude pfula ụgwọ.”
¹² “Iphe, ee-ku ndu ono bụ
 ‘Ndu-nsọ kẹ Chileke’;
 ọzoo ‘Ndu Chipfu gbatarụ’.
 L'e kua gube Zayọnu
 ‘Nwanchọta’;
 ọzoo ‘mkpụkpu,
 a ta gbadoeduru agbado’.”

¹ “?Bụ onye bụ ọphuu? ?Bụ onye shi l'alị Edomu abya phọ; mbụ onye ono, yeru uwe, dụ meeme, shi lẹ mkpukpu Bọzura eje abya ono? ?Bụ onye bụ ono yeru akpabiri g'onye yeru kpowula-kpowula uwe; mbụ onye ono, azọ garamugaramu eje l'iphu l'iphu gude egoshi g'ọ kabe ọkpehu ono?”

“Ọ kwa mbēdua. Mu pfubekwaru ẹka ọto epfu iphe, mu epfu. Teme ike adzọta nemadzu dukwa mu phọ.”

² “?Bụkwanu gūnu meru g'o gude uwe ngu nọdu eke meeme; g'onye azọcha akpuru-iphe, e meje mēe?”

³ “Ọ kwa mu zoshiru mēe ono nwēka mu. Ọhamoha l'opu ta adukwa onye byaru ekwe mu ẹbo. Mu gude ẹhu-eghu zọo ya zoshia; mbụ gude oke ẹhu-eghu mu zọo ya ọtilitoli. Ọ bụru mee phẹ gbakarụ kpua l'uwe mu. Ọ bụru iya bụ lẹ mee, atuko uwe mu l'opu sweta. ⁴ Ọ bụru iphe, kparụ iya nụ bụ l'eswe agwata ugwo iphe nọ mu l'okpoma. Teme apha aagbata mu ono rwuwa. ⁵ Mu leri ẹnya; ọphu ọ dudu onye gbaa mkpu, dụ nụ. Ọ nyia mu ẹhu kpala l'ọ tọ dudu onye byaru agbaarụ mu mkpu. Ọ bụru ọkpehu mu bẹ mu gude dzọo onwomu. Teme ọ bụru oke ẹhu-eghu mu bẹ gudeshi mu nụ. ⁶ Mu gude ẹhu-eghu mu zọo ọhamoha pyakapyaka; gude oke ẹhu-eghu mu mee; mēe tsuaha phẹ. Mu woru mee phẹ wua l'alị.”

Ajaja yele epfu anụ Chileke

⁷ Mu e-pfu k'obu, Chipfu eyeje ndibe iya.

Mbụ iphe, Chipfu meshiru

anyi, kparụ iphe,

ọ gbaru g'a jaa ya ajaja;

mbụ ikpoto iphe, dụ ree,

o meru ọnu-ulo Ízurẹlu;

kẹle ọophushi
 obu-imemini ike;
 tẹme ọ nọdu eyeje obu
 yegharu iya ẹka.

⁸ Ọ sọru: “Eviya eviya; ndu-a bu ndibe mu; unwu mu, ata abyadu adzuru mu uka.” Ọ buru iphe ono meru g'o gude a dzota phe. ⁹ Ephe nodu ejekpo iphe-ehuka, ephe jeru g'o ha; ọ nodu atsue ya pho l'ehu. Ọ buru ojozi-imigwe, shi l'eka ọ nọ jeru je adzo phe. Ọ buru eye obu, o yeru phe; yele obu-imemini, oophuru phe be o gude gbata phe. Ọ palia phe ephekerephe; heru phe eheru teke ndiche ono l'ophu l'ophu. ¹⁰ Ole ọ bu; ephe jikale-a l'ephe tee medu iphe, ọ sọru phe g'ephe mee; shi nno mee Unme-du-Nso nkiya iphe aphu. Ọ buru iya meru g'o gude ọ ghakobe bya aburu onye opfu phe. Mbụ yebedua l'onwiya bya etsoaha phe ọgu.

¹¹ A nonyaa; ephe nyata teke ndiche; mbụ teke Mosisu yele ndu nkiya nọ. Ephe rĩa sụ: “?Bu awe be onye ono, dugharu phe eze-enyimu ono nọhununu; mbụ onye dugharu ndu nche aturu yele aturu me egbu iya-a? ? Bu awe be ọ nọ; mbụ onye ono, woru Unme-du-Nso nkiya ye; ephe l'iya swiru ono; ¹² onye ono, woru okpehu iya ophu du biribiri ye Mosisu l'ekutara; o woru eze-enyimu kee ebo l'iphu phe; k'ophu aa-maru epha iya jasụ l'ojejoje; ¹³ mbụ onye ono, duru phe ghaa ogbumini ono. Ephe gbaa kwaakwa g'inya agba l'echiegu. Ophu opfu aduduru phe l'okpa. ¹⁴ Unme Chipfu rwukpo phe pho g'onye erwu eswi eje le mbarabata; je adobe l'eka ephe nọru tuta unme. Ọ bu egube ono bu g'i gude dua ndibe ngu; k'ophu ii-me g'epha ngu buru iphe, a-du akpabiri.”

¹⁵ Gbenu l'imigwe; mbụ l'ephekerephe eka ono, abaeze ngu nọ ono; mbụ eka ono, du nsọ bya adu akpabiri

ono; gbenu l'eka ono tufu enya humakpodapho! ?Bu awe be n-yemobu ngu; yele okpehu ngu no? Eme odoon ngu yele aphu obu-imemini ngu ono ta adukwa ophu i kweru g'o rwua anyi eka. ¹⁶ Obenu l'oo ngu bu nna anyi. A makwaru-a le Ebirihamu ta amadu anyi. Ophu Izurelu amadu onye anyi bu. Obenu l'oo gube Chipfu bu nna anyi; bya aburu onye aagbata anyi. Epha ngu shi l'ojejeje duta. ¹⁷ Su-a; gube Chipfu; ?bu gunu meru g'o gude i mee g'anyi phukuru lufu l'uzo nkengu; i su-chia okpoma anyi k'ophu bu l'anyi ta tsuduru ngu ebvu? Lwanu azu m'obvu ndu-ozu ngu; mbu okpa-ipfu ono, bu okiphe ngu ono!

¹⁸ Ali nsu ngu ono ta noduru ndibe ngu odu l'eka. Ndu ohogu ngu bya eworu eka ono, duru ngu nsu ono zo tolitoli. ¹⁹ Ole anyi bukwapho nkengu e -shi le ndiche. O gbenu du g'i tiki bu-swee ishi anyi; g'e teke ekuswee anyi laaru l'epha ngu.

64

¹ O du g'a su g'i gbajaa igwe ebo nyizeta! G'oke ubvu nmaa jijijijii l'iphu ngu! ² Mbu-a; egube ono, oku etsuje nku, enwu oku ono; egube ono, oku emeje ge mini, shiru iya nu phuhu uphu ono; nyizetanu bya emee ge ndu ohogu ngu maru epha ngu! Byanu emee g'ohamoha phua kpaakpaakpa l'iphu ngu; ³ kele teke ono, i meru iphe, dugbaa oke ebvu onoya, bu iphe, anyi amadu l'ime ono be i nyizetaru. Oke ubvu nmaa jijijijii l'iphu ngu. ⁴ E -shi ke teke ndiche ta adukwa onye numajewaru nu. Ophu o tubajeduru le nchi. Ophu enya ahumajeduru Chileke ozo, du nu, abudu gubedua, bu Chileke, emejeru ndu ele iya enya l'eka iphe, ephe ele enya iya. ⁵ Igbajeru phe mkpu; mbu ndu egudeje ehu-utso eme iphe, pfuru oto. Mbu ndu nyataru iphe, i suru g'e meje. Obenu le

teke anyi emekwapho iphe-ẹji ekpu phe; ẹhu eghuahaa ngu eghu. ?Denuhununu g'ee-shi dzotaba anyi? ⁶ G'anyi ha dukwaa g'iphe, aaso nsọ. Teme apfubekoto anyi dukotawa ge nkirika ẹkwa, du ideyideyi. G'anyi ha nwewaru enwenwe du ge mkpẹekwo. Iphe-ẹji anyi ndu apa anyi nganganga ge pherephere. ⁷ O to duedu onye eku epha ngu. Ophu o duedu onye eme ge ya e-me woru ngu ẹka; kele i woharu anyi iphu; bya eworu anyi wehaaru ejo-ememe, anyi eme.

⁸ Obenu le-a; gube Chipfu; o kwa ngu bu nna anyi. Anyibedua bukwa urwa; gubedua buru onye akpu ite. Anyi tukoru buru iphe, i gude ẹka ngu mee. ⁹ G'ehu te eghughakwaru ngu eghu ẹka jiko Chipfu. Ba gukobekwaru anyi iphe-ẹji anyi g'o noo jasụ l'ojejoje! Jikonu lenaa anyi enya; kele anyi tukokwaru buru ndibe ngu! ¹⁰ Mkpukpu ngu, dugbaa nsọ ono tukoakwaru buru ejagiri echiegu. Mbụ je akpachaa le Zayonu buchakwaa ejagiri echiegu. Teme Jierusalemu buru ochobu. ¹¹ Ezeulo ngu ono, du nsọ; bya adu akpabiri ono, anyi shi nweru ono, bu ẹka nna anyi oche phe shi anoduje aja ngu ajaja ono be a tukwaru oku; o tsua ya tsufu. Teme iphe, bukpoo ẹka ono, anyi yeru obu ono g'o ha bukotaru ola-l'iswi. ¹² G'o du egube ono gube Chipfu; ? ii-gudeshikwapho onwongu? ?Ii-no-kirishi nwadoo hua anyi ahuhu hugharu iya ẹka to?

65

Ikpe yele ndzota

¹ Mu shi ekpuhajẹ onwomu goshi ndu akpaduru ishi mu. Ndu achoduru mu achochu be mu shi emeje g'ephe huma mu. O buru oha ono, te eshidu ekuje epha mu ono be mu shi asuje: Wakwa mu-o! Wakwa mu-o! ² Mbokumoku be mu amachije ẹka togboru ndu ejo-okpoma.

Mbù ndu ono, ụzo ẹphe eshi adudu ree ono, buẹpho iphe, ẹphe ritaru bẹ ẹphe anọduje eme g'ẹphe mee ono; ³ mbù ndu bụ mkpụrumkpuru bẹ ẹphe anọduje akpatsu mu iwe l'iphu mu gẹdegede; ejeje anọdu lẹ mgbabu agwa iphe; kpokobe buloku mee ya ẹnya ẹka aakpoje ùnwù-isensu ọku; ⁴ ndu ejeje anọdu l'ẹka eeliye odzu; kwaa akwakwa l'ẹka ono nwukota ẹnya ẹnyashi eme kẹ maa l'edomi; ndu anọduje ata anụ ezi; eshi mini iphe l'ite phẹ, bụ mini anụ, aasọ nsọ; ⁵ ndu anọduje epfu sụ: Ọ-nọ-l'ụzo gbalakwaa! G'ọ tọ dukwa onye a-byakube mu ntse; kẹle mu dukwa nsọ! Mu kakwa ngu adu nsọ! Ẹgube ndu ono bụ ẹnwuru, akpụ tūuu ala mu l'imi. Ẹphe bụ ọku, enwuje phoophoohoo mkpụrumkpuru.

⁶ “Lekwa; e dekwaru iya edede dobe mu l'iphu sụ: Mu taa nọdukwa doo. Mu a-pfukwa ụgwo pfu-dzua apfu-dzu. Mu a-pfu phẹ iya nwuru iya enwuru ye phẹ l'ẹka; ⁷ mẹkpoo iphe-ẹji nkephe; mẹ kẹ nna phẹ oche phẹ.” Nokwa iphe, Chipfu eepfu. “Ọ bụru iphe, kparụ iya nụ bụ l'ẹphe jeru je anọdu l'eli úbvú agwa iphe; je anọdu l'eli obvu epfubyishi mu. Ọo iphe ono meru g'o gude mu je apfu phẹ ụgwo iphe, ẹphe meru; nwuru iya enwuru dẹe phẹ adẹe l'utapfu.”

⁸ Wakwa iphe, Chipfu epfu baa: “Ọ kwa ẹgube ono, mẹe abụjeru: ọ -dukwadu l'ọjopfula akpuru vayinu; l'aasu g'e te mebyishikwa iya lẹ nwiphe, dū ree hakwaru dukwadu iya ono; nọkwa gẹ mu e-me kẹ ndu ejeru mu ozi bụ ono; mu taa tūkokwa g'ẹphe ha emebyishi. ⁹ Mu emekwa g'awa Jiékpọpu phodu. Mbù lẹ mu e-me g'ọ dūru ndu Jiuda e-nweru oke úbvú mu ono. Mbù l'ọo ndu ono, mu họtaru ono bẹ ọo-buru okiphe phẹ. Ọ bụru ẹka ono bẹ ndu ono, ejeru mu ozi ono e-buru. ¹⁰ Nsuda Sharonu a-buru ẹka aa-nọdu eche iphe-edobe. Tẹme nsuda Akọru aburu ọdu-eswi dūru ndibe mu, bụ ndu achọ mu nụ.

¹¹ “Obenu k'unubèdua, bụ ndu jìkaru mụbe Chipfu; bya azọha eze úbvú mu ono, dū nsọ ono; mbụ ndu meru nri doberu Omelonwiya; bya agbajia mēe l'okoro sūberu Ọkpuluwa; ¹² ẹgube ndu ono bẹ mu a-gbakọ doberu oguechi. Teme g'unu ha e-phuretaẹpho g'a phushia unu tẹrii; kẹle mu kuru unu oku; ọphu unu azaduru ẹnu. Mu pfua opfu yeru unu; ọphu unu angaduru nchi. Unu nọdu mu l'iphu mee ẹjo-ememe. Teme ọ bụru iphe, dū mu ẹji bẹ unu hatarū ememe.” ¹³ Ọo ya bụ lẹ-a; wakwa iphe, Nnajiuphu, bụ Chipfu epfu baa: “Ndu ejeru mu ozi e-rikwa nri; unubèdua aswịru ẹgu. Ndu ejeru mu ozi angua iphe-angungu; unubèdua akpọhu ọnu nkụ. Ndu ejeru mu ozi e-tekwa ẹswa; unubèdua aburu ndu e meru iphe-iphere kpua. ¹⁴ Ndu ejeru mu ozi a-gū ebvu; ebvu, shi l'ẹhu-utso, jiru phẹ obu; obenu l'unubèdua ara ẹkwa aphụ, tukuru unu obu sweta; unu echia mkpu l'ẹka meji tọfuwaru unu ree. ¹⁵ Ẹpha unu a-buru iphe, ndu mu họtaru e-gudeje ephu l'iphu. Ọ bụru Nnajiuphu, bụ Chipfu e-mechaa gbua unu. Obenu lẹ ndu ejeru iya ozi bẹ ọo-gū ẹpha ọphúú. ¹⁶ Onye agọkpo ọnu-oma anụ nemadzū l'alị ono l'e-gude Chileke ire-lanū ono agọ iya. Onye erikwanū nte l'alị ono egude Chileke ire-lanū ono ria nte ọbu; kẹle iphe-ẹhuka, shi dūhawaa nū bẹ aa-tuko zohachaa woru iya domia gẹ mu ta ahumajehe iya.

¹⁷ “Lekwa; mu e-metakwa igwe ọphúú; bya emeta eliphe ọphúú. Akahū iphe bẹ a taa nyatabaedu; ọphu ọobatabaedu l'egomunggo. ¹⁸ Ọ chia g'ẹhu tsọo unu utso; unu ete ẹswa ojejeje ekpu iphe ono, mu e-meta ono; kẹle mu e-me Jierúsalemū g'ọ bụru mkpukpu ẹhu-utso. Teme ndu nọ iya nū aburu ndu emeje g'ẹhu tsọo nemadzū. ¹⁹ Mu e-te ẹswa kpua Jierúsalemū. Teme ndibe mu a-buru ndu e-me g'ẹhu tsọo mu utso. Ọphu aanumaedu olu-ẹkwa; ọzoo echi mkpu l'ime iya ọzobaa.

²⁰ Ọ tọ dũabaedu nwata, a-nọ ujiku olemole nwụhu l'ime mkpụkpu ono; ọzoo onye bụ ọgerenya, ata akafụdu nka l'ishi. Onye nọru ụkporo apha ise bya anwụhu bẹ aa-suje l'ọ gbakwohuru agbakwohu. Onye iphe-ẹji, anọ-rwuduru ụkporo apha ise bẹ aa-suje l'a turu iya ọnu.

²¹ Ẹphe a-kpụshi ụlo buru iya. Ẹphe agbaa opfu-vayinu ria akpuru iya. ²² Ẹphe taa kpuedu ụlo aharu ndu ọzo g'ẹphe buru. Ọphu ẹphe akọedu opfu aharu ndu ọzo g'ẹphe ria; kẹle ọo g'oshi akabeje nka bụ gẹ ndibe mu a-ka nka. Mbụ lẹ ndu ono, mu họtaru ono e-rije iphe, ẹphe seru akanya iya; ria ya nọo ọdu. ²³ Ẹphe te eseedu akanya ọla-l'iswi. Ọphu ẹphe anwushiedu unwegirima, ẹheni a-nọdu etso; kẹle ẹphe a-buru ndu Chipfu keberu l'oma; ẹphebedua g'ẹphe ha; mękpoo awa phẹ l'ophu.

²⁴ Ẹphe -bya eku oku; mu evuwaru ụzo za phẹ ẹnu. Ẹphe -gudekwadu-a opfu l'ọnu epfu; mu anụmawa iphe, ẹphe epfu. ²⁵ Ẹjo-nkuta-ọswa ẹphe l'unwu aturu a-tukoje akpa nri l'ẹka lanu. Teme oduma awata ata ẹswa g'eswi. Ọ buru iphe, agwọ e-rije bụ urwuku. Iphe ono ta aduedu ọphu emeka iphe; ọzoo gbua iphe egbugbu l'eli úbvú mu ono, dũ nsọ ono l'ophu.” Nokwa iphe, Chipfu eepfu.

66

Ikpe yẹle ẹka obu a-du

¹ Wakwa iphe, Chipfu epfu: “Imigwe bụkwa aba-eze mu. Eliphe bụru okposhi, mu tų-koberu ọkpa. Denu ẹgube ụlo, unu a-kpuru mu? ?Bụ ẹgube awe bẹ mu a-nọduje iya atuta unme ọbu? ² ?Tọbudu mbẹdua gude ẹka mu mee iphemiphe ono g'ọ ha meru g'o gude ẹphe du?” Nokwa iphe, Chipfu eepfu. “Wakwa ẹgube onye mu a-gube iphe baa: onye wozeru onwiya ali; yẹle onye obu iya dũ àgù; onye anụmaje opfu mu; ndzụ erwuta iya.

³ “Obenu l'onye buẹpho l'oogburu mu eswi; dukwa g'onye egbu nemadzụ. Onye gude nwaturu agwa mu dukwanu g'onye aswịkwo nkuta olu. Onye gude iphe, ọ kọtaru l'opfu bya mu anunu dule mu-a g'onye agbashi mu mee ezi. Onye akpokwanuru mu unwu-isensu oku duẹpho g'onye agwa nshi. Noo kele ephe hatawaru enu eka phe. Teme o buru iphe, aduje phe ree bu ejo ahuma, ephe anoduje eme. ⁴ Oo ya bu le mbedua achotakwapho iphe, mu e-gude mekpaa phe ehụ. Mbụ-a; mu e-meẹ phe pho iphe, ephe atsu ebvu; kele teke mu kuru oku ta adudu onye zarụ mu enu. Ophu o dudu onye yeru mu onu teke mu pfuru opfu. Ephe nodu mu l'iphu eme ejo-ememe. Teme o buru iphe, ephe hotaru eme bu iphe, adudu mu ree.”

⁵ Unu numakwa Opfu Chipfu; unube ndu anmajeru opfu iya pyaapyaapya: “Unwunna unu, bu ndu kporu unu ashị bya ewuchia unu ewuchi l'opfu ehụ mu be pfuwaru su: ‘Ge Chipfu goshinu l'o bu onye gbaru g'a kwabeje iya ubvu; k'ophu anyi a-huma ehutso unu!’ Ole ee-mechanaa mee ndu ono iphe-iphere. ⁶ Numakpodapho utsu, ada le mkpukpu! Numakpodapho uzu, aatu l'eze-ulo Chileke. O kwa iphe, ada nu bu le Chipfu apfu ndu ohogu iya iphe, rwuberu phe nu.

⁷ “Zayonu be ime byaru awata ememe; o nwuwa nwa. Mbụ l'upfu byaru awata iya eme ehuka; o nwuwa nwa nwoke. ⁸ ?Bu onye numajeru egube iphe ono? ?Bu onye humajeru egube iphemiphe ono? ?Aanwuje oha l'ophu l'ujiku lanu? Too ?aa-du ike zeda ndu a-buru oha eka phe le mgbo lanu? Ole o bu; o kwadu-a ime, wataru eme Zayonu; o nwuwana unwegirima iya. ⁹ ? Mu e-mechaa g'ime merwua l'anwunwu; mu emedu g'a nwua ya too?” Nokwa iphe, Chipfu eepfu. “Su-a; ?mu a-

gbẹ sụ-chia ẹkpa-nwa l'ẹka mu gbẹ mewaa gẹ nwa rwua l'anwunwu?" Nokwa iphe, Chileke unu epfu.

¹⁰ G'ẹhu tuko unu lẹ
Jierúsalemu tsoo uto!

G'unu gude Jierúsalemu
tee ẹswa; iphe,
bukpoo unubẹ ndu yeru
iya obu!

G'ẹhu tsoshikpoo unu l'iya
ike;
mbu unubẹ ndu rarụ
iya ẹkwa;
¹¹ kele unu a-ngu ẹra ngu-jia
ẹpho l'ẹra iya ono,
bu ẹra ndumobu ono.

Unu a-ngukpoo ya mĩa ya
pyopyopyo l'o tsoo
unu uto;
kele oo-nodu agbo ke joloji.

¹² Kele-a; wakwa iphe, Chipfu epfu baa: “Mu e-me g'ẹhu-guu sọru iya gborogboro gẹ nggele. Teme ẹku, shi ohamoha alwaru iya gẹ nggele, aso asoso. Ee-che ngu ẹra; hee ngu l'onwiya; tee ngu ebvu l'utapfu. ¹³ Oo gẹ ne aduje nwa iya obu bu gẹ mu a-nodu adu unu obu. O buru lẹ Jierúsalemu bẹ mu a-nodu adu unu obu obu. ¹⁴ Unu -humaepho iphe ono bẹ obu a-tsọahaa unu uto. Unu abyaahaa pulapula g'ẹswa. Iphe ono, Chipfu e-me l'ẹhu ndu ejeru iya ozi ono; bẹ l'e-me g'a maru iya. Obenu lẹ ndu ogho iya bẹ oo-tukoshi oke ẹhu-eghu iya.”

¹⁵ Unu lekwa; Chipfu gudekwa oku abya. Teme ugbo-inya iya dugbaa g'oke pherephere. O buru oke iwe bẹ oo-gude tukoshi phe ẹhu-eghu iya. L'o gude oku, enwu

phoophoophoo baaru phe mba; ¹⁶ kele oo oku yele ogu-echi iya be Chipfu ee-gude kpee ndiphe ikpe; mbu le ndu Chipfu a-phu teerii a-duka igwerigwe.

¹⁷ “Ndu ono, doru onwophe nsọ bya asachaa onwophe awu eje l'anya-agwa; mbu ndu awu l'odze etso onye ono, no l'echilabo ndu ata anu ezi; me ndu ata okerepfu; me ikpoto anu ozo, aasogba nsọ; ndu ono g'ephe ha l'a-tuko tabuhu onu l'ugbo lanu.” Nokwa iphe, Chipfu eepfu. ¹⁸ “Teme eshinu ephe eme egube umere ono; teme ephe ndu ari egube oriri ono be mu abyaakwaa achikobe ohamoha; mekpoo ndu epfu egube opfu, ephe epfu g'ephe bya ahuma ge mu du-be akpabiri.

¹⁹ “Mu e-me iphe-ohubama l'echilabo phe. Mu abya aharu nwa ndu ophu waru nu zia g'ephe jedzuru ohamoha ono, bu ndu teke anuma-swee udu mu; ophu ephe eke ahuma-swee ge mu du-be akpabiri ono; mbu g'ephe jee mkpukpu Tashishi; waa ali Pulu; yele ali ndu Lidiya; mbu ndu ono, agbaje apfu ono. Ephe eje ali ndu Tubalu; yele ke ndu Jiavanu; jekota ali ndu bu uzenya uzanya le mgboru eze-enyimu. Ephe eje emee g'ohamoha ono maru ge mu du-be akpabiri. ²⁰ Ephe a-tuko unwunna unu l'ophu, shigbaa l'ohamoha chita bya l'ubvu mu, du nsọ le Jierusalumu. Ephe a-buru iphe, e gude gwaa Chipfu. Ephe anodu l'inya abya; me l'ugbo-inya; mekpoo l'ugbo-ali, ophu aakpu akpukpu. Ephe anodu l'eli inya-mulu; mekpoo l'eli inya-kamelu awu abya.” Noo iphe, Chipfu epfu. “Su-a; aa-chiru phe bya egube ono, ndu Izurulu eyeje ngweja-nri l'ite, a ta sodu nsọ gude bya mu anunu l'eze-ulo mube Chipfu ono. ²¹ Teme mu a-hakwaru phe pho hota g'ephe buru ndu-uke mube Chileke; yele ndu Liviya.” Nokwa iphe, Chipfu eepfu.

²² “Su-a; ọ kwa g'igwe òphúú; yẹle eliphe òphúú, mu e-me a-nọ jasụwaruroya l'iphu mu; nokwa g'ẹpha unu; yẹle awa unu a-nọ.” Nokwa iphe, Chipfu eepfu. ²³ “Eeshije l'iphe, bụ Ọbo Ọnwa-òphúú jasụ l'iphe, bụkota ọnwa afufu ọzo; tẹme l'e shijekwaphọ l'iphe, bụ eswe-atụta-unme lanụ jasụ l'iphe, bụkota eswe-atụta-unme ọzo; mbụ lẹ nemadzụ l'ophu a-byajẹ bya abaarụ mu ẹja.” Nokwa iphe, Chipfu eepfu. ²⁴ “Ọzo bụ l'ẹphe alufuje je ahuma odzu ndu kwefuru mu ike. Ẹka ono bẹ ẹkà, a-nọdu ata phẹ nụ taa nwụhukwa anwụhu. Ọphu ọku, enwu iya nụ anyịhodu anyịhu. Ẹphe aburu iphe, ndiphe l'ophu a-nọdu akpọ-yiru ukuvu.”

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d